

O LeLiahona

Saunoaga o le Konafesi Aoao

Ua Fofogaina atu ni Suiga e
Faamalolosia ai le Autalavou

Na Viia e Peresitene Nelson
Faamanuiaga o le Malumalu,
Alofa mo Isi

Ua Fofogaina Mai Malumalu Fou e 8



**O Se Manatu Tonu
Lava Ia Te Oe (o le
Mesia), na saunia
e Elspeth Young**

*“I le saunua atu ai e uiga i le
Togiola a le Faaola, sa saunua
Peresitene Russell M. Nelson:*

*“E pei o mea uma, o Iesu
Keriso o lo tatou faataitaiga sili,
“o le na onosai i le satauro, ona
o le olioli sa tuu i ona luma”
[Eperu 12:2]. Mafausau i lena
mea! Ina ia mafai ona Ia ono-
saia aafiaga aupito i faigata e
lei onosaia muamua i le lalo-
lagi, na taulai atu ai lo tatou
Faaola i le olioli!” . . .*

*“E faapena foi, o le olioli ua
‘tuu i o tatou luma’ o le olioli
lea o le fesoasoani atu i le Faa-
ola i Lana galuega o le togiola.”*

Elder D. Todd Christofferson
o le Korama a Aposetolo e
Toasefululua, “O Le Olioli
o le Au Paia,” 17.



Sauniga o le Taeao o le Aso Toonai

- 6 **O Le Savali, o le Uiga, ma le Motu o Tagata**
Elder Jeffrey R. Holland
- 9 **O Soo Moni o le Faaola**
Elder Terence M. Vinson
- 12 **Ia Faatuatua, Ae Le o Le Lē Faatuatua**
Stephen W. Owen
- 15 **O Le Olioli o le Au Paia**
Elder D. Todd Christofferson
- 19 **Gafatia Faaleagaga**
Michelle Craig
- 22 **Tautinoga Mausali ia Iesu Keriso**
Elder Dale G. Renlund
- 26 **Faalagolago i le Alii**
Peresitene Dallin H. Oaks

Sauniga o le Afiati o le Aso Toonai

- 30 **Lagolagoina o le Au Pulega Aoao, Fitugafulu Eria, ma Taitai Aoao o le Ekalesia**
Peresitene Henry B. Eyring
- 31 **Mataala i le Tatalo e Le Aunoa**
Elder David A. Bednar
- 35 **Maua e ala i le Mana o le Tusi a Mamona**
Elder Rubén V. Alliaud
- 38 **O Molimau, Korama a le Perisitua Arona, ma Vasega a Tamaitai Talavou**
Peresitene Russell M. Nelson
- 40 **O Fetuunaiga e Faamalositia ai le Autalavou**
Elder Quentin L. Cook
- 44 **Sau, Mulimuli Mai ia te A'u o le Fuafuaga Mamao a le Alii e Faatoilalo ai le Fili**
Mark L. Pace
- 47 **Faalagolago Tumau ma Malosi**
Elder L. Todd Budge
- 50 **Pe a Mavae le Tofotofoina o lo Tatou Faatuatua**
Elder Jorge M. Alvarado
- 53 **Tumau ia Tatou Folafofaga ma Feagaiga**
Elder Ronald A. Rasband

Sauniga a Tamaitai

- 57 **I Mala i Manū, Iesu, Afio Mai!**
Reyna I. Aburto

Faamamaluina o Lona Suafa

- Lisa L. Harkness*
- 67 **Afafine Faapelepele**
Bonnie H. Cordon
- 70 **O Tamaitai o le Feagaiga i Faigapaaga ma le Atua**
Peresitene Henry B. Eyring
- 73 **O Poloaga Sili e Lua**
Peresitene Dallin H. Oaks
- 76 **O Oa Faaleagaga**
Peresitene Russell M. Nelson

Sauniga o le Taeao o le Aso Sa

- 80 **O Le I Ai i Feagaiga**
Elder Gerrit W. Gong
- 83 **Mauaina o le Olioli i le Faasoaina Atu o le Talalelei**
Cristina B. Franco
- 86 **O Lau Malaga Sili**
Elder Dieter F. Uchtdorf
- 90 **O Le Pa'i a le Faaola**
Elder Walter F. González
- 93 **Aua E Te Taufaaesese Mai Ia Te A'u**
Elder Gary E. Stevenson
- 96 **O Le Poloaga Lona Lua ma le Sili**
Peresitene Russell M. Nelson

Sauniga o le Afiati o le Aso Sa

- 100 **O Le Paia ma le Fuafuaga o le Fiafia**
Peresitene Henry B. Eyring
- 104 **Iloaina, Alofaina, ma le Tuputupu A'e**
Elder Hans T. Boom
- 106 **Tuu Atu i o Tatou Agaga e Pulea o Tatou Tino**
Peresitene M. Russell Ballard
- 110 **Mana e Faatoilalo ai le Fili**
Elder Peter M. Johnson
- 113 **Ave Lo Tatou Satauro**
Elder Ulisses Soares
- 116 **Fua**
Elder Neil L. Andersen
- 120 **Malelega Faaii**
Peresitene Russell M. Nelson
- 64 **O Au Pulega Aoao ma Taitai Aoao o le Ekalesia a Iesu Keriso o le Au Paia o Aso e Gata Ai**
- 123 **Talafou o le Ekalesia**
- 127 **Sau, Mulimuli Mai ia te A'u—Aoao Mai i Savali o le Konafesi Aoao**



O Le Konafesi Aoao Faaleafatausaga Lona 189

Taeao o le Aso Toonai, 5 Oketopa, 2019, Sauniga Aoao

Taitai: Peresitene Henry B. Eyring
Tatalo Amata: Elder Larry Y. Wilson
Tatalo Faaiu: Elder Steven R. Bangerter
O musika na saunia e le Aufaipese a le Tapeneko i le Lotoa o le Malumalu; Mack Wilberg ma Ryan Murphy, taitai pese; Andrew Unsworth, taokeni: “Ua Tafa Ata,” *Viiga*, nu. 1; “From All That Dwell below the Skies,” *Viiga*, nu. 90, arr. Wilberg; “A Ou Su’esu’e i Mau Paia,” *Viiga*, nu. 174, arr. Murphy; “Le Faavae Malosi,” *Viiga*, nu. 45; “Faatuatua,” *Tusipese a Tamaiti*, 50–51, arr. Elliott; “Ia Fiafia Tatou,” *Viiga*, nu. 3, arr. Wilberg.

Afiati o le Aso Toonai, 5 Oketopa, 2019, Sauniga Aoao

Taitai: Peresitene Dallin H. Oaks
Tatalo Amata: Elder Matthew L. Carpenter
Tatalo Faaiu: Elder Craig C. Christensen
O musika na saunia e se aufaipese tuu faatasi mai siteki i Provo, Iuta; Jim Kasen, taitai pese; Joseph Peeples, taokeni: “O Iesu Lo’u Sulu,” *Viiga*, nu. 49, arr. Kasen; “Le Atua Malie Lau Galuega,” *Viiga*, nu. 82, arr. Kasen; “Faaola o Isaraelu,” *Viiga*, nu. 5; “Thy Spirit, Lord, Has Stirred Our Souls,” *Viiga*, nu. 157, arr. Kasen.

Afiati o le Aso Toonai, 5 Oketopa, 2019, Sauniga a Tamaitai

Taitai: Joy D. Jones
Tatalo Amata: Salote Tukuafu
Tatalo Faaiu: Carol Costley
O musika na saunia e se aufaipese tuu faatasi a teineiti o le Peraimeri ma tamaitai talavou mai siteki o Jordan Sisifo, Iuta; Kasey Bradbury, taitai pese; Linda Margetts, taokeni: “Praise to the Lord, the Almighty,” *Viiga*, nu. 72, arr. Webb; “Ia Vi’ia Oe le Atua,” *Viiga*, nu. 10; “Ou Te Fia Vaai i le Malumalu,” *Tusipese a Tamaiti*, 99, arr. Mohlman; “Na Ia Auina Mai Lona Alo,” *Tusipese a Tamaiti*, 20–21, arr. DeFord.

Taeao o le Aso Sa, 6 Oketopa, 2019, Sauniga Aoao

Taitai: Peresitene Henry B. Eyring
Tatalo Amata: Elder O. Vincent Haleck
Tatalo Faaiu: Becky Craven
O musika na saunia e le Aufaipese a le Tape-neko i le Lotoa o le Malumalu; Mack Wilberg, taitai pese; Brian Mathias ma Richard Elliott,

taokeni: “Ma’eu le Atua e,” *Viiga*, nu. 53; “I Luga o Mauga,” *Viiga*, nu. 4, arr. Wilberg; “O Le Tatalo a le Tamaititi,” *Tusipese a Tamaiti*, 6–7, arr. Perry; “Aoao Mai ia Ou Ui i le Mala-malama,” *Viiga*, nu. 187; “Vaivai ‘Ea Fanau a Siona,” *Viiga*, nu. 159, arr. Lyon; “Love Divine, All Loves Excelling,” Wesley and Prichard, arr. Wilberg.

Afiati o le Aso Sa, 6 Oketopa, 2019, Sauniga Aoao

Taitai: Peresitene Dallin H. Oaks
Tatalo Amata: Elder Jack N. Gerard
Tatalo Faaiu: Douglas D. Holmes
O musika na saunia e le Aufaipese a le Tape-neko i le Lotoa o le Malumalu; Mack Wilberg ma Ryan Murphy, taitai pese; Richard Elliott, taokeni: “O Mai, Fanau a le Alii,” *Viiga*, nu. 24, arr. Murphy; “Ou Te Tu ma Ofo,” *Viiga*, nu. 107, arr. Murphy; “Faamalosia ia i le Galuega Nei,” *Viiga*, nu. 152; “Faapa’ia Mai Au,” *Viiga*, nu. 70, arr. Staheli.

E Maua Saunoaga o le Konafesi

Ina ia maua saunoaga o konafesi aoao i luga o le initoneti i le tele o gagana, asiasi i le conference.Church of Jesus Christ.org ma filifili se gagana. O loo maua foi lauga i luga o le polokalama feaveai o le Gospel Library. E masani lava i totonu o le ono vaiaso talu ona maea le konafesi aoao, e maua foi lipine faalogologo ma vitio faa-Peretania i faletusi autu. O loo maua faamatalaga e uiga i le konafesi aoao i mamau e mafai ona faaogaina e tagata o le ekalesia e i ai manaoga faapitoa i le disability. Church of Jesus Christ.org.

I Le Faavaa

Luma: Ata na pueina e Janae Bingham
I Tua: Ata na pueina e Welden Andersen

Puega o Ata o le Konafesi

O atapu’e i le Aai o Sate Leki na pueina e Welden Anderson, Cody Bell, Janae Bingham, Randy Collier, Weston Colton, Bruno Lima, Brian Nicholson, Leslie Nilsson, Matthew Reier, Christina Smith, ma Dave Ward.



NOVEMA 2019 VOL. 43 NU. 11
O LE LIAHONA 18611 890

O le mekasini faavaomalo o Le Ekalesia a Iesu Keriso o le Au Paia o Aso e Gata Ai

O Le Au Peresitene Sili: Russell M. Nelson, Dallin H. Oaks, Henry B. Eyring

O le Korama a Aposetolo e Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Faatonu: Randy D. Funk

Faufautua: Becky Craven, Cristina B. Franco, Sharon Eubank, Walter F. González, Larry S. Kacher, Adrián Ochoa, Michael T. Ringwood, Vern P. Stanfill

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonu: Adam C. Olson

Pule Faatonu Lagolago: Ryan Carr

Faasalalau Lagolago: Camilla Castrillón

Au Tususitua ma Faatonutonu: David Dickson, David A. Edwards, Matthew D. Flitton, Garrett H. Garff, Jon Ryan Jensen, Aaron Johnston, Charlotte Larcabal, Michael R. Morris, Eric B. Murdock, Joshua J. Perkey, Jan Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Faatonusili o Faatufugaga: Tadd R. Peterson

Mamanu: Jeanette Andrews, Fay P. Andrus, Mandy Bentley, C. Kimball Bott, Thomas Child, Joshua Dennis, David Green, Colleen Hinkley, Eric P. Johnsen, Susan Lofgren, Scott M. Mooy, Emily Chieko Remington, Mark W. Robison, K. Nicole Walkenhorst

Faatonu o le Puletaofia o Meatotino: Collette Nebeker Aune

Pule i le Gaosiga: Jane Ann Peters

Gaosiga: Ira Glen Adair, Julie Burdett, José Chavez, Thomas G. Cronin, Bryan W. Gygi, Ginny J. Nilson, Marriisa M. Smith

Tailolomi: Joshua Dennis, Armon Harris

Faatonusili Lomitusi: Steven T. Lewis

Faatonusili o Faletusi: Nelson Gonzalez

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le

liahona.lds.org: pe meli mai i le *Liahona*, flr. 23,

50 E. North Temple, Salt Lake City, UT

84150-0023, USA; po o le i-meli:

liahona@ChurchofJesusChrist.org.

O Le Liahona (o Iona uiga i le Tusi a Mamona o le "tapasa" po o se "faatonu" e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaoia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faaigofieina), Silovenia, Sipanioli, Suetena, Swahili, Tagaloka, Tahiti, Tai, Toga, Iukureini, Urutu, ma Viatenama. (E eseele lava gagana.)

© 2019 Puletaofia e le Intellectual Reserve, Inc. Ua taofia aia tatau uma. Lomia i le Lunaite Setete o Amerika.

Faamatalaga o le Puletaofia: Vagana ua faailoa mai, e mafai e tagata taitoatasi ona kopi anomea mai le *Liahona* mo lo latou lava faaagaina patino, e le faia ai ni pisinisi (e aofia ai valaauga o le Ekalesia). O lenei aia tatau e mafai ona faaleagaina i soo se taimi. E le tatau ona kopiina ia ata pe afai o loo faaalila le faasaina i le laina o faaaloolaga faatasi ai ma le faatufugaga. Ia auina mai fesili e uiga i le puletaofia i le Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ChurchofJesusChrist.org.

Mo le Aufaitau i le Lunaite Setete ma Kanata:

November 2019 Vol. 43 No. 11. LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (American Express, Discover, MasterCard, Visa) may be taken by phone or at store.ChurchofJesusChrist.org. (Canada Post Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Faailaga i le Faasologa Faaalafapeta

Aburto, Reyna I., 57
Alliaud, Rubén V., 35
Alvarado, Jorge M., 50
Andersen, Neil L., 116
Ballard, M. Russell, 106
Bednar, David A., 31
Boom, Hans T., 104
Budge, L. Todd, 47
Christofferson, D. Todd, 15
Cook, Quentin L., 40
Cordon, Bonnie H., 67
Craig, Michelle, 19
Eyring, Henry B., 30, 70, 100
Franco, Cristina B., 83
Gong, Gerrit W., 80
González, Walter F., 90
Harkness, Lisa L., 60
Holland, Jeffrey R., 6
Johnson, Peter M., 110
Nelson, Russell M., 38, 76, 96, 120
Oaks, Dallin H., 26, 73
Owen, Stephen W., 12
Pace, Mark L., 44
Rasband, Ronald A., 53
Renlund, Dale G., 22
Soares, Ulisses, 113
Stevenson, Gary E., 93
Uchtdorf, Dieter F., 86
Vinson, Terence M., 9

Faasino Autu

Agaga Paia, 19, 35
Aiga, 90, 106
Alii Talavou, 38, 40
Alofa, 73, 86, 104, 106, 110, 116
Amio Sa'o, 53
Ata o le faaolataga, 90, 100, 106, 116
Auauna atu, 15, 19, 60, 70, 86, 96
Auaunaga, 70, 96, 104
Autalavou, 12, 38, 40, 53, 120
Avea ma Soo, 9, 15, 19, 22, 60, 86, 96, 104, 113
Epikopo, 38, 40
Faaaumeaina, 12, 67
Faeeaga, 73
Faaiipoipoga, 73, 80
Faaleagaga, 12, 19, 44
Faalotovaivai, 110
Faamagaloga, 113
Faamalologa, 57, 90
Faamanatuga, 110
Faamanuiaga, 76, 90, 120
Faamoemoe, 47, 90
Faaosoosoga, 31, 93
Faataitaiga, 50
Faatuatua, 6, 12, 19, 22, 47, 50, 67, 76, 116
Faatuatuaina, 19, 26, 47
Faatulagaga o le Ekalesia, 40, 67
Faigata, 15, 47, 50, 57, 97, 100, 104, 113, 116
Fale, 12, 44
Feagaiga, 22, 53, 60, 76, 80, 83, 116
Fesoasoaniga alofa, 96
Fiafia, 100
Galuega faaifeautalai, 83, 86
Gasegase faalemafaufau, 57

Iesu Keriso, 6, 9, 15, 22, 26, 35, 44, 47, 53, 57, 60, 80, 83, 86, 90, 93, 100, 110, 113, 116
Iloatino, 76, 93
Iosefa Samita, 6, 93, 100, 104, 113, 120
Lalolagi o agaga, 26, 106
Liua, 15, 22, 35
Loto-pulea, 106, 113
Malamalama, 104
Malumalu, 26, 76, 120
Mana, 35, 76, 110
Mativa, 96
Muai olaga, 86, 106
Olioli, 9, 15, 47, 83, 96, 116
Paia, 100, 120
Perisitua, 76, 80
Perisitua Arona, 38, 40
Poloaiga, 15, 73, 93
Puipuiga, 31, 44
Salama, 73, 100, 104, 106, 113
Saogalemu, 31
Satani, 31, 44, 93, 110
Sauniga, 38, 80, 116
Sauniuniga, 31, 70
Suesue i tusitusiga paia, 44, 110
Taitaiga, 38, 40, 67
Tamaitai, 70, 73, 76
Tamaitai Talavou, 38, 40, 67
Tatalo, 19, 31, 104, 110
Taulaga anapogi, 96
Tautinoga, 9, 22
Tekinolosia, 12, 19, 40, 110
Tino faaletino, 31, 106
Toefuataiga, 120
Togiola, 9, 47, 60, 106, 116
Tulafono, 73
Tusi a Mamona, 35, 80, 83, 110
Uluai Faaaliga, 6, 104, 120
Usiuitai, 15, 73, 93



Mea na Faamamafa Mai mai le Konafesi Aoao Faaleafatausaga Lona 189

Na tuuina mai pea lava pea e taitai o le Ekalesia o e na saunoa mai i le taimi o le konafesi aoao le valaaulia ina ia—ia fiafia atili, ia paia atili, ia avea atili e pei o le Faaoa, ma ia fesoasoani i isi ia faia foi faapea.

O le mea e sili ai, na latou faia lena suiga e foliga e mafai lava e i tatou taitoatasi ona ausia.

“E finagalo le Alii i Ana fanau uma ia tofo i faamanuiaga e faavavau o loo maua i totonu o Lona malumalu,” o le aoao mai lea a Peresitene Russell M. Nelson. “. . . O le agavaa faaletagata lava ia e ulufale atu ai i le maota o le Alii e manaomia ai le tele o sauniuniga faaleagaga a le tagata lava ia. Ae faatasi ai ma le fesoasoaniga a le Alii, e leai se mea e faigata.”

Mauaina o le Fiafia ma le Paia

Ua valaaulia e Peresitene Nelson i tatou taitoatasi ina ia agavaa mo faamanuiaga o le malumalu (tagai i le itulau 120).

Sa faamalamalama mai e Peresitene Henry B. Eyring le sootaga i le va o le faateleina o le paia ma le faateleina o le fiafia (tagai i le itulau 100).

Sa aoao mai e Elder D. Todd Christofferson i tatou i le ala e maua ai “le olioli o le Au Paia” (tagai i le itulau 15).

O Se Valaaulia ia Alofa ma Faasoa Atu

Sa aoao mai e Peresitene Nelson le taua o le alofa atu i o tatou tuaoi ma auiliili mai aafiaga taua o le galuega fesoasoani agaalofa a le Ekalesia (tagai i le itulau 96).

Sa faamalamalama mai e Elder Dieter F. Uchtdorf le mana o le valaauliaina o isi e “o mai ina matamata” (tagai i le itulau 86).

Na faamatalaina e Sister Cristina B. Franco le olioli o le faasoaina atu o le talalelei (tagai i le itulau 83).

Faamalolosia o le Autalavou

Na fofogaina mai e le perofeta ni suiga i faalapopotoga a le autalavou lea o le a faamalolosia le autalavou i au peresitene o le korama ma au peresitene o vasega e tulai ae ma taitai (tagai i le itulau 38).

Na tuuina mai e Elder Quentin L. Cook le auala o le a faagaoioia ai le taitaiga o le Perisitua Arona (tagai i le itulau 40).

Na faasoa mai e Sister Bonnie H. Cordon ni suiga i le faalapopotoga a tamaitai talavou (tagai i le itulau 67).

Fausiaina o Malumalu; Fausiaina o i Tatou

Sa fofogaina mai e Peresitene Nelson ia malumalu fou e valu i le taimi o le sauniga a tamaitai (tagai i le itulau 76).

I le aoauli o le Aso Sa, sa ia aoao mai e uiga i le agavaa e ulu atu i le malumalu ma faalauiiloa mai ia fesili o pepa faataga o le malumalu ua faafouina (tagai i le itulau 120). ■





SAUNIA E ELDER JEFFREY R. HOLLAND
O Le Korama a Aposetolo e Toasefululua

O Le Savali, o le Uiga, ma le Motu o Tagata

I le vāvāō faifai pea ma le pa’ō o tagipalau o mea faalavefau o o tatou aso, tau ina ia tatou tauivi ia vaai atu ia Keriso i le totonugalemu o o tatou olaga, o lo tatou faatuatua, ma o la tatou auaunaga.

Uso e ma taufafine, o Sammy Ho Ching lea, e fitu masina le matua, o loo matamata i le konafesi aoao i lona aiga ia Aperila talu ai.

Ina ua latalata i le taimi e lagolago ai Peresitene Russell M. Nelson ma isi Pulega Aoao, sa pisi lava lima o Sammy i le uuina o lana fagu. Sa ia faia la le mea sili na sosoo ai.

Ua tuu mai e Sammy se uiga fou atoa i le manatu o le palota ma ou vae.

Susu maia i lenei konafesi faaleafatausaga a Le Ekalesia a Iesu Keriso o le Au Paia o Aso e Gata Ai. Ina ia seti le tulaga mo se talanoaga e faatatau i le uiga o nei faatasiga faalua i le tausaga, ou te manao tou te mafaufau i lenei vaai mai le tala a Luka i le Feagaiga Fou:¹

“Ua latalata [Iesu] i Ieriko, a ua nofo i le auala le tasi tauaso o faatoga i mea:

“... Ua faalogo o ia i [se] motu o tagata ua savavali ane, ona fesili lea o ia, pe se a lea.

“... Ua latou fai atu ia te ia, o Iesu le Nasareta ua maliu ane.

“Ona alaga mai ai lea o ia, ua faapea mai, Iesu e, le alo o Tavita, ia e alofa mai ia te au.”

O le faate’ia ai i lona lototoa, sa taumafai ai le motu o tagata e faafilemu o ia, ae “ua atili ai ona alaga [o ia],” na faapea mai. O se taunuuga o lona naunautaiga, sa aumai ai o ia ia Iesu, lea sa faafofoga atu i lana aioiga na tumu i le faatuatua mo le toefuataiina o lana vaai ma faamalolo ai o ia.²

E faagaetia lava a’u i lenei tamai aafiaga manino i taimi uma ou te faitauina ai. E mafai ona tatou lagonaina



O Sammy Ho Ching o loo lagolagoina Peresitene Russell M. Nelson i le taimi o le konafesi aoao ia Aperila 2019.

le mafatia o lea tagata. E toetoe lava a mafai ona tatou lagona atu o alaga o ia mo le gauaiga o le Faaola. Tatou te ‘ata’ata i lona musu e filemu—o le mea moni, o lona naunautaiga ia ki i *luga* le leotele a o ta’u atu e isi tagata uma ia te ia e kiki i *lalo*. I lea lava tala, o se tala matagofie o le faatuatua naunautai tele. Ae e pei o mau uma, o le tele o le tatou faitau i ai, o le tele foi lena ona tatou malamalama i ai.

O le manatu e tasi na taia ai a’u talu ai nei lava o le lagona lelei sa i ai i lenei tagata i le i ai o tagata loto ma’ale’ale faaleagaga na siomiaina o ia. O le taua atoa o lenei tala o loo faalagolago i sina vaega toalaiti o alii ma tamaitai lēmailoa o ē, ina ua fesiligia e a latou uo, “O le a le uiga o lenei vāvāō?” sa i ai le vaaiga mamao, pe afai e te mafaia, e faailoa atu Keriso o le mafuaaga mo le vāvāō; o Ia o le Uiga o le Vāvāō. O loo i ai se lesonea i lenei tamai talanoaga mo i tatou uma. I mataupu o le faatuatua ma le talitonuga maumaututu, e fesoasoani e tuu-sa’o atu lau fesili ia i latou o loo i ai tonu se faatuatua ma se talitonuga! “E mafai ea e le tauaso ona taitai le tauaso?” Sa fesili ai Iesu i se tasi taimi. “[Afai o lea] la te le pauu uma lava ea i le utu?”³

O le faamoemoega mo le auai ai i nei konafesi o le faateleina lea o le faatuatua ma le talitonuga maumaututu o tagata uma, ma e ala i le faatasi ma i matou i le asō, o le a e iloa ai o lenei sailiga o se taumafaiga e fefaasoa’i e tagata uma. Vaavaai solo. O iinei i nei eleele e te vaai ai i le eseele o le toatele o aiga e o mai mai itu uma. E matua fafia uo ua leva i le toe feiloai ai, o se aufaipese ofoofogia o loo faavevela, ma tagata tetee o loo alalaga mai i a latou lava mataupu masani. O faifeautalai mai se taimi ua leva o loo saili mo a latou soa sa i ai muamua, a o saili ai e faifeautalai faato’a foi mai le misi-ona ni a latou soa *fou* (pe afai tou te

silafia le uiga o la'u tala!). Ma atapue? Le lagi e, fesoasoani mai! Faatasi ma telefoni i tagata uma, ua suia ai lo tatou faamoemoega mai le “o tagata uma o se faifeautalai” i le “o tagata uma o se pueata.” I le lotolotoi ai o mea uma o lenei vāvāo fiafia, e mafai ona fesili tonu ai se tasi, “O le a le uiga o ia mea uma?”

E pei ona i ai i le tatou tala i le Fea-gaiga Fou, o i latou ua faamanuiaina i le vaai o le a iloina, e ui i isi mea uma e mafai ona ofa mai ia i tatou e tu masani o lenei konafesi, ae o le a itiiti pe leai foi se uiga se'i vagana ua tatou maua Iesu i le totonugalemu o ia mea uma. Ina ia pu'e le vaaiga mamao o loo tatou sailia, o le faamalologa ua Ia folafola mai, o le tulaga taua ua tatou iloa o loo i ai iinei, e le tatau ai ona faalavelave le vāvāo ia i tatou—i le olioli e tatau ai—ma tāmāu lo tatou taulaiga ia te Ia. O le tatalo a failauga uma, o le faamoemoe o e uma e vivii, o le migao o malo faaaloologia uma—ua tuuto atu uma i le valaauliaina o le Agaga o Ia o le ana lenei Ekalesia—le Keriso soifua, le Tamai Mamoe a le Atua, le Aloalii o le Filemu.

Ae tatou te le tau i ai i totonu o se maota autu mo konafesi ina ia maua ai o Ia. A faitau e se tamaitiiti le Tusi a Mamona mo le taimi muamua ma matua fiafia i le lototele o Apinati po o le savali a le autau talavou e 2,000, e mafai ona tatou faapoopo lemu i ai e faapea o Iesu o le taulaiga autu lea i lenei tusi ofoofogia, o loo tu o se faatosinaga mai itulau uma o le tusi ma tuuina mai le sootaga i isi tagata faatupu faatuatua o loo i ai.

E faapena foi, pe a aoao se uo e uiga i lo tatou faatuatua, atonu e fai si ona lofituina i nisi o elemene tulagaese ma vaogagana e le masani ai o a tatou faatinoga faalelotu—o tapulaa i meaai, sapalai o le ola-tutoatasi, alasopo a paionia, gafa faaeletonika o aiga, ma le anoanoai o nofoaga autu o siteki



lea e ono faamoemoe moni nisi o loo maua ai ni sirloin steak, ona o le tutusa ma le ta'uga o le upu (stake) siteki. O lea la, a o tofo ai a tatou uo fou i le anoanoai o vaaiga ma leo fou, e tatau ona tatou faasino atu ma fesoasoani ia latou malamalama i le uiga ma le faamoemoega o mea uma, i le fatu ola o le talalelei e faavavau—le alofa o Matua Faalelagi, le meaalofa togiola a se Alo paia, le taitaiga mafanafana a le Agaga Paia, le toefuataiga i aso e gata ai o nei upumoni uma ma isi mea e tele.

A alu se tasi i le malumalu paia mo le taimi muamua, atonu e ono faateia o ia i lenei aafiaga. O la tatou galuega o le faamautinoa lea o faatusa paia ma sauniga ua faaalua, o laei o sauniga ma aoaoga i ata, ia le faalavelave ae ia faasino atu le tagata i le Faaola, o le ua tatou i ai iina e tapuai i ai. O le malumalu o Lona maota lea, ma e tatau ona ave a o Ia ma taulaiga silisili i o tatou

mafaufau ma loto—le mamalu o le mataupu faavae a Keriso ua faatumulia ai o tatou tagata atoa e pei ona faatumulia ai sauniga o le malumalu—mai le taimi tatou te faitau ai i faaupuga ua vane i luga o le faitotoa ulufale e oo atu i le taimi mulimuli tatou te faaaluina i totonu o le maota. I le lotolotoi ai o le maofa uma tatou te ofo ai, e ao ona tatou vaai, i luga atu o mea uma, i le uiga o Iesu i totonu o le malumalu.

Mafaufau i le tele naua o ta'imuaga lototele ma faasilasilaga fou i le Ekalesia i nei masina ua te'a. Pe a tatou auauna atu i le tasi ma le isi, pe faaleleia lo tatou aafiaga o le Sapati, pe talia se polokalama fou mo tamaiti ma le autalavou, o le a tatou misia le mafuaaga moni mo nei fetuunaiga faafaaaliga pe afai tatou te vaai i na mea o ni elemene tuueseese, e le fesootei nai lo se taumafaiga fesootai faatasi e fesoasoani ia i tatou ia atiae atili mausali i luga o le Papa o lo tatou Olataga.⁴ O le mea moni, e moni o le mea lenei na faamoemoe ai Peresitene Russell M. Nelson i lo tatou faaaoaga o le igoa ua faaalua o le Ekalesia.⁵ Afai o Iesu—Lona suafa, Lana aoaoga faavae, Lana faataitaiga, Lona paia—e mafai ona i ai i le totonugalemu o la tatou tapuaiga, o le a tatou faamalositia le upumoni sili sa aoao mai e Alema: “E tele mea o le a oo mai; [ae] faauta, e i ai se mea e tasi ua sili atu ona taua nai lo ia mea uma— . . . o le a soifua ma afio mai ai le Togiola i totonu o ona tagata.”⁶

O se manatu faaii e tasi: O le siosiomaga na i ai Iosefa Samita i le amataga o le seneturi lona 19 sa sasao faaafi ai fefinauaiga a tagata i a latou molimau i le FaaKerisiano.⁷ Ae i le vāvāo na latou faia, sa punitia ma le le iloina e nei failotu naunautai le Faaola tonu sa sailia ma le naunautai e le taulealea o Iosefa. I le tauivi ai ma le mea sa ia ta'ua o le “pogisa ma le fenumiai,”⁸ sa ia alu atu ai i le filemu o se togavao lea sa ia vaai



atu faatasi ma le toalua ia ma le anoanoai o isi i le gasologa o taimi e faapea, e moni lava o le vaaiga ma le leo sili ona faagaetiaina o le olaga e faapea, o Iesu e le gata ina malie ane¹⁰ ae e afio mai o Ia ia i tatou, tu i o tatou *talaane*, ma faia Lona apitaga *faatasi* ma i tatou.¹¹

Tuafafine ma Uso e, i le vāvāō faifai pea ma le pa’ō o tagipalau o mea faalavefau o o tatou aso, tau ina ia tatou tauivi ia vaai atu ia Keriso i le totonugalemu o o tatou olaga, o lo tatou faatuatua, ma la tatou auaunaga. O iina tonu o loo taoto ai le uiga moni. Ma afai e i ai ni aso e tapulaa ai la tatou vaai, pe faaitiitia ai foi lo tatou talitonuga, pe tofotofoina ma toefaalecia lo tatou faatuatua—aua e mautinoa lava o le a faapena ona faia—ona tau ina ia tatou alalaga leotetele atu, “Iesu e, le alo o Tavita, ia e alofa mai ia te au.”¹² Ou te folafola atu i le naunautaiga faaaposetolo ma le talitonuga maumaututu faaperofeta o le a Ia faafogaina oe ma o le a fetalai mai, pe vave pe tuai, “Inā vaai ia ou mata, o lou faatuatua ua e ola ai.”¹³ Susu maia ma tala aao mai i le konafesi aoao. I le suafa o Iesu Keriso, amene. ■

FAAMATALAGA

1. Atonu o lenei vaega e tutusa pe le tutusa foi ma le vaega o loo tusia i le Mataio 20:30–34, lea e toalua ia tauaso na tali atu, pe o le isi o loo tusia i le Mareko 10:46–52, lea sa iloa ai le tauaso o Patimaio le atalii o Timaio.
2. Tagai i le Luka 18:35–43; faapoopo le faamamafa.
3. Luka 6:39.
4. Tagai i le 2 Nifae 9:45.
5. Tagai ia Russell M. Nelson, “O Le Igoa Sa’o o le Ekalesia,” *Liahona*, Nov. 2018, 87–89.
6. Alema 7:7.
7. O le itulagi i le setete o Niu Ioka e latalata i Palamaira sa tele ina faasino i ai o le “burned-over district” ona o le vāvāō tau tupuaiga lea sa salalau solo i na tama’i nuu laiti.
8. Iosefa Samita—Talafaasolopito 1:13.
9. Iosefa Samita—Talafaasolopito 1:17.
10. Tagai i le Luka 18:37.
11. Tagai i le Ioane 14:23.
12. Mareko 10:47.
13. Luka 18:42.

ma faalogo ai i se molimau sili atu ona mamalu e uiga i le totonugalemu o le Faaola i le talalelei nai lo soo se isi molimau ua tatou ta’ua iinei i lenei taeao. Faatasi ai ma se meaaloa o le vaai sa lei mafaufauina ma lei faamoemoeina, sa vaai ai Iosefa i le faaaliga i lona Tama Faalelagi, le Atua silisiliese o le atulaulau, ma Iesu Keriso, Lona Alo atoatoa e Toatasi na Fanaua. Ona faia lea e le Tama le faaitaiga ua tatou talanoaina i lenei taeao: sa tusi atu o Ia ia Iesu, ma fetalai mai: “O Lo’u Atalii Pele Lenei. Faalogo ia te Ia!”⁹ E leai se faailoaga sili atu o le faasinomaga paia o Iesu, Lona silisiliese i le ata o le faaolataga, ma Lona tulaga i le silafaga a le Atua

e mafai ona sili atu nai lo lenei tautinoga e iva-upu.

O le vāvāō ma le fenuniaiga? Motu o tagata ma fefinauiga? E anoanoai na mea uma i lo tatou lalolagi. O le mea moni, o loo finau ai pea ē masalosalo ma ē faatuatua e uiga i lenei faaaliga ma le toetoe o isi mea uma na ou talanoa ai i lenei aso. Ina ne’i e ono tauivi e vaai manino atili ma ia maua le uiga i le lotolotoi o le anoano o manatu, ou te faasino atu oe i lenei lava Iesu e tasi ma tuu atu se molimau faaaposetolo e uiga i le aafiaga o Iosefa Samita, na oo mai pe tusa o le 1,800 tausaga i le mavae ai ona toe pupula o le tatou uo tauaso i le Auala anamua i Ieriko. Ou te molimau



SAUNIA E ELDER TERENCE M. VINSON
O Le Au Peresitene o Fitugafulu

O Soo Moni o le Faaola

*E mafai ona tatou lagonaina le olioli tumau
pe a avea lo tatou Faaola ma Lana talalelei ma
auivi lea tatou te atiae ai i luga o tatou olaga.*

O se mea o loo natia i le tusi o Hakai i le Feagaiga Tuai o se faamatalaga o se vaega o tagata sa ono faaagaina le fautuaga a Elder Holland. Sa latou sese i le le tuuina o Keriso i le totonugalemu o o latou olaga ma la latou auunaga. Ua vali e Hakai ni nai ata faalemafau-fau faatupu-manatu ina ua ia lapataia nei nuu i le nofonofo i le mafanafana o o latou fale nai lo le fausiaina o le malumalu o le Alii:

“O ona po nei ea tou te nonofo ai i o outou fale ua tāpapa, a o lenei fale ua faatafunaina?”

“O lenei, o loo faapea ona fetalai mai ai o Ieova o ‘au; Ia outou mafaufau i o outou ala.

“Ua outou totō mea e tele, a e itiiti mea ua outou au mai ai; ua outou aai, a e lei maoona ai outou; ua outou feinu, a e lei malilie ai outou; ua outou oofu, a e lei mafanafana ai outou; o le ua galue foi i se tau, e fai lana tau e fafao i le taga ua pūpū solo.

“O loo faapea ona fetalai mai o Ieova o ‘au; Ia outou mafaufau i o outou ala.”¹

Tou te le fialia ea i na faamatalaga o le lē aoga o le faamuamua o le mea e leai se taunuuga e faavavau e sili atu i mea a le Atua?

I se sauniga faamanatuga talu ai nei sa ou auai, sa ta’ua ai e se faifeautalai ua

foi mai le misiona se tama na aoteleina atoatoa lenei manatu ina ua ia fai atu i lana fanau, “O le mea lea tatou te manaomia iinei o le faaitiitia o le Wi-Fi ae faatele Nifae!”

I le nofo ai i Aferika i Sisifo mo le lima tausaga, sa ou vaai ai i le tele o faataitaiga o tagata na meafua lava le



faamuamua o le talalelei e aunoa ma le maasiasi. O se tasi o faataitaiga faapena o le igoa o se pisinisi fale fai pa’u ma le faapaleniina o uili o taavale i Kana. Sa faaigoaina e le pule i le “Thy Will Alignment (Ia Faaogatusa ma Lou Finagalo).”

E mafai ona tatou lagonaina le olioli tumau² pe a avea lo tatou Faaola ma Lana talalelei ma auivi lea tatou te atiae ai i luga o tatou olaga. Peitai, e matua faigofie lava ona avea lenei auivi ma mea o le lalolagi, lea e taatia ai le talalelei ua na o se mea e tuu i le faitalia pe tau na ona auai i le lotu mo le lua itula i Aso Sa. A oo i le tulaga lenei, ua tutusa lava ma le tuu o o tatou tau i “se taga ua pūpū solo.”

O loo ta’u mai e Hakai ia i tatou ina ia tuuto atu—ina ia, e pei ona matou ta’ua i Ausetalia, “fair dinkum” [faamaoni] i le ola i le talalelei. O tagata e fair dinkum (pe faamaoni) pe a avea i latou ma tagata latou te fai mai e avea ai i latou.

Sa ou aoao teisi e uiga i le fair dinkum (faamaoni) ma tuu atu le mea sili ou te mafaia i le taalo lakapi. Sa ou aoao a ou taalo i lo’u malosi tele, pe a tuu atu mea uma o ia te a’u, sa matua maoae lo’u olioli i le taaloga.

O le tausaga na sili ona ou fialia ai i le lakapi o le tausaga ina ua uma le aoga mauualuga. O le au sa ou i ai sa talenia uma ma tuuto. O matou le au siamupini i lenei tausaga. Peitai, i le tasi aso sa matou taaalo ai ma se au e le lelei tele, ma i le mae’a o le taaloga sa tofu i matou uma ma se tamaitai e ave i le siva tele faaletausaga a le kolisi. Sa ou mafaufau ona o se taaloga faigofie lenei, e tataua ona ou taumafai e puipui a’u lava mai manuaga ina ia mafai ai ona ou olioli atoa i le siva. I lenei taaloga, sa matou le’i tuuto tele i fetiaiga malolosi sa tataua ona matou faia, ma sa matou faia. O le mea sili ona leaga, sa i’u le

taaloga i le fula tele o lo'u laugutu lea sa le manaia ai o'u foliga vaaia mo la'u tafaoga faamasani. Masalo sa manao-mia ona ou aoaoina se mea.

Sa tupu se aafiaga ese tele i se taaloga na mulimuli ane lea sa ou matua tuuto i ai. I se tasi taimi sa ou tamoe ai ma le naunautai moni i se tagata na ma fetoi; sa vave ona ou lagonaina se tiga i o'u foliga. I le aoaoina ai e lo'u tama e le tatau lava ona ou faailoa atu i le isi au o loo o'u manua, sa ou faaauau ai ona taalo i le taaloga. I lena po, a o taumafai e ai, sa ou iloa ai ua le mafai ona ū se meaai. O le taeao na sosoo ai, sa ou alu ai i le falemai, lea sa faamautu mai ai e le Faaata ua gau lo'u auvae. Sa uaea mau lo'u gutu mo le isi ono vaiaso na sosoo ai.

Sa aoaoina ni lesonea mai lenei faataoto o le laugutu fula ma le auvae gau. E ui i o'u manatuaga o le fiaai lē faamalieina mo meaai malō i le ono vaiaso lea sa na o vai na mafai ona inuina, ae ou te le'i faanoanoa i lo'u auvae gau ona o se taunuuga lea o le tuu atu o a'u mea uma. Ae e i ai lava lo'u faanoanoaga i le laugutu fula ona o se faatusa lea o lo'u taofiofi.

O le tuu atu o a tatou mea uma e le faapea o le a solo mai ai pea faamanuiaga po o le faamanuiaina i taimi uma. Ae o lona uiga o le a tatou maua

le olioli. O le olioli e le o le faamalieina puupuu, po o se fiafiaga lē tumau. O le olioli e tumau, ma o loo maua i a tatou taumafaiga ua taliaina e le Alii.³

O se faataitaiga o se taliaina faapena, o le tala ia Oliva Kurena. E pei ona ta'ua e Peresitene Boyd K. Packer: "Ina ua tutulieseina le Au Paia mai Katelani, . . . sa tuua Oliva e faatauina atu a latou meatotino po o le a lava sina mea na te mafai [ona maua ai]. Sa le tele se avanoa e mafai ai ona faamanuiaina o ia. Ma, e moni lava, e lei manuia ana taumafaiga!"⁴ Sa poloaiina o ia e le Au Peresitene Sili e fai se galuega sa faigata, pe a le faigata. Ae sa faamalo atu le Alii ia te ia mo ana taumafaiga lē faamanuiaina sa manino lava i nei upu:

"Ou te manatua la'u auauna o Oliva Kurena; faauta, e moni Ou te fai atu ia te ia o le a manatua i le paia lona igoa mai lea tupulaga i lea tupulaga, e faavavau faavavau lava, ua fetalai mai ai le Alii.

"O lea, ia tuu atu ia te ia e finafinau faamaoni mo le laveaiina o le Au Peresitene Sili o la'u Ekalesia, . . . ma a pa'ū o ia o le a toe tulai mai o ia, ona o le a sili atu le paia o lona taulaga ia te a'u nai lo ona faatelega, ua fetalai mai ai le Alii."⁵

Atonu e moni lena mea mo i tatou uma—e le o o tatou tulaga manuia, ae o a tatou taulaga ma taumafaiga, e taua i le Alii.



O Terence M. Vinson, o loo tu o se tagata lona fa mai le agavale, i le avea ai ma se tasi o lana au lakapi a le aoga maua luga

O le isi faataitaiga o se soo moni o Iesu Keriso o se uo pele ia i ma'ua i Côte d'Ivoire i Aferika i Sisifo. O lenei tuafafine lelei ma faatuatua na mafatia i sauaga faalelagona, ma oo lava i ni sauga faaletino mai lana tane i se vai-taimi faaumiumi, ma i'u ai ina la tete'a. Sa le'i femoumoua'i lava o ia i lona faatuatua ma le lelei, ae ona o le leaga o lana tane ia te ia, sa matuitui ona tiga mo se taimi umi. I ana lava upu, na ia faamatala ai le mea na tupu:

"E ui na ou fai atu ua ou faamagaloina o ia, ae ou te moe pea ma se manu'a; e faaalu o'u aso ma lena manu'a. Sa pei o se mu i lo'u loto. E tele taimi sa ou tatalo ai i le Alii e aveese atu mai ia te a'u, ae sa matuā tiga lea sa ou talitonu malosi ai o le a ou ola i lo'u olaga atoa ma lea mea. E sili atu le tiga nai lo le taimi na oti ai lo'u tina a o ou talavou lava; e sili atu le tiga nai lo le taimi na oti ai lo'u tama, e oo lava i lo'u atalii. Sa foliga mai e sosolo pea ma lilo-fia ai lo'u loto, ma ou maua ai le lagona o le a ou oti i soo se taimi lava.

"O nisi taimi ou te fesiligia ai a'u lava po o le a se mea e ono faia e le Faaola i lo'u tulaga, ma e sili ai lo'u faapea atu, 'Ua mamafatu lenei mea, le Alii e.'

"Ona oo lea i se tasi taeao sa ou saili ai mo le tiga lea e sau mai nei mea uma i lo'u loto ma sa ou saili loloto, mo lea tiga i lo'u agaga. Sa lei toe lagonaina lea tiga. Sa vave ona ou mafaufau i mafuaaga uma sa [ao] ona ou lagona ai le tiga, ae sa ou le lagonaina le tiga. Sa ou faatalitali i le aso atoa e vaai pe o le a ou lagonaina le tiga i lo'u loto; sa ou le'i lagonaina. Ona ou tootuli lea i lalo ma faafetai atu i le Atua mo le faia o le taulaga togiola a le Alii lea ua aoga mo a'u."⁶

O lenei tuafafine ua faamau atu nei ma le fiafia i se alii lelei ma faatuatua e alofa tele ia te ia.

O a la o tatou uiga e tatau ona i ai pe afai o i tatou o soo moni o Keriso?



i le talalelei? Aua o le faalotolotolua e le o le faamaoni lea (fair dinkum)! Ma e le viia e le Atua i latou e le tuuto atoa o latou loto.⁹

E leai ma se oa, po o soo se mea faafiafia, po o soo se tulaga, po o soo se ala o faasalalauga faaagafesootai, po o soo se taaloga vitio, po o soo se taaloga, po o soo se fegalegaleaiga ma se tagata lauiloa, po o soo se mea i le lalolagi e sili atu ona taua nai lo le ola e faavavau. O le apoapoaiga la a le Alii i tagata uma o le, “mafaufau i o outou ala.”

O ou lagona ua sili ona faailoa atu i upu a Nifae: “Ou te olioli i le manino; ou te olioli i le upumoni; ou te olioli i lo’u Iesu, ona ua togiola e ia lo’u agaga mai seoli.”¹⁰

O i tatou ea o ni soo moni o Ia o lē na foai maia Ana mea uma mo i tatou? O Ia o lo tatou Togiola ma lo tatou Fautua i le Tama? O Ia o Le sa tuuto a’ia’i o Ia lava i Lana taulaga togiola ma o loo tuuto atoa foi nei i Lona alofa, Lona alofa mutimutivale, ma Lona finagalo mo i tatou ia maua le olioli e faavavau? Ou te augani atu i tagata uma e faalogo ma faitau i nei upu: Faamolemole, faamolemole aua ne’i aveesea lo outou tuuto atoa seia oo ina e tau atu i ai i se taimi e le tupu i le lumanai. Ia faamaoni (fair dinkum) i le taimi nei ma lagona le olioli! I le suafa o Iesu Keriso, amene. ■

FAAMATALAGA

1. Hakai 1:4–7.
2. Tagai i le Ioane 15:11; Roma 14:17; 2 Korinito 8:2; Eperu 12:2; Mose 5:10, 7:53.
3. Tagai i le Enosa 1:3–6, 27; Mataupu Faavae ma Feagaiga 52:15; 97:8–9.
4. Boyd K. Packer, “O E Aupito Itiiti o Ou Uso Nei,” *Liahona*, Nov. 2004, 86.
5. Mataupu Faavae ma Feagaiga 117:12–13.
6. Tusitusiga patino.
7. Alema 20:23.
8. Alema 22:15.
9. Tagai i le Faaliga 3:15–16.
10. 2 Nifae 33:6.

Ma o le a le taua o le talalelei ia i tatou pe a tatou “mafaufau [i o tatou] ala,” e pei ona fautua mai Hakai?

Ou te fiafia i le faataitaiga o le amio sa’o na faaalua e le tama o le Tupu o Lamona. Tou te manatua lona muai ita i le iloaia sa faafeao atu lona atalii e Amona, o se sa Nifae—o se nuu e ita i ai sa Lamanā. Sa ia se’iina lana pelu e tau ai ma Amona ma e lei pine ae tu le pelu a Amona i lona faa’i. “O lenei o le tupu, i le fefe nei aveeseina lona ola, ua fai mai: Afai e te faasaoina au, o le a ou tuu atu ia te oe soo se mea e te fai mai ai, e oo lava i le afa o le malo.”⁷

Matau mai lana ofa—afa o lona malo mo lona ola.

Ae mulimuli ane, i le mavae ai ona malamalama i le talalelei, sa ia faia se isi

ofa. “Sa fai mai le tupu: O le a se mea ou te faia ina ia mafai ona ou maua o lenei ola faavavau ua e tautala i ai? Ioe, o le a se mea ou te faia ina ia mafai ai ona fanauina o au i la le Atua, ina ia seia ese ai i fafo lenei agaga leaga mai lo’u fatafata, ma ou maua ai lona Agaga, ina ia mafai ona faatumuina o au i le olioli, ina ia le mafai ona lafoaia ese o au i le aso gataaga? Faaui, ua fai mai o ia, o le a ou tuu atu mea uma ua ou maua, ioe, o le a ou lafoaia i lou malo, ina ia mafai ona ou maua lenei olioli tele.”⁸

O le taimi lea, sa ia saunia ai e lafoaia atoa lona malo, ona sa sili atu le taua o le talalelei nai lo mea uma na ia te ia! Sa faamaoni (fair dinkum) o ia i le talalelei.

O le fesili la mo i tatou taitoatasi o le, o tatou faamaoni ea (fair dinkum)



SAUNIA E STEPHEN W. OWEN
Peresitene Aoao o Alii Talavou

Ia Faatuatua, Ae Le o Le Lē Faatuatua

*O lona uiga e tatau ona tatou faaalu moni
se taimi i aso taitasi e motusia ai mai le
lalolagi ae fesootai atu i le lagi.*

E lei mamao atu nei na ou ala ai i luga ma sauni e suesue i tusitusiga paia. Na ou pikiina i luga la'u telefoni ma nofo i se nofoa i autafa o lo'u moega, ma le faamoemoe e tatala le polokalama o le Gospel Library. Sa ou tatalaina la'u telefoni ma a o tau amata suesuega ae ou vaaia loa ni faasilasilaga se ono mo feau tusitusia ma imeli na oo mai i le po. Sa ou manatu, "O le a ou vave

siakiina na feau ona ou alu lea i tusitusiga paia." Ia, e lua itula mulimuli ane o loo ou faitauina pea na feau tusitusia, imeli, talafou pupuu, ma savali o ala o faasalalau faaagafesootai. Ina ua ou iloa le taimi ua i ai, sa ou faanatinati atu e sauni mo le aso. O lena taeao sa ou misia ai a'u suesuega faatusitusiga paia, ma o se taunuuga ou te lei mauaina se meaai faaleagaga sa ou faamoemoe i ai.



Fafagaina Faaleagaga

Ou te mautinoa e toatele outou e i ai ni aafiaga faapea. Ua faamanuiaina i tatou e tekinolosi faaonapo nei i le tele o auala. E mafai ona latou faafesootaia i tatou i uo ma aiga, ma faamatalaga, ma talafou e uiga i mea o tutupu i le taimi nei i le lalolagi atoa. Ae, e mafai foi ona aveesea e ia mea i tatou mai fesootaiga sili ona taua: lo tatou fesootaiga ma le lagi.

Ou te toe ta'ua le saunoaga a lo tatou perofeta, o Peresitene Russell M. Nelson: "Ua tatou ola i se lalolagi ua matua faigata ma faateteleina le fefinauai. O le maua pea o ala faasalalau faaagafesootai ma se taamilosaga 24 itula o talafou ua lofituina ai i tatou i savali e le muta. Afai e ao ona tatou maua se faamoemoe o le suesueina o le tele o manatu ma filosofia a tagata ia e osofaia le upumoni, e tatau ona tatou aoao e maua ia faaaliga."

Na faaauau pea Peresitene Nelson i le lapatai mai faapea, "i aso a sau, o le a lē mafai ona ola ai faaleagaga e aunoa ma le taiala, taitaiga, faamafanafanaga, ma le faatosinaga faifai pea a le Agaga Paia."¹

I tausaga ua mavae, na faamatala ai e Peresitene Boyd K. Packer e uiga i se lafu tia lea, ona o le matua tetele o le kiona, na saisaitia ai i fafo atu o apitaga masani ma feagai ai ma le fiaaai. I se taumafaiga a nisi o tagata lelei e faasao ia tia, na faasalalau ai ni uta o vaomago faataamilo i lea nofoaga—e le o le mea lea e masani ona aai ai tia, ae sa latou faamoemoe o le a faasaoina ai tia i le taumalulu. O le mea e faanoanoa ai, na maua mulimuli ane le tele o tia ua mamate. Sa latou 'aina le vaomago, ae sa lei fafagaina ai i latou, sa latou matelaina ma mamate ma o latou manava tutumu.²

O le tele o savali o loo lofituina ai i tatou i le vaitau o faamatalaga o se tulaga talitutusa faaleagaga i le fafagina o tia i vaomago—e mafai ona tatou



aai i le aso atoa, ae e le o fafagaina ai i tatou.

O fea tatou te maua ai le fafagaina moni faaleagaga? O le tele lava, e le o le lauiloa i luga o ala o faasalalauga faaagafesootai. Tatou te mauaina pe a tatou “fetaomi atu i luma” i luga o le ala o feagaiga, “ma piimau pea i le ai uamea,” ma aai i le fua o le laau o le ola.³ O lona uiga e tataua ona tatou faaalu moni se taimi i aso taitasi e motusia ai mai le lalolagi ae fesootai atu i le lagi.

I lana miti, na vaai ai Liae i tagata o e na ‘aai i le fua ona latou lafoai lea ona o le faatosinaga a le fale tele ma le ateatea, o le faamaualuga o le lalolagi.⁴ E mafai ona tausi ae tagata talavou i totonu o se aiga a le Au Paia o Aso e Gata Ai, auai i sauniga ma vasega sa’o uma o le Ekalesia, e oo lava i le auai i sauniga i le

malumalu, ona savavali ese lea ma o atu “i ala faasaina ma leiloloa [ai].”⁵ Aisea e tupu ai lea mea? I le tele o tulaga e mafua ona, atonu sa na ona latou faia o ni faatinoga faaleagaga i fafo, ae sa le’i liua moni lava totonu o o latou loto. Sa latou aai ae sa lei fafagaina i latou.

I se faatusatusaga, ua ou feiloai i le toatele o outou talavou o le Au Paia o Aso e Gata Ai o e atamamai, malolosi, ma faamaoni. Ua outou iloa o outou o atalii ma afafine o le Atua ma e i ai Sana galuega mo oe e fai. Tou te alolofa atu i le Atua ma o outou “loto atoa, mafaufau atoa, manatu atoa, ma le malosi atoa.”⁶ Tou te tausia a outou feagaiga ma auauna atu i isi, e amata atu i le aiga. Tou te faatinoina le faatuatua, salamo, ma faaleleia i aso taitasi, ma aumaia ai e lenei mea ia te

outou le olioli tumau. O loo outou sauniuni mo faamanuiaga o le malumalu ma isi avanoa o le a outou mauaina o ni soo moni o le Faaola. Ma o loo outou fesoasoani e saunia le lalolagi mo le Toe Afio Mai Faalua, valaaulia isi ia o mai ia Keriso ma maua faamanuiaga o Lana Togiola. O loo outou fesootai ma le lagi.

Ioe, tou te fetaiai ma luitau. Ae e faapena foi augatupulaga uma. O aso nei o tatou, ma e manaomia ona tatou faatuatua, ae le o le faatuatua. Ou te molimau atu ua silafia e le Alii o tatou luitau, ma e ala mai i le taitaiga a Peresitene Nelson, o loo Ia saunia ai i tatou e fetaiai ma [na luitau]. Ou te talitonu o le valaau talu ai nei a le perofeta mo se ekalesia e faatotonugalemu-i-le-aiga, ma lagolagoina e mea tatou te faia i totonu o o tatou falelotu,⁷ ua mamanuina e fesoasoani ia i tatou ia faasaina le ola—e oo lava i le tupuolaola—i nei aso o le matelaina faaleagaga.

Faatotonugalemu i le Aiga

O le a le uiga o le avea ma se ekalesia e faatotonugalemu-i-le-aiga? E mafai ona eseese foliga o aiga i le salafa o le lalolagi. Atonu e te sau mai se aiga lea na auai i le Ekalesia mo le tele o augatupulaga. Pe ua na o oe foi le tagata o le Ekalesia i lou aiga. Atonu ua e faaipoipo pe nofofua, i ai pe leai foi se fanau i le fale.

E ui lava i o outou tulaga, e mafai lava ona e faia lou aiga ma nofoaga autu o le aoaoina ma le ola ai i le talalelei. O lona uiga o le tauaveina o le tiutetauave patino mo lou liua ma le tuputupu ae faaleagaga. O lona uiga o le mulimuli i le fautuaga a Peresitene Nelson “ina ia [toe faafou lou] fale i se malutaga o le faatuatua.”⁸

O le a taumafai le fili e faatosina ia te oe e faapea e le manaomia le fafagaina faaleagaga, po o le taufaasese atili, faapea e mafai ona faatali. O ia o le sifi o mea



faalavefau ma le pogai o le faatuutuu. O le a Ia aumaia ni mea i lou taulaiga ia e foliga e faananati ae, o le mea moni, e le taua. Na te faia oe ina ia matua “pupu [lou loto] i mea e tele” ma lē amanaia ai le “mea e tasi e ao ina ia maua.”⁹

E maeu lou faafetai mo o’u “matua lelei,”¹⁰ o e na tausia lo la aiga i se fale o i ai i taimi uma le fafagaina faaleagaga, mafutaga alofa, ma gaoioiga faafiafia anoa. O aoaoga na la tuuina mai i lo’u talavou na matua lelei lava mo a’u. Matua, faamolemole ia atiae ni sootaga malolosi ma lau fanau. Latou te manaomia le tele o lou taimi, ae le o le itiiti.

Lagolagoina e le Ekalesia

A o e faia, o loo i ai iina le Ekalesia e lagolagoina oe. O o tatou aafiaga i le ekalesia e mafai ona faamalosi ai le fafagaina faaleagaga lea e faia i le fale. I lenei la tausaga, ua tatou vaaia ai lenei ituaiga lagolago a le Ekalesia i le Aoga Sa ma le Peraimeri. O le a tatou vaai atili ai foi i sauniga a le Perisitua Arona ma Tamaitai Talavou. E amata atu ia Ianuari nei, o le a fetuunai teisi le mataupu aoaoina mo nei sauniga. O le a taulai atu pea i autu o le talalelei, ae o na autu o le a ogatusa ma le *Sau, Mulimuli Mai ia te A’u—Mo Tagata Taitoa-tasi ma Aiga*. O se suiga laititi lenei, ae e mafai ona faia ai se aafiaga tele i le fafagaina faaleagaga o le autalavou.

O a nisi ituaiga o lagolago o loo tuuina atu e le Ekalesia? I le lotu tatou te aai ai i le faamanatuga, lea e fesoasoani ia i tatou e toe faamautu a tatou tautinoga i le Faaola i vaiaso taitasi. Ma i le lotu tatou te potopoto

faatasi ai ma isi tagata talitonu o e ua osia na lava feagaiga. O sootaga alofa ua tatou atiae ma isi soo o Iesu Keriso e mafai ona avea ma lagolago mamana i lo tatou avea ai ma soo e faatotonugalemu-i-le-aiga.

Ina ua 14 ou tausaga, na siitia atu lo’u aiga i se nuu fou. Ia, atonu e le foliga o se faalavelave matautia lenei ia te outou, ae i lo’u mafaufau i lena taimi, sa matuai faigata lava. O lona uiga o le siosiomia ai e tagata ou te le iloina. O lona uiga o le a auai isi alii talavou uma o la’u uarota i se aoga e ese mai ia te a’u. Ma i lo’u mafaufau e 14 tausaga, sa ou manatu ai, “E faapefea ona faia e o’u matua lenei mea ia te a’u?” Na ou lagona le pei ua faaleagaina lo’u olaga.

Peitai, e ala atu i a matou gaoioiga a Alii Talavou, sa mafai ai ona ou fausia ni mafutaga ma isi tagata o la’u korama, ma sa avea i latou ma a’u uo. E le gata i lea, na amata ona i ai se faamemelo faapitoa a uso o le au epikopo ma faufautua o le Perisitua Arona i lo’u olaga. Sa latou auai i a’u taaloga afeleti. Sa latou tusi mai ia te a’u ni tusi faalototele lea na ou teuina e oo mai i lenei aso. Sa faaaauu pea ona latou fesootei mai ia te a’u ina ua ou alu i le kolisi ma ou tuua ai mo se misiona. O se tasi o i latou sa i ai foi i le malaevaalele ina ua ou foi mai i le fale. O le a ou faafetai pea e faavavau mo nei uso lelei ma lo sootaga o le alofa ma faamoemoega mauaululuga. Sa latou faasino atu a’u i le lagi, ma sa avea le olaga ma mea susulu, fiafia, ma olioli.

E faapefea e i tatou, o ni matua ma taitai, ona fesoasoani i le autalavou ia iloa e le o tuua na o i latou a o latou

savalia ai le ala o feagaiga? E faaopopo atu i le fausia o sootaga patino, tatou te valaaulia i latou i faatasiga toatele ma toalaiti—mai konafesi a le Mo le Malosi o le Autalavou ma tolauapiga a le autalavou i gaoioiga faalevaiaso a le korama po o vasega. Aua lava ne’i manatu faatauvaa i le malosi lea e sau mai le potopoto faatasi ma isi o loo taumafai foi ina ia malolosi. Epikopo ma isi taitai, faamolemole ia taulai atu i le fafagaina o tamaiti ma le autalavou i a outou uarota. Latou te manaomia le tele o lou taimi, ae le itiiti.

Pe o oe o se taitai, se tuaoi, se uso o le korama, pe na o se uso-a-tagata o le Au Paia, afai e te maua le avanoa e pa’i atu ai i le olaga o se tagata talavou, ia fesoasoani atu ia te ia ia fesootei ma le lagi. Atonu o lau faatosinaga o le “lagolago [tonu lava lea] a le Ekalesia” o loo manaomia e le tagata talavou.

Uso e ma tuafafine, ou te molimau atu o loo afio Iesu i le ulu o lenei Ekalesia. O loo Ia musuiaina o tatou taitai ma taialaiina i tatou i le fafagaina faaleagaga tatou te manaomia ia faasaoina ai le ola ma tupuolaola ai i aso e gata ai. O le a fesoasoani lena fafagaina faaleagaga ia i tatou ina ia faatuatua ae le o le lē faatuatua. I le suafa o Iesu Keriso, amene. ■

FAAMATALAGA

1. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 96.
2. Tagai i le Jeffrey R. Holland, “O le Aoaoina Atu ma le Aoaoina Mai i le Ekalesia,” *Liahona*, Iuni 2007, 96.
3. 1 Nifae 8:30.
4. Tagai i le 1 Nifae 8:24–28; 11:36.
5. 1 Nifae 8:28.
6. Mataupu Faavae ma Feagaiga 4:2.
7. Tagai i le Russell M. Nelson, “Malelega Amata,” *Liahona*, Nov. 2018, 6–8.
8. Russell M. Nelson, “Avea ma Faaitaitaiga Lelei o le Au Paia o Aso e Gata Ai,” *Liahona*, Nov. 2018, 113.
9. Luka 10:41–42.
10. 1 Nifae 1:1.



SAUNIA E ELDER D. TODD CHRISTOFFERSON
O Le Korama a Aposetolo e Toasefululua

O Le Olioli o le Au Paia

O le olioli e sau mai le tausiga o poloaiga a Keriso, mai le faatoilaloina o faanoanoaga ma vaivaiga e ala ia te Ia, ma mai le auauna atu e pei ona Ia auauna atu.

O le perofeta o Enosa o le Tusi a Mamona, o le atalii o Liae, sa tusia se aafiaga se tasi lea na tupu i le amataga o lona olaga. Ao tulimanu na o ia i le vaomatua, sa amata ona mafaufau loloto Enosa i aoaoga a lona tama, o Iakopo. Sa ia faamatalaina, “O upu sa ou faalogo soo o tautala i ai lo’u tamā e uiga i le ola e faavavau, ma le olioli o le au paia, sa gotouga ifo i lo’u lotu.”¹ I le matelaina faaleagaga o lona agaga, sa tootuli ai Enosa i le tatalo, o se tatalo ofoofogia na faia i le aso atoa ma oo atu i le po, o se tatalo na oo mai ai ia te ia faalaliga taua, faamautinoaga, ma folafolaga.

E tele na’ua mea e ao ona aoaoina mai le aafiaga o Enosa, ae o le asō o le mea ua tu matilatila i lo’u mafaufau o le manatuaga e Enosa o lona tama o talanoa soo e uiga “i le olioli o le au paia.”

I lenei konafesi i le tolu tausaga talu ai, sa saunoa ai Peresitene Russell M. Nelson e uiga i le olioli.² Faatasi ai ma isi mea, na ia saunoa ai:

“O le olioli o tatou lagonaina e itiiti lava se mea e faatatau i tulaga o o tatou olaga a o mea uma o loo faatatau i le taulaiga o o tatou olaga.

“Afai o le taulaiga o o tatou olaga e i le fuafuaga o le faaolataga a le Atua

. . . ma ia Iesu Keriso ma Lana talalelei, e mafai ona tatou lagona le olioli e tusa lava po o a mea o tutupu—pe le o tutupu foi—i o tatou olaga. O le olioli e sau mai [ia te Ia] ma ona o Ia. . . . Mo le Au Paia o Aso e Gata Ai, o Iesu Keriso o le olioli lea!”³

O le Au Paia o i latou ia ua ulu atu i le feagaiga o le talalelei e ala i le papatisoga ma o loo taumafai ia mulimuli ia Keriso o ni Ona soo.⁴ O lea, “o le olioli



o le au paia” ua faailoa ai le olioli o le avea e faapei o Keriso.

Ou te fia talanoa e uiga i le olioli lea e sau mai le tausiga o Ana poloaiga, le olioli lea e tupu mai le faatoilaloina o faanoanoaga ma vaivaiga e ala ia te Ia, ma le olioli e maua i le auauna ai e pei ona Ia auauna atu.

O Le Olioli o le Tausiga o Poloaiga a Keriso

Ua tatou ola i se vaitau o le faama-licina o tuinanau lea ua fesiliga ai e le toatele le taua o poloaiga a le Alii pe ua faigofie foi ona le amanaiaina latou. O loo tupu soo, o tagata latou te tetee i faatonuga faalelagi e pei o le tulafono o le ola mama, le tulaga faatonuina o le faamaoni, ma le paia o le Sapati, e foliga mai e manuia ma olioli i mea lelei o le olaga, o nisi taimi e sili atu i lo i latou o loo tauivi ia usiuitai. O nisi e amata ona tuufesililisi pe o taua ea taumafaiga ma osigataulaga. Sa i ai se taimi na faitio ai le nuu anamua o Israelu:

“Ua le aoga ona auauna atu i le Atua: ma o le a se aoga na tatou tausiga ai ana sauniga ma na tatou savavali faanoanoa ai i luma o le Alii o Au?”

“Ma o lenei ua tatou ta’u fiafia le ua faamaualuga; ioe, o e ua faia galuega o le amioleaga ua faamautuina; ioe, e oo ia i latou o e ua tofotofa i le Atua ua laveaiina.”⁵

Ia faatali, sa fetalai ai le Alii, seia oo “i lena aso pe a ou faaputupu a’u maa taua. . . . Ona outou . . . iloa [lea o] le eseese o le amiotonu ma le amioleaga, i le va o le ua auauna i le Atua ma ia o le ua le auauna atu ia te ia.”⁶ Atonu o e amioleaga e “maua le olioli ia latou galuega mo se [vai]tau,” ae e le tumau lava.⁷ O le olioli o le Au Paia e tumau.

E silasila le Atua i mea i o latou vaaiga moni, ma faasoa mai e Ia lena vaaiga ia i tatou e ala i Ana poloaiga, e taialaina ma le mataalia i tatou i faigata

ma faafitauli o le olaga faaletino e agai atu i le olioli e faavavau. Sa faamalalama mai e le Perofeta o Iosefa Samita: “Pe a aoaoina i tatou e Ana poloaiga, e faia i le vaaiga o le faavavau; aua ua silasila mai le Atua i luga ia i tatou e faapei o i ai i tatou i le faavavau; e afio le Atua i le faavavau, ma e le silasila i mea e pei ona tatou vaai i ai”⁸

Ou te le’i feiloai lava i se tasi na mauaina le talalelei i se taimi mulimuli ane i le olaga o lē e lei moomoo maimau pe ana ia vave maua. “Aue, o filifiliga leaga ma measese sa ono ou alofia,” latou te fai mai ai. O poloaiga a le Alii o lo tatou taiala lea i filifiliga lelei atu ma taunuuga fiafia atu. E matua tataua ona tatou olioli ma faafetai atu ia te Ia mo le faaali mai ia i tatou o lenei ala sili atu ona lelei.

A o talavou Sister Kalombo Rosette Kamwanya mai le D.R. Congo, o loo auauna atu nei i le Misiona a Côte d’Ivoire Abidjan West, sa ia anapogi ma tatalo mo le tolu tausaga ia maua le itu na finagalo le Atua na te uia. I se faalepō

ofoofogia, sa faaali atu ai ia te ia ni fale se lua, o se falesa ma le mea ua ia iloa nei o se malumalu. Sa amata ona ia saili ma sa lei pine ae ia maua le falesa na ia vaai ai i lana miti. Sa fai mai le faailo, “O Le Ekalesia a Iesu Keriso o le Au Paia o Aso e Gata Ai.” Sa papatiso Sister Kamwanya ona sosoo ai lea ma lona tina ma ona tuagane e toaono. Sa fai mai Sister Kamwanya, “Ina ua ou maua le talalelei, sa ou lagona e pei o se manulele na pueina ua faasaolotoina. Na faatumulia lo’u loto i le olioli. . . . Sa ou maua le faamautinoaga e alofa le Atua ia te au.”⁹

O le tausiga o poloaiga a le Alii ua faagafatiaina atoatoa atili i tatou ma faigofie ona lagonaina atili Lona alofa. O le ala sa’o ma le vaapiapi o poloaiga e tau sa’o atu lava i le laau o le ola, ma o le laau ma ona fua, e sili ona suamalie ma “silisili ona manaomia i mea uma,”¹⁰ o le faatusa lea o le alofa o le Atua ma ua faatumulia ai le agaga “i le olioli tele.”¹¹ Na fetalai mai le Faaola:

“Afai tou te tausia a’u poloaiga, ona tumau lea o outou i lo’u alofa; pei ona

ou tausia poloaiga a lo’u Tama, ma ou tumau i lona alofa.

“Ua ou fai atu nei mea ia te outou, ina ia tumau ai lo’u *olioli* ia te outou, ma ia atoatoa foi lo outou *olioli*.”¹²

O Le Olioli o le Manumalo e ala ia Keriso

E tusa foi lava pe maua i tatou o tausia ma le faamaoni ia poloaiga, ae o loo i ai pea tofotofoga ma faafitauli e ono faalavelave i lo tatou olioli. Ae a tatou tauivi ia manumalo i nei luitau faatasi ma le fesoasoaniga a le Faaola, na te lagolagoina uma le olioli tatou te lagonaina i le taimi nei ma le olioli o loo tatou tulimatai atu i ai. Na faamautinoaga atu e Keriso i Ona soo, “E maua foi outou e le puapuaga i le lalolagi: a ia outou lototetele; ua ou manumalo i le lalolagi.”¹³ O le liliu atu ia te Ia, usiusitai ia te Ia, fusia o i tatou ia te Ia, lea e liua ai tofotofoga ma faanoanoaga i le olioli. Se’i o’u ta’ua se faataitaiga se tasi.

I le 1989, sa auauna atu ai Jack Rushton o le peresitene o le Siteki o Irvine Kalefonia i le Iunaite Setete. I le taimi o se tafaoga faaleaiga i le talafatai o Kalefonia, sa faasee Jack e aunoa ma se laupapa faasee ae ta ai e se galu o ia i se papa i lalo o le sami, ma gau ai lona ua ma manu’a tugā ai lona tuasivi. Mulimuli ane sa fai mai Jack, “O le taimi lava na ou lavea ai, sa ou iloa ai ua pe atoa lo’u tino.”¹⁴ Sa le toe mafai ona toe tautala pe mānava foi ia lava.¹⁵

Sa lagolagoina e aiga, uo, ma tagata o le siteki Uso Rushton ma lona faletua, o Jo Anne, ma, faatasi ai ma isi mea, sa toe sui se vaega o le latou fale e taulima ai le nofoa faataavalevale a Jack. Sa oo ina avea Jo Anne ma tausima’i autu a Jack mo le isi 23 tausaga na sosoo ai. E faasino atu i tala o le Tusi a Mamona i le auala e asiasi atu ai le Alii i Ona tagata i o latou puapuaga ma faamāmāina a latou avega,¹⁶ sa fai mai ai Jo Anne, “E



Sister Kalombo Rosette Kamwanya



Jack ma Jo Anne Rushton

tele ina ou maofa i le māmā o le loto ou te lagonaina i le tausiga o lo’u toalu.”¹⁷

O sina suiga i ona totoga e māmava ai na toefuatai ai le gafatia o Jack e tautala, ma i totonu o le tausaga, sa valaauina ai Jack o se faiaoga o Aoaoga Faavae o le Talalelei ma se peteriaka o le siteki. Pe a ia tuu atua se faamanuiaga faapeteriaka, e tuu e se isi e umia le perisitua lima o Uso Rushton i luga o le ao o le tagata e mauaina le faamanuiaga ma lagolagoina ona lima ma ogalima i le taimi o le faamanuiaga. Sa maliu Jack i le Aso Kerisimasi o le 2012, i le mavae ai o le 22 tausaga o auaunaga tuuto.

I se tasi taimi i se faatalanoaga, sa matau ai e Jack: “O le a oo mai faafitauli i o tatou olaga uma; o se vaega o lo tatou i ai iinei i lenei lalolagi. Ma e manatu nisi tagata o le lotu po o le mauaina o le faatuatua i le Atua o le a puipuia oe mai mea leaga. Ou te le manatu o le uiga lena. Ou te manatu o le uiga e faapea, afai e malosi lo tatou faatuatua, lea afai e tutupu mea leaga, ia o le a tutupu lava, o le a mafai ona tatou taulimaina na mea. . . . E le femououa’i lava lo’u faatuatua, ae e le faapea la sa ou le’i oo ai i ni mafatiaga. Ou te manatu mo le taimi muamua o lo’u olaga sa tulei ai a’u i le mea e gata ai, ma o le mea moni sa leai se mea e liliu i ai, ma o lea sa ou liliu atu ai i le Alii, ma e oo mai i lenei aso, ua ou lagona se olioli inā tele.”¹⁸

O le vaitau lenei ua i ai i nisi taimi ni osofaiga lē alofa i luga o ala o faasalalauga faagafesootai ma patino i tagata e faasaga ia i latou o ē saili e tausi ia tulaga faatonuina a le Alii o laei, faafiafiaga, ma le māmā i feusuaiga. E matele lava i le autalavou ma talavou matutua faatasi ma le Au Paia, faapea ai foi ma tamaitai ma tina, o loo amoina lenei satauro o le tauemuina ma le sauaina. E le faigofie le faatoilaloina o ia sauaga,



ae ia manatua upu a Peteru: “Afai e upuleagaina outou ona o le suafa o Keriso, amuia outou, aua o loo tumau ia te outou le Agaga mamalu o le Atua; o loo faifaia o ia e i latou, a ua viia e outou.”¹⁹

I le Faatoaga o Etena, sa i ai Atamu ma Eva i se tulaga o le lē sala, “e aunoa ma se olioli, ona sa laua lē iloa se pagatia.”²⁰ O lenei, i le avea ai ma tagata e tali atu mo i tatou lava, tatou te maua le olioli e manumalo ai i le pagatia i soo se ituaiga, pe o se agasala, tofotofoga, vai-vaiga, po o soo se isi lava faafitauli i le fiafia. O le olioli lea o le lagonaina o le alualu i luma i le ala o le avea ma soo; le olioli o le “mauaina o se faamagaloga o . . . agasala, ma ina ua latou maua le filemu o le mafaufau”;²¹ o le olioli o le lagonaina o le faalauteleina o le agaga o se tasi ma tuputupu ae e ala i le alofa tunoa o Keriso.²²

O Le Olioli o le Auauna Atu e pei ona Auauna Atu Keriso

E maua e le Faaola le olioli i le aumaia o lo tatou tino ola pea ma le ola e faavavau.²³ A o lauga ai e uiga i le Togiola a le Faaola, sa saunoa Peresitene Russell M. Nelson:

“E pei o mea uma, o Iesu Keriso o lo tatou faataitaiga sili, ‘o le na onosai i le satauro, ona o le olioli sa tuu i ona luma’ [Eperu 12:2]. Mafaufau i lena mea! Ina ia mafai ona Ia onosaia aafiaga aupito i faigata e lei onosaia muamua i le lalolagi, na tulaui atu ai lo tatou Faaola i le olioli!

“Ma o le a le olioli lea sa tuu i Ona luma? E mautinoa lava na aofia ai le olioli i le faamamāina, faamaloloina, ma le faamallosia o i tatou; o le olioli o le totogiina mo agasala a tagata uma o le a salamo; o le olioli o le a mafai e oe ma a’u ona toe foi atu—i le mama



ma le agavaa—e mau faatasi ma o tatou Matua Faalelagi ma aiga.”²⁴

E faapena foi, o le olioli ua “tuu i o tatou luma” o le olioli lea o le fesoa-soani atu i le Faaola i Lana galuega o le togiola. I le avea ai ma fanau a Aperamo,²⁵ tatou te auai ai i le faamanuiaina o aiga uma o le lalolagi “i faamanuiaga o le Talalelei, o faamanuiaga ia o le faaolataga, o le ola e faavavau.”²⁶

E manatua upu a Alema:

“O lo’u mitamitaga leni, atonu e avea a’u ma tufugaaao o le Atua i le taitaiina mai o se agaga i le salamo; o lo’u olioli foi leni.

“Ma faauta, a ou vaai atu i le toatele o ou uso ua salamo faamaoni, ma ua o mai i le Alii lo latou Atua, ona faatumu-lia lea o lou agaga i le olioli. . . .

“Peitai ua le na’o lo’u lava manuia ua ou olioli ai, ae ua sili atu le atoatoa o lo’u olioli ona o le manuia o o’u uso, o e na ò ae i le laueleele o Nifae. . . .

“O leni, pe a ou mafaufau i le manuia o o’u uso nei e segia ese atu lo’u agaga, ua oo lava e peiseai ua vavae ese atu ai mai le tino, i le tele naua o lo’u olioli.”²⁷

O fua o la tatou auaunaga i le tasi ma le isi i le Ekalesia o se vaega o le olioli ua “tuu i o tatou luma.” E oo lava i taimi o le lotovaivai po o le ātu, e mafai

lava ona tatou auauna atu ma le onosai pe afai tatou te taulai atu i le olioli o le faafiafiaina o le Atua ma aumaia ai le malamalama, toomaga, ma le fiafia i Ana fanau, o o tatou uso ma tuafafine.

A o i ai i Haiti i le masina ua te’a mo le faapaiaina o le Malumalu o Port-au-Prince, sa feiloai ai Elder David ma Sister Susan Bednar i se tuafafine talavou o lana tane sa fasiotia i ni nai aso na muamua atu i se faalavelave matautia. Sa la’ua fetagisi faatasi ma ia. Ae i le Aso Sa sa tu ai leni tamaitai pele i lona tulaga o se faasino nofoa i sauniga o le faapaiaiga, ma se ‘ataata agamalu ma talimalo mo tagata uma na ulufale atu i le malumalu.

Ou te talitonu o le “olioli sili o le au paia” e sau mai i le iloina o loo augani mai le Faaola i lo latou faamoemoega,²⁸ “ma e leai se tasi e mafai ona malamalama i le olioli lea [o le a faatumuina] o latou agaga [ao] tatou [faalogo atu ia Iesu] o tatalo atu i le Tama mo i tatou.”²⁹ Faatasi ai ma Peresitene Russell M. Nelson, ou te molimau atu o lena olioli o se meaalofoa mo Au Paia faatuatua “o e na onosaia satauro o le lalolagi”³⁰ ma o e “taumafai ma le nautaitai e ola i se olaga amiotonu, e pei ona aoao mai e Iesu Keriso.”³¹ Tau ina ia tumu lo outou olioli, ou te tatalo ai i le suafa o Iesu Keriso, amene. ■

FAAMATALAGA

- Enosa 1:3.
- Tagai Russell M. Nelson, “O Le Olioli ma le Ola ai Faaleagaga,” *Liahona*, Nov. 2016, 81–84.
- Russell M. Nelson, “O Le Olioli ma le Ola ai Faaleagaga,” 82.
- Tagai i le Bible Dictionary, “Saint.”
- Malaki 3:14–15.
- Malaki 3:17–18.
- Sa tautino mai le Faaola afai o se ekalesia (po o se olaga) “ua le atiae i luga o lau talalelei, ma ua atiae i luga o galuega a tagata, po o luga o galuega a le tiapolo, e moni ou te fai atu ia te outou latou te maua le olioli ia latou galuega mo se tau, ma e toe itiiti ane oo mai le iuga, ma o le a tatuu i latou i lalo ma lafo i le afi, lea ua leai se toe foi mai ai” (3 Nifae 27:11).

8. *Aoaoga a Peresitene o le Ekalesia: Iosefa Samita* (2007), 507.

9. Tususiga patino.

10. 1 Nifae 11:22; tagai foi i le 1 Nifae 8:11.

11. 1 Nifae 8:12.

12. Ioane 15:10–11; faaopoopo le faamamafa.

13. Ioane 16:33.

14. Jack Rushton, i le “Faith in Adversity: Jack Rushton and the Power of Faith,” SmallandSimpleTV, Sept. 2, 2009, YouTube.com.

15. Tagai Allison M. Hawes, “It’s Good to Be Alive,” *Ensign*, Apr. 1994, 42.

16. Tagai i le Mosaea 24:14.

17. Jo Anne Rushton, in Hawes, “It’s Good to Be Alive,” 43.

18. Jack Rushton, i le “Faith in Adversity: Jack Rushton and the Power of Faith.”

19. 1 Peteru 4:14. Ia manatua foi folafolaga o loo ta’ua i le 2 Nifae 9:18 ma le 3 Nifae 12:12.

20. 2 Nifae 2:23; tagai foi i le Mose 5:10–11.

21. Mosaea 4:3.

22. Tatou te manatua upu a Iakopo na musuia ia Iosefa Samita ia “ole atu i le Atua” (Iakopo 1:5). O fuaiupu nei e faalēmasani ai:

“O’u uso e, ia outou manatu o le mea e olioli tele ai pe a pa’u’u atu outou i le tele o puapugā;

“Ina ua outou iloa, o le tofotofoga o lo outou faatuatua e tupu ai le onosai.

“A ia atoatoa le galuega a le onosai, ina ia atoatoa ai ma ia sao ona lelei ai outou, ia leai se mea e tasi e mativa ai” (Faaliliuga a Iosefa Samita, Iakopo 1:2 [i le Iakopo 1:2, vae faamatalaga a]; Iakopo 1:3–4).

23. Tagai i le Mose 1:39.

24. Russell M. Nelson, “O Le Olioli ma le Ola ai Faaleagaga,” 82–83; uluai faamamafa.

25. “Afai foi e o Keriso outou, e moni o le fanau outou a Aperamo, o suli foi e tusa ma le mea ua folafolaina” (Kalatia 3:29; tagai foi i le Kenese 22:18; 26:4; 28:14; Galuega 3:25; 1 Nifae 15:18; 22:9; Mataupu Faavae ma Feagaiga 124:58).

26. Aperamo 2:11.

27. Alema 29:9–10, 14, 16. E faapena foi, ua fetalai mai le Alii ia i tatou, “Afai o le a tele lo oulua olioli faatasi ma se agaga e toatasi na oulua [aumaia] ia te a’u i le malo o lo’u Tamā, e matua tele atu lo oulua olioli pe afai lua te ‘aumai ni agaga e toatele ia te a’u!” (Mataupu Faavae ma Feagaiga 18:16). Sa folafola atu i Sa Nifae e Toatolu se atoaga o le olioli ona sa latou mananao ia aumaia agaga ia Keriso “ao tu pea le lalolagi” (3 Nifae 28:9; tagai foi i le 3 Nifae 28:10).

28. Tagai i le Mataupu Faavae ma Feagaiga 45:3–5.

29. 3 Nifae 17:17.

30. 2 Nifae 9:18.

31. Russell M. Nelson, “O Le Olioli ma le Ola ai Faaleagaga,” 84.



SAUNIA E MICHELLE CRAIG
Fesoasoani Muamua i le Au Peresitene Aoao o Tamaitai Talavou

Gafatia Faaleagaga

I le avea ai ma soo faamaoni a Iesu Keriso, e mafai ona e maua musumusuga ma faaaliga faaletagata lava ia, e ogatusa ma Ana poloaiga, e faapitoa ia te oe.

A o ou tuua se tolauapiga a Tamaitai Talavou i lenei taumafanafana, sa tuuina mai e se tamaitai talavou lelei ia te a'u se tusi. I totonu, sa ia fesili mai ai, "E mafai faapefea ona ou iloa o loo taumafai le Atua e ta'u mai ia te a'u se mea?" Ou te *fafia* i lana fesili. E faananau o tatou agaga mo se fesootaiga ma lo tatou aiga faalelagi. Tatou te fia lagona e manaomia ma aogā i tatou. Ae e i ai taimi tatou te tauivi ai e iloa le eseese i le va o ō tatou lava manatu ma uunaiga mālū a le Agaga. Ua aoao mai Perofeta, anamua ma aso nei afai o se mea na te "valaaulia ma faatosina e fai se mea lelei, e sau mai ia Keriso."¹

Na tuuina mai e Peresitene Russell M. Nelson se valaaulia faigofie ma mamana: "O'u uso e ma tuafafine, ou te *aioi* atu ia te outou ia faateleina lo outou *gafatia faaleagaga* e maua ai faaaliga. . . . Filifili e fai le galuega faaleagaga e manaomiaina e olioli ai i le meaalofo o le Agaga Paia ma faalogosoo atu ma le manino atili i le siufofoga o le Agaga."²

Ou te manao i lenei taeao e talanoa atu ia te outou mai lo'u loto e uiga i auala e fa e faateleina ai lou gafatia faaleagaga e maua ai faaaliga.

1. Ia Naunau ma le Loto e Fatuina se Taimi ma se Avanoa e Lagona ai le Siufofoga o le Atua

A o e faaogaina lou faitalia e aveese ai se taimi i aso uma e faalatalata atu ai i le siufofoga o le Atua, aemaise lava i le Tusi a Mamona, i le aluga o taimi o le a manino atili Lona siufofoga ma e masani atili i ai.

I se eseese, o mea *faalavefau* ma le *pisapisaō* ia e faatumulia ai le lalolagi ma o tatou aiga ma o tatou olaga e mafai



ona atili faigata ai ona tatou lagona Lona siufofoga. O nei mea faalavefau e mafai ona tumau i ō tatou mafaufau ma loto lea tatou te le tuua lava se avanoa mo uunaiga malu a le Agaga Paia.

Na aoao mai le Perofeta o Iosefa Samita, o le tele o taimi e faaali mai e le Atua o Ia Lava "i tagata taitoatasi ma patino i le tagata lava ia, i lona potu; i le vao po o le faatoaga, ma e leai se pisa po o se vavaō."³

E manao Satani e vavae ese i tatou mai le siufofoga a le Atua i le taofia o i tatou mai na nofoaga filemu. Afai e fetalai mai le Atua i se leo lemu, ma le itiiti, e tatau ia te oe ma a'u ona faalatalata atu ia lagona o Ia. Vaai faalemafaufau i le mea e ono tupu pe a tatou naunautai ia tumau pea le fesootaiga ma le lagi e pei ona tatou naunautai ia tumau pea le fesootaiga ma le Wi-Fi! Filifili se taimi ma se nofoaga, ma faalogologo mo le siufofoga o le Atua i aso uma. Ma ia tausia ma le sa'olele lenei taimi atofaina paia, aua e matuā tele lava mea e faalagolago i ai!

2. Faatino e aunoa ma le Faatuai

A e mauaina ni uunaiga ona e faatino lea ma le faamoemoe, e mafai ona faa-aoga oe e le Alii. O le tele o lou faatino, o le tele foi lena o [lou] masani i le siufofoga o le Agaga. O le a faateleina lou iloa o le taitaiga a le Atua ma o loo "naunau [o Ia] . . . e faaali Lona mafaufau ma le finagalo."⁴ Afai e te faatuai, e ono galo ia te oe le uunaiga pe misia le avanoa e fesoasoani ai i se tasi mo le Atua.

3. Ia Maua Lau Feau mai le Alii

O le tatalo e foliga mai e naunau le Tama Faalelagi e tali o la tatou aioiga ina ia taitai atu i se tasi e manaomia la tatou fesoasoani. Na aoao mai Peresitene Henry B. Eyring ia i tatou ia saili i faaaliga e ala i le ōle atu i le Atua po o ai e mafai ona tatou fesoasoani i ai mo Ia. "Afai e te faia fesili faapena, o le a oo mai

le Agaga Paia ma o le a musuia oe i mea e mafai ona e faia mo isi tagata. A e alu ma fai na mea, ua e i ai i le feau a le Alii, ma a e i ai i le feau a le Alii, ua e agavaa mo le meaalofo o le Agaga Paia.”⁵

E mafai ona e tatalo ma òle atu i le Alii mo se feau. A o e faia, e mafai ona Ia faaagaina ou tomai masani e faatau-nuu ai Lana galuega maoae.

O lo’u tama matua, o Fritz Hjalmar Lundgren, na malaga mai Suetena ina ua 19 ona tausaga. Na ia taunuu i Amerika, na o ia, ma se atopau ma le ono tausaga o aoga aloa’ia. I le lē mafai ai ona tautala i se Igilisi, na ia malaga atu ai i Oregon ma faigaluega ai o se tipi laau ma mulimuli ane, auai i le Ekalesia faatasi ma lo’u tinamatua ma lo’u tina. E le’i pulefaamalumu lava o ia i se uarota, ae i le avea ai o se faiaoga o aiga faamaoni, na ia toefaatoaagaina mai le silia ma le 50 aiga esee se i le Ekalesia. Na faapefea ona ia faia lene mea?

Ina ua mavae le maliu o tamamatua, sa ou lagaina se pusa o ana pepa ma tau ai i se tusi na tusia e se alii na toe foi mai i le lotu ona o le alofa o Tamamatua. O le tusi e faitauina faapea: “O le mealilo a Uso Fritz, ou te talitonu, e i ai lava o ia i se feau mo le Tama Faalelagi.”

O lene tusi sa aumai mai ia Tuagane Wayne Simonis. Sa asiasi tamamatua ia te ia ma faamasani i tagata taitoatasi o le aiga. Mulimuli ane, na ta’u atu e Tamamatua ia i latou e manaomia i latou ma na valaauliaina i latou e auai i le lotu. Ae i lene Aso Sa, na ala mai ai Tuagane Simonis ma se faafitauli—na te le’i faamaeaina le tau-aluga o lona fale, ma na faamoemoe e timu lene vaiaso. Na tonu ia te ia e alu i le lotu, faatalofo ma Tamamatua, ona tuua lea ma toe foi atu i le fale e faamaca le tauluga. E mafai lava ona auai lona aiga i le sauniga faamanatuga e aunoa ma ia.



Sa lelei lava lana fuafuaga seia, oo i le taimi, a o i ai i luga o le tauluga, na ia faalogoina ai se tagata o a’e atu i le apefa’i. I ana upu: “Ina ua ou tepa a’e i luga, . . . o loo tu Uso Fritz i le pito i luga o le apefa’i. Sa ia ‘ata’ata mai ia te a’u. I le taimi muamua, sa ou maasiasi ma lagona e pei o se tama’i tamaitiiti ua maua ua faamisi le a’oga. Ona . . . ou lagona lea o le ita. [Ae na ona aveese lava e Uso Fritz] o lona suti ma tautau i luga o le apefa’i. A o ia afe i luga lima o lona ofutino paepae, sa ia liliu mai ia te a’u ma faapea mai, ‘Uso Simonis, o i ai se isi samala? Masalo e taua tele lenei galuega semanu e te lē tuua lou aiga, ma afai e taua, ou te fia fesoasoani ia te oe.’ A o ou tilotilo atu i ona mata, sa na o le agalelei ma le alofa faaKeriso sa ou vaaia. Sa alu ese lo’u ita. . . . Sa ou tuu i lalo a’u meafaigaluega i lene Aso Sa ma mulimuli atu i la’u uo lelei i lalo o le apefa’i ma toe foi atu i le falesa.”

Sa maua e Tamamatua lana feau mai le Alii, ma sa iloa e ia e tatau ona ia sailia mamoe ua leiloloa. E pei lava o alii e toafa o e na ave la latou uo ma’i supa i luga o le tauluga ona tuu ifo o ia i lalo e faamaloloina e Iesu Keriso,⁶ na faapena foi le feau a Tamamatua na avatu ai o ia i se tumutumu fale. E auina mai e le Alii faaaliga ia i latou e saili e fesoasoani atu i isi.

4. Talitonu ma Faalagolago

Talu ai nei, na ou faitau ai i tusitusiga paia e uiga i se isi faifeautalai maoae na mauaina lana feau mai le Alii. Sa aoao atu e Arona le tupu o sa Lamana, o lē sa mafaufau pe aisea na le sau ai foi Amona le uso o Arona e aoao o ia. “Ma sa fai atu Arona i le tupu: Faauta, ua valaauina o ia e le Agaga o le Alii *i se isi ala*.⁷”

Sa fetalai mai le Agaga i lo’u loto: e tofu i tatou ma se misiona esee se faatino, ma e i ai taimi e ono valaau ai i tatou e le Agaga i “se isi ala.” E tele

auala e fausia ai le malo o le Atua o ni soo osifeagaiga, ma tausī feagaiga o Iesu Keriso. I le avea ai ma Ona soo faamaoni, e mafai ona e maua musumu-suga ma faaaliga faaletagata lava ia, e ogatusa ma Ana poloaiga, e faapitoa ia te oe. Ua ia te oe ni misiona tulagaese ma ni matafaioi e faatino i le olaga ma o le a tuuina atu le taitaiga tulagaese e faataunuuna ai.

O Nifae, le uso o Iareto, e oo lava ia Mose sa i ai uma se vaega tele o vai e soipoa—ma sa eseese uma auala na faia ai. Na galue Nifae e “ta laau i gaosiga uiga eseese.”⁸ Na fausia e le uso o Iareto ni vaa na “malu lelei e pei o se ipu.”⁹ Ma sa “savali [Mose] i le iliti tai matutu i totonu o le sami.”¹⁰

Na tofu maua e i latou taitoatasi faatonuga patino, na faapitoa mo i latou, ma sa faatuatua ma galulue i latou taitoatasi. E silafia e le Alii i latou o e usiusitai ma, i upu a Nifae, “o le a saunia e ia se ala mo [i tatou] ina ia mafai ai ona . . . faataunuuna o le mea ua ia poloaia.”¹¹ Ia matau na fai mai Nifae, “se ala”— e lē “o le ala.”

Pe o tatou misia pe o faamisi foi ni feau patino mai le Alii ona ua Ia saunia “se ala” e ese mai le mea na tatou faamoemoe i ai?

Sa taitai atu lo’u tamamatua i se nofoaga e le masani ai—i se suti, i luga o se tumutumu fale, i se Aso Sa. Faalagolago i le Atua e taitai oe, e tusa lava pe foliga mai e ese lena ala nai lo le mea na e faamoemoeina pe e ‘ese mai i isi.

E eseese ituaiga o tagata o le Au Paia o Aso e Gata Ai, ae “ua tutusa tagata uma i le Atua”—“uliuli pe pa’epa’e, pologa pe saoloto, o tane ma fafine,” nofofua ma faaipoipo, mauoa ma mativa, talavou ma matutua, tagata ua loa i le ekalesia ma tagata faatoa liliu mai.¹² E tusa lava po o ai oe, po o a mea o loo e feagai ai, ua valaaulia oe i le la’o’ai a le Alii.¹³



A o avea ai le sailia ma le faia o le finagalo o le Tama ma mamanu masani o lou olaga i aso uma, e moni lava o le a taitai atu oe ia sui ma salamo.

O le polokalama fou a le Ekalesia mo tamaiti ma le autalavou ua fausia i luga o le faavae o le aoaoina e saili ia faaaliga, iloaina o le mea e finagalo le Alii tatou te faia, ona galue lea i luga o lena faatonuga. O i tatou taitoatasi, po o le a le matua po o le tulaga, e mafai ona tauivi e *saili, maua, ma faatino*. A o e mulimuli i lena mamanu e faavavau ua faavaeina mo ō tatou aso, o le a e latalata atili atu ia Iesu Keriso—Lona alofa, Lona malamalama, Lana taitaiga, Lona filemu, ma Lana faamalologa ma le mana gafatia. Ma o le a e faateleina lou gafatia faaleagaga e avea ai ma se mea faigaluega i Ona aao i aso uma i le faataunuuna

o Lana galuega sili. I le suafa o Iesu Keriso, amene. ■

FAAMATALAGA

1. David A. Bednar, i le Talanoaga Faafesagai ma Elder ma Sister Bednar (faasalalauga a le autalavou i le lalolagi atoa, Me 12, 2015), [facetoface.ChurchofJesusChrist.org](https://www.ChurchofJesusChrist.org); tagai foi i le Moronae 7:16.
2. Russell M. Nelson, “Faaliga mo le Ekalesia, Faaliga mo o Tatou Olaga,” *Liahona*, Me 2018, 96; faaopoopo le faamamafa.
3. *Aoaoga a Peresitene o le Ekalesia: Iosefa Samita* (2007), 129.
4. Russell M. Nelson, “Faaliga mo le Ekalesia, Faaliga mo o Tatou Olaga,” 94.
5. Henry B. Eyring, in “President Eyring 1990s,” *Deseret News*, Apr. 2, 2009, [deseretnews.com](https://www.deseretnews.com).
6. Tagai i le Mareko 2:1–12.
7. Alema 22:4; faaopoopo le faamamafa.
8. 1 Nifae 18:1.
9. Tagai i le Eteru 6:5–8.
10. Esoto 14:29.
11. 1 Nifae 3:7.
12. 2 Nifae 26:33.
13. Tagai i le Quentin L. Cook, “O Le Faavavau o Aso Uma,” *Liahona*, Nov. 2017, 51.



SAUNIA E ELDER DALE G. RENLUND
O Le Korama a Aposetolo e Toasefululua

Tautinoga Mausali ia Iesu Keriso

*Ua valaaulia i tatou e le Atua ia lafoaiese
atoa o tatou ala tuai ia le toe oo i ai ma
amata se olaga fou ia Keriso.*

Ia Aperila ua te'a, sa ou maua ai le avanoa e faapaia ai le Malumalu o Kinshasa Temokalasi Ripapelika o Congo.¹ E le mafai e upu ona faamatalaina le olioli sa ou lagonaina ma tagata faatuatua o Congo i le vaai atu i se malumalu ua faapaiaina i lo latou laueleele.

O tagata taitoatasi na ulufale atu i le Malumalu o Kinshasa sa vaaia se uluai atavali ua faaulutalaina *O Afu i Congo*.² Ua faamanatu faapitoa ai i tagata e o i le malumalu e uiga i le tautinoga mausali e manaomia e taula ai i latou lava ia Iesu Keriso ma ia mulimuli ai i le ala o feagaiga o le fuafuaga a lo tatou Tama Faalelagi. O afu ua faaali mai i le atavali ua oo mai ai i le mafauafau se faatinoga lea sa taatele i le silia ma se seneturi talu ai i

uluai tagata liliu mai i le FaaKerisiano i Congo.

A o lumanai ai lo latou liliu mai, sa latou tapuai atu i tupua faitino e leai ni ola, na talitonu o ia mea o loo i ai ni mana faalelagi.³ I le mavae o le liliu mai, e toatele sa faia se malaga i se tasi o afu o le mau afu le mafaitaulia i le Vaitafe o Congo, e pei o le Afu o Nzongo.⁴ Sa tau'ai e nei tagata liliu mai o latou tupua faitino sa i ai i totonu o le afu o se faailoga i le Atua ma isi ua latou lafoai a latou tu masani tuai ma taliaina ia Iesu Keriso. Latou te lei tau'ai atua ma

le loto i ai a latou tupua faitino i totonu o se vai to'a ma papa'u; sa latou tau'ai atua i totonu o vai tatafe o se afu tele, ia sa le mafai ai ona toe maua ia mea. O nei faatinoga o se faailoga lea o se tautinoga fou ae mausali ia Iesu Keriso.

O tagata i isi nofoaga ma vaitausaga ua faaalia lo latou tautinoga ia Iesu Keriso i ni auala talitutusa faapea.⁵ O tagata o le Tusi a Mamona sa igoa ia Aneti-Nifae-Liae sa "tuu i lalo auupega o lo latou fouvale," ma tanumia "loloto i latou i le elele" e avea o "se molimau i le Atua . . . o le a latou le toe faaoga ina [a latou] auupega."⁶ I le faia o lea mea, sa latou folafola atu ai e mulimuli i aoaoga a le Atua ma ia le toe fultua lava i lo latou tautinoga. O lenei faatinoga o le amataga lea o le "faaliliuina i le Alii" ma le toe pauu ese ai.⁷

O le "faaliliuina i le Alii" o lona uiga o le tuua o se tasi ala o amioga, sa taitaiina e se faatulagaga tuai o talitounuga, ma vaetamaina i se faatulagaga fou e fua i le faatuatua i le fuafuaga a le Tama Faalelagi ma ia Iesu Keriso ma Lana Togiola. O lenei suiga e sili atu nai lo o se taliaina faaleatamai o aoaoga o le talalelei. Na te mamanuina lo tatou faasinomaga, liuaina lo tatou malamalamaaga i le uiga o le olaga, ma taitai atu i se faamaoni a'ia'i lēmāsuia i le Atua. O manaoga patino e feteenai ina ia taula ai i le Faaola ma mulimuli ai i le ala o feagaiga, e mouese lava ma e suitulagaina e se naunautaiga ia usitai i le finagalo o le Tama Faalelagi.

O le faaliliuina i le Alii e amata i se tautinoga mausali i le Atua, e sosoo ma le faia o lenei tautinoga o se vaega ua avea ai i tatou lava. O le faapatinoina o se tautinoga faapena o se faagasologa i le olaga atoa ma e manaomia ai le onosai ma le salamo faifai pea. Ma le mea mulimuli, o lenei tautinoga e avea ma se vaega o le tagata o tatou i ai, faaofiaina i o tatou lagona faaletagata lava



Malumalu o Kinshasa Ripapelika Tominika o Congo



Congo Falls, saunia e David Meikle



ia, ma e i ai pea i o tatou olaga. E pei lava o le le galo ia i tatou o o tatou lava igoa e tusa lava po o a mea o loo tatou mafaufau i ai, ia le galo foi ia i tatou se tautinoga ua tāmāu i o tatou loto.⁸

Ua valaaulia i tatou e le Atua ia lafoaiese atoa o tatou ala tuai ia le toe oo i ai ma amata se olaga fou ia Keriso. E tupu lenei mea ao tatou atiae le faatuatua i le Faaola, lea e amata i le faalogo atu i le molimau a i latou ua i ai le faatuatua.⁹ A mavae lena, o le a faateleina le faatuatua ao tatou galulue i ni auala lea e taulaina mausali atili i tatou ia te Ia.¹⁰

Ia, e manaia pe afai e faapepesiina le faatuatua faateleina e pei o le fulū po o se mā'i masani. O “sina mafatua faaleagaga” la o le a atiae ai le faatuatua i isi. Ae e le tupu faapena. E na o le pau le auala e tupu ai le faatuatua e mo se tagata e faatino i le faatuatua. O nei faatinoga e masani ona uunaia e ni valaaulia e tuuina mai e isi, ae e le mafai ona tatou “faatupuina” le faatuatua o se isi po o le faalagolago faapitoa atu i isi e uunaia lo tatou foi [faatuatua]. Mo lo tatou faatuatua ina ia tuputupu ae, e tatau ona tatou filifili i faatinoga faatupu-faatuatua, e pei o le tatalo,

suesueina o tusitusiga paia, ‘ai ma inu i le faamanatuga, tausia ia poloaiga, ma le auaina atu i isi.

A o tuputupu ae lo tatou faatuatua ia Iesu Keriso, e valaaulia i tatou e le Atua ia faia ni folafolaga faatasi ma Ia. O nei feagaiga, e pei ona iloga ai folafolaga, o ni faailoga ia o lo tatou liua. O feagaiga e fatuina foi se faavae mautu mo le alualu i luma faaleagaga. Pe a tatou filifili ia papatiso, tatou te amata i le ave i o tatou luga o le suafa o Iesu Keriso¹¹ ma filifili e faailoa i tatou lava faatasi ma Ia. Tatou te tautino atu ia avea faapei o Ia ma ia atiinae Ona uiga paia.

O feagaiga e taulaina i tatou i le Faaola ma faamalosiā i tatou i le aluga o le ala lea e tau atu i lo tatou aiga faalelagi. O le mana o feagaiga e fesoasoani ia i tatou ina ia tumau i le suiga tele o le loto, faateleina lo tatou liua i le Alii, ma maua atoatoa fofoga o Keriso i o tatou mata.¹² Ae peitai o se tautinoga faalotolotolua ia tatou feagaiga o le a le maua ai e i tatou se mea.¹³ Atonu o le a faaosoosoina i tatou ia fafoliga, tau’ai a tatou ala tuai i totonu o vai toafilemu, po o le tatanu o a tatou auupega o le fouvale ma ‘au o loo lala mai i luga. Peitai o se tautinoga

le mautonu ia tatou feagaiga o le a le tatalaina le faitotoa i le mana faamama a le Tama Faalelagi ma Iesu Keriso.

O lo tatou tautinoga e tausia a tatou feagaiga e le tatau ona faatapulaā pe fetuunai i suiga o tulaga i o tatou olaga. O lo tatou faalagolago i le Atua e tatau ona pei o le faalagolago i le Vaitafe o Congo lea e tafe latalata ane i le Malu-malu o Kinshasa. O lenei vaitafe, e le pei o le tele o vaitafe i le lalolagi, e tafe pea i le tausaga atoa¹⁴ ma sasaa atua le latalata i le 11 miliona kalone (41.5 miliona L) o vai i le sekone e tasi i le Vasa Atalani.

Na valaaulia e le Faaola Ona soo ina ia faapea ona faatuatua ina ma tumau. Sa Ia fetalai, “O le mea lea, ia faamautu lenei mea i o outou loto, o le a outou faia mea o le a ou aoao atu ia te outou, ma poloiaina ai outou.”¹⁵ O se naunautaga “mausali” e tausia a tatou feagaiga e faatagaina ai le mauaina atoa o folafolaga a le Atua ina ia mafai ona tatou mauaina le olioli tumau.¹⁶

E toatele le Au Paia o Aso e Gata Ai ua faaalai lo latou “mausali” i le tausiga o a latou feagaiga ma le Atua ma o loo suia pea i latou i taimi uma. Se’i o’u faamatala atua ni tagata se toatolu

faapena—o Uso Banza Mucioko, Tuafafine Banza Régine, ma Uso Mbuyi Nkitabungi.

I le 1977 sa nonofo ai le au Banzas i Kinshasa i le atunuu o Zaire, lea ua igoa nei i le Temokalasi Ripapelika o Congo. Sa matua faaaloalogiaina i latou i lo latou nuu faalelotu Porotesano. Ona o a la taleni, sa saunia ai e le latou lotu mo lo latou aiga talavou e o i Suitiselani e aooga ai ma tuuina atu se sikolasipi faaleiunivesite.

A o i ai i Sineva, i le malaga a le pasi e agai atu i le a’oga, sa vaai soo ai lava Uso Banza i se tamai falelotu o loo i ai le igoa “O Le Ekalesia a Iesu Keriso o le Au Paia o Aso e Gata Ai.” Sa ia tuufesili, “Ua i ai ea ia Iesu Keriso ni Au Paia i le taimi nei, i aso e gata ai?” Sa i’u ina filifili o ia e alu e vaai.

Sa faafeiloaia ma le mafanafana Uso ma Tuafafine Banza i le paranesi. Sa la fesiligia nisi o fesili faifai pea sa ia i latou e uiga i le natura o le Atua, e pei o le, “Afai o le Atua o se agaga, e pei o se savili, na faapefea la ona foafoaina i tatou i Ona foliga? E mafai faapefea ona afio o Ia i Lona nofoalii? La te lei maua lava se tali faamalieloto pe ana le faamalamalama atua e faifeautalai aoaoga faavae toefuataina i se lesone puupuu. Ina ua o ese atu faifeautalai, sa fetepaa’i le au Banzas i le tasi ma le isi ma faapea, “E le o le upumoni ea lenei ua ta faalogo i ai?” Sa faaaau



ona latou o mai i le lotu ma sauniga faatasi ma faifeautalai. Sa latou iloa o le papatisoina i le Ekalesia toefuataina a Iesu Keriso o le a i ai ni taunuuga. O le a aveese le la sikolasipi, o le a faaleaogaina a latou visa, ma o le a manaomia ona latou tuua ma le la fanau Suitiselani. Sa latou filifili ina ia papatisoina ma faamauina ia Oketopa 1979.

I le lua vaiaso talu ona mavae la latou papatisoga, sa toefoi atu ai Uso ma Tuafafine Banza i Kinshasa, o i laua o le tagata muamua ma le lona lua lea o le Ekalesia i lo latou atunuu. Sa tumau fesootaiga a tagata o le Paranesi o Sineva ma i latou ma fesoasoani ia fesootai i latou ma taitai o le Ekalesia. Sa uunaia le au Banzas ia faatalitali ma le faatuatua i le taimi folafolaina o le a faatu ai e le Atua Lana Ekalesia i Zaire.

O le taimi lea, o se isi tamaitiiti aoga mai Zaire i le polokalama faafesuiai, o Uso Mbuyi, o loo ‘aoga i Peleseuma. Sa papatisoina o ia i le 1980 i le Uarota

a Brussels. Ina ua mavae lena, sa ia auauna atu i se misiona i Egelani. Ma sa galue le Atua i Ana vavega. Sa toefoi atu Uso Mbuyi i Zaire o le tagata lona tolu o le Ekalesia i lona atunuu. Faatasi ai ma le faatagana a ona matua, sa faia sauniga a le Ekalesia i le fale o lo latou aiga. Ia Fepuari 1986 na faia se talosaga mo le faailoaina aloaia atu e le malo o le Ekalesia. Sa manaomia ai saini a tagatanuu e toatolu o Zaire. O tagata e toatolu na sainia ma le fafia le talosaga o Uso Banza, Tuafafine Banza, ma Uso Mbuyi.

O nei tagata faatuatua sa iloina le upumoni ina ua latou faalogo i ai; sa latou osia se feagaiga i le papatisoga lea na taula ai i latou i le Faaola. I se tulaga faafaatusa, sa latou lafoai ai o latou ala tuai i totonu o se afu tatafe e aunoa ma se faamoemoe e toe maua mai. Sa le’i faigofie le ala o le feagaiga. O le vāvāō faaupufai, o fesootaiga motusia ma taitai o le Ekalesia, ma luitau ia e masani ai a o fausiaina se nuu o le Au Paia atonu e faalotovaivaia ai ni tagata e faalētuuto. Peitai sa tumau pea Uso ma Tuafafine Banza ma Uso Mbuyi i lo latou faatuatua. Sa latou auai i le faapaiaiga o le Malumalu o Kinshasa, i le mavae ai o le 33 tausaga talu ona latou sainia le talosaga lea na taitai atu ai i le faamamaluga aloaia o le Ekalesia i Zaire.

O loo i ai iinei i le asō le au Banzas i le Nofoaga Autu o Konafesi. O loo latou faatasi ai ma le la fanau tama e toalua, o Junior ma Phil, ma afafine faaletulatonu,



Banza Mucioko, Banza Régine, ma o latou atalii



Mbuyi Nkitabungi o se faifeautalai faamisiona

o Annie ma Youyou. I le 1986, o Junior ma Phil o uluai tagata e toalua ia na papatisoina i le Ekalesia i Zaire. O loo maimoa mai Uso Mbuyi ma lona fale-tua, o Maguy, ma le la fanau e toalima i nei taualumaga mai Kinshasa.

Ua malamalama nei paionia i le uiga ma taunuuga o feagaiga ia sa aumaia i latou “i le malamalama o le Alii lo latou Atua, ma ia olioli ia Iesu Keriso lo latou Togiola.”¹⁷

E faapefea ona tatou taulaina i tatou lava i le Faaola ma tumau ma le faa-tuatua e pei o nei tagata ma le toatele o le fia sefulu o afe o Au Paia i Congo na mulimuli ia i latou ma le fia mili-ona o isi i le lalolagi atoa? Sa aoaoina i tatou e le Faaola i le ala e faia ai. O vaiaso taitasi tatou te aai ma feinu ai i le faamanatuga ma osia se feagaiga ma lo tatou Tama Faalelagi. Tatou te folafola atu e fesootai o tatou faasinomaga ma le Faaola e ala i le tautino atu o lo tatou naunau ia ave i o tatou luga Lona suafa, ia manatua pea o Ia, ma tausi Ana poloaiga.¹⁸ O le saunia ma le filiga ma le osia ma le agavaa o nei feagaiga i vaiaso taitasi e taula ai i tatou i le faavae mausali a le Faaola, ma fesoasoani ia i tatou e faapatinoia a tatou tautinoga,¹⁹ ma tuleia ai ma le malos i tatou i luga o le ala o feagaiga.

Ou te valaaulia outou ia tuuto atu i se faagasologa i le olaga atoa o le ave ma soo. Osia ma tausia feagaiga.



Banza Régine ma Banza Mucioko

Tau'ai a outou auala tuai i afu loloto ma tatafe. Ia tatanu atoa tou auupega o le fouvale e aunoa ma le lala mai i luga o 'au. Ona o le Togiola a Iesu Keriso, o le osia o feagaiga i se faamoemoega moni ia faamamalu i ai ma le tumau o le a faamanuia ai lou olaga e faavavau. O le a e ave atili e pei o le Faaola pe a e manatua pea o Ia, mulimuli ia te Ia, ma faamemelo ia te ia. Ou te molimau atu o Ia o le faavae mautu. E faamoemocina o Ia, ma o Ana folafolaga e mautinoa. I le suafa o Iesu Keriso, amene. ■

FAAMATALAGA

1. Sa faia le faapaiga i le Aso Sa o le Laupama, 14 Aperila, 2019, e pei ona tofia ai e Peresitene Russell M. Nelson.
2. O le tusiata, o David Meikle, na valiina le *Afu o Congo* sa galue mai atapue o Afu o Kiubu. O Afu o Kiubu o loo i ai i le tusa ma le 249 maila (400 km) i matu o Lubumbashi i le vaega i sautesasae o le Temokalasi Ripapelika o Congo.
3. O nei meafaitino sa lauiloa o se *inkisi* i le gagana Kikongo ma le *fétiches* i le FaaFaarani. O le upu e faaliliuina i le FaaPeretania o le amulets, “talismans,” po o le fetishes.
4. Sa vali foi e David Meikle le *Afu o Nzongo* sa galue mai atapue o le afu. O Afu o Nzongo o loo i ai i le tusa ma le 81 maila (130 km) mai Kinshasa, Temokalasi Ripapelika o Congo. O vaitafe i nei afu sa oo ina lauiloa o *Nzadi Inkisi*, po o le “River of Fetishes.” O loo atagia mai le igoa ia faiga masani o loo faamatalaina i le tusiga.
5. I le 1000 TA, o faauluuluga o le ituaiga Iselani e feiloai faatasi mo le latou *Allting* faaletausaga e lua vaiaso, o se faatasiga faasamasamanoa e faia tulafono e noatia ai tagata uma. O se tamaloa e igoa ia Thorgeir sa talosagaina na te faia le faaiuga mo tagata



Mbuyi Nkitabungi ma Mbuyi Maguy

uma e uiga i le liliu atu i le FaaKerisiano pe faaaauu pea ona tapuai atu i atua o Noue. I le mavae ai o aso e tolu o nofo ai na o ia i lona faleie, sa faasilasila mai ai e Thorgeir lana faaiuga: o le a avea tagata ma Kerisiano. A o toe taliu atu Thorgeir i lona nuu, sa ia ave ana tupua faapelepele o atua-FaaNoue ma lafo i totonu o se afu, ua igoa nei o le *Godafoss*, po o le “Afu o Atua.” O lenei faatinoga ua faailoa ai le liua atoa o Thorgeir i le FaaKerisiano.

6. Alema 23:13; 24:17–18.
7. Tagai i le Alema 23:6; David A. Bednar, “Faaliliuina i le Alii,” *Liahona*, Nov. 2012, 106–9.
8. Tagai i le Esekeliu 11:19–20; 2 Korinito 3:3.
9. Tagai i le Roma 10:14, 17.
10. Tagai i le *Tala'i La'u Talalelei: O Se Tāiala mo le Galuega Faafaifeautalai*, rev. ed. (2018), 203.
11. Tagai Dallin H. Oaks, “O Le Ave i o Tatou Luga o le Suafa o Iesu Keriso,” *Ensign*, Me 1985, 80–83.
12. Tagai i le Alema 5:12–14.
13. Tagai i le Mataupu Faavae ma Feagaiga 82:10.
14. O le Vaitafe o Congo o le vaitafe lona lua sili ona malos, loloto ma o le lona iva sili ona umi i le lalolagi. Ona na te kolosia faalua le ekueta, e tasi le vaega o le vaitafe e i ai i taimi uma i le vaitau timu, lea e tafe ai lava i taimi uma le vai. O le tafe e tumau pea i le tausaga atoa, i le averesi e 41,000 mita kupita o vai i le sekone e tasi, e ui o le saosasaoa o le tafe e ono fesuisui ai i le aluga o tausaga (mai le 23,000–75,000 mita kupita i le sekone e tasi).
15. Faaliliuga a Iosefa Samita, Luka 14:28 (i le Luke 14:27, vae faamatalaga b).
16. Tagai i le 2 Nifae 9:18; Russell M. Nelson, “O Le Olioli ma le Ola ai Faaleagaga,” *Liahona*, Nov. 2016, 81–84. Na saunoa mai Peresitene Nelson: “O le olioli o se meaalofo mo e faamaoni” (itulau 84).
17. Alema 37:9.
18. Tagai i le Mataupu Faavae ma Feagaiga 20:77. I le semina faaleautaitai o misiona ia Iuni 2019, i le mavae ai ona taumafa i le faamanatuga, a o lei amataina lana savali aloaia, sa saunoa ai Peresitene Russell M. Nelson, “Ua oo mai se manatu ia te a'u o lo'u osia o se feagaiga i le asō e sili atu ona taua nai lo le savali ua ou sauniaina. Ua ou osia se feagaiga a o ou ai i le faamanatuga o le a ou loto e ave i o'u luga le suafa o Iesu Keriso ma ua ou loto e usitai i Ana poloaiga. E tele ina ou faalogo i faaupuga tatou te aai i le faamanatuga e faafou ai feagaiga na osia i le papatisoga. E ui e moni lena mea, ae e matua sili atu i lo lena. Ua ou osia se feagaiga fou. Ua outou osia ni feagaiga fou. . . . O le tauila, lea Na te faia ai le fetalaiga o le a tatou maua pea Lona Agaga e faatasi ma i tatou. E mau lea faamanuiga!”
19. Tagai i le 3 Nifae 18:12.



SAUNIA E PERESITENE DALLIN H. OAKS
Fesoasoani Muamua i le Au Peresitene Sili

Faalagolago i le Alii

Na o le pau lo tatou faalagolagoga mautinoa o le faatuatua lea i le Alii ma Lona alofa mo Ana fanau.

O’u uso ma tuafafine pele, o se tusi sa ou mauaina i se taimi ua leva atu ua faalauiloa atu ai le autu o la’u lauga. Sa manatunatu loloto le tusitala i se faaipoipoga i le malumalu i se alii ua maliu lana soa e faavavau. O le a avea o ia ma avā lona lua. Sa ia fesili i lenei fesili: pe mata e mafai ona faia sona lava ia aiga i le olaga a sau, pe o le a tataua ona ia nofo faatasi ma lana tane ma lana ava muamua? Sa na ona ou ta’u atu ia te ia e faalagolago i le Alii.

Ou te faaauau atu i se aafiaga sa ou faalogo i ai mai se paaga pele, lea ou te faasoa atu i lana faatagaga. I le mavae ai o le maliu o lana avā pele ma le tina o lana fanau, sa toe faaipoipo ai se tama. O nisi o le fanau matutua sa matua tetee lava i le faaipoipoga ma saili atu i le fautuaga a se tasi o le aiga e vavalalata i ai, o lē sa avea ma se taitai faaaloaloga o le Ekalesia. I le mavae ai ona faalogo atu i mafuaaga o lo latou tetee, lea sa taulai atu i tulaga ma sootaga i le lalolagi o agaga po o i malo o le mamalu lea e sosoo ma le Faamasinoga Mulimuli, sa faapea atu ai lenei taitai: “O loo outou popole i mea sese. E tataua ona outou popole pe o le a outou oo i na nofoaga. Mafaufau loloto i lena mea. Afai e te oo iina, o na mea uma o le a sili ona matagofie nai lo le mea e mafai ona e mafaufauina.”

O se aoaoga faamafanafana loto tele! Faalagolago i le Alii!

Mai tusi na ou mauaina, ou te iloa o loo atuatuvaletisi isi i ni fesili e uiga i le lalolagi o agaga o le a tatou nofoia pe a tatou feoti ae tatou te lei toetutu mai. O nisi e manatu o le a faaauau pea i le lalolagi o agaga le tele o tulaga faaletino ma faafitauli o loo tatou oo i ai i lenei olaga faaletino. O le a moni lava se mea ua tatou iloa e uiga i tulaga i le lalolagi o agaga? Ou te talitonu e sa’o se tusiga a se polofesa o mataupu faalelotu

i le BYU i lenei mataupu: “Pe a tatou fesiligia i tatou lava i mea ua tatou iloa e uiga i le lalolagi o agaga mai tusitusiga faavae, o le tali e ‘lē tele lava e pei ona masani ona tatou mafaufauina.’”¹

Ioe, ua tatou iloa mai tusitusiga paia pe a oti o tatou tino e faaauau pea ona tatou ola o ni agaga i le lalolagi o agaga. Ua aoa mai foi tusitusiga paia ua vaevaeina lenei lalolagi o agaga ia i latou o ē na “amiotonu” pe na “faamaoni” i le taimi o le olaga ma i latou o ē amioleaga. Ua faamatalaina mai foi le auala e aoa atu ai e nisi o ē faatuatua le talalelei ia i latou o ē na amioleaga pe na fouvale (tagai i le 1 Peteru 3:19; Mataupu Faavae ma Feagaiga 138:19–20, 29, 32, 37). O le mea sili ona taua, ua faaali mai i faaaliga o onapo nei o le galuega o le faaolataga e agai pea i luma i le lalolagi o agaga (tagai i le Mataupu Faavae ma Feagaiga 138:30–34, 58), ma e ui e uunaia i tatou e aua ne’i faatuai lo tatou salamo i le olaga faaletino (tagai i le Alema 13:27), ae ua aoaoina foi i tatou o nisi salamo e mafai




ona faia iina (tagai i le Mataupu Faavae ma Feagaiga 138:58).

O le galuega o le faaolataga i le lalolagi o agaga e aofia ai le faasaolotoina o agaga mai le mea ua faamatalaina soo e tusitusiga paia o le “pologa.” O tagata uma i le lalolagi o agaga o loo i lalo o se ituaiga o pologa. O le faaaliga maoae a Peresitene Iosefa F. Samita, ua avea ma tusitusiga paia i le vaega 138 o le Mataupu Faavae ma Feagaiga, o loo ta’ua ai o ē maliliu amiotonu, o ē sa i ai i se setete o le “filemu” (Mataupu Faavae ma Feagaiga 138:22) a o latou tulimata’i atu i le Toetutu (tagai i le Mataupu Faavae ma Feagaiga 138:16), “sa vaai e ua maliliu i le umi o le tuuese a o latou agaga mai i o latou tino, o se pologa” (Mataupu Faavae ma Feagaiga 138:50).

E mafatia foi ē amioleaga i se pologa faaopoopo. Ona o agasala e le’i salamoina, ua latou i ai i le mea na faasino i ai le Aposetolo o Peteru o le “falepuipui” o agaga (1 Peteru 3:19; tagai foi i le Mataupu Faavae ma Feagaiga 138:42). O nei agaga ua faamatalaina o e ua “noanoatia” pe ua “faatagataotauaina” (Mataupu Faavae ma Feagaiga 138:31, 42) pe o ē e “tutuli ese i fafo i le pouliuli i fafo” ma le “taufaitagi, ma le tagiaue, ma le lilivau o nifo” a o latou faatalitali ai le toetutu ma le faamasinoga (Alema 40:13–14).

O le toetutu mo tagata uma i le lalolagi o agaga ua faamautinoa e le Toetu o Iesu Keriso (tagai i le 1 Korinito 15:22), e ui e tupu i taimi eseese mo vaega eseese. Seia oo i lena taimi atofaia, o mea ua ta’u mai e tusitusiga paia ia i tatou e uiga i gaoioiga i le lalolagi o agaga e faatatau atoa i le galuega o le faaolataga. Isi mea iti ua faaali mai. E tala’i atu le talalelei i ē lē iloa se mea, o ē lē salamo, ma ē fouvale ina ia mafai ona faasaolotoina i latou mai lo latou pologa ma agai i luma i faamanuiaga ua faapolopolo e se Tama Faalelagi alofa mo i latou.



O le pologa i le lalolagi o agaga lea e faatatau i agaga amiotonu ua liuaia, o le manaomia lea ona latou faatalitali—ma e masalo e faatagaina foi i latou e uunaia isi e faanatinati—le faatinoga o o latou sauniga sui i le lalolagi ina ia mafai ai ona papatisoina i latou ma olioli ai i faamanuiaga a le Agaga Paia (tagai i le Mataupu Faavae ma Feagaiga 138:30–37, 57–58).² O nei sauniga sui i la le tino e faamalosia ai foi i latou ia agai i luma i lalo o le pule o le perisitua e faatoatele vaega o ē amiotonu e mafai

ona tala’i atua le talalelei i agaga i le falepuipui.

E ese mai nei mea faavae, e itiiti lava ni mea o loo i ai i a tatou tusitusiga paia faavae e uiga i le lalolagi o agaga lea e sosoo ma le oti ma muamua i le Faamasinoga Mulimuli.³ O a la nisi mea ua tatou iloa e uiga i le lalolagi o agaga? E toatele tagata o le Ekalesia na maua ni faaaliga po o isi musumusuga e faailoa atu ai ia i latou le auala e faagaoioi ai mea pe faatulaga i le lalolagi o agaga, ae o nei aafiaga faaleagaga faaletagata



lava ia e le tatau ona malamalama i ai pe aoao atu o ni aoaoga faavae aloaia a le Ekalesia. Ma o le mea moni, o loo anoanoai masalosologa o tagata o le ekalesia ma isi o loo i ai i puna o lomiga e pei o tusi o aafiaga toetoe oo i le oti.⁴

E tusa ai ma nei mea uma, ua taua ai le manatuaina o lapataiga atamai a Elder D. Todd Christofferson ma Elder Neil L. Andersen i savali o le konafesi aoao na muamua atu. Sa aoao mai Elder Christofferson: “E tatau ona manatuaina e le o faamatalaga uma e faia e se taitai o le Ekalesia i le taimi ua tuanai, po o le taimi nei, e ao ona avea ma se aoaoga faavae. Ua malamalama lava i le tulaga aoao o le Ekalesia o se faamatalaga e fai e se taitai i se sauniga se tasi e tele lava ina fai ma ona manatu patino, e ui sa lelei ona mafaufauina, ae e le avea ma se faamatalaga aloaia mo le Ekalesia atoa.”⁵

I le konafesi na sosoo ai, sa aoao mai ai e Elder Andersen lenei mataupu faavae: “O le aoaoga faavae, e aoaoina e uso uma e toa 15 o le Au Peresitene Sili

ma le Korama a le Toasefululua. E le o natiaina i se parakalafa faanenefu o se lauga.”⁶ O le folafolaga i le aiga, na sainia e perofeta, tagatavaai, ma talifaa-aliga e toa 15, o se faataitaiga matagofie lea o lenei mataupu faavae.

E ese mai se mea ua aloaia e pei o le folafolaga i le aiga, o aoaoga faaperofeta a Peresitene o le Ekalesia, e faamautu e isi perofeta ma aposetolo, o se faataitaiga foi lea o lenei mea. E tusa ai ma tulaga i le lalolagi o agaga, na tuu mai ai e le Perofeta o Iosefa Samita ni aoaoga se lua e latalata i le faaiuga o lana auau-naga ia na aoao soo mai e ē na sosoo ma ia. O se tasi o nei aoaoga, o lana aoaoga i le lauga a King Follett e faapea o tagata o le aiga o ē amiotonu o le a toe faatasi i le lalolagi o agaga.⁷ O le isi o le faamatalaga lenei i se maliu i le tausaga mulimuli o lona soifuaga: “O agaga o ē amiotonu e faaecaina i se galuega sili atu ma mamalu atu . . . [i le] lalolagi o agaga. . . E le o mamao i latou mai ia i tatou, ma e iloa ma malamalama i o

tatou mafaufauga, lagona, ma taga, ma e tele ina tiga i latou ona o ia lagona.”⁸

Ae a la le fesili e pei ona ou ta’ua muamua e uiga i le mea e nonofo ai agaga? Afai o lenei fesili e foliga mai e ese ā pe faatauvaa ia te oe, mafaufau i le tele o au lava fesili, po o fesili foi na ua faaosoosoina oe e tali e fua i se mea na e faalogo i ai mai se isi tagata i se taimi ua tuanai. Mo fesili uma e uiga i le lalolagi o agaga, ou te fautua atu ni tali se lua. *Muamua*, manatua e alofa le Atua i Lana fanau ma o le a mautinoa e faia mea silisili mo i tatou taitoatasi. *Lua*, manatua le aoaoga masani lenei o le Tusi Paia, lea na sili ona aoga ia te a’u i le taulimaina o fesili e leai ni tali:

“Ia e faatuatua ia Ieova ma lou loto atoa; a e aua le faalagolago i lou lava atamai.

“Ia e manatua o ia i ou ala uma, ona faatonuina ai lea e ia lava ou ala.” (Faataoto 3:5–6).

Sa faapena foi ona faaii e Nifae lana salamo [psalm] maoae i upu nei, “Le Alii e, ua ou faalagolago ia te oe, ma o le a ou faalagolago pea ia te oe e faava-vau.” O le a ou lē tuu atu lo’u faalagolago i le lima o le tagata” (2 Nifae 4:34).

E mafai ona tatou tomanatu faalilolilo uma e uiga i tulaga i le lalolagi o agaga pe talanoaina foi nei fesili po o isi fesili e leai ni tali i faatulagaga faale-aiga po o isi faatulagaga vavalalata. Ae aua ne’i o tatou aoao atua pe faaaoaga e fai ma aoaoga faavae aloaia mea e le tutusa ma tulaga faatonuina o aoaoga faavae aloaia. O le faia o lenei mea e le faalateleina ai le galuega a le Alii ma e ono faalotovaivaia ai tagata mai le saili atu i lo latou lava mafanafana po o le faagaecetiaina e ala i faaaliga faaletagata lava ia ua sauniaina e le fuafuaga a le Alii mo i tatou taitoatasi. O le soona faalagolago i aoaoga faaletagata lava ia po o masalosologa e ono tosoeseina ai i tatou mai le gauai atu i le aoaoina ma

taumafaiga ia o le a faalateleina ai lo tatou malamalamaaga ma fesoasoani ai ia i tatou ia agai i luma i luga o le ala o feagaiga.

O le faalagolago i le Alii o se aoaoga masani ma moni i Le Ekalesia a Iesu Keriso o le Au Paia o Aso e Gata Ai. O le aoaoga lena a Iosefa Samita ina ua oo uluai Au Paia i sauaga matuia ma le tele o faafitauli lemafaatoilaloia.⁹ O loo avea pea lena ma mataupu faavae silisili e mafai ona tatou faaogaina pe a fetaiai a tatou taumafaiga e aoao po o a tatou tausinioga e saili le mafanafana, ma faafitauli i mataupu e le'i faaalua maia pe le'i taliaina foi e avea ma aoaoga faavae aloaia o le Ekalesia.

O lena mataupu faavae e tasi e faatautau i fesili e leai ni tali e uiga i faamauga i le isi olaga e sosoo ai po o fetuunaiga manaomia ona o mea e tutupu po o soligatulafono i le olaga faaletino. E matua anoanoai mea tatou te le iloa lena e na o le pau lo tatou faalagolagoga mautinoa o le faatuatua lea i le Alii ma Lona alofa mo Ana fanau.

I le faaiuga, o le mea ua tatou iloa e uiga i le lalolagi o agaga, o le galuega o le faaolataga a le Tama ma le Alo o loo faaauau pea iina. Na amatalia e lo tatou Faaola le galuega o le folafola atu o le saolotoga i ē ua faatagataotauaina (tagai i le 1 Peteru 3:18–19; 4:6; Mataupu Faavae ma Feagaiga 138:6–11, 18–21, 28–37), ma o lena galuega e faaauau pea pe a faaauau pea ona tala'i atu le talalelei e avefau agavaa ma ta'uogaina, e aofia ai le salamo, ia i latou o loo manaomia pea ona aafiaga o le faamamaina (tagai i le Mataupu Faavae ma Feagaiga 138:57). O le faamoemoega o na mea uma o loo faamatalaina i le aoaoga faavae aloaia a le Ekalesia, na tuuina mai i faaaliga o ona po nei.

“O e e salamo o e ua oti o le a togilolaina, e ala i le usiusitai i sauniga o le maota o le Atua,

“Ma a uma ona latou totogi o le sala o a latou solitulafono, ma mulumulu mamā, o le a latou maua se tau i tusa ma a latou galuega, aua o i latou o ni suli o le olataga” (Mataupu Faavae ma Feagaiga 138:58–59).

O le tiute o i tatou taitoatasi o le aoao atu lea o le aoaoga faavae o le talalelei toefuataiina, tauti i poloaiga, alofa ma fesoasoani atu i le tasi ma le isi, ma faia le galuega o le faaolataga i malumalu paia.

Ou te molimau atu i le moni o mea sa ou talanoa atu ai iinei atoa ai ma upumoni ua aoaoina ma o le a aoaoina i lenei konafesi. Ua mafai nei mea uma ona o le Togiola a Iesu Keriso. E pei ona tatou iloa mai faaaliga o aso nei, o Ia “ua faamamaluina le Tama, ma *laveai galuega uma a ona aao*” (Mataupu Faavae ma Feagaiga 76:43; faaopoopo le faamamafa). I le suafa o Iesu Keriso, amene. ■

FAAMATALAGA

1. “What’s on the Other Side? A Conversation with Brent L. Top on the Spirit World,” *Religious Educator*, vol. 14, no. 2 (2013), 48.
2. Tagai i *Aoaoga a le Perofeta o Iosefa Samita*, sel.

Joseph Fielding Smith (1976), 309–10; Joseph Smith, “Journal, December 1842–June 1844; Book 2,” p. 246, The Joseph Smith Papers, josephsmithpapers.org.

3. O se faaaliga ia Iosefa Samita e tele ina ta’ua e uiga i le lalolagi o agaga e faapea, “O lea lava mafutaga ua i ai ia te i tatou iinei o le a i ai ia te i tatou iina” (Mataupu Faavae ma Feagaiga 130:2). E ono faamatalaina e lenei mea se malo o le mamalu nai lo le lalolagi o agaga, ona e talu ai e faaauau pea, “Ac o le a nao na faatasia ma le mamalu e faavavau, o se mamalu e lē o ia i tatou i le taimi nei” (fuaiupu e 2).
4. Mo se faataitaiga, George G. Ritchie, *Return from Tomorrow* (1978) and Raymond Moody, *Life after Life* (1975).
5. D. Todd Christofferson, “O Le Mataupu Faavae a Keriso,” *Liahona*, Me 2012, 88; tagai foi i le Joseph F. Smith, *Gospel Doctrine*, 5th ed. (1939), 42. Tagai i le, mo se faataitaiga, le faamatalaga i le Mataupu Faavae ma Feagaiga 74:5 e uiga i se aoaoga patino a le Aposetolo o Paulo.
6. Neil L. Andersen, “Tofotofoina o lo Outou Faatuatua,” *Liahona*, Nov. 2012, 41.
7. Tagai i *Aoaoga a Peresitene o le Ekalesia: Iosefa Samita* (2007), 175.
8. *Talafaasolopito o le Ekalesia*, 6:52; o loo aofia i *Aoaoga a Peresitene o le Ekalesia: Iosefa Samita*, 326; e tele ina ta’ua soo, e pei o le Henry B. Eyring, *Ia Faalatalata Atili i le Atua* (1997), 122; tagai foi i *Aoaoga a Peresitene o le Ekalesia: Polika Iaga* (1997), mataupu 38, “O Le Lalolagi o Agaga.”
9. Tagai i *Aoaoga: Iosefa Samita*, 318.





TUUINA ATU E PERESITENE HENRY B. EYRING
Fesoasoani Lua i le Au Peresitene Sili

Lagolagoina o le Au Pulega Aoao, Fitugafulu Eria, ma Taitai Aoao o le Ekalesia

Uso e ma tuafafine, e tuuina atu ia tatou lagolagoina Russell Marion Nelson o le perofeta, tagatavaai, ma talifaaaliga ma o le Peresitene o Le Ekalesia a Iesu Keriso o le Au Paia o Aso e Gata Ai; Dallin Harris Oaks o le Fesoasoani Muamua i le Au Peresitene Sili; ma Henry Bennion Eyring o le Fesoasoani Lua i le Au Peresitene Sili.

O i latou e finagalo ai, ia faailoa mai.

O i latou e faatuiese, pe afai e i ai, ia faailoa mai.

E tuuina atu ia tatou lagolagoina Dallin H. Oaks o le Peresitene o le Korama a Aposetolo e Toasefululua ma M. Russell Ballard o le Sui Peresitene o le Korama a Aposetolo e Toasefululua.

O i latou e finagalo i ai, faamolemole ia faailoa mai.

A i ai se faatu'iese ia faailoa mai.

E tuuina atu ia tatou lagolagoina uso nei o le Korama a Aposetolo e Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit Walter Gong, ma Ulisses Soares.

O i latou e finagalo ai, faamolemole ia faailoa mai.

Ai sē faatuiese, ia faailoa mai.

E tuuina atu ia tatou lagolagoina ia fesoasoani i le Au Peresitene Sili ma le Korama a Aposetolo e Toasefululua o ni perofeta, tagatavaai, ma talifaaaliga.

O i latou uma e lagolagoina, faamolemole faailoa mai.

O e au ese ai, pe afai e i ai, ia faailoa mai.

E tuuina atu ina ia tatou faamaloloina ma le agaga faafetai uso nei mo a latou auaunaga tuuto, Elders Wilford W. Andersen, Kim B. Clark, Lawrence E. Corbridge, Claudio R. M. Costa, Bradley D. Foster, O. Vincent Haleck, Donald L. Hallstrom, Steven E. Snow, ma Larry Y. Wilson o Fitugafulu o le Pulega Aoao ma faamatuu atu ia i latou le tulaga o le malolo ma le mamalu.

O i latou e fia aufaatasi ma i matou e faailoa atu le lotofaafetai i nei Uso ma o latou aiga mo le latou auaunaga ofoofogia, faamolemole ia faailoa mai.

E tuuina atu ina ia tatou faamalolo mai uso nei o ni Fitugafulu Eria: Julio C. Acosta, Blake R. Alder, Alain L. Allard, Omar A. Alvarez, Taiichi Aoba, Carlos F. Arredondo, Aley K. Auna Jr., Grant C. Bennett, Michael H. Bourne, Rómulo V. Cabrera, Wilson B. Calderón, Hernando Camargo,





SAUNIA E ELDER DAVID A. BEDNAR
O Le Korama a Aposetolo e Toasefululua

José C. F. Campos, Nicolás Castañeda, Walter Chatora, Zeno Chow, Robert J. Dudfield, J. Kevin Ence, Meliula M. Fata, K. Mark Frost, Claude R. Gamiette, Maurício G. Gonzaga, Leonard D. Greer, Jose L. Isaguirre, Tae Gul Jung, Sergio L. Krasnoselsky, Milan F. Kunz, Bryan R. Larsen, G. Kenneth Lee, Geraldo Lima, W. Jean-Pierre Lono, Khumbulani Mdletshe, Dale H. Munk, Norman R. Nemrow, Yutaka Onda, Wolfgang Pilz, Raimundo Pacheco De Pinho, Gennady N. Podvodov, Abraham E. Quero, Marco A. Rais, Steven K. Randall, Francisco J. Ruiz de Mendoza, Edwin A. Sexton, Raúl H. Spitale, C. Walter Treviño, 'Aisake K. Tukuafu, Juan A. Urrea, Raul S. Villanueva, ma Leonard Woo.

O e fia au faatasi ma i matou e faailoa atu le lotofaafetai mo la latou auauaunaga silisili, faamolemole faailoa mai.

E tuuina atu ina ia tatou lagolago-ina uso nei o ni Fitugafulu Eria fou: Michel J. Carter, Alfred Kyungu, R. Pepper Murray, Ryan K. Olsen, ma Iotua Tune.

O i latou e finagalo ai ia faailoa mai.

O i latou e faatuiese, pe afai e i ai, ia faailoa mai.

E tuuina atu ia tatou lagolagoina isi Au Pulega Aoao, Fitugafulu Eria, ma Taitai Aoao o le Ekalesia e pei ona i ai nei.

O i latou uma e lagolagoina, faamolemole faailoa mai.

O e faatuiese, pe afai o i ai, i le faailoga lava lea e tasi.

O i latou na faatuiese i soo se tofiga e tatau ona faafesootai o latou peresitene o siteki.

Uso e ma tuafafine, matou te faafetai atu mo lo outou faatuatua ma tatalo faifai pea mo taitai o le Ekalesia. ■

Mataala i le Tatalo e Le Aunoa

(Alema 34:39; Moronae 6:4; Luka 21:36)


E manaomia le mataala i taimi uma e faafetaia'ia ai le faamalieina i nai mea ua i ai ma le faasamasamanoa.

Ou te tatalo ma le faamaoni mo le fesoa-soani a le Agaga Paia mo outou ma a'u a o tatou olioli ai i le tapuai faatasi.

Ia Aperila o le 1976, sa saunoa patino ai Elder Boyd K. Packer i le autalavou o le Ekalesia i le konafesi aoao. I lana savali lauiloa na faaulutalaina "Korokotaila Faaleagaga," sa ia faamatalaina ai le taimi sa i ai i se tofiga i Aferika sa ia matauina ai ni korokotaila e le iloa e mata o loo faatalitali e lamaina nisi ta'umamaina. Ona ia faatatauina lea o korokotaila ia Satani, o loo lamaina le autalavou le faateete i le natiaina o le natura lamatia o le agasala.

Sa 23 o'u tausaga i le taimi na tuu mai ai e Elder Packer lena lauga, ma sa ma tulimatai atu ma Susan i le fanau mai o le ma tamaitiiti muamua i ni nai aso. Sa faagaecetia i ma'ua i le aano o lana savali e uiga i le aloese mai le agasala ma le ala atamai na ia faaogaina ai amioga masani o manu e aoao ai se lesona taua faaleagaga.

Sa ma faimalaga foi ma Susan i Aferika i le tele o tofiga. Ma sa ma maua



ai ni avanoa e vaai ai i manu ofoofogia o loo ola i lena konetineti. I le manatuaaina ai o le aafiaga o le lauga a Elder Packer i o ma olaga, sa ma taumafai ai e matau ma aoao ni lesona mai amioga a manu Aferika.



Ou te fia faamatala atua ni uiga ma ni togafiti a ni cheetah se lua sa ma matamata i ai ma Susan a'o tuliina ni manu e ai ma faasoa atu nisi o mea na ma mataua i le ola ai i aso uma i le talalelei a Iesu Keriso.

Cheetah ma Anetelo (Topis)

O cheetah o manu sili ia ona saosaoa i le lalolagi ma e oo atu lona saosaoa i le 75 maila i le itula (120 km/h). O nei manu mananaia e mafai ona oso vave mai se mea o tu ai ma tamoe saosaoa i le 68 maila i le itula (109 km/h) i lalo ifo o le tolu sekone. O cheetah o manufai e toloto atu i manu na te aina ma tamoe i sina mamao puupuu e tuli ma osofai.

Toeitiiti lua itula sa ma faaaluina ma Susan e matamata ai i ni cheetah se lua o toloto atu i se vaega tele o anetelo, o anetelo e sili ona taatele ma salalau solo i Aferika. O le vao uumi ma mamago o le togavao o Aferika sa enaena pei e auro ma sa toetoe a lilofia atoa ai manufai pe a latou tulia se vaega o anetelo. Sa valavala cheetah mai le tasi ma le isi pe tusa ma le 100 iata (91 m) le mamao ae sa galulue faatasi i le la tuliga.

A o nofo sa'o i luga le tasi cheetah i le vao ma le minoi, sa lafi i lalo le isi cheetah i le palapala ma toloto lemu ia latalata atu i anetelo e le o iloa le mea o tupu. Ona oo lea ina mou atu le cheetah lea sa nofo sa'o i luga i le vao i le taimi tonu na nofo sa'o ai i luga le isi cheetah. O le mamano felafolafoai o le tasi cheetah sa lafi i lalo ma toloto atu i luma a o nofo sa'o i luga le isi cheetah i le vao, sa faaauau pea mo se taimi umi. O le leleoa ma le tomai faimailei o le fuafuaga sa faamoemoe e faalavelave ma faasese ai anetelo ma mafai ai ona aveesea lo latou taulai mai le lamatiaga o loo latalata atu. I le onosai ma le tumau, sa galulue ai cheetah e lua o se vaega e pu'e mai le la meaai e sosoo ai.

Sa tutu i le va o le vaega tele o anetelo ma cheetah ua lalata atu, o ni anetelo matutua ma malolosi atu, sa tutu o ni leoleo i luga o ni maupe'epu'e teremate (teremite mounds). O le vaaiga manino o le togavao mai tama'i maupe'epu'e sa mafai ai e nei anetelo leoleo ona vaavaai atu mo ni faailo o se lamatiaga.

Ona faafuasei lea ona iloa atu cheetah ua i ai i le mamao e osofai ai, sa liliu ai le vaega atoa o anetelo ma

taufetuli ese. Ou te le iloa pe faapefea ona fesootai atu anetelo leoleo i le vaega toatele lea, ae sa avatu lava se lapataiga, ma sa o atu ai anetelo i se nofoaga saogalemu.

Ma o le a la le isi mea na faia e cheetah? Sa aunoa ma le faatuai, sa toe amata ai foi e cheetah e lua le la mamano felafolafoai o le tasi cheetah sa lafi i lalo ma toloto atu i luma a o nofo sa'o i luga le isi cheetah i le vao. Sa faaauau le mamano o le tuliga. La te le'i taofi. La te le'i malolo pe fai sina toma. Sa la tumau i le mulimulita'ia o le la fuafuaga o le faalavefauga ma le taufaasese. Sa ma vaaia ma Susan le mou ese o cheetah i se mamao, ma sa agai latalata atu pea i le vaega o anetelo.

I lena po sa ma faia ai ma Susan se talanoaga le mafaagaloina e uiga i mea sa ma matauina ma aoaoina. Sa ma talanoaina foi lena aafiaga ma le ma fanau ma fanau a fanau ma faailo le tele o lesona taua. Ou te faamatala atu nei lesona e tolu o na lesona.

Lesona #1—la Faateete i Togafiti Taufasese a le Tiapolo

Ia te a'u, o cheetah o ni manu e sasa'o tino, aulelei, ma mata'ina. O le pa'u pei e tau samasama ma efuefu pae-pae ma togitogi uliuli o le cheetah e fai ma togafiti matagofie lea e toetoe e le vaaia ai nei manu a o latou toloto atu i manu latou te aina i togavao o Aferika.

I se ala faapena, o manatu ma amioga lamatia faaleagaga e mafai ona foliga mai e faatosina, manaomia, pe faafiafiaina. O lea, i lo tatou lalolagi faaonapo nei, ua manaomia ai e i tatou taitoatasi ona nofouta i le taufaasese o le leaga e faafoliga e lelei. E pei ona lapatai mai Isaia, "Oi talofa ia te i latou o e fai mai, ua lelei le mea leaga, ae leaga le mea lelei, o e fai ma malamalama le pouliuli, ae fai foi ma pouliuli le malamalama; o e fai ma mea suamalie

le mea oona, ae fai ma mea oona le mea suamalie!”¹

I se vaitau o manatu feūa’i, lea ua lagolagoina ai le faatamaia o le paia o le ola o le tagata o se mea sa’o ma o fetauaiga ua faamatalaina o le saolotoga, ua matua faamanuiaina ia i tatou e ola i lenei tisipenisione o aso e gata ai lea e mafai ai ona susulu pupula le malamalama o le talalelei toefuataiina i o tatou olaga ma fesoasoani ai ia i tatou ia iloatino mea leaga taufaasese ma faalavefau a le fili.

“Aua o i latou o e e popoto ma ua latou talia le upumoni, *ma ua latou ave le Agaga Paia mo o latou taiala, ma sa lei faaseseina*—e moni Ou te fai atu ia te outou, o le a lē tatuuina i latou i lalo ma lafo i le afi, ae o le a latou gafatia le aso.”²

Lesona #2—Ia Mataala ma Ia Nofouta

Mo se anetelope, o sina taimi lava e le faaeteete ai pe le gauai ai e mafai ona osofaia vave ai e se cheetah. E faapena foi, o le faamaliecaina faaleagaga i nai mea ua i ai ma le faasamasamanoa e lamatia ai i tatou i togafiti atamai a le fili. O le lē manafanafa faaleagaga na te valauliaina le lamatiaga sili i o tatou olaga.

Na faamatalaina e Nifae le auala i aso e gata ai o le a taumafai ai Satani e faaōleōle ma faamoe le fanau a le Atua i se lagona sese o le saogalemu faaletino, “o le a latou fai mai: Ua lelei mea uma i Siona; ioe, ua manuia Siona, ua lelei mea uma—*ma e faapea ona olegia e le tiapolo o latou agaga*, ma taitai lemu ese atu i latou i lalo i seoli.”³

E manaomia le mataala i taimi uma e faafetaia’ia ai le faamaliecaina i nai mea ua i ai ma le faasamasamanoa. O le mataala, o le tulaga po o le faatinoga lea o le *vaavaai pea ma le faaeteete* mo lamatiaga po o faigata e ono oo mai. Ma o le vaavaai pea o lona uiga o le faatinoga o le *mataala* e leoleo ma puipui. I se uiga faaleagaga, e manaomia ona

tatou mataala ma ia nofouta i uunaiga a le Agaga Paia ma faailoilo e oo mai mai leoleo a le Alii i luga o olo.⁴

“Ioe, ma ou te apoapoai atu foi ia te outou . . . ia outou mataala i le tatalo e le aunoa, ina ia le taitaieseina outou e faaososoga a le tiapolo, . . . aua faauta, na te le tauia outou i se mea lelei.”⁵

O le taulai atu o o tatou olaga i le Faaola ma Lana talalelei e mafai ai ona tatou faatolalaina le lagona o le tagata natura ina ia matamoe ma paie faaleagaga. E pei ona faamanuiaina i tatou i mata e vaai ai ma taliga e faalogo ai,⁶ e mafai e le Agaga Paia ona faateleina lo tatou gafatia e vaai ai ma faalogo i taimi tatou te le masani ai ona mafaufau e manaomia ona tatou vaai ma faalogo, po o le taimi tatou te le mafaufau ai i se mea e mafai ona vaaia pe faalogoina.

“O le mea lea, ia mataala ai, ina ia outou saunia.”⁷

Lesona #3—Malamalama i le Faamoemoega o le Fili

O le cheetah o se manufecai lea e masani ona lamaina isi manu e ai. O le

aso atoa, aso uma, o se manufecai lava le cheetah.

O Satani “o le fili o le amiotonu ma i latou e saili atu e fai le finagalo o le Atua.”⁸ O le aso atoa, ma aso uma ua na o le pau lona faanaunautaga ma le faamoemoega atoa o le faia lea o atalii ma afafine o le Atua ia pagatia e pei o ia lava.⁹

O le fuafuaga o le fiafia a le Tama ua mamanu e tuuina mai ai le taitaiga mo Ana fanau, e fesoasoani ai ia i latou ia lagonaina le olioli tumau, ma ia aumaia saogalemu ai i latou ia te Ia i le aiga i ni tino toetu ma faacaina. O loo galue le tiapolo e fai ia fenumiai ma ia lē fiafia atalii ma afafine o le Atua ma ia faasalaveia lo latou alualu i luma e faavavau. O loo galue ma le lē malolo le fili e osofai elemene o le fuafuaga a le Tama lea e sili ona ita i ai.

O Satani e leai sona tino, ma ua muta lona alualu i luma e faavavau. E pei lava ona taofia e se punivai le vai e tafe i se vaitafe, ua faapena foi ona punitia le alualu i luma e faavavau o le fili aua e leai sona tino faitino. Ona o



Mo se anetelope, o sina taimi lava e le faaeteete ai pe le gauai ai e mafai ona osofaia vave ai e se cheetah. E faapena foi, o le faamaliecaina faaleagaga i nai mea ua i ai ma le faasamasamanoa e lamatia ai i tatou i togafiti atamai a le fili.




“Ma ina ia mafai ona outou sao mai le mana o le fili.”¹³

Valaaulia, Folafolaga, ma le Molimau

E pei lava o le taua o lesone e mafai ona aoaina mai le matauina o amioga a cheetah ma anetelope, e faapena foi ona tataua ia i tatou taitoatasi ona tagai mo lesone ma lapataiga o loo maua i mea faigofie e tutupu i le olaga i aso uma. Pe a tatou saili mo se mafaufau ma se loto e tatala atu ia maua le taitaiga faalelagi e ala i le mana o le Agaga Paia, o le a mafai e nisi o aoaoga aupito silisili e mafai ona tatou mauaina ma le tele o lapataiga sili ona mamana e mafai ona malupuipua ai i tatou, ona tupu mai i o tatou lava aafiaga masani. O loo i ai ni faataoto mamana i tusitusiga paia ma i o tatou olaga i aso taitasi.

Ua ou faamamafa atua na o le tolu o le tele o lesone e mafai ona faailoaina i le aafiaga sa ma maua ma Susan i Aferika. Ou te valaaulia ma uunaia outou ia mafaufau i lenei tala i cheetah ma anetelope ma faailoa nisi lesone faaopoopo mo oe ma lou aiga. Faamolemole ia manatua i taimi uma o lou



lona fouvale, ua teenaina ai e Lusifelo mo ia lava ia faamanuiga uma ma aafiaga faaletino e mafai ona maua i se tino o aano ma ivi. O se tasi o faauigaga malosi faaletusi paia o le upu *malaia* o loo faaalia i lona le mafaia lea ona faauau ona alualu i luma ma avea e pei o lo tatou Tama Faalelagi.

Talu ai o se tino faaletino e matua totonugalemu i le fuafuaga o le fiafia a le Tama ma lo tatou atina’ega faaleagaga, ua saili ai Lusifelo e faalavelaveina lo tatou alualu i luma e ala lea i le faaososoina o i tatou e faaoga ma le faaletatau o tatou tino. Sa aoa mai Peresitene Russell M. Nelson o le saogalemu faaleagaga e taoto atoa lea i le “aia lava ne’i faia le laasaga muamua faatosina e alu ai i le mea e le tatou ona e alu ai ma le faia o le mea e le tatou ona e faia.” . . . I le avea ai ma tagata soifua e tofua i tatou uma ma manaoga fiaai [faaletino] e manaomia mo lo tatou ola. O nei manaoga fiaai e matua taua lava mo le faafualoaina o le ola. O le ala le mea a le fili e fai? . . . Na te osofaia i tatou e ala i o tatou manaoga fiaai.

Na te faaososoina i tatou e ‘ai mea e le tatou ona tatou aai ai, e inu mea e le tatou ona tatou inuina, ma fiafia i mea e le tatou ona tatou fiafia i ai!”¹⁰

O se tasi o mea ua iloagofie o le faavavau, o le fili o le ua matua pagatia tonu ona e leai sona tino faaletino, na te valaaulia ma faatosinaina i tatou ia tatou pagatia faatasi ma ia e ala i le faaaogaina ma le faaletatau o o tatou tino. O le mea faigaluega tonu lava lea e le maua ia te ia ma e le mafai ona ia faaaogaina ua avea ma faamoemoega autu o ana taumafaiga e toso atu i tatou i le faafanoga faaletino ma faaleagaga.

O le malamalama i faamoemoega o se fili e taua i sauniuniga mataalia mo ni osofaiga e ono oo mai.¹¹ O le mea moni ona sa iloa e Kapeteni Moronae le faamoemoega o sa Lamana, sa ia saunia ai e fetaiai ma i latou i le taimi na latou o mai ai ma sa manumalo ai.¹² Ma o lena mataupu faavae ma le folafolaga e tasi e faatatau foi ia i tatou taitoatasi.

“Afai ua outou saunia, o le a outou le matatau.



SAUNIA E ELDER RUBÉN V. ALLIAUD
O Le Fitugafulu

aiga o le nofoaga autu moni lea mo le aoaoina ma le ola ai i le talalelei.

A outou tali atu i le faatuatua i lenei valaaulia, o le a oo atu manatu musuia i o outou mafaufau, o le a maena lagona faaleagaga i o outou loto, ma o le a outou iloina faatinoga e tatau ona faia pe faaaauu ina ia mafai ai ona outou “ave i o outou luga [le] ofutau atoa [o le Atua] ina ia mafai ona outou talitalia le aso leaga, ina ua uma lea ona outou faia o mea uma, ina ia mafai ona outou tutumau.”¹⁴

Ou te folafola atu o faamanuiaga o sauniuniga mataalia ma le puipuiga faaleagaga o le a tafe atu i lou olaga pe a e mataala i le tatalo e le aunoa ma nofouta.

Ou te molimau atu o le fetaomi atu i luma i le ala o feagaiga e maua ai le saogalemu faaleagaga ma valaaulia ai le olioli tumau i o tatou olaga. Ma ou te molimau atu o le a lagolagoina ma faamalositia i tatou e le Faaola toetu ma soifua i taimi uma o le lelei ma le leaga. Ou te molimau atu ai i nei upumoni, i le suafa paia o le Alii o Iesu Keriso, amene. ■

FAAMATALAGA

1. Isaia 5:20.
2. Mataupu Faavae ma Feagaiga 45:57; faaopoopo le faamamafa.
3. 2 Nifae 28:21; faaopoopo le faamamafa.
4. Tagai i le Esekiele 33:7; Mataupu Faavae ma Feagaiga 101:44–58; Taiala i Tusitusiga Paia, “Leoleo, Leoleo Mamoe,” scriptures.ChurchofJesusChrist.org.
5. Alema 34:39.
6. Tagai i le Mataio 13:16.
7. Mataupu Faavae ma Feagaiga 50:46.
8. Taiala i Tusitusiga Paia, “Tiapolo,” scriptures.ChurchofJesusChrist.org.
9. Tagai i le 2 Nifae 2:27.
10. Russell M. Nelson, in “Advice from the Prophet of the Church to Millennials Living in a Hectic World,” Feb. 18, 2018, newsroom.ChurchofJesusChrist.org.
11. Tagai i le Alema 2:7–13.
12. Tagai i le Alema 43:29–33, 48–50.
13. Mataupu Faavae ma Feagaiga 38:30–31.
14. Mataupu Faavae ma Feagaiga 27:15.

Maua e ala i le Mana o le Tusi a Mamona

E tatau ona lagona e tagata uma ma ia maua e le mana o upumoni o loo i ai i le Tusi a Mamona.

Pe a ou asiasi atu i tagata liliu mai i o latou fale, o se tasi o fesili ou te fiafia lava e fesili soo ia i latou e pe na faapefea ona latou iloa ma o latou aiga le Ekalesia ma pe na faapefea ona oo ina latou papatiso. E le afaina pe o le tagata sa i ai i lenei taimi o se tagata e toaga mai pe e lei toe auai mai i le lotu mo le tele o tausaga. O le tali lava e tasi: faatasi ma se ataata ma le pupula o o latou fofoga, e amata ona latou faamatala ai le tala o le auala na maua ai i latou. O le mea moni, e foliga mai o le tala o le liuaina o le tala lava e tasi o le auala na maua ai i tatou.

O Iesu Keriso Lava Ia o le Alii o mea leiloloa. E popole o Ia mo mea e

leiloloa. O le mafuaaga moni lenei sa Ia aoao mai ai faataoto tatou te maua i le mataupu 15 o Luka: o le faataoto o le mamoe na leiloa, le tupe na leiloa, ma le, faataoto mulimuli, o le atalii faamaumauoa. O nei tala uma e tofua uma lava ma se mea e tutusa ai: E le afaina pe aisea ua leiloa ai. E le afaina e tusa lava pe na latou iloa o latou leiloloa. E i ai se lagona lofituina o le olioli lea na alagaina atu, “Ia tatou olioli ia; aua ua ou maua [le mea] na leiloa.”¹ I le faaiuga, e leai se mea e leiloa moni ia te Ia.²

Se’i o’u faasoa atu lava ia te outou i lenei aoauli se tasi o mea aupito sili



ona taua ia te a'u—o le tala i le auala na maua ai a'u.

A o toetiiti atoa lo'u 15, ae valaaulia a'u e lo'u uncle, o Manuel Bustos ia faaalu sina taimi ma ia ma lona aiga iinei i le Iunaite Setete. O se avanoa sili lea mo a'u e aoao ai sina Igilisi. Sa liliu lo'u uncle i le Ekalesia i le tele o tausaga na muamua atu, ma sa i ai sona agaga faafaifeautalai maoae. Masalo o le mafuaaga lea sa talanoa ai lo'u tina ia te ia, e aunoa ma lo'u iloina, ma fai i ai o le a ioe i le valaaulia i le tuutuuga e tasi: ia aua nei ona taumafai e faatalitonu a'u ia avea ma se tagata o lana Ekalesia. O i matou o Katoliko, ma ua augātupulagā o matou avea ai, ma sa leai se mafuaaga e sui ai fua. Sa ioe atoa i ai lo'u uncle ma tasi lana upu lea na oo lava i se fesili faigofie e uiga i le Ekalesia, sa ia le manao lava e tali.

Ioe, o le mea sa le mafai e lo'u uncle ma si ona toalua lelei, o Marjorie, ona aloese ai o le avea ma tagata sa i ai i laua.³

Sa tofi a'u i se potu sa i ai se potutusi telē o tusi. Sa mafai ona ou vaaia i lenei potutusi, sa i ai masalo e 200 kopi o le

Tusi a Mamona i gagana eseese, o le 20 o na tusi i le FaaSipaniolo.

I se tasi aso, i lo'u fiailoa, sa ou ave i lalo se kopi o le Tusi a Mamona i le FaaSipaniolo.

O se tasi o na kopi lea e vaivai le faavaa lanu moana vaivai, ma le ata o le agelu o Moronae i luma. Ina ua ou susueina, i le itulau muamua sa tusia ai le folafolaga lenei: “Ma pe a outou maua nei mea, ou te apoapoai atu ia te outou ia outou ole atu i le Atua, le Tamā Faavavau, i le suafa o Iesu Keriso, pe ua le moni ea nei mea; ma afai tou ole atu ma le loto faamaoni, ma le manatu moni i ai, ma le faatua-tua ia Keriso, o le a ia faaali mai le moni o ia mea ia te outou, i le mana o le Agaga Paia.”

Ona faaopoopo mai lea: “Ma o le mana o le Agaga Paia e mafai ona outou iloa ai le moni o mea uma lava.”⁴

E faigata ona faamatala le aafiaga o nei mau i lo'u mafaufau ma lo'u loto. Ma le faamaoni lava, ou te lei saili mo “le upumoni.” Sa na o a'u o se talavou, fiafia i le olaga, olioli i lenei aganuu fou.

E ui i lea, faatasi ma lena folafolaga i le mafaufau, sa amata ai ona ou faitauina faalilolilo le tusi. A o ou faitau atili, sa ou malamalama afai ou te manao moni lava ia maua se mea mai lenei aafiaga, e tatau la ona ou amata tatalo. Ma e tatou te iloa lelei uma lava le mea e tupu pe a e filifili e le gata e faitau ae tatalo foi e uiga i le Tusi a Mamona. Ia, o le mea tonu lena sa tupu ia te au. O se mea matua faapitoa ma tulagaese tele—ioe, e pei lava o le mea o loo tupu i le fia miliona o isi i le lalolagi atoa. Sa oo ina ou iloa e ala i le mana o le Agaga Paia e moni le Tusi a Mamona.

Ona ou alu atu lea i lo'u uncle e faamatala ia te ia le mea na tupu ma ua ou sauni ina ia papatisoina. Sa le mafai e lo'u uncle ona taofiofi lona te'i tele. Sa oso i totonu o lana taavale, alu atu i le malaevaalele, ma toefoi mai lea ma la'u pepa malaga i le vaalele e toe foi atu i le fale, faatasi ma se faamatalaga sa faatuātusi i lo'u tina e faapea, “E mamā a'u ma lenei mea!”

I se isi tulaga e sa'o o ia. Sa maua tonu a'u e le mana o le Tusi a Mamona.

Atonu e toatele ua maua e ala i faifeautalai ofoofogia i le lalolagi atoa, i tulaga uma e ala i auala faavavega. Pe atonu foi na maua i latou e auala atu i uo sa tuu ma le mautinoa e le Atua i o latou ala. Pe atonu foi na maua i latou e se tasi mai lenei tupulaga pe na auala mai i se tasi o o latou tuua.⁵ Po o le a lava le tulaga o i ai, ina ia alualu i luma i se liua moni faaletagata lava ia, e le pine, ae tatau ona latou oo uma i ai ma ia maua e le mana o upumoni o loo i ai i totonu o le Tusi a Mamona. I le taimi lava e tasi, e tatau ona filifili patino i latou lava e fai se tautinoga moni i le Atua o le a latou tauivi e tasi Ana poloaiga.

Ina ua ou toefoi atu i Buenos Aires, sa iloa ai e lo'u tina sa ou manao moni lava ina ia papatisoina. Talu ai sa i ai sina o'u uiga faatautee, nai lo le tetee





mai la ia te a'u, sa ia 'au ma le atamai ia te a'u. Ma e aunoa ma le iluaina, sa faia ai e ia lava lo'u faatalanoaga o le papatisoga. O le mea moni, ou te talitonu sa loloto atu lana faatalanoaga nai lo faatalanoaga ia e faatautaia e a tatou faifeautalai. Sa ia fai mai ia te a'u, "Afai e te manao ina ia papatiso, o le a ou lagolagoina oe. Ae e muamua o le a ou fai atua ni fesili, ma ou te manao ia e matua mafauafau loloto ma tali mai ma le faamaoni. E te tautino mai e te auai i le lotu i Aso Sa uma lava?"

Sa ou fai atu ia te ia, "Ioe, o le a ou faia lena mea."

O e iloa le umi o le lotu?"

"Ioe, ua ou iloa," na ou fai atu ai.

Sa ia tali mai, "Ia, afai e te papatiso, o le a ou faamautinoaina e te alu i le lotu."

Ona ia fesili mai lea ia te a'u pe ua ou loto moni lava e le inu ava malosi pe ulaula.

Sa ou tali atu, "Ioe, o le a ou tausisia foi lena mea."

Ona ia fai mai lea, "Afai e te papatiso, o le a ou mautinoia o le tulaga lava lena e i ai." Ma sa faaauau ai i lena ala i le toetoe o poloaiga uma.

Sa valaau mai lo'u uncle i lo'u tina e ta'u ia te ia e aua le popole, e le toe umi ae ou te'a ma nei lagona. Fa tausaga mulumuli ane, ina ua ou maua lo'u valaauga e auauna atu i le Misiona a Urukuei Montevideo, sa valaau atu ai lo'u tina i lo'u uncle e fesili i ai po o a fea tonu o le a te'a ai a'u ma nei lagona uma. O le mea moni e mai le taimi sa papatisoina ai a'u, sa avea lo'u tina ma se tina fiafia atu.

Sa ou iloa sa taua le Tusi a Mamona i le faagasologa o le liuaina e ala i le muai tofo i le folafolaga e faapea "o le a latalata atu ai se tagata i le Atua e ala i le usitaia o ona mataupu."⁶

Sa faamalamalama mai e Nifae le faamoemoega autu o le Tusi a Mamona i le ala lena:

"Ona ua matou galulue maelega e tusia nei mea, e faatauana atu ai ia matou fanau, ma o matou uso foi, ia talitonu ia Keriso, ma ia faalelei ma le Atua. . . .

"Ma [o lea] matou [te] tautalatala [ai] e uiga ia Keriso, ua matou olioli ia Keriso, ua matou talai atu Keriso, [ma] ua matou vavalo e uiga ia Keriso, . . . ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasala."⁷

O le Tusi a Mamona atoa ua faatumulia i lena lava faamoemoega paia e tasi.

Mo lena mafuaaga, soo se tagata faitau lava e tautino atu i se suesuega faamaoni e uiga i ai, faatasi ma se agaga o le tatalo, e le gata o le a aoao e uiga ia Keriso ae o le a aoao *mai ia* Keriso— aemaise lava pe a latou faia le faaiuga o le "faaitaia o le mana o le afioga"⁸ ma aua le vave teena ona o manatu faailogalanu o le le talitonu⁹ ona o mea ua ta'u mai e isi e uiga i mea latou te lei vaai lava i ai.

Sa saunoa Peresitene Russell M. Nelson: "A ou mafauafau i le Tusi a Mamona, ou te mafauafau i le upu *mana*. O upumoni o le Tusi a Mamona ua i ai le *mana* e faamalolo ai, faamafanafana, toefuatai, fesoasoani, faamalosia, faatoafimalie, ma faafiafia o tatou agaga."¹⁰

O la'u valaaula i lena aoauli ia i tatou uma taitoatasi, e tusa lava po o le a le umi ua avea ai tatou ma se tagata o le Ekalesia, ia faataga le mana o



SAUNIA E PERESITENE RUSSELL M. NELSON

upumoni o le Tusi a Mamona ia maua i tatou ma toe opomau i tatou ma i lea aso ma lea aso a o tatou saili atu ma le filiga mo faaaliga faaletagata lava ia. O le a ia faia pe a tatou faatagaina.

Ou te molimau atu ma le faamaoni o loo i ai i le Tusi a Mamona le atoaga o le talalelei a Iesu Keriso ma o le a faamautu mai e le Agaga Paia lona moni i lea taimi ma lea taimi i soo se tasi o e, faatasi ma se loto faamaoni, e saili atu i le malamalama e oo i le faaolataga o o latou agaga.¹¹ I le suafa o Iesu Keriso, amene. ■

FAAMATALAGA

1. Luka 15:6; tagai foi i le Luka 15:9, 32.
2. I lona tulaga lautele, o tala o tusitusiga paia mo valoaga lea e talanoa mai i le faapotopotoina o ituaiga ua leiloloa o Isaraelu (tagai ia Russell M. Nelson, “O Le Faapotopotoina o Isaraelu Ua Faataapeapeina,” *Liahona*, Nov. 2006, 79–82). E ui lava ua leiloloa, latou te le o leiloloa ia te Ia (tagai i le 3 Nifae 17:4). Ma le isi, e maitaina le iloaina latou te le o iloa o latou leiloloa pe ana le oo i le taimi ua maua ai i latou, aemaise lava pe a maua o latou faamanuiaga faapeteriaka.
3. Na ta’ua e Elder Dieter F. Uchtdorf Saint Francis o Assisi ina ua ia saunoa mai, “Talalelei i taimi uma ma pe a manaomia, faaoga upu” (“Faatalitali i le Auala i Tamaseko,” *Liahona*, Me 2011, 77; tagai foi ia William Fay ma Linda Evans Shepherd, *Share Jesus without Fear* [1999], 22).
4. Moronae 10:4–5.
5. O le tala o le liuaina o o matou tuua o la matou lava foi tala. Na aoao mai Elder William R. Walker, “O le a avea ma se mea matagofie pe afai e silafia e Au Paia uma o Aso e Gata Ai tala o le liuaina o o latou tuua” (“Ia Tutumau i Faatuatuaga,” *Liahona*, Me 2014, 97). O le mea lea, o i tatou uma lava sa i ai se auala na maua tonu ai lava pe na ala mai i o tatou tuua, e faafetai ai lo tatou Tama Faalelagi, o le e silafia le iuga mai le amataga (tagai i le Aperamo 2:8).
6. Faatomuaga i le Tusi a Mamona; tagai foi i le Alema 31:5.
7. 2 Nifae 25:23, 26.
8. Alema 31:5.
9. Tagai i le Alema 32:28.
10. Russell M. Nelson, “O Le Tusi a Mamona: Faamata e Faape’i Lou Olaga e aunoa ma Ia?” *Liahona*, Nov. 2017, 62.
11. Tagai i le 3 Nifae 5:20.

O Molimau, Korama a le Perisitua Arona, ma Vasega a Tamaitai Talavou

O fetuunaiga o le a matou faasilasila atu nei ua faamoemoe e fesoasoani i alii talavou ma tamaitai talavou ia atiae lo latou gafatia paia faaletagata lava ia.

Uso e ma tuafafine pele, ua matagofie lava le toe faatasi ai foi ma outou i lenei konafesi aoao. I le amataga o lenei vaiaso, sa faia ai ni faasilasilaga i tagata o le Ekalesia e uiga i suiga i aiaiga faavae e faatatau i tagata e mafai ona auaua

atu o ni molimau i sauniga o le papatisoga ma faamauga. Ou te fia faamamafa atua na vaega e tolu.

1. O se papatisoga sui mo se tagata ua maliu e mafai ona molimau ai soo se





tasi o loo umiaina se pepa faataga o le malumalu o loo aoga, e aofia ai se pepa faataga e tapulaa le faaaogaina.

2. Soo se tagata ua maua faacega paia o loo i ai se pepa faataga o le malumalu o loo aoga e mafai ona auauna atu o se molimau i sauniga o faamauga, mo ē o soifua po o se faamauga sui.
3. Soo se tagata o le Ekalesia ua papatisoina, e mafai ona avea ma se moli-mau i le papatisoga o se tagata o soifua. O lenei suiga e faatatau i papatisoga uma i fafo atu o le malumalu.

O nei fetuunaiga i aiaiga faavae e faatatau i faiga faavae. O aoaga faavae ma feagaiga ua faamamafaina e le masuia. E tutusa lava lo latou aafiaga i sauniga uma. O nei suiga e tatau ona matua faaleleia tele ai le auai o aiga i nei sauniga.

Ou te fia talanoa foi ia te outou i lenei taimi e faalauiloa atu fetuunaiga e faatatau i o tatou talavou ma o latou taitai.

Tou te manatua na ou valaauliaina le autalavou a Le Ekalesia a Iesu Keriso o le Au Paia o Aso e Gata Ai ia auai i le

autau talavou a le Alii ia auai ai i le galuega silisili i luga o le lalolagi i le asō—le faapotopotoina o Isaraelu.¹ Na ou tuuina atu lenei valaauliaina i a tatou autalavou ona e matua maeu le faamanuiaina o i latou i le aapa atu i isi ma faasoa atu mea latou te talitonu i ai i se faiga faagauloto. O le galuega o le faapotopotoina o se vaega taua o le fesoasoani ina ia saunia le lalolagi ma ona tagata mo le Afio Faalua Mai o le Alii.

I uarota taitasi, o le autau talavou a le Alii e taitai e se epikopo, o se auauna tuuto a le Atua. O lona tiutetauave muamua lava ma le sili o le tausua lea o alii talavou ma tamaitai talavou o lana uarota. O le epikopo ma ona fesoasoani e taitaia le galuega a korama o le Perisitua Arona ma vasega a Tamaitai Talavou i le uarota.

O fetuunaiga o le a matou faasilasila atu nei ua faamoemoe e fesoasoani i alii talavou ma tamaitai talavou ia atiae lo latou gafatia paia faaletagata lava ia. Matou te mananao foi ia faamalositia korama a le Perisitua Arona ma vasega

a Tamaitai Talavou ma tuuina atu le lago-lago i epikopo ma isi taitai matutua a o latou auauna atu i lenei tupulaga faiae.

O le a talanoaina nei e Elder Quentin L. Cook o le Korama a Apisetolo e Toasefululua ia fetuunaiga e faatatau i alii talavou. Ma o le po nei, i le sauniga aoa a tamaitai, o le a talanoaina ai e Sister Bonnie H. Cordon, le Perisitene Aoao o Tamaitai Talavou ia fetuunaiga e faatatau i tamaitai talavou.

Ua autasi le Au Perisitene Sili ma le Toasefululua i le faamaoniaina o nei tau-mafaiga e faamalositia ai a tatou talavou. E maeu tele lo tatou alolofa ia i latou ma tatalo mo i latou. O i latou o le “faamoemoe o Isaraelu, le autau a Siona, fanau o aso valaioa.”² Tatou te faailoa atu lo tatou talitonuga i a tatou talavou ma lo tatou lotofaafetai mo i latou. I le suafa paia o Iesu Keriso, amene. ■

FAAMATALAGA

1. Tagai ia Russell M. Nelson, “Faamoemoe o Isaraelu” (faigalotu a le autalavou i le lalolagi atoa, Iuni 3, 2018), HopeofIsrael.ChurchofJesusChrist.org.
2. “Faamoemoe o Isaraelu,” *Viiiga*, nu. 161.



SAUNIA E ELDER QUENTIN L. COOK
O Le Korama a Aposetolo e Toasefululua

O Fetuunaiga e Faamalosia ai le Autalavou

O le a toatele atu alii talavou ma tamaitai talavou e taulimaina ma le manuia lenei lu'i ma tumau ai i luga o le ala o feagaiga ona o lenei taulaiga sa'olele atoa i a tatou talavou.

Faafetai lava, Peresitene Nelson pele, mo lena taiala fafia faafaaaliga e faata-tau i molimau i papatisoga ma le taita-iga ua e talosagaina i matou ia tausoa faatasi e fesoasoani ai e faamalosia le autalavou ma atiae lo latou gafatia paia.

Ae ou te le'i faasoa atua na fetuuna-iga, matou te faailoa atu lo matou agaga faafetai faamaoni mo le auala tulagaese ua tali mai ai tagata o le ekalesia i atinaega i le Toefuataiga faifai pea o le talalelei. E pei ona fautua mai e Peresitene Nelson i le tausaga ua te'a, ua inu a outou vaitamini!¹

Ua outou suesue ma le olioli le *Sau, Mulimuli Mai ia te Au* i le aiga.² Ua outou tali mai foi i fetuunaiga i le lotu. Ua fai faatasi e uso o le korama a toea-ina ma tuafafine o le Aualofa le galuega o le faaolataga.³

Ua taumasuasua lo matou lotofaafetai.⁴ Matou te faafetai faapitoa o loo faaauau pea ona tumau le malolosia ma le faatuatua o a tatou talavou.

O loo ola o tatou talavou i se taimi faafiafiaina ae luitauina foi. O filifiliga o loo avanoa ua matua faateleina

le ogaoga. O se faataitaiga se tasi: ua maua i telefonipoto faaonapo nei le avanoa i faamatalaga e maoae le taua ma siitiaina, e aofia ai talafaasolopito o aiga ma tusitusiga paia. I le isi itu, o loo i ai le faavalevalea, ola le mama, ma mea leaga sa le'i maua i le tuanai.

Ina ia fesoasoani i a tatou talavou ia faia filifiliga sa'o mai nei mea uma, ua



saunia ai e le Ekalesia ni ta'imua anoa ma atoatoa se tolu. Muamua, ua faama-losia ma faalauteleina mataupu aoaoina i le aiga. Lua, o se polokalama mo tamaiti ma le autalavou ua aofia ai ni gaoioiga faafiafiaina ma atinaega faale-tagata lava ia lea na faato'a faailoa atu i le Aso Sa ua te'a e Peresitene Russell M. Nelson, Peresitene M. Russell Ballard, ma Taitai Aoao. O se ta'imua lona tolu o ni suiga faalefaalapotopotoga ina ia avea le autalavou o se taulaiga sili atu ona taua a o tatou epikopo ma isi taitai. O lenei taulaiga e tataua ona mamana faaleagaga ma fesoasoani ai i a tatou talavou ia avea ma autau talavou lea na talosagaina i latou e Peresitene Nelson e avea ai.

O Mamanu Fesootai

O nei taumafaiga, faatasi ma mea na sa faasilasila atu i le aluga o nai tausaga ua te'a, e le o ni suiga e fai eseese. O fetuunaiga taitasi o se vaega taua o se mamanu fesootai e faamanuia ai le Au Paia ma saunia ai i latou e feiloai ma le Atua.

O le tasi vaega o le mamanu e fesootai ma le tupulaga faia'e. Ua talosaga-ina tatou talavou ia faia atili o latou lava tiutetauave faaletagata lava ia a o talavou—e aunoa ma le faia e matua ma taitai o mea e mafai e le autalavou ona faia mo i latou lava.⁵

Faasilasilaga

O le aso matou te faasilasila atu ai suiga i faalapotopotoga mo le autalavou i le uarota ma le siteki. E pei ona faamalamalama atu e Peresitene Nelson, o le a talanoaina e Sister Bonnie H. Cordon suiga mo tamaitai talavou i le afiafi nei. O le tasi faamoe-moega mo suiga o le a ou talanoaina nei o le faamalosia lea o ē umia le Perisitua Arona, o korama, ma au peresitene o korama. O nei suiga e ogatusa ma a

tatou faiga masani i le Mataupu Faavae ma Feagaiga 107:15, e faitauina, “O le au epikopo o le au peresitene o lenei perisitua [Arona], ma e umia ki po o le pule o lea lava perisitua.”

O se tasi o tiute o le epikopo o loo i tusitusiga paia o le pulefaamalumu lea i ositaulaga ma ia fono faatasi ma i latou, aoao i latou i tiute o lo latou tofi.⁶ E faaopoopo atu i ai, o le fesoasoani muamua i le au epikopo o le a i ai le tiutetauave patino mo a’oa’o ma o le fesoasoani lua mo tiakono.

O le mea lea, ina ia ogatusa ma lenei faaialiga i le Mataupu Faavae ma Feagaiga, o au peresitene o Alii Talavou i le uarota o le a faamutaina nei. Ua tele mea lelei na faia e nei uso faamaoni, ma e matou te faailoa atu le agaga faafetai ia i latou.

O le matou faamoemoe o le a tuu atu e au epikopo se faamamafa tele ma se taulaiga i tiutetauave o le perisitua o alii talavou ma fesoasoani ia i latou i o latou tiute faalekorama. O faufautua agavaa matutua mo Alii Talavou o le a valaauina e fesoasoani i au peresitene o korama o le Perisitua Arona ma le au epikopo i o latou tiute.⁷ Matou te talitonu o le a toatele atu alii talavou ma tamaitai talavou e taulimaina ma le manuia lenei lu’i ma tumau ai i luga o le ala o feagaiga ona o lenei taulaiga sa’olele atoa i a tatou talavou.

I le mamanu musuia a le Alii, ua i ai i le epikopo le tiutetauave mo tagata uma i le uarota. Na te faamanuiaina matua o le autalavou faapea ai foi ma le autalavou. Sa iloa e le tasi epikopo a o ia fautuaina se alii talavou sa tauivi ma ponokalafi, sa na o le pau le mea e mafai ona ia fesoasoani ai i le alii talavou i lona salamo pe afai lea na te fesoasoani i matua ia tali atu ma le alofa ma le agaga malamalama. O le faamalologa o le alii talavou o se faamalologa foi lea mo lona aiga ma sa mafai e ala

i le galue o le epikopo e fai ma sui o le aiga atoa. Ua avea nei le alii talavou ma se e umia ma le agavaa le Perisitua Mekisateko ma se faifeautalai faamisiona.

E pei ona fautua mai lenei tala, o nei fetuunaiga o le a:


- Fesoasoani i epikopo ma o latou fesoasoani ia taulai atu i o latou tiutetauave taua i le autalavou ma tamaiti o le Peraimeri.
- Tuu le mana ma tiute o le Perisitua Arona i le totonugalemu o le olaga patino ma sini a alii talavou uma.

O nei foi fetuunaiga e:

- Faamamafa ai tiutetauave o au peresitene o korama o le Perisitua Arona ma a latou laina tuusao e lipoti atu ai i le au epikopo.
- Faaosofia ai taitai matutua e fesoasoani ma faufautua i au peresitene o korama a le Perisitua Arona i le faalauteleina o le mana ma le pule o lo latou tofi.

Ia manatua, o nei fetuunaiga e lē faaitiitia ai le tiutetauave o le au epikopo mo *tamaitai talavou*. E pei ona faato’a aoao mai Peresitene Nelson, “O [le] tiutetauave muamua lava ma le sili [a le epikopo] o le tausia lea o alii talavou ma *tamaitai talavou* o lona uarota.”⁸

O le a faapefea ona faataunuuiina e a tatou epikopo pele ma galulue malolosi lenei tiutetauave? E pei ona outou manatuina, i le 2018 sa toe fetuunaia korama o le Perisitua Mekisateko ina



ia galulue vavalalata atili ai ma Aualofa ina ia mafai ai e korama a toeaia ma Aualofa, i lalo o le taitaiga a le epikopo, ona tauave faatasi tiutetauave taua ia na alu muamua ai le tele o lona taimi. O nei tiutetauave ua aofia ai le galuega faafaifeautalai ma le galuega o malumalu ma talafaasolopito o aiga i le uarota⁹—faapea ai foi ma le tele o auaunaga i tagata o le uarota.

E le *mafai* e le epikopo ona faasafua atu nisi tiutetauave, e pei o le faamalolosi o le autalavou, avea ma faamasino sili, tausiga o e le tagolima, ma le vaavaaiga o mea tautupe ma mataupu faaletino. Peitai, ua itiiti nei mea i lo mea atonu na tatou malamalama i ai i le tuanai. E pei ona faamalalamalama mai e Elder Jeffrey R. Holland i le tausaga ua te’a ina ua faasilasila mai fetuunaiga i korama o le Perisitua Mekisateko: “Ioe, e tumau pea le epikopo o le faitaulaga sili pulefaamalumu o le uarota. O lenei fetuunaiga fou [o korama a toeaia ma Aualofa] e tatau ona tuu o ia ia pulefaamalumu i le galuega a le Perisitua Mekisateko ma le Aualofa e aunoa



*ma le manaomia o ia e faia le galuega a se tasi o na tino.*¹⁰

Mo se faaitaiga, o se peresitene o le Aualofa ma se peresitene o le korama a tocaina, pe a tofia ai, e mafai ona faia se matafaioi tele atu i fefautuaaiga ma tagata matutua—*e pei foi ona mafai e se peresitene o Tamaitai Talavou ona fefautuaai ma tamaitai talavou.* E ui o le epikopo e mafai ona auauna atu o se faamasino sili, ae ua āia foi isi taitai nei i faaaliga mai le lagi e fesoasoani ai i luitau e le o tau manaomia ai se faamasino sili po o aafia ai se sauaga o soo se ituaiga.¹¹

E le faapea la ua le mafai pe le tatau i se tamaitai talavou ona talanoa atu i le epikopo po o ona matua. O le latou tau-laiga o le autalavou! Ae e le faapea ai e sili atu ona faafetaia e se taitai o Tamaitai Talavou ia manaoga o se tamaitai talavou patino. E tutusa lava le popole o le au epikopo mo tamaitai talavou e pei foi mo alii talavou, ae tatou te iloa ina le malosiaga e sau mai le mauaina o ni taitai malolosi, punouai, ma taulai o Tamaitai Talavou o e alolofa ma faufautua, ae latou te le faia fua matafaioi a au peresitene o vasega ae fesoasoani atu i talavou ia manuia [le faataunuaina] o na matafaioi.

O le a faasoa atu e Sister Cordon nisi suiga faafiafiaina mo tamaitai talavou i le po nei. Peitai, ou te faasilasila atu o peresitene o Tamaitai Talavou a uarota o le a lipoti sa’o atu nei ma fefautuaai faatasi ma le epikopo o le uarota. I le tuana, o leni tofiga sa mafai ona faamatuu atu i se fesoasoani [o se epikopo], ae mo le agai i luma, o tamaitai talavou o le a avea ma tiutetauave tuusao a lē o umia ki e pulefaamalumu ai mo le uarota. O le a faaauau pea ona lipoti sa’o atu le peresitene o le Aualofa i le epikopo.¹²

I tulaga aoao ma le siteki, o le a faaauau pea ona i ai a tatou au peresitene o Alii talavou. I luga i le siteki, o se fautua maua luga o le a avea ma peresitene o Alii Talavou¹³ ma e faatasi ai ma fautua maua luga ua tofia i Tamaitai Talavou ma le Peraimeri, o le a avea ai ma vaega o le komiti o le Perisitua Arona–Tamaitai Talavou a le siteki. O nei uso o le a galulue faatasi ma le au peresitene o Tamaitai Talavou o le siteki i leni komiti. Faatasi ai ma se fesoasoani i le peresitene o le siteki e fai ma taitaifono, o le a faateleina le taua o leni komiti ona o le tele o polokalama ma gaoioiga i le ta’imua fou a Tamaitai

ma le Autalavou o le a faia i tulaga faalesiteki.

O nei fautua maua luga, i lalo o le taitaiga a le au peresitene o le siteki, e mafai ona auauna atu o se punaoa i le epikopo ma korama a le Perisitua Arona i se faiga talitutusa i le auaunaga o loo tuuina atu e fautua maua luga i korama a tocaina i uarota.

E tusa ai ma se mataupu fesooteai, o le a auauna atu se isi fautua maua luga o le peresitene o le Aoga Sa a le siteki ma, pe a manaomia, e mafai ona auauna atu i le komiti o le Perisitua Arona–Tamaitai Talavou a le siteki.¹⁴

O suiga faaopoopo i faalapopotoga o le a faamalamalama atili atu i faamatalaga o le a auina atu i taitai. O nei suiga ua aofia ai:

- O le fonotaga a le komiti talavou a le au epikopo o le a suitulaga e se aufono a le autalavou a le uarota.
- O le upu “Mutuale” o le a faamutaina ma ta’ua nei o “gaoioiga a Tamaitai Talavou,” “gaoioiga a korama a le Perisitua Arona,” po o “gaoioiga a le autalavou” lea o le a faia i vaiaio taitasi i nofoaga e mafai ai.
- O le paketi a le uarota mo gaoioiga a le autalavou o le a vaevaeina i alii talavou ma tamaitai talavou e tusa ai ma le aofai o le autalavou i faalapopototoga taitasi. O se aofaiga e lava lelei o le a tuuina atu mo gaoioiga a le Peraimeri.
- I tulaga uma lava—uarota, siteki, ma [le ekalesia] aoao—o le a tatou faaogaina le upu “faalapopototoga” nai lo le upu “ausilali.” O i latou e taitai i faalapopototoga Aoao o le Aualofa, Tamaitai Talavou, Alii Talavou, Peraimeri, ma le Aoga Sa o le a ta’ua o “Taitai Aoao.” O i latou e taitaia faalapopototoga i le uarota ma le siteki o le a ta’ua o “taitai o uarota” ma “taitai o le siteki.”¹⁵

O fetuunaiga ua faasilasila atu i le aso e mafai ona amata i le vave e saunia ai paranesi, uarota, itu, ma siteki, ae e tataua ona oo atu i le aso 1 o Ianuari, 2020 ua faatulagaina. O nei fetuunaiga, pe a tuu faatasi ma fai faatasi ma fetuunaiga na muamua atu, o le a fai ma faatusa o se taumafaiga faaleagaga ma faalapotopotoga e ogatusa ma le aoaoga faavae e faamanuia ma faama-losia ai alii, tamaitai, autalavou, ma tamaiti uma, i le fesoasoani ai i le tasi ma le isi e mulimuli i le faataitaiga a lo tatou Faaola, o Iesu Keriso, a o tatou agai i luma i luga o le ala o feagaiga.

Uso e ma tuafafine pele, ou te folafola atu ma molimau atu o nei fetuunaiga atoatoa, i lalo o le taitaiga a se peresitene ma se perofeta musuia, o Russell M. Nelson, o le a faamana-ina ma faamalosi ai tagata uma o le Ekalesia. O le a atiae e a tatou talavou le faatuatua sili atu i le Faaola, ma pui-puia mai faaosoosoga a le fili, ma tutu saunia e faafetaiaia luitau o le olaga. I le suafa paia o Iesu Keriso, amene. ■

FAAMATALAGA

1. Tagai ia Russell M. Nelson, i le “Latter-day Saint Prophet, Wife and Apostle Share Insights of Global Ministry,” Newsroom, Oct. 30, 2018, newsroom.ChurchofJesusChrist.org.
2. Ma le isi, ua outou faia ni taumafaiga patino e faaoga le igoa sa’o o le Ekalesia e pei ona aoao mai e Peresitene Russell M. Nelson ma ia manatua lo tatou Faaola i le alofa ma le faaaloalo a o outou faia lena mea.
3. “E auina atu tagata o le Ekalesia a Iesu Keriso ‘e galulue i lona tovine mo le faa-olataga o agaga o tagata’ (Mataupu Faavae ma Feagaiga 138:56). O lenei galuega o le faaolataga e aofia ai le galuega faamisiona a tagata o le au paia, faatumauna o tagata liliu mai, faatoagaaina mai o tagata ua le malolosi mai, galuega o le malumalu ma talafaasolo-pito o aiga, ma le aoaoina atu o le talalelei. E faatonutonu e le au epikopo lenei galuega i le uarota, ae fesoasoani i ai isi sui auai o le au fono a le uarota” (*Tusitaulima 2: Taitaiina o le Ekalesia*, 5.0, ChurchofJesusChrist.org).
4. I le avea ai ma taitai, matou te alolofa i tagata



- o le Ekalesia a Iesu Keriso o le Au Paia o Aso e Gata Ai mo lo outou lelei ma lo outou avea ma soo. Matou te faamamalu i tagata taitoatasi, o tina, o tama, le autalavou, ma tamaiti o loo savavali i le ala o feagaiga—ma o loo faia lena mea i le tuuto ma le olioli.
5. I le 2019, sa amata ai ona tufa e tiakono ta’i 11 tausaga le matutua le faamanatuga, ma maua e tamaitai talavou ma alii talavou ta’i 11 tausaga le matutua pepa faataga o le malu-malu e tapulaa le faaogaina. O le tausaga ua tea, sa lu’iina ai e Peresitene Nelson a tatou alii ma tamaitai talavou ia avea ma se vaega o le autau talavou e faapotopoto Isaraelu ua faataapepeina i itu uma e lua o le veli (tagai “Faamoemoe o Isaraelu” [faigalotu mo le autalavou i le lalolagi atoa, Iuni 3, 2018], HopeofIsrael.ChurchofJesusChrist.org). Sa matua anoanoai le tali mai.
 - Ua auuina atu nei faifeautalai faamisiona i se ala tulagaese i ni tausaga talavou lava. Talu mai le aso 6 Oketopa, 2012, ua agavaa alii talavou e auuina atu i le 18 tausaga ma tamaitai talavou i le 19 tausaga.
 6. “O lenei foi o le tiute o le peresitene e i luga o le Perisitua o Arona o le pulefaamalumalu i luga o ositaulaga . . . , ma fono faatasi ma i latou, e aoao atu ia te i latou tiute o lo latou tofi. . . . O lenei peresitene o se epikopo; aua o se tasi lea o tiute o lenei perisitua” (Mataupu Faavae ma Feagaiga 107:87–88).
 7. O taitai matutua o le a valaauina foi o ni tagata tomiai faapitoa o le korama o le Perisitua Arona e fesoasoani i polokalama ma gaoioiga ma ia auai i fonotaga a le korama ina ia mafai e le au epikopo ona asiasi soo atu i vasega ma gaoioiga a Tamaitai Talavou ma asiasi atu i lea taimi ma lea taimi i le Peraimeri. O nisi tagata tomiai faapitoa e mafai ona valaauina e fesoasoani atu i se mea faapitoa e tupu, e pei o se toluapiga; o isi e mafai ona valaauina mo se taimi umi atu e fesoasoani i faufautua o korama. O le a i ai i taimi uma ni alii matutua e le ititi ifo ma se toluai i fonotaga taitasi a le korama, polokalama, po o se gaoioiga. E ui o le a sui matafaioi ma faalagiga, ae matou te le o faamoemoe e faaititia ai le aofai o alii matutua e auuina atu ma lagolagoina ia korama a le Perisitua Arona.
 8. Russell M. Nelson, “O Molimau, Korama a le Perisitua Arona, ma Vasega a Tamaitai Talavou,” *Liahona*, Nov. 2019, 39, faaopoopo le faamamafa; tagai foi ia Ezra Taft Benson, “I Tamaitai Talavou o le Ekalesia,” *Liahona*, Ian. 1987.
 9. Ua matou fautuaina foi epikopo ia tele atu se taimi e faaalu atili ma talavou nofofua matutua ma o latou lava aiga.
 10. Jeffrey R. Holland, fonotaga faaletaitai mo le konafesi aoao, Ape. 2018; tagai foi i le “Effective Ministering,” ministering.ChurchofJesusChrist.org. Sa aoao mai Elder Holland o tiutetauave a le epikopo e le mafai ona faasafua atu o le pulefaamalumalu lea i korama a le Perisitua Arona ma tamaitai talavou, avea ma se faamasino sili, vaavaai mea tautupe ma mataupu faaletino a le Ekalesia, ma le tausiga o ē matitiva ma lē tagolima. O au peresitene o korama a toeaia ma le Aualofa e mafai ona faia tiutetauave autu mo le galuega faafaifeautalai, galuega o malumalu ma talafaasolopito o aiga, le tulaga lelei o le aoao atu i totonu o le uarota, ma le leoleoina ma le auuina atu i tagata o le Ekalesia.
 11. E faaopoopo atu i tulaga e manaomia ai ki a se faamasino sili, o faafitauli o le saua o soo se ituaiga e tataua ona taulimaina e epikopo e tusa ai ma aiaiga faavae o le Ekalesia.
 12. O le a faaauau pea ona lipoti sa’o atu le peresitene o le Aualofa a le siteki i le peresitene o le siteki.
 13. O fesoasoani o le peresitene o Alii Talavou o le siteki e mafai ona valaauina mai tagata o le siteki po o le, pe a manaomia, e mafai ona valaauina le fautua maua luga ua tofia i Tamaitai Talavou ma le fautua maua luga ua tofia i le Peraimeri.
 14. O le uso e auuina atu o le peresitene o le Aoga Sa ua i ai le tiutetauave taua tele mo mataupu aoaoina a le autalavou i Aso Sa e lua o masina taitasi.
 15. O au peresitene o le Aualofa, Tamaitai Talavou, Alii Talavou, Aoga Sa ma le Peraimeri i tulaga aoao ma le siteki [ua ta’ua] o Taitai Aoao po o taitai o le siteki. I le uarota, e taitai e le au epikopo alii talavou, o lea la o faufautua a le korama o le Perisitua Arona e le o ni taitai o le uarota.



SAUNIA E MARK L. PACE
Peresitene Aoao o le Aoga Sa

Sau, Mulimuli Mai ia te A'u—o le Fuafuaga Mamao a le Alii e Faatoilalo ai le Fili

E saunia e le Alii Lona nuu e faasagatau atu i osofaiga a le fili. O le Sau, Mulimuli Mai ia te A'u o le fuafuaga mamao lea a le Alii e faatoilalo ai le fili.

Tatou te fiafia i le potopoto faatasi i lenei konafesi aoao maoae o Le Ekalesia a Iesu Keriso o le Au Paia o Aso e Gata Ai. O se faamanuiaga le mauaina o le mafaufau ma le finagalo o le Alii e ala i aoaoga a Ana perofeta ma aposetolo. O Peresitene Russell M. Nelson o le perofeta soifua a le Alii. E maeu lo tatou agaga faafetai mo ana fautuaga ma taitaiga musuia ua mauaina i le asō.

Ou te faaopoopo atu la'u molimau i molimau na faasoa atu muamua. Ou te molimau atu i le Atua, lo tatou Tama e Faavavau. O loo soifua o Ia ma e alofa ia i tatou ma leoleo ia i tatou. O Lana fuafuaga o le fiafia ua tuuina mai ai faamanuiaga o lenei olaga faaletino ma lo tatou toe foi atu mulimuli i Lona afioaga.

Ou te molimau atu foi ia Iesu Keriso. O Ia o le Alo e Toatasi o le Atua na Fanaua. Na Ia laveaiina i tatou mai le

oti, ma ua Ia togiolaina i tatou mai le agasala pe a tatou faatino le faatuatua ia te Ia ma salamo. O Lana taulaga togiola le i'u mo i tatou ua aumaia ai



faamanuiaga o le tino ola pea ma le ola e faavavau. Ioe, “Ia faafetaia le Atua mo lana meaalofo e le mafaatusalia o Lona Alo paia” (“O Le Keriso Soifua: O Le Molimau a Aposetolo,” *Liahona*, Me 2017, faavaa i totonu pito i luma).

Ua faamanuiaina le Au Paia o Aso e Gata Ai i le lalolagi atoa e tapuai ia Iesu Keriso i Ona malumalu. O se tasi o na malumalu o loo fauina i le taimi nei i Winnipeg, Kanata. Sa ma maua ma lo'u toalua, o Anne Marie, le avanoa e asiasi ai i le nofoaga o le galuega ia Aokuso o lenei tausaga. Ua matagofie le mamanuina o le malumalu ma o le a mautinoa lava le ofoofogia pe a maca. Peitai, e le mafai ona e maua se malumalu ofoofogia i Winnipeg, po o se isi lava mea, e aunoa ma se faavae mautu ma mausali.

O le taamilosaga o le to'a o le kiona ma le liusuavaia o le aisa ma tulaga o le faaleagaina ai o le palapala i Winnipeg na faigata ai ona saunia le faavae o le malumalu. O lea, sa tonu ai o le faavae o lenei malumalu o le a aofia ai ni poloka u'amea uumi se 70 e faasima faatasi. O nei poloka u'amea e 60 futu (18 m) le umi ae 12 i le 20 inisi (30 i le 50 sm) le lautele. Na viliina i lalo o le palapala seia tau i ni papa ma'a, pe tusa ma le 50 futu (15 m) i lalo o le palapala. O lenei faiga, o le a saunia ai e le 70 poloka u'amea se faavae mautu ma mausali mo le mea o le a avea ma malumalu matagofie o Winnipeg.

I le avea ai ma se Au Paia o Aso e Gata Ai, tatou te sailia se faavae mausali ma mautinoa talitutusa faapena i o tatou olaga—o se faavae faaleagaga e manaomia mo la tatou faigamalaga i le olaga faitino ma toe foi atu ai i lo tatou aiga faalelagi. O lenei faavae ua faatuina i luga o papa ma'a o lo tatou liua i le Alii o Iesu Keriso.

Tatou te toe manatua aoaoga a Helamana mai le Tusi a Mamona: “Ma o lenei, ou atalii e, ia manatua,

ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, . . . o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mau-tinoa lea, o se faavae lea afai e atiae ai tagata e le mafai lava ona pauu i latou” (Helamana 5:12).

Faafetai, ua tatou ola i se taimi ua aoao mai ai e perofeta ma aposetolo i tatou e uiga i le Faaola o Iesu Keriso. O le mulimuli ia latou fautuaga ua fesoasoani ia i tatou e faatulaga ai se faavae mautu ia Keriso.

O le tausaga ua mavae atu, i lana malelega amata o le konafesi aoao ia Oketopa 2018, na tuuina mai e Peresitene Russell M. Nelson leni folafolaga ma le lapataiga: “O le faamoemoega lava o le Ekalesia ua leva ona i ai o le fesoasoani lea i tagata uma ia faateleina lo latou faatuatua i lo tatou Alii o Iesu Keriso ma i Lana Togiola, ia fesoasoani ia i latou i le osia ma le tausaga a latou feagaiga ma le Atua, ma ia faamalositia ai ma faamauina o latou aiga. I leni lalolagi faigata i nei aso, ua le faigofie ai leni mea. *Ua faateteleina e le fili ana osofaiga i le faatuatua ma ua i o tatou luga ma o tatou aiga i se saoasaoa matua uigaese.* Ina ia sao mai ai faaleagaga, tatou te manaomiaina *ni fuafuaga e faatoilalo ai le fili ma ni fuafuaga mamao*” (“Malelega Amata,” *Liahona*, Nov. 2018, 7; faaopopo le faamamafa).

I le mavae ai o le savali a Peresitene Nelson, na faasilasila mai ai e Elder Quentin L. Cook o le Korama a Aposetolo e Toasefululua le punaoa o le *Sau, Mulimuli Mai ia te A'u* mo tagata taitoatasi ma aiga. Na aofia i lana saunoaga faamatalaga nei:



- “O le punaoa fou mo suesuega i le fale, o le *Sau, Mulimuli Mai ia te A'u* . . . ua mamanuina e fesoasoani i tagata o le ekalesia ina ia aoaoina le talalelei i totonu o le aiga.”
- “‘O leni punaoa e mo tagata taitoatasi uma ma aiga i le Ekalesia’ [*Sau, Mulimuli Mai ia te A'u—Mo Tagata Taitoatasi ma Aiga* (2019), vi].”
- “O lo tatou faamoemoega o le faapaleni lea o aafiaga i le Lotu ma le aiga i se auala o le a matua faateleina ai le faatuatua, faaleagaga, ma faalolotoina ai le liua i le Tama Faalelagi ma le Alii o Iesu Keriso.” (“Liuaia Loloto ma Tumau i le Tama Faalelagi ma le Alii o Iesu Keriso,” *Liahona*, Nov. 2018, 9–10.)

O le amataga o Ianuari o leni tausaga, na amata suesueina ai e le Au Paia o Aso e Gata Ai i le lalolagi atoa le Feagaiga Fou, ma le punaoa o le *Sau, Mulimuli Mai ia te A'u* e fai ma o tatou taiala. Faatasi ai ma se faatulagaga faalevaiaso, ua fesoasoani le *Sau, Mulimuli mai ia te A'u* ia i tatou e suesue i tusitusiga paia, aoaoga faavae o le talalelei, ma aoaoga a perofeta ma aposetolo. O se punaoa maoae mo i tatou uma.

I le mavae ai o le iva masina o leni taumafaiga o le suesueina o tusitusiga paia i le lalolagi atoa, o le a se mea ua tatou vaaia? Ua tatou vaai i le Au Paia o Aso e Gata Ai i soo se nofoaga ua

tuputupu ae i le faatuatua ma le tuuto i le Alii o Iesu Keriso. Ua tatou vaai i tagata taitoatasi ma aiga o faataatiaese se taimi i le aluga o le vaiaso e suesue ai i afioga a lo tatou Faaola. Ua tatou vaaia le faaleleia o le aoaoina o le talalelei i a tatou vasega o le Aso Sa a o tatou suesue i tusitusiga paia i le aiga ma faafesoai o tatou malamalamaaga i le lotu. Ua tatou vaaia le olioli ma le lotogatasi sili atu faaleaiga a o tatou o ese mai i le na o le faitauina o tusitusiga paia i le suesueina o tusitusiga paia i se auala loloto atu.

O se faamanuiaga mo a'u le asiasi i le toatele o le Au Paia o Aso e Gata Ai ma faalogo muamua i o latou aafiaga i le *Sau, Mulimuli Mai ia te A'u*. O le faaalua o lo latou faatuatua ua faatumulia ai lo'u loto i le olioli. O nisi nei o ni nai manatu faaalua na ou faalogo i ai mai tagata eseese o le Ekalesia i vaega eseese o le lalolagi:

- Na faasoa mai se tama: “Ou te fiafia i le *Sau, Mulimuli Mai ia te A'u*, ona na te aumaia se avanoa e molimau atu ai i la'u fanau e uiga i le Faaola.”
- I se isi aiga, na fai mai ai se tamaititi: “O se avanoa leni e faalogo ai i o'u matua o tuu mai a la molimau.”
- Na faasoa mai se tina: “Ua musuia ai i matou i le ala e faamuamua ai le Atua. O le taimi na matou [mafaufau ai matou te] ‘lei mauaina’



ua [tumu] i le faamoemoe, olioli, filemu, ma le manuia i auala matou te lei iloa e mafai.”

- Na matauina e se ulugalii: “Ua matua ese lava lo matou faitauina o tusitusiga paia nai lo se isi lava taimi muamua na matou faitauina ai. Ua matua tele lava mea o loo matou aoaoina nai lo se isi lava taimi muamua na matou aoaoina ai. E finagalo le Alii ia tatou vaai atu i mea i se auala ese. O loo sauniaina i tatou e le Alii.”
- Na ta’ua e se tina: “Ou te fiasia o loo tatou aoaoina faatasi le mea e tasi. I le taimi muamua, sa tatou faitauina. I le taimi nei, ua tatou aoaoina.”
- Na faasoa mai e se tuafafine lenei vaaiga malamalama: “I le taimi muamua, sa ia te oe le lesonea ae faaopoopo i ai tusitusiga paia. I le taimi nei, ua ia te oe tusitusiga paia ae faaopoopo i ai le lesonea.”
- Na faaalua e se isi tuafafine: “Ou te lagona le eseesega pe a ou faia [e faatusa i le] taimi pe a ou le faia ai. Ua faigofie atu ia te a’u le talanoa i isi e uiga ia Iesu Keriso ma o tatou talitonuga.”
- Na ta’ua e se tinamatua: “Ou te valaau i la’u fanau ma latou fanau

i Aso Sa ma e matou te fefaasoaai faatasi malamalamaaga mai le *Sau, Mulimuli Mai ia te A’u*.”

- Na matauina e se tuafafine: O le “*Sau, Mulimuli Mai ia te A’u* e lagona e pei o loo auauna patino mai lava le Faaola ia te a’u. Ua musuia e le lagi.”
- Na fai mai se tamā, “Pe a tatou faaaogaina le *Sau, Mulimuli Mai ia te A’u*, ua pei i tatou o le fanauga a Isaraelu, o loo faailoga pou o a tatou faitotoa, e puipuia ai o tatou aiga mai faatosinaga a le faaosaala.”

Uso e ma tuafafine, o se olioliga le asiasi atu ia te outou ma faalogo i auala o faamanuiaina ai e a outou taumafaiga i le *Sau, Mulimuli Mai ia te A’u* o outou olaga. Faafetai atu mo lo outou tuuto.

O le suesueina o tusitusiga paia faatasi ai ma le avea o le *Sau, Mulimuli Mai ia te A’u* o se taiala o loo faamalosi ai lo tatou liua ia Iesu Keriso ma Lana talalelei. Tatou te lē na ona faafesuaia o le itula e tasi ua aveese mai le lotu i le Aso Sa mo le itula e tasi ua faaopoopo atu i suesuega o tusitusiga paia i le fale. O le aoaoina o le talalelei o se taumafaiga faisoo i le aluga o le vaiaso. E pei ona faasoa mai ma le malamalama e se tasi o tuafafine ia te a’u, “O le sini e le o le faapuupuuina o le lotu i le tasi le itula; ae ia ono aso le umi atu o le lotu!”

Ia, toe mafaufau i le lapataiga na tuuina mai e lo tatou perofeta, o Peresitene Nelson, ina ua ia tatalaina le konafesi aoao ia Oketopa 2018:

“Ua faateleleina e le fili ana osofaiga i le faatuatua ma o tatou luga ma o tatou aiga i se saoasaoa matua uigaese. Ina ia sao mai ai faaleagaga, tatou te manaomiaina ni fuafuaga mamao e faatolilo ai le fili” (“Malelega Amata,” 7).

Ona oo lea (pe tusa ma le 29 itula mulimuli ane) i le aoauli o le As Sa, na ia tapunia ai le konafesi i lana folafolaga leni: “Pe a e galue filiga e toe

faafou lou fale e avea ma se nofoaga autu e aoaoina ai le talalelei, . . . o le a faaitiitia le faatosinaga a le fili i lou olaga ma i lou aiga” (“Avea ma Faataitai-iga Lelei o le Au Paia o Aso e Gata Ai,” *Liahona*, Nov. 2018, 113).

E mafai faapefea ona vave faateleleina osofaiga a le fili ae i le taimi lava e tasi o loo faaitiitia moni lava faatosinaga a le fili? E mafai ona tupu, ma o loo tupu i le Ekalesia atoa, aua o loo saunia e le Alii Lona nuu e faasagatau atu i osofaiga a le fili. O le *Sau, Mulimuli Mai ia te A’u* o le fuafuaga mamao lea a le Alii e faatolilo ai le fili. E pei ona aoao mai e Peresitene Nelson, “O le mataupu aoaoina fou ua tuufaatasia e faatotonugalemu-i-le-aiga, ma lagolagoina-e-le-Ekalesia ua i ai le gafatia e tatala mai ai le mana o aiga.” Ae, o le a manaomia a tatou taumafaiga sili; tatou te manaomia ona “[mulimulitaia] ma le totoa ma le faateete ina ia liua o [tatou] fale i se malutaga o le faatuatua” (“Avea ma Faataitai-iga Lelei o le Au Paia o Aso e Gata Ai,” 113).

Aua, e pei ona saunoa mai Peresitene Nelson, “E nafa i tatou taitoatasi ma lo tatou tuputupu ae faaleagaga faaletagata lava ia” (“Malelega Amata,” 8).

O le punaoa o le *Sau, Mulimuli Mai ia te A’u*, o loo saunia ai e le Alii i tatou “mo taimi faigata ua tatou feagai ai nei.” (Quentin L. Cook, “Liaina Loloto ma Tumau,” 10). O loo Ia fesoa-soani mai ia i tatou e faatulaga le “faavae mautinoa lea, o se faavae lea afai e atiae ai tagata e le mafai lava ona pauu i latou” (Helamana 5:12)—le faavae o se molimau e taula mausali i le papa o lo tatou liua i le Alii o Iesu Keriso.

Tau ina ia faamalosi i tatou e a tatou taumafaiga i aso taitasi i le suesueina o tusitusiga paia ma faamaonia ai lo tatou agavaa mo nei faamanuiaga folafolaina. Ou te tatalo atu ai i le suafa o Iesu Keriso, amene. ■



SAUNIA E ELDER L. TODD BUDGE
O Le Fitugafulu

Faalagolago Tumau ma Malosi

*O le faalagolago i le Alii e aofia ai le faalagolago
i Lana taimi ma e manaomia ai le onosai ma le
tumau lea e onosaia ai afā o le olaga.*

Na matuai ma'i lava lo ma atalii o Tanu i lana misiona i Aferika ma sa ave i se fale-mai e lē tele ni punaoa. A o ma faitauina lana tusi muamua ia i maua ina ua uma lona ma'i, sa ma manatu o le a ia faavai-vai, ae peitai na ia tusi mai, "E ui sa ou taoto i le potu tigaina, ae sa ou lagonaina le filemu. Ou te lei maua lava se fiasia tumau ma malosi faapea i lo'u olaga."

A o ma faitauina ma lo'u toalua nei upu, na lofituina i ma'ua i lagona ootia. *Fiasia tumau ma malosi.* Ma te lei faalogo lava ua faamatalaina le fiasia i

lea auala, ae na moni ana upu. Sa ma iloa o le fiasia na ia faamatalaina sa le na o sefaamalieina, po o se lagona siitia, ae o se filemu ma le olioli lea e oo mai pe a tatou gauai atu i tatou lava i le Atua ma tuu atu lo tatou faatuatuaga ia te ia i mea uma. Sa ma iloa o le fiasia na ia faamatalaina sa le na o se faamalieina, po o se lagona siitia, ae o se filemu ma le olioli lea e oo mai pe a tatou gauai atu i tatou lava i le Atua ma tuu atu lo tatou faatuatuaga ia te ia i *mea uma*.¹ Sa ma oo foi i ni taimi faapena i o ma olaga

ina ua fetalai mai e le Atua le filemu i o ma agaga ma mafua ai ona ma maua le faamoemoe ia Keriso e tusa lava pe na faigata ma le mautonu le olaga.²

Ua aoao mai Liae faapea pe ana faapea e le'i pauu Atamu ma Eva, "semanū e tumau pea i laua i le tulaga o le lē sala, e aunoa ma se olioli, ona sa laua lē iloa se pagatia; . . .

"Ae faauta, ua faia *mea uma* e tusa ma le poto o ia o lē ua silafia *mea uma*.

"Na pa'ū Atamu ina ia i ai tagata; ma ua i ai tagata, ina ia latou maua le olioli."³

I se auala feteenai, ua saunia ai i tatou e puapuaga ma faanoanoaga ia lagona le olioli pe afai o le a tatou faatuatuaina le Alii ma Lana fuafuaga mo i tatou. O lenei upumoni ua faamatalaina ma le matagofie e se tuisolo i le seneturi lona 13: "O faanoanoaga e sauniaina oe mo le olioli. Na te matuai saluesea mea uma mai lou fale, ina ia maua e le olioli fou se avanoa e ulu atu ai. Na te luluina laulaau lanusasama mai lala o lou fatu, ina ia mafai e lau fou lanumeamata ona tuputupu ae i lo latou tulaga. Na te se'iina i luga aa ua pala, ia maua ai e aa fou o loo natia i lalo le avanoa e ola ai. Po o a lava faanoanoaga e lulu mai lou fatu, o le a suia e mea e sili atu ona lelei."⁴

Na aoao mai Peresitene Russell M. Nelson, "O le olioli o loo ofa mai e le Faaola [ia i tatou] . . . e faifai pea, ma faamautinoa mai o o tatou 'puapuaga o le a nao sina minute laitiiti' [Mataupu Faavae ma Feagaiga 121:7] ma faapaia-ina mo lou manuia."⁵ O o tatou tofoto-foga ma puapuaga e mafai ona faia ni avanoa mo le olioli sili atu.⁶

O tala fiasia o le talalelei e le o le folafolaga o se olaga e saoloto mai faanoanoaga ma faigata ae o se olaga e tumu i faamoemoga ma uiga—o se olaga lea e mafai ai e o tatou faanoanoaga ma puapuaga ona "tofatumoanaina i le olioli ia Keriso."⁷ Na tautino mai le



Faaola, “E maua foi outou e le pua-puaga i le lalolagi: a ia outou loto tetele; ua ou manumalo i le lalolagi.”⁸ O Lana talalelei o se savali o le faamoemoe. O loo i ai i le faanoanoa e o faatasi ma le faamoemoe ia Iesu Keriso le folafolaga o le olioli tumau.

O le tala i le malaga a sa Iaretō i le nuu folafolaina e mafai ona faaaoaga o se talafaatusa mo la tatou malaga i le olaga faaletino. Na folafola atu e le Alii i le uso o Iareto ma lona nuu o le a ia “alu atu i [o latou] luma i se laueleele ua silisili ona lelei i luga o laueleele uma o le lalolagi.”⁹ Na Ia faatonuina i latou e fausia ni vaa, ma sa latou galulue ma le usiusitai e fausia [vaa] e tusa ma faatonuga a le Alii. Peitai, a o agai i luma le galuega, na oo ane ni popolega i le uso o Iareto faapea o mamanu a le Alii mo vaa sa le talafeagai. Sa ia tagi atu:

“Le Alii e, ua uma ona ou faia o le galuega na e poloaiina ai a’u, ma ua ou faia vaa e pei ona e faatonuina ai a’u.

“Faauta foi, le Alii e, ua leai se malamalama i totonu o i latou.”¹⁰

“Faauta, le Alii e, pe e te tuu ea i matou ia matou sopoia lenei vai tele i le pogisa?”¹¹

Na e sasaaina atu ea lou loto i le Atua i se auala faapea? Pe a tauivi e ola e pei ona poloai mai ai le Alii ma ua le ausia faamoemoega amiotonu, na e tuufesili ea pe o le a e savali ea i lenei olaga i le pouliuli?¹²

Na faaalia e le uso o Iareto se popole tele e uiga i lo latou gafatia e ola ai i totonu o vaa. Ma sa ia tagi atu, “Ma o le a matou fano foi, ona e le mafai ona matou manava i totonu o i latou, vagana le ea lea ua i totonu.”¹³ Na faafaigata ea ona e mānava ona o faafitauli o le olaga ma faapogai ai ona e tuufesili pe mafai faapefea ona e sao mai lea aso, ae le gata i lena a o le toe foi atu i lou aiga faalelagi?

Ina ua mavae ona galulue faatasi le Alii ma le uso o Iareto e foia ona

popolega uma, ona Ia faamalamalama atu lea i ai, “E le mafai ona outou sopoia lenei moana tele vagana ai *ua ou saunia* [se ala mo] outou aua galu o le sami, ma matagi ua o atu, ma lologa o le a oo mai.”¹⁴

Na faamanino mai e le Alii faapea o le a le mafai lava ona oo sa Iaretō i le nuu folafolaina e aunoa ma Ia. E le o latou e pule, ma na o le pau le ala latou te mafai ai ona sopoia le moana sausu o le tuu atu o lo latou faatuatuaga ia te Ia. O nei aafiaga ma aaoaga mai le Alii na foliga mai na faalolotoina ai le faatuatua o le uso o Iareto ma faamalosia ai lona faatuatuaga i le Alii.

Matau le ala na suia ai ana tatalo mai fesili ma popolega i le faailoaga o le faatuatua ma le faalagolago:

“Ua ou iloa, Le Alii e, ua ia te oe le mana uma, ma e mafai ona e faia o soo se mea e te finagalo i ai mo le manuia o tagata; . . .

“Faauta, Le Alii e, e mafai ona e faia lenei mea. Ua matou iloa e mafai ona e faaali mai le mana tele, lea ua foliga faatauvaai i le malamalamaaga o tagata.”¹⁵

O loo faamaumauina faapea ona “o atu [lea o le au sa Iaretō] i o latou . . . vaa, ma tuuvaa atu i le sami, *ma tuu atu* i latou lava i le Alii lo latou Atua.”¹⁶ O le *tuu atu* o lona uiga o le faatuatuaina



po o le lafoaia. E lei ō le au sa Iaretō i totonu o vaa aua sa latou iloa tonu le auala o le a galulue ai mea i le latou malaga. Sa latou o atu i totonu ona ua latou aoao e faalagolago i le mana, agalelei, ma le alofa mutimutivale o le Alii, ma o lea sa latou loto ai ia lafo atu i latou lava ma soo se masalosalo po o popolega na ia i latou i le Alii.

Talu ai nei sa fefe Abe le atalii o lo’u atalii e tietie i se tasi manu e alu i luga ma lalo. Sa sili ia te ia se manu e le minoi. Sa iu ina faatalitonu o ia e lona tinamatu o le a saogalemu, o lea sa ia faatuatua ai o ia, ma oso loa i luga. Ona ia fai mai lea ma se ataata tele, “ou te le lagonaina se saogalemu, ae o loo ou saogalemu.” Masalo na faapena lagona o sa Iareto. O le faatuatua o le Atua atonu e le lagonaina pea le saogalemu i le taimi muamua, ae e mulimuli mai le olioli.

Sa le faigofie le faigamalaga mo le au sa Iareto. “Sa tele taimi sa tofatumoana ai i latou i le loloto o le sami, ona o galu mauululuga lea na fati ae i o latou luga.”¹⁷ Ae ui i lea sa faamaumauina faapea sa le’i “pe lava le agi o le matagi e avatu [i latou] *agai* i le nuu folafolaina”¹⁸ E ui ina faigata ona malamalama i ai, aemaise lava i taimi o o tatou olaga pe a malolosi mai ia matagi ma sousou le sami, e mafai ona tatou maua le toafimalie i le iloaia o loo uunaia atu pea i tatou e le Atua i Lona agalelei le iu e agai atu i le aiga.

Na faaauau pea faamaumauga, “Sa faapea ona latou lelea atu i luma; ma sa leai se sauai o le sami sa mafai ona faamalepeina vaa, pe o se tafola e mafai ona faaleagaina i latou; ma sa latou maua pea le malamalama e le aunoa, pe o luga o le vai po o lalo o le vai.”¹⁹ O loo tatou ola i se lalolagi lea e fafati mai ai i o tatou luga ia galu malolosi o le oti, gasegase faaletino ma faalemafaufau, ma tofotofoga ma puapuaga o soo se ituaiga. Ae, e ala atu i le faatuatua ia

Iesu Keriso ma le filifili ia faalagolago ia te Ia, *tatou te mafai foi* ona maua le malamalama faifai pea a le o luga o vai po o lalo o vai. *Tatou te mafai* ona maua le faamautinoaga faapea e le muta le tulei atu o i tatou e le Atua e agai atu i lo tatou aiga faalelagi.

A o felafoaiina i totonu o vaa, “sa pepese atu [le au sa Iaretō] i viiga i le Alii; . . . ma sa [latou] faafetai ma vivii atu i le Alii i le aso atoa; ma ina ua oo mai le po, sa latou le taofia le vivii atu i le Alii.”²⁰ Sa latou lagona le olioli ma le lotofaafetai e oo lava i le lotolotoi o o latou puapuaga. E ui latou te lei taunuu i le nuu folafolaina, ae ua latou olioli i le faamanuiaga folafolaina ona o lo latou faalagolago tumau ma *malosi* ia te Ia.²¹

Na aveina atu le au sa Iaretō i luga o le vai i aso e 344.²² Pe mata e mafai ona outou vaai faalemafaufau i lena mea? O le faalagolago i le Alii e aofia ai le faalagolago i Lana taimi ma e manaomia ai le onosai ma le tumau lea e onosaia ai afā o le olaga.²³

Mulimuli ane, “sa taunuu [le au sa Iaretō] i luga o le matafaga o le laueleele na folafolaina. Ma ina ua latou tuvae i luga o le matafaga o le laueleele na folafolaina sa latou punonou i lalo i luga o le laueleele, ma faamaualalalo i latou lava i luma o le Alii, ma tutulu i loimata o le olioli i luma o le Alii, ona o le tele o lona alofa mutimutivale agamalua ia te i latou.”²⁴

Afai tatou te faamaoni i le tausiga o a tatou feagaiga, o le a tatou taunuu saogalemu foi i se aso i le aiga ma o le a ifo atu i luma o le Alii ma o le a maligi loimata o le olioli mo le tele o Lona alofa mutimutivale i o tatou olaga, e aofia ai faanoanoaga lea na faia ni avanoa mo le tele o le olioli.²⁵

Ou te molimau atu ao tatou tuuto atu i tatou lava i le Alii ma faalagolago tumau ma *malosi* ia Iesu Keriso ma Ona faamoemoega paia i o tatou olaga, o le



a Ia asiasi mai ia i tatou ma faamautinoaga, fetalai mai le filemu i o tatou agaga, ma faapogai ai ona tatou “faamoemoe mo le laveaiga mai ia te ia.”²⁶

Ou te molimau atu o Iesu o le Keriso. O Ia o le puna o le olioli uma.²⁷ Ua lava Lona alofa tunoa, ma e *malosi* o Ia e faaola.²⁸ O Ia o le malamalama, o le ola, ma le faamoemoe o le lalolagi.²⁹ O le a Ia le tuua i tatou ia fano.³⁰ I le suafa o Iesu Keriso, amene. ■

FAAMATALAGA

1. Tagai i le Alema 36:3; 57:27.
2. Tagai i le Alema 58:11.
3. 2 Nifae 2:23–25; faapoopo le faamamafa.
4. Tagai *The Mathnawi of Jalalu'ddin Rumi* (1925–40), trans. Reynold A. Nicholson, vol. 5, 132.
5. Russell M. Nelson, “O Le Olioli ma le Ola Ai Faaleagaga,” *Liahona*, Nov. 2016, 82.
6. Tagai Neal A. Maxwell, “Suatia ma le faamoemoe,” *Liahona*, Iulai 2001, 73: “O Iesu le Togiola sa ‘sasaa atu foi lona agaga e oo i le oti.’ . . . A o tatou ‘sasaa’ atu o tatou agaga i aioiga patino i nisi taimi, ua tatou faagaogaoina ni avanoa mo nisi olioli!”
7. Alema 31:38; tagai foi ia Neal A. Maxwell, “Brim with Joy” (Brigham Young University devotional address, Jan. 23, 1996), speeches.byu.edu: “Pe a tatou ausia se vaega o le faapaiaga, o le a tofatumoanaina o tatou puapuaga i le olioli o Keriso. E le faapea o le a aunoa i tatou ma ni puapuaga, ae o le a tuu i latou i se vaega lea e faataga ai i tatou e taulimaina i latou. Faatasi ai ma lo tatou tulituli-

matagauina o le olioli ma le faateleina o le fua-tagataga o le amiotonu, o le a tatou lagonaina se isi matāua o le fiafia—tasi le matāua i le mavae ai o le isi—seia, i upu a se perofeta, “tumu [o tatou loto] i le olioli” (Alema 26:11). Ma mulimuli ane, o le a iu ina taumasuasua le ipu o le agaga!”

8. Ioane 16:33.
9. Eteru 1:42.
10. Eteru 2:18–19.
11. Eteru 2:22.
12. Tagai i le Ioane 8:12.
13. Eteru 2:19; faatusatusa i le Mareko 4:38; tagai foi i le Mareko 4:35–41.
14. Eteru 2:25; faapoopo le faamamafa.
15. Eteru 3:4–5.
16. Eteru 6:4; faapoopo le faamamafa.
17. Eteru 6:6.
18. Eteru 6:8; faapoopo le faamamafa; tagai foi i le 1 Nifae 18:8.
19. Eteru 6:10.
20. Eteru 6:9; tagai foi i le 1 Nifae 18:16.
21. Faatusatusa le 1 Nifae 5:5. E ui na i ai pea lava i le vao, ae na olioli Liai i faamanuiaga folafolaina.
22. Tagai i le Eteru 6:11.
23. Tagai i le Eperu 10:36; Alema 34:41; Mataupu Faavae ma Feagaiga 24:8; 64:32.
24. Eteru 6:12.
25. Tagai i le 1 Nifae 1:20; 8:8; Alema 33:16.
26. Alema 58:11.
27. Tagai ia Russell M. Nelson, “O Le Olioli ma le Ola ai Faaleagaga,” 82.
28. Tagai i le 2 Nifae 31:19; Alema 34:18; Moronae 10:32.
29. Tagai i le “O Le Keriso Soifua: O Le Molimau a le Au Aposetolo,” *Liahona*, Me 2017, totonu o le faavaa pito i luma.
30. Tagai i le 1 Nifae 1:14.



SAUNIA E ELDER JORGE M. ALVARADO
O Le Fitugafulu

Pe a Mavae le Tofotofoina o lo Tatou Faatuatua

A tatou mulimuli i le siufofoga o le Atua ma Lana ala o feagaiga, o le a la faamalosia i tatou i o tatou tofotofoga.

A o ou laitiiti, sa ofa mai e Frank Talley, o se tagata o le Ekalesia e fesoasoani e avatu lo'u aiga mai Puerto Rico i le Aai o Sate Leki, ina ia mafai ona faamauina i matou i le malumalu, ae sa le'i pine ae alia'e mai faafitauli. Na ma'i se tasi o o'u tuafafine, o Marivid. O le le mautonu, na tatalo ai o'u matua po o le a le mea e fai ma sa lagona pea le uunaiga e fai le malaga. Sa la talitonu afai la te mulimuli ma le faatuatua i uunaiga a le Alii,



o le a tausia ma faamanuiaina lo matou aiga—ma sa faapena lava.

E tusa lava po o a faafitauli tatou te fetaiai i le olaga, e mafai ona tatou faatuatua o le a saunia e Iesu Keriso se ala e agai i luma a o tatou savavali i le faatuatua. Ua folafola mai e le Atua o i latou uma o e ola e tusa ma feagaiga ua latou osia ma Ia o le a mauaina, i Lona lava taimi, Ana faamanuiaga folafolaina uma. Sa aoao mai Elder Jeffrey R. Holland, “E vave oo mai nisi faamanuiaga, o nisi e tuai, o nisi e le oo mai vagana le lagi; ae mo i latou e taliaina le talalelei a Iesu Keriso, *e oo mai lava*”¹

Na aoao mai e Moronae faapea “o le faatuatua o mea ia ua faamoemoe i ai ae ua le vaaia; o le mea lea, aua tou te masalosalo ona ua outou le vaaia, aua tou te le maua se molimau seia uma ona tofotofoina o lo outou faatuatua.”²

O le tatou fesili o le, O le a se mea e tatau ona tatou faia ia taulimaina sili ai tofotofoga e oo mai i lo tatou ala?

I lana uluai malelega faalauaitele i le avea ai ma Peresitene o le Ekalesia, na aoao mai ai Peresitene Russell M. Nelson: “I le avea ai ma se Au Peresitene fou, matou te fia amata faatasi ma

le taunuuga i le mafaufau. Mo lenei mafuaaga, ua matou talanoa atu ai ia te outou i le asō mai se malumalu. I le taunuuga lea tatou te tauivi uma i ai ina ia faaecina i le mana i totonu o se maota o le Alii, faamauina o ni aiga, faamaoni i feagaiga e osia i totonu o se malumalu lea e agavaa ai i tatou mo le meaalofo silisili a le Atua—le ola e faavavau. O sauniga o le malumalu ma feagaiga tou te osia iina o le ki lea i le faamalosia o lou olaga, lau faaipopoga ma le aiga, ma lou tomai e tetee atu ai i osofaiga a le fili. O lou tapuai ai i totonu o le malumalu ma lau auaunaga iina mo ou tuua o le a faamanuiaina ai oe i le faateleina o faaaliga faaletagata lava ia ma le filemu, ma o le a faamalosia ai lou tuuto e tumau i luga o le ala o feagaiga.”³

A tatou mulimuli i le siufofoga o le Atua ma Lana ala o feagaiga, o le a Ia faamalosia i tatou i o tatou tofotofoga.

O le malaga a le matou aiga i le malumalu i tausaga ua te'a sa faigata, ae ina ua matou latalata atu i le malumalu i Sate Leki, Iuta, na fai mai lo'u tina, na tumu i le olioli ma le faatuatua, “O le a lelei mea uma; o le a puipuia i tatou e le Alii.” Sa faamauina i matou o se aiga, ma sa toe malosi lo'u tuafafine. Na tupu lenei mea ina ua mavae le tofotofoina o le faatuatua o o'u matua ma i le mulimuli ai i uunaiga a le Alii.

O lenei faaitaiga a o'u matua o loo uunaia ai lava o matou olaga i aso nei. O a la faaitaiga na aoao ai i matou i le *mafuaaga* o aoaoga faavae o le talalelei ma na fesoasoani ia i matou e malamalama ai i le uiga, faamoemoga, ma faamanuiaga e aumaia e le talalelei. O le malamalama i le *mafuaaga* o le talalelei a Iesu Keriso e mafai ona fesoasoani ia i tatou e fetaiai ma o tatou luitau ma le faatuatua.

I le iuga, o mea uma e valaaulia ma poloa'iina i tatou e le Atua e fai o se faailoaga o Lona alofa mo i tatou ma Lona naunau e tuu mai ia i tatou faamanuiaga

ua faapolopoloina mo e faatuatua. E le mafai ona tatou mafau fau o le a aoao e a tatou fanau i latou lava ia fiafia i le talalelei; o le tatou tiutetauave le aoao o i latou. A o tatou fesoasoani e aoao a tatou fanau i le ala e faaoga ai ma le atamai lo latou faitalia, e mafai ona uunaia i latou e a tatou faataitaiga ina ia faia ni a latou lava filifiliga amiotonu. O le a fesoasoani lo latou ola faamaoni ia latou foi fanau ia iloa le upumoni o le talalelei mo i latou lava.

Alii talavou ma tamaitai talavou, faalogo i le perofeta o aso nei o loo talanoa atu ia te outou. Saili ia iloa upumoni paia ma saili ia malamalama i le talalelei mo outou lava. Na apoapoai mai talu ai nei Peresitene Nelson: O le a le poto e le o ia te oe? . . . Mulimuli i le faataitaiga a le Perofeta o Iosefa. Saili se nofoaga filemu. . . . Ia faamaualalo ina oe lava ia i luma o le Atua. Liligi atu lou loto i lou Tama Faalelagi. Liliu atu ia te Ia mo ni tali.”⁴ A o e saili le

taitaiga mai lou Tama Faalelagi alofa, faalogo i fautuaga a perofeta soifua ma matau faataitaiga a ni matua amiotonu, e mafai foi ona e avea ma se sootaga malosi o le faatuatua i lou aiga.

“I matua e i ai fanau o e ua o ese mai le ala o feagaiga, ia toe foi lemu atu. Fesoasoani ia i latou ia malamalama i upumoni o le talalelei. Amata nei loa; e le o tuai lava.

O la tatou faataitaiga o le ola amiotonu e mafai ona faia ai se eseese tele. Na saunoa mai Peresitene Nelson: “I le avea ai ma tagata o le Au Paia o Aso e Gata Ai, ua tatou masani lava i le manatu o le ‘lotu’ o se mea e tupu i totonu o o tatou falesā, ma e lagolagoina e mea o loo tutupu i le aiga. Ua tatou manaomia se fetuunaiga i leni mamānu. O le taimi leni mo se *Ekalesia e-faatotonugalemu-i-le-aiga*, ma lagolagoina e mea o loo tutupu i totonu o faletatalo o a tatou paranesi, uarota, ma siteki.”⁵



Ua aoao mai e tusitusiga paia, “Ia aoao le tama e tusa ma ona ala, aua a oo ina matua e le toe foi ese ai lava.”⁶

Na latou fai mai foi, “Ma o leni, ona sa i ai i le talai atu o le afioga se uiga malosi e taitai atu ai tagata ia latou faia le mea tonu—ioe, sa i ai sona uiga mamana tele atu i luga o mafau-fau o tagata nai lo le pelu, po o se isi lava mea, ua oo ia te i latou—o lea na manatu ai Alema e tataua ona latou faataitaia le mana o le afioga a le Atua.”⁷

E faamatalaina se tala i se fafine sa lē fiafia i le ‘ai lolo tele o lana tama. Po o le a le tele o lona faatonuina o ia e tuu, sa faamalie pea lona manao i mea suamalie. I le matuā le fiafia ai, na tonu ai ia te ia e ave lana tama e vaai i se tamalii atamai lea e na te faaaloalogia.

Sa ia alu atu ia te ia ma faapea atu i ai, “Lau susuga, ua tele naua le ‘ai lolo o la’u tama. E mafai ona e ta’u atu ia te ia faamolemole e tuu le ‘ai lolo?”

Sa faalogo ma le totoa o ia ona faapea atu lea i le tama a le fafine, “Alu i le fale ma toe foi mai i le lua vaiaso.”

Sa ia ave lana tama ma o atu i le fale, ma le le mautonu pe aisea na le fai atu ai i le tama e tuu le ‘ai lolo.

I le lua vaiaso mulimuli ane, sa la toe foi atu. Sa tilotilo sa’o atu le alii poto lea i le tamaitiiti ma fai atu, “Sole, ua tataua ona tuu lou ‘ai tele i lolo. E lē lelei mo lou soifua maloloina.”

Na lue le ulu o le tamaitiiti ma folafola atu o le a tuu.





Na fesili atu le tina o le tamaitiiti, “Aisea na e le ta’u atu ai lena mea ia te ia i le lua vaiaso talu ai?”

Sa ataata le alii poto. “O le lua vaiaso talu ai, sa ou ‘ai tele foi a’u ia i leole.”

Sa ola lena tamalii i le amiosa’o lea na ia silafia lelei ai o le a malosi lana fautuaga pe afai o loo ia ola ai i lana lava fautuaga.

O a tatou faatosinaga i a tatou fanau e sili atu ona mamana a o latou vaaia i tatou o savavali ma le faamaoni i luga o le ala o feagaiga. O Iakopo le perofeta o le Tusi a Mamona o se faataitaiga o lea amiotonu. Na tusia e lona atalii o Enosa le aafiaga o aoaoga a lona tama:

“Ua iloa e a’u, o Enosa, o lo’u tamā o se tagata amiotonu o ia—ona sa ia aoaoina a’u i lana gagana, ma i le aoaoga ma le apoapoiga foi a le Alii—ma ia faamanūina lava le suafa o lo’u Atua mo lena mea. . . .

“... Ma o upu sa ou faalogo soo o tautala i ai lo’u tamā e uiga i le ola e faavavau, ma le olioli o le au paia, sa gotouga ifo i lo’u loto.”⁸

Sa ola tina o autau talavou i le talalelei ma na faatumulia a latou fanau i le talitonuga maumaututu. Na lipoti mai e lo latou taitai:

“Sa aoaoina i latou e o latou tina, e faapea afai latou te le masalosalo, o le a laveaiina i latou e le Atua.

“Ma sa latou faamatala mai ia te au upu a o latou tinā, fai mai: Matou te le masalosalo lava sa mautinoa lena mea e o matou tinā.”⁹

Na faamalositia Enosa ma le autau talavou e le faatuatua a o latou matua, lea na fesoasoani ia i latou e fetaiai ma o latou lava tofotofoga o le faatuatua.

Ua faamanuiaina i tatou i le talalelei tofufuataina a Iesu Keriso i o tatou aso, lea e siitia i tatou pe a tatou lagona le lotovaivai po o le atuatuvaile. Ua faamautinoa mai ia i tatou o a tatou tau-mafaiga o le a fua mai i le taimi a le Alii pe afai tatou te fetaomi atu i luma e ala atu i le tofotofoina o lo tatou faatuatua.

Sa ma faatasi atu ma lo’u toalua talu ai nei, ma le Au Peresitene o le Eria, ma Elder David A. Bednar i le faapaiaiga o le Malumalu o Port-au-Prince Haiti. O le ma atalii o Jorge, na matou o faatasi, sa fai mai i lona aafiaga: “E ofoofogia, Papa! O le taimi lava na amata ai e Elder Bednar le tatalo o le faapaiaiga, sa mafai ona ou lagonaina le faatumulia o le potu i le mafanafana ma le malamalama. Na faaopoopo e le tatalo le tele o mea i lo’u malamalamaaga e uiga i le faamoemoega o se malumalu. O le maota moni lava o le Alii.”

I le Tusi a Mamona, na aoa mai ai Nifae faapea ao tatou mananao ia iloa le finagalo o le Atua, o le a Ia faamalositia

i tatou. Sa ia tusia, “O a’u, o Nifae, ona sa ou talavou lava . . . ma sa ia te a’u foi le naunau tele e fia iloa mealilo a le Atua, o le mea lea, na ou tagi atu ai i le Alii; ma faauta sa asiasi mai o ia ia te a’u, ma faamalulūina lo’u loto, o le mea lea na ou talitonu ai i upu uma na tautalaina e lo’u tamā; o le mea lea na ou lē fouvale ai e faasaga ia te ia e pei o o’u uso.”¹⁰

Uso e ma tuafafine, sei o tatou fesoasoani atu ia tatou fanau ma tagata uma o siomiaina i tatou ina ia mulimuli i le ala o le feagaiga ina ia mafai ai e le Agaga ona aoa atu i latou ma faamalu-luina o latou loto ia mananao e mulimuli ia te Ia i o latou olaga atoa.

A o ou mafaufau i le faataitaiga a o’u matua, ua ou iloa ai o lo tatou faatuatua i le Alii o Iesu Keriso o le a faaali mai ia i tatou le ala lea e tofoi atu ai i lo tatou aiga faalelagi. Ou te iloa e oo mai vavega pe a maea ona tofotofoina lo tatou faatuatua.

Ou te molimau atu ai ia Iesu Keriso ma Lana taulaga togiola. Ou te iloa o Ia o lo tatou Faaola ma le Laveai. Na afio mai o Ia ma lo tatou Tama Faalelagi i lena taeao i le tautotogo o le 1820 i le taulealea o Iosefa Samita, le perofeta o le Toefuataiga. O Peresitene Russell M. Nelson o le perofeta o lo tatou vaitaimi. I le suafa o Iesu Keriso, amene. ■

FAAMATALAGA

1. Jeffrey R. Holland, “O Se Faitaulaga Sili i Mea Lelei Atali,” *Liahona*, Ian. 2000, 45.
2. Eteru 12:6.
3. Russell M. Nelson, “A’o Tatou Agai Faatasi Atu i Luma,” *Liahona*, Ape. 2018, 7.
4. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.
5. Russell M. Nelson, “Malelega Amata,” *Liahona*, Nov. 2018, 7.
6. Faataoto 22:6.
7. Alema 31:5.
8. Enosa 1:1–3.
9. Alema 56:47–48.
10. 1 Nifae 2:16.



SAUNIA E ELDER RONALD A. RASBAND
O Le Korama a Aposetolo e Toasefululua

Tumau ia Tatou Folafolaga ma Feagaiga

Ou te valaaulia outou ia mafaufau i folafolaga ma feagaiga ua outou osia ma le Alii, ma faatasi ai ma isi, ma le amiosa'o tele, ma le iloaia o le a outou savavali i a outou upu.

Uso e ma tuafafine pele, a o tatou tapunia ai lenei sauniga, tau ina ia tatou taofimau i o tatou loto le molimau na fanau i le asō e uiga i upumoni o le talalelei a Iesu Keriso. Ua faamanuiaina i tatou i le mauaina o lenei taimi paia e faatasi ai e toe faamalositia la tatou folafolaga i le Alii o Iesu Keriso o i tatou o Ana auauna ma o Ia o lo tatou Faaola.

Ua mamafa lava i lo'u mafaufau le osia ma le tausia o folafolaga ma feagaiga. O le a se taua ia te oe o le tausia o lau upu? ina ia faatuatuaia? ia faia le mea na e fai mai o le a e faia? ia tauivi e faamamalu au feagaiga paia? ia i ai le amiosa'o? E ala i le ola faamaoni ia tatou folafolaga i le Alii ma isi, tatou te savavali ai i le ala o feagaiga e toefoi atu i lo tatou Tama i le Lagi ma tatou lagona ai Lona alofa i o tatou olaga.

O lo tatou Faaola o Iesu Keriso o lo tatou Faataitaiga sili lea pe a oo mai i le osia ma le tausia o folafolaga ma feagaiga. Na afio mai o Ia i le lalolagi ma le folafolaga e fai le finagalo o le Tama. Sa Ia aoao mai mataupu faavae o le talalelei i upu ma galuega. Na togioia

e Ia a tatou agasala ina ia mafai ona tatou toe ola. Na Ia faamamaluina Ana folafolaga uma taitasi.

Mata e mafai ona faia lea tala e tasi mo i tatou uma taitoatasi? O a ni tulaga lamatia pe afai tatou te faimamago teisi, sina sasi laitiiti, pe le tausisia foi a tatou tautinoga? Ae a pe afai tatou te savavali

ese mai ia tatou feagaiga? Pe o le a o mai ia Keriso isi ona o a tatou faataitaiga? Pe o le a e savali i lau upu? O le tausiga o folafolaga e le o se mausa; ae o se uiga o le avea ai ma soo o Iesu Keriso.

O le manatua pea o o tatou vaivaiga i le olaga faaletino, sa folafolaga mai ai e le Alii, "Ia fiala, ma aua le fefefe, aua o A'u o le Alii ua Ou faatasi ma outou, ma o le a tu i tafatafa o outou."¹ Ua ou lagonaina Lona afio ai pe a manaomia se faamautinoaga, mafanafana, po o le malamalamaaga po o se malosiaga sili atu faalecagaga, ma ua faalotomauualalo ina tele a'u ma le lotofaafetai mo Lana mafutaga paia.

Ua fetalai mai le Alii, "O tagata taitoatasi e lafoai ana agasala ma sau ia te a'u, ma valaau mai i lo'u igoa, ma usi-usitai i lo'u leo, ma tausii i a'u poloaiga, o le a vaai i o'u mata ma iloa o i ai a'u."² Masalo o Lana folafolaga silisili lena.

Sa ou aoaoina le taua o le tausia o la'u upu i lo'u talavou. O se tasi o ia faataitaiga o le taimi sa ou tu faasasa'o ai e tauloto le Tautoga a le Sikauti. O la tatou fegalegaleaiga ma Tama Sikauti a Amerika, lea ua faamutaina





nei, o le a avea pea ma se talatuu taua ia te a'u ma lenei Ekalesia. I le faalapotopotoga o Sikauti, i le anoanoai o alii ma tamaitai sa auauna atu ma le filiga o ni taitai Sikauti, i tina—o faamamaluga moni e avatu iina—ma i alii talavou na auai i le Sikauti, matou te faapea atu, “Faafetai lava.”

I lenei lava sauniga, na faasila-sila mai ai e lo tatou perofeta pele, o Peresitene Russell M. Nelson, ma Elder Quentin L. Cook ni fetuunaiga ia o le a toe faataulai atu ai la tatou gauaiga i talavou ma faaogatusa ma a tatou faalapotopotoga faatasi ma upumoni faaalua. Ma le isi, i le Aso Sa na se'i te'a atu nei, sa faamalamalama mai ai e Peresitene Nelson ma Peresitene M. Russell Ballard le polokalama fou mo Tamaiti

ma le Autalavou a Le Ekalesia a Iesu Keriso o le Au Paia o Aso e Gata Ai mo le Ekalesia atoa. O se ta'imua i le lalolagi atoa ua taulai atu i lo tatou Alii ma le Faaola, o Iesu Keriso. Ua autasi le Au Peresitene Sili ma le Korama a Aposetolo e Toasefululua i lenei taitaiga fou, ma ou te tuu atu la'u molimau patino na taialaina e le Alii i matou i laasaga uma o le ala. Ua ou fiala lava mo tamaiti ma le autalavou o le Ekalesia o le a maua aafiaga i lenei taulaiga tuufaatasi ia i latou i le aiga ma i le lotu—e ala i le aoaoina o le talalelei, auaunaga ma gaoioiga, ma le atinaega patino.

O le autu a le autalavou mo le tausaga a sau, 2020, o loo ta'ua ai le folafolaga mataina a Nifae e “alu ma fai.” Sa ia tusia, “Ma sa oo ina fai atu

o a'u o Nifae, i lo'u tamā: O le a ou alu ma fai mea ua poloaiina e le Alii, aua ua ou iloa e lē tuuina mai e le Alii ni poloaiiga i le fanauga a tagata, vagana o le a saunia e ia se ala mo i latou ina ia mafai ai ona latou faataunuuina o le mea ua ia poloaiina ai i latou.”³ E ui sa tautalagia i se taimi ua leva, ae o i tatou i le Ekalesia e tausia lena folafolaga i le asō.

O le “alu ma fai” o lona uiga o le ō ese mai i ala o le lalolagi, mauaina ma le faatinoina o faaaliga faaletagata lava ia, ola amiotonu faatasi ma le faamoemoe ma le faatuatua i le lumanai, osia ma le tausia o feagaiga e mulimuli ia Iesu Keriso, ma o le a faateleina ai lo tatou alolofa mo Ia, le Faaola o le lalolagi.

O se feagaiga o se folafolaga e lua ona itu i lo tatou va ma le Alii. I le avea ai ma ni tagata o le Ekalesia, tatou te osi feagaiga i le papatisoga e ave i o tatou lava luga le suafa o Iesu Keriso, ma ola e pei ona sa soifua ai o Ia. E pei o i latou na papatisoina i Vai o Mamona, ua tatou osifeagaiga foi ia avea ma Ona nuu, “e tauave avega a le tasi [ma le isi], ina ia māmā; . . . [ia] faanoanoa faatasi ma e e faanoanoa; . . . faamafanafana atu ia te i latou o e e manaomia le faamafanafanaga, ma tutu o ni molimau a le Atua i taimi uma ma i mea uma, ma i nofoaga uma.”⁴ O la tatou auaunaga i le tasi ma le isi i le Ekalesia e atagia mai i la tatou tautinoga e faamamalu na folafolaga.

A tatou aai i le faamanatuga, ua tatou faafouina lena feagaiga e tauave i o tatou luga Lona suafa ma faia nisi folafolaga faaopoopo ia lelei atili. O o tatou mafaufauga ma amioga i aso taitasi, pe tetele pe itiiti, e atagia mai ai a tatou tautinoga ia te Ia. O Lana folafolaga paia ia i tatou, “afai tou te manatua pea a'u o le a outou maua lo'u Agaga e faatasi ma outou.”⁵

O la'u fesili i le asō e faapea, o tatou tumau i a tatou folafolaga ma feagaiga

pe o nisi taimi ua na o ni tautinoga faa'afa'afa, e faia faasamasamanoa ma o lea e faigofie ai lava ona soli? Pe a tatou fai atu i se tasi, "O le a ou tatalo mo oe," o tatou tatalo la? Pe a tatou tautino atu, "O le a ou i ai iina e fesoasoani," tatou te i ai ea? Pe a tatou tautino atu e totogi se aitalafu, o totogia ea? Pe a sii o tatou lima e lagolago se tagata i se valaauga fou, o lona uiga o le tuu atu o le lagolago, o tatou lagolago ea?

I se tasi afiafi a o o'u talavou, sa ma saofafa'i ma lo'u tina i le vae o le moega ma talanoa ma le faamaoni e uiga i le taua o le ola i le Upu o le Poto. "Ou te iloa mai aafiaga o isi, mai tausaga ua alu," sa ia fai mai ai, "o le leai o se faalecagaga ma se nofouta e sau mai le le tausia o le Upu o le Poto." Sa ia pulato'a i o'u mata ma sa ou lagonaina ana upu o tuia ai lo'u loto: "Folafola mai ia te a'u, Ronnie, i le aso nei (sa ia valaauina a'u ia Ronnie), o le a e ola i aso uma i le Upu o le Poto." Sa ou faia ma le faamaoni lena folafolaga ia te ia, ma sa ou tausia i nei tausaga uma.

Sa tautuaina lelei a'u e lena tautinoga a o o'u talavou ma i tausaga

mulimuli ane a o ou i ai i mafutaga faapisinisi ia sa faia ai inuga ava. Sa ou muai faia se faaiuga e mulimuli i tulafono a le Atua, ma ou te lei toe tau mafaufau faalua i ai. Ua fetalai mai le Alii, "Ua noatia au le Alii, pe a outou faia mea ou te fai atu ai; a e pe a outou le faia mea ou te fai atu ai, e leai sa outou folafolaga."⁶ O le a Lana fetalai ia i latou o e tausia le Upu o le Poto? O le a tatou maua le folafolaga o le soifua maloloina, malosi, potu, malamalama, ma agelu e puipuia i tatou.⁷

I nai tausaga talu ai, sa ma i ai ma Sister Rasband i le Malumalu i Sate Leki mo le faamauiina o se tasi o o ma afafine. A o matou tutu ai i fafo o le malumalu ma se afafine laitiiti e le'i lava le matua e auai ai i le sauniga, sa matou talanoa e uiga i le taua o le faamauiina i totonu o le malumalu paia o le Atua. E pei ona aoao ai a'u e lo'u tina i tausaga ua alu, sa ma fai atu ai i le ma afafine, "Ma te mananao ia e faamau ma le saogalemu i totonu o le malumalu, ma e ma te mananao ia te oe e te folafola mai ia i ma'ua, afai e te mauaina sau soa e faavavau, o le a e faia se aso ma ia ina



ia faamauiina ai i totonu o le malumalu." Sa ia tautino mai ia i maua.

Sa ia ta'u mai talu mai lena taimi o le matou talanoaga ma lana folafolaga na puipuia o ia ma faamanatu atu ia te ia le "mea sa sili ona taua." Sa mulimuli ane sa ia osia ni feagaiga ina ua faamauiina o ia i lana tane i le malumalu.

Sa aoao mai Peresitene Nelson: "Tatou te faateleina . . . le mana o le Faaola i o tatou olaga pe a tatou osia feagaiga paia ma tausia na feagaiga i le saolele. O a tatou feagaiga e fusia ai i tatou ia te Ia ma tatou maua ai le mana faaleatua."⁸

A tatou tausia folafolaga i le tasi ma le isi, o le a tatou tausia foi folafolaga i le Alii. Manatua le fetalai a le Alii: "Aua na faia e outou i le tasi o e aupito itiiti o o'u uso nei, o a'u lea na outou faia i ai."⁹

Tatou mafaufau ma a'u i ni faaitaiga o folafolaga i totonu o tusitusiga paia. Sa tautino Amona ma atalii o Mosaea i le Tusi a Mamona "e talai atu le afioga a le Atua."¹⁰ Ina ua pu'eina Amona e le autau a sa Lamana, sa avatu o ia i luma o le Tupu sa Lamana o Lamona. Sa ia tautino atu i le tupu, "o le a ou avea ma au auauna."¹¹ Ina ua o mai le au osofai e gaio mamoe a le tupu, sa tipi ese e Amona o latou lima. Sa maofa tele le tupu, sa ia faalogo atu i le savali a Amona e uiga i le talalelei ma sa liua ai.

O Ruta, i le Feagaiga Tuai, sa folafola atu i lona tina faaletulafono, "O le mea e te alu i ai, ou te alu ai foi."¹²





Sa ia ola faamaoni i lana tautinoga. O le Samaria agalelei, i se faataoto i le Feagaiga Fou, sa folafola atu i le pule o le faletalimalo pe mafai ona ia tausua le tagata malaga ua manu'a, "Ai se mea e te toe faatau ai, ou te tau atu ia te oe pe a ou toe sau."¹³ O Sorama i le Tusi a Mamona, sa folafola atu e alu i le vao faatasi ma Nifae ma ona uso. Sa ta'ua e Nifae, "Ina ua uma ona fai mai e Sorama se tautoga ia te i matou, sa uma lo matou popole e uiga ia te ia."¹⁴

Ae a le folafolaga anamua "na faia i tama" e pei ona faamatalaina i tusitusiga paia e faapea "o le a liliu atu loto o fanau i o latou tama"?¹⁵ I le muai olaga ina ua tatou filifili le fuafuaga a le Atua, na tatou faia ai se folafolaga e

fesoasoani atu ia faapotopoto Isaraelu i itu uma e lua o le veli. "Sa tatou faipaga ma le Alii," sa faamalamalama ai e Elder John A. Widtsoe i ni tausaga ua mavae. "O le faataunuaina o le fuafuaga sa le na o se galuega a le Tama, ma se galuega a le Faaola, ae o le tatou galuega foi."¹⁶

"[O le] faapotopotoina o le mea aupito sili lea ona taua o loo tupu i le lalolagi i aso nei," na saunoa ai Peresitene Nelson a o faimalaga atu ai o ia i le lalolagi. "Pe a tatou talanoa i le faapotopotoina, ua na ona tatou fai atu lava o lenei upumoni taua: o tagata uma o fanau a lo tatou Tama Faalelagi, i itu uma o le veli, e tatau ona faalogo i le savali o le talalelei toefuataina a Iesu Keriso."¹⁷

I le avea ai ma se Aposetolo a le Alii o Iesu Keriso, ou te faamaea atu i se valaaulia ma se folafolaga. Muamua, o le valaaulia: Ou te valaaulia outou ia mafaufau i folafolaga ma feagaiga ua outou osia ma le Alii, ma faatasi ai ma isi, ma le amiosa'o tele, ma le iloaina o le a outou savavali i a outou upu. Lua, ou te folafola atu ia te outou, a outou faia leni mea, o le a faamautuina e le Alii a outou upu ma faapaiaina a outou galuega a o outou tauivi ai ma le filiga e le faavaivai e atiae o outou olaga, o outou aiga, ma Le Ekalesia a Iesu Keriso o le Au Paia o Aso e Gata Ai. O le a faatasi o Ia ma outou, o'u uso e ma tuafafine, ma e mafai ona outou vaai atu i luma, ma le talitonuga, o le a "talai [outou] i le lagi, ina ia mafai ona [outou] mau faatasi ma le Atua i se tulaga o le fafia e le gata . . . ona ua fetalai mai ai le Alii le Atua."¹⁸

Ou te molimau ma folafola atu ai nei mea, i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 68:6.
2. Mataupu Faavae ma Feagaiga 93:1.
3. 1 Nifae 3:7.
4. Mosaea 18:8–9.
5. 3 Nifae 18:7.
6. Mataupu Faavae ma Feagaiga 82:10.
7. Tagai i le Mataupu Faavae ma Feagaiga 89:18–21.
8. Russell M. Nelson, "Mauaina o le Mana o Iesu Keriso i o Tatou Olaga," *Liahona*, Me 2017, 39.
9. Mataio 25:40.
10. Alema 17:14.
11. Alema 17:25.
12. Ruta 1:16.
13. Luka 10:35.
14. 1 Nifae 4:37.
15. Mataupu Faavae ma Feagaiga 2:2; tagai foi i le Mataupu Faavae ma Feagaiga 27:9; 128:17; Iosefa Samita—Talafaasolopito 1:39.
16. John A. Widtsoe, "The Worth of Souls," *Utah Genealogical and Historical Magazine*, Oct. 1934, 189.
17. Russell M. Nelson, "Faamoemoe o Isaraelu" (faigalotu a le autalavou i le lalolagi atoa, Iuni 3, 2018), <https://www.hopeofisrael.org/2018/06/03/famoemoe-o-israel/>.
18. Mosaea 2:41.



Sauniga a Tamaitai | 5 Oketopa 2019

SAUNIA E REYNA I. ABURTO

Fesoasoani Lua i le Au Peresitene Aoao o le Aualofa

I Mala i Manū, Iesu, Afio Mai!

Ou te molimau atu e “ala i mala ma manū” o le a faatasi le Alii ma i tatou, o ō tatou “puapuaga [e mafai ona] tofatumoanaina i le olioli ia Keriso.”

O se tasi o a tatou viiga faapelepele o loo faailoa mai ai le olega “I mala i manū, Iesu, afio mai!”¹ Sa ou i ai i luga o se vaalele a o latalata atu i se afā tele. O le vaai atu i fao i le faamalama, na mafai ona ou iloa atu ai se faaputuga mafiafia o ao i lalo ifo o i matou. O ave o le la o loo goto ifo na suluia ai ao, na mafua ai ona latou susulu mai ma le malamalama tele. E lei umi, ae faaifo ifo le vaalele i totonu o ao mafiafia, ma sa faafuasei ona ufitia ai i matou e se pogisa mafiafia na galo atoa ai ia i matou le malamalama susulu sa matou molimauina i sina taimi na muamua atu.²

E mafai foi ona fatua’i ni ao pa’auli i o tatou olaga, ia e mafai ona galo ai ia i tatou le malamalama o le Atua ma mafua ai ona tatou fesiligia pe o toe i ai pea lena malamalama mo i tatou. O nisi o na ao o le atuatuvaile, popole, ma isi ituaiga o mafatiaga faalemafaufau ma faalelagona. E mafai ona latou faase-seina le auala tatou te vaai ai ia i tatou lava, o isi, e oo lava i le Atua. Ua aafia ai tamaitai ma alii o vaiautaga uma i tulimanu uma o le lalolagi.

E faapena foi le leaga o le ao taufaa-ōleōle o le masalosalo lea e mafai ona

aafia ai isi e le’i tofo i nei luitau. E pei o soo se vaega o le tino, e aafia foi le faiai i faama’i, mafatiaga ma vailaau eseese. Pe a mafatia o tatou mafaufau, e tatau ona tatou saili atu i le fesoasoani mai le Atua, mai ia i latou o loo siomia i tatou, ma mai polofesa o le soifua maloloina faafomai ma faalemafaufau.

“O tagata soifua uma—tane ma le fafine—ua foafoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma . . . ua tofua ai ma se natura



paia ma se taunuuga.”³ E pei o o tatou Matua Faalelagi ma lo tatou Faaola, ua tatou maua se tino faaletino⁴ ma aafia i lagona.⁵

O’u uso pele, o se mea masani le lagona o le faanoanoa po o le popole i sina taimi. O le faanoanoa ma le atu-atuvala o lagona masani ia o le tagata soifua.⁶ Peitai, afai tatou te faanoanoa pea ma afai e poloka e o tatou tiga lo tatou tomai e lagona ai le alofa o lo tatou Tama Faalelagi ma Lona Alo ma le faatosinaga a le Agaga Paia, atonu la o loo tatou mafatia mai le atuatuvaile, popole, po o isi tulaga faalelagona.

Sa tusia e la’u tama teine i se tasi taimi: “Sa i ai se taimi . . . [sa] ou matua faanoanoa ai lava i taimi uma. Sa ou mafaufau i taimi uma o le faanoanoa o se mea e maasiasi ai, ma o se faailoga o se vaivaiga. O lea sa ou le ta’ua ai i se tasi o’u faanoanoaga. . . . Sa ou lagona le leai atoa o so’u taua.”⁷

Sa faamatalaina e se uo i le auala leni: “Talu mai lava lo’u laitiiti, sa ou feagai ma se taua faifai pea ma lagona o le leai o se faamoemoe, pogisa, tuuatoa-tasi, ma le fefe ma le lagona ua olopa-laina a’u pe faaletonu. Sa ou faia mea uma e nana ai o’u tiga ma ia lē tuuina atu le foliga o o’u tulaga faaletonu ae na o le ola manuia ma malosi.”⁸

A’u uo pele, e mafai ona tupu i soo se tasi o i tatou—aemaise lava pe afai, i le avea ai ma tagata talitonu i le fuafuaga o le fiafia, tatou te tuuina avega lē talafeagai i o tatou lava luga e ala i le mafaufau tatou te manaomia ona atoa-toa i le taimi nei. O ia manatu e mafai ona lofituina. O le ausiaina o le atoatoa o se faagasologa o le a tupu i lo tatou olaga faitino ma tala atu—ma e na o le alofa tunoa o Iesu Keriso [e mafai ai].⁹

I se isi itu, pe a tatou faasoa atu e uiga i o tatou luitau faalelagona, ta’utino atu tatou te lē atoatoa, ua tatou tuuina atu i isi le faatagaga e faasoa mai



ai a latou tauiviga. Tatou te iloa faatasi ai o loo i ai le faamoemoe ma e le tataua ona tatou mafatia ai na o i tatou.¹⁰

I le avea ai ma soo o Iesu Keriso, ua tatou osia se feagaiga ma le Atua ua tatou “loto e tauave avega a le tasi [ma le isi]” ma “faanoanoa faatasi ma e e faanoanoa.”¹¹ E mafai ona aofia i lenei mea le amata ona iloina o gasegase faalelagona, sailia o punaoa e mafai ona fesoasoani e taulima ai nei tauiviga, ma iu ai ina aumaia i tatou lava ma isi ia Keriso, o le Fomai Sili.¹² E tusa lava pe tatou te le iloa pe faapefea ona fesoatai i mea o loo aafia ai isi, ae o le faamaoniga e moni a latou fuafuaga, e mafai ai ona avea o se laasaga muamua taua i le sailia o le malamalama ma le faamalologa.¹³

I nisi tulaga, o le mafuaaga o le atuatuvaale po o le popole e mafai ona iloina, ae o nisi taimi e ono faigata atu ona iloaitino.¹⁴ E ono mafatia o tatou faiai ona o le ātu¹⁵ po o le vaivai tele,¹⁶ lea e mafai ona faaleleia i nisi o taimi e ala i fetuunaiga i fuafuaga o meaai, moe, ma le faamalositino. I nisi taimi, o togafitiga po o vailaau i lalo o le tai-taiga a polofesa ua aoaoina e mafai foi ona manaomiaina.

O gasegase faalemafaufau pe faalelagona e lē togafitia e mafai ona taitai atu i le faateleina o le faaesea, malamalama sese, mafutaga malepelepe, faamanualia o le tagata lava ia, ma e

oo lava i le pule i le ola. Ou te iloina patino lenei mea, ona sa malii lo’u lava tama i le pule i le ola i le tele o tausaga talu ai. O lona malii sa faateia ma nutimomoia ai loto o lo’u aiga ma a’u. Na tele ni tausaga na ou galue ai e fo’ia lo’u faanoanoaga, ae talu ai nei lava sa ou aoao ai o le talanoa e uiga i le pule i le ola i auala talafeagai e fesoasoani moni lava e puipuia nai lo le uunaia.¹⁷ Ua ou talanoaina saoloto nei ma la’u fanau le oti o lo’u tama ma molimauina le faamalologa e mafai e le Faaola ona tuuina mai i itu uma e lua o le veli.¹⁸

O le mea e faanoanoa ai, o le toatele o ē mafatia mai le ogaoga o le atuatuvaale e faataumamaoina i latou lava mai o latou uso a Au Paia ona latou te lagona e lē fetai i latou i nisi o uiga latou te mafaufauina. E mafai ona tatou fesoasoani ia latou iloa ma lagona latou te auai moni faatasi ma i tatou. E taua le iloina o le atuatuvaale e le o se taunuuga o vaivaiga, po o se taunuuga masani foi o le agasala.¹⁹ E “faateleina pe a faalilolilo ae e faaititia i le agaalofoa mai i isi.”²⁰ Tatou te mafai faatasi ona talepe ao o le faaesea ma le faalumaina ina ia aveesea le avega o le maasiasi ma mafai ai ona tutupu vavega o le faamalologa.

I le taimi o Lana galuega faaletino, na faamalolo ai e Iesu Keriso ē mama’i ma ē mafatia, ae sa tataui i tagata taitoatasi ona faaoga le faatuatua

ia te Ia ma galue ina ia maua Lana faamalologa. O nisi sa savavali mo se mea mamao, o isi na faaloaloa atu o latou lima e pa’i ai i Lona ofu, ma o isi sa tataui ona aveina atu ia te Ia ina ia mafai ona faamaloloina.²¹ Pe a oo i le faamalologa, pe tatou te le matua manaomia uma ea o Ia? “Pe le o i tatou uma ea o ni tagata aisi?”²²

Ia tatou mulimuli i le ala a le Faaola ma faateleina lo tatou agaalofoa, faaititia o tatou uiga faamasino atu, ma tuu lo tatou suesue fua o olaga faaleagaga o isi. O le faalogo atu ma le alofa o se tasi lea o meaalofoa silisili e mafai ona tatou ofoina atu, ma atonu o le a mafai ona tatou fesoasoani e tauave pe aveesea ai ao mamafa ia e taotaomia ai ē pele ia i tatou ma uo²³ ina ia mafai, e ala i lo tatou alofoa, ona latou toe lagona ai le Agaga Paia ma vaaia ai le malamalama e sau mai ia Iesu Keriso.

Afai e siomia pea oe e se “puao o le pogisa,”²⁴ liliu atu i le Tama Faalelagi. E leai se mea na e oo i ai e mafai ona suia ai le upumoni e faavavau o oe o Lona afaifine ma e alofa o Ia ia te oe.²⁵ Ia manatua o Keriso o lou Faaola ma le Togiola, ma o le Atua o lou Tama. E malamalama i La’ua. Vaai faalemafaufau ia i La’ua o lataane ia te oe, o loo faafofoga ma ofoina mai le lagolago.²⁶ “O le a [La’ua] faamafanafanaina outou i o outou puapuaga.”²⁷ Ia fai mea uma e te mafaia, ma faalagolago i le togiola alofa tunoa a le Alii.

O au tauiviga e le faamatalaina ai oe, ae e mafai ona faaleleia ai oe.²⁸ Ona o se “mea matuitui i le tino,”²⁹ atonu o le a e maua ai le tomali e lagona atili ai le agaalofoa i isi. E pei ona taialaina e le Agaga Paia, faasoa atu lau tala ina ia “fesoasoani i e vaivai, sii i luga lima ua tautau i lalo, ma faamalosi tulivae ua vaivai.”³⁰

Mo i nisi o i tatou o loo tauivi i le taimi nei pe lagolagoina se tasi o loo

tauivi, ia tatou loto e mulimuli i polo-aiga a le Atua ina ia tatou maua pea Lona Agaga e faatasi ma i tatou.³¹ Ia tatou faia “mea laiti ma faatauvaa”³² o le a tatou maua ai le malosi faaleagaga. E pei ona saunoa mai Peresitene Russell M. Nelson, “E leai se mea na te tatala-ina le lagi e pei o le tuufaatasiga o le mamā a’ia’i faateleina, usiusitai sa’olele, sailiga ma le naunautai, taumafa i aso taitasi i afioga a Keriso i le Tusi a Mamona, ma taimi faisoo e tuuto atu i le galuega o malumalu ma talafaasolopito o aiga.”³³

Ia tatou manatua uma o lo tatou Faaola, o Iesu Keriso, “[ua ave] i ona luga o [tatou] vaivaiga, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia . . . le ala e fesoasoani ai [ia i tatou] e tusa ai ma o [tatou] vaivaiga.”³⁴ Na afio mai o Ia “e fufusi i e loto momomo, . . . e [faa-mafanafana] i e faanoanoa uma; . . . e foaiina atu ia i latou le matagofie e sui a’i le efuefu, o le uu o le olioli e sui a’i le faanoanoa, o le ofu e fai a’i viiga e sui a’i le loto faavaivai.”³⁵



Ou te molimau atu ia te outou e “ala i mala ma manū” o le a faatasi le Alii ma i tatou, o o tatou “puapuaga [e mafai ona] tofatumoanaina i le olioli ia Keriso,”³⁶ ma “e faaolaina i tatou i le alofa tunoa, pe a uma mea uma e mafai ona tatou faia.”³⁷ Ou te molimau atu o le a toe afio mai Iesu Keriso i le lalolagi “ma le faamalologa i ona apaau.”³⁸ I le iuga, e “soloiesea e [Ia] loimata uma i o [tatou] mata; e leai foi se toe . . . faanoanoa.”³⁹ Mo i latou uma o le a “o mai ia Keriso, ma faaatoatoaina ia te ia,”⁴⁰ “e le toe goto le la; . . . auā e faia Ieova [ma o tatou] malamalama e faavavau, e uma foi a o o [lo tatou] faanoanoa.”⁴¹ I le suafa o Iesu Keriso, amene. ■

FAAMATALAGA

1. “Afio Mai” *Viiga*, nu. 92.
2. A o matou i luga a’e o ao, sa le mafai ona matou vaaia le pogisa lea na o ni nai futu na i ai i lalo ifo o matou, ma ina ua ufitia i matou i le pogisa i lalo, sa faigata ona vaai i le susulu o le la lea sa susulu i ni nai futu i luga a’e o i matou.
3. “O Le Aiga: O Se Folaolaga i le Lalolagi,” *Liahona*, Me 2017, 145.
4. “O le agaga ma le tino o le tagata lea” (Mataupu Faavae ma Feagaiga 88:15). “O lou tino o le malumalu mo lou agaga. Ma o le auala e te faaoga ai lou tino e aafia ai lou agaga” (Russell M. Nelson, “O Filifiliga mo le Faavavau,” *Liahona*, Nov. 2013, 107).
5. Tagai, mo se faaitaiga, Isaia 65:19; Luka 7:13; 3 Nifae 17:6–7; Mose 7:28. O le aoao e faailoa ma faatauaina o tatou lagona e mafai ona fesoasoani ia i tatou e faaogaina lelei ina ia ave atili ai faapei o lo tatou Faaola, o Iesu Keriso.
6. Tagai “Sadness and Depression,” kidshealth.org/en/kids/depression.html.
7. Hermana Elena Aburto blog, hermanaelenaaburto.blogspot.com/2015/08. Sa ia tusia foi:
“O lena tofotofoga na ou maua ai le avanoa e faatino moni ai lo’u faatuatua i le ata o le faaolataga. Aua na ou iloa na alofa lo’u Tama Faalelagi ia te a’u, ma o loo i ai Sana fuafuaga mo au, ma na malamalama lelei Keriso i le mea na ou oo i ai.”
“E le faalumaina oe e le Atua pe a le lava lou tomai. E fiafia o Ia e fesoasoani ia te oe ia faaleleia na salamo. E le o fa’amoemoe o Ia e fa’alelei mea uma i le taimi e tasi. E te le tau faia nao oe lenei mea” (iwillhealthee.blogspot.com/2018/09).
8. Tusitusiga patino. Sa ia tusia foi: “O le pulupasama faamalolo o le Togiola a lou Faaola o le punavai aupito tumau lea o le filemu ma le sulufaiga i lau malaga atoa. Pe a ou lagonaina le tuuatoatasi i la’u tauiviga, ua faamanatu mai ia te au ua uma ona Ia silafia tonu le mea o loo feagai ma au. . . . E i ai le tele o le faamoemoe i le iloa ina o lo’u tino toetu atoatoa i le lumanai, o le a le afaina i lenei [mafatiaga] faaletino.”
9. Tagai i le Russell M. Nelson, “Atoatoaga o Lo o Faatalitali,” *Ensign*, Nov. 1995, 86–88; Jeffrey R. Holland, “Ia Atoatoa Ona Lelei o La Outou Amio—I Le Iuga,” *Liahona*, Nov. 2017, 40–42; J. Devn Cornish, “O Lava Ea Lo’u Lelei? Pe O Le A Ou Ausia Ea?” *Liahona*, Nov. 2016, 32–34; Cecil O. Samuelson, “What Does It Mean to Be Perfect?” *New Era*, Jan. 2006, 10–13.
10. E taua le talanoa atu e uiga i nei faafitauli i a tatou fanau, aiga, ma uo i o tatou aiga, uarota, ma alalafaga.
11. Mosaea 18:8–9.
12. Tagai i le Russell M. Nelson, “Iesu Keriso—o le Fomai o Fomai,” *Liahona*, Nov. 2005, 85–88; Carole M. Stephens, “O Le Fomai Sili,” *Liahona*, Nov. 2016, 9–12.
13. O le iloa ina pe faapefea ona faailoa faailoga ma auga ia i tatou lava ma isi e mafai ona fesoasoani. E mafai foi ona tatou aoao e iloa ai le le sa’o po o auala o mafaufauga le lelei ma le auala e suitulaga ai i [mafaufauga] sili atu ona sao ma maloloina.
14. O le atuatuavale e mafai foi ona afua mai i suiga lelei o le olaga—e pei o le fanau mai o se tamaitiiti po o se galuega fou—ma e mafai ona tupu pe a lelei mea i le olaga o se tagata
15. Tagai “Understanding Stress,” *Adjusting to Missionary Life* (2013), 5–10.
16. Tagai Jeffrey R. Holland, “Peiseai o se Ipu ua Nutilili,” *Liahona*, Nov. 2013, 40.
17. Tagai ia Dale G. Renlund, “Understanding Suicide” (video), ChurchofJesusChrist.org; “Talking about Suicide” (video), ChurchofJesusChrist.org; Kenishi Shimokawa, “Malamalama i le Pule i le Ola: Faailoilo o Lapataiga ma Puipuga,” *Liahona*, Oke. 2016, 35–39.
18. “O le amataga o le faamalologa e manaomia ai le faatuatua e pei o se tamaitiiti i le mea moni e le masuia, e alofa le Tama oi le Lagi ia te oe ma ua saunia se ala e faamalolo ai. Na ofoina mai e Lona Alo Pele, o Iesu Keriso Lona soifua e saunia ai lena faamalologa. Peitai e leai se vaifofo faamaneta, leai se pulu pasama faigofie e maua ai le faamalologa, e leai foi se auala faigofie i togafitiga atoatoa. O le fofu e manaomia ai le faatuatua loloto ia



SAUNIA E LISA L. HARKNESS
Fesoasoani Muamua i le Au Peresitene Aoao o le Peraimeri

Iesu Keriso i Lona mana e le iu e faamalolo ai” (Richard G. Scott, “O Le Faamaloloina o Taunuuga Faataumaoi o le Sauaina po o le Faatautala,” *Liahona*, Me 2008, 42). Pe a i ai se faafitauli, o lo tatou faanaunauga o le faaleleia. Ae ui i lea, e le tatou ona avea i tatou ma tagata e faaleleia mo i tatou lava po o isi tagata. Tatou te le tau faia mea uma. I le silia ma le tasi le taimi i lo’u olaga, sa ou sailia ni tagata fesoasoani e fesoasoani ia te a’u e taulimaina taimi faigata.

19. Tagai i le Ioane 9:1–7.
20. Jane Clayson Johnson, *Silent Souls Weeping* (2018), 197.
21. Tagai i le Mataio 9:2–7, 20–22; 14:35–36; Mareko 1:40–42; 2:3–5; 3 Nifae 17:6–7.
22. Mosaea 4:19; tagai foi i le Jeffrey R. Holland, “Pe Le o i Tatou Uma Ea o Ni Tagata Aisi?” *Liahona*, Nov. 2014, 40–42.
23. Tagai i le Roma 2:19; 13:12; tagai foi i le Jeffrey R. Holland, “Come unto Me” (Brigham Young University devotional, Mar. 2, 1997), speeches.byu.edu.
24. 1 Nifae 8:23; tagai foi i le 1 Nifae 12:4, 17; 3 Nifae 8:22.
25. Tagai i le Salamo 82:6; Roma 8:16–18; Mataupu Faavae ma Feagaiga 24:1; 76:24; Mose 1:1–39.
26. Tagai *Adjusting to Missionary Life*, 20; tagai foi i le Mika 7:8; Mataio 4:16; Luka 1:78–79; Ioane 8:12.
27. Iakopo 3:1; tagai foi i le Efeso 5:8; Kolose 1:10–14; Mosaea 24:13–14; Alema 38:5. Faitau lau faamanuiaga faapeteriaka ma talosaga atu mo se faamanuiaga faaleperisitua ina ia mafai ona e lagona ma manatua le tele o le alofa o le Tama Faalelagi ia te oe ma e finagalo e faamanuia oe.
28. Tagai i le 2 Korinito 4:16–18; Mataupu Faavae ma Feagaiga 121:7–8, 33; 122:5–9.
29. 2 Korinito 12:7.
30. Mataupu Faavae ma Feagaiga 81:5; tagai foi i le Isaia 35:3.
31. Tagai i le Moronae 4:3; Mataupu Faavae ma Feagaiga 20:77.
32. Alema 37:6.
33. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.
34. Alema 7:12; tagai foi i le Isaia 53:4; 2 Nifae 9:21; Mosaea 14:4.
35. Isaia 61:1–3; tagai foi i le Luka 4:18.
36. Alema 31:38; tagai foi i le Alema 32:43; 33:23.
37. 2 Nifae 25:23.
38. Malaki 4:2; 3 Nifae 25:2.
39. Faaaliga 21:4.
40. Moronae 10:32.
41. Isaia 60:20.

Faamamaluina o Lona Suafa

I le faasinomaga ma le auai i feagaiga, ua valaauina ai i tatou i le suafa o Iesu Keriso.

A o faatalitali ma le fafia matua i le fanau mai o se tamaitiiti, ua ia i latou le tiutetauave o le filifilia o se igoa mo le latou pepe fou. Masalo ina ua e fanau mai, na e maua se igoa na tuufaasolo mai i lou aiga mo augatupulaga. Pe atonu o le igoa na e mauaina sa lauiloa i le tausaga po o le nofoaga lea na e fanau mai ai.

Sa tuuina atu e le perofeta o Helamana ma lona faletua ni igoa taua faaleaiga i o laua atalii pepe o Nifae ma Liae. Sa ta’u atu mulimuli ane e Helamana i ona atalii:

“Ua ou faaigoaina oulua i igoa o tatou uluai matua . . . ina a oulua manatua o oulua igoa ia oulua manatua ai i laua; ma a oulua manatua i laua ia oulua manatua a laua galuega; . . . ua taua, ma ua tusia foi, e faapea na lelei.

“O lea, ou atalii e, ou te manao ina ia oulua faia le mea ua lelei.”¹

O igoa o Nifae ma Liae na fesoasoani ia i laua e manatua ai galuega lelei a o la tuua ma uunaia i laua ia faia foi mea lelei.

Uso e, po o fea lava o tatou nonofo ai, po o le a le gagana tatou te tautatala



ai, pe ua 8 tausaga le matua pe ua 108, tatou te tausoina uma se suafa faapitoa o loo i ai nei faamoemoega lava e tasi.

“Aua o [tatou] uma lava na papatisoina ia Keriso ua . . . oofu ia Keriso . . . aua ua tasi lava [tatou] uma ia Keriso Iesu.”²

I le avea ai ma tagata o Le Ekalesia a Iesu Keriso o le Au Paia o Aso e Gata Ai, “na muamua tatou tautino atu i ai lo tatou naunautai e tauave i o tatou luga le suafa o Keriso, i le sauniga o le papatisoga.”³ E ala i lenei feagaiga, na tatou folafola atu e manatua pea o Ia, tausi i Ana poloaiga, ma auauna atu i isi. O lo tatou naunautai e tausia lenei feagaiga e faafouina i aso Sapati taitasi pe a tatou aai ma feinu i le faamanatuga ma toe olioli ai i le *faamanuiaga* o le “savavali i le ola toefuataiina.”⁴

O le igoa na tuuina mai ia i tatou ina ua tatou fananau mai ua atagia ai lo tatou faasinomaga taitoatasi ma tuuina mai le lagona auai i totonu o o tatou aiga faalelatalagi. Peitai, ina ua “toe fanauina” i tatou i le papatisoga, o lo tatou malamalamaaga pe o ai i tatou na faateleina. “Ona o le feagaiga ua outou faia, o le a ta’ua ai outou o le fanau a Keriso, . . . aua faauta, . . . ua fanauina ai e ia outou faaleagaga; aua ua outou fai mai ua liua o outou loto ona o le faatuatua i lona suafa; o lea, ua fanauina ai outou e ia.”⁵

O lea la, i le faasinomaga ma le auai i feagaiga, ua valaauina ai i tatou i le suafa o Iesu Keriso. Ma “o le a lē i ai se isi igoa e tuuina mai po o se isi lava ala po o ni auala e mafai ona oo mai ai le olataga i le fanauga a tagata, ua nao i le suafa lava ma ala i le suafa lava o Keriso, le Alii Mamana Aoao.”⁶

O le suafa o Iesu sa lauiloa ao lei taitai soifua mai o Ia. I le Tupu o Peniamina, na valoia e se agelu, “Ma o le a ta’ua o ia o Iesu Keriso, o le Alo o le Atua, . . . ma o lona tina o le a ta’ua o Maria.”⁷ O Lana galuega o le “alofa toggiola”⁸ na faailoa mai foi i fanau a



le Atua i soo se taimi lava na i ai le talalelei i le lalolagi, mai lava i ona po o Atamu ma Eva seia oo mai i le taimi nei, ina ia mafai ona latou iloa “le puna e mafai ona latou tepa taulai i ai mo se faamagaloga o a latou agasala.”⁹

I le tausaga ua mavae, na tuuina mai ai e Peresitene Russell M. Nelson “se talosaga faavaloaga” i tamaitai ina “ia mamanuina le lumanai e ala i le fesoasoani e faapotopototo Isaraelu ua faataapeapeina.” Sa ia valaaulia i tatou e faitau le Tusi a Mamona ma “faailoga fuaiupu taitasi o loo talanoa pe o loo faasino i le Faaola.” Sa ia saunoa mai ia tatou “manatu i ai e uiga i le tautalatala e uiga ia Keriso, olioli ia Keriso, ma talai atu Keriso faatasi ma o [tatou aiga] ma uo.” Atonu ua amata ona e iloa ina fua o ana folafolaga “o le a outou latalata atili atu i le Faaola. . . . Ma o suiga, e oo lava i vavega, o le a amata ona tutupu.”¹⁰

O la tatou folafolaga ia manatua pea le Faaola tatou te maua ai le malosi e tu atu ai mo le upumoni ma le amiotonu—pe o tatou i ai i se faapotopotoga

toatele o tagata po o ō tatou nofoaga tuufua, lea e leai se tasi e iloina a tatou amioga vagana ai le Atua. A tatou manatuaina o Ia ma Lona suafa o loo tatou tauaveina, o le a leai so tatou nofoaga mo ni faatusatusaga e le lelei mo i tatou lava po o faamasinoga faamaualuga. Faatasi ma o tatou mata i le Faaola, tatou te vaai ia i tatou lava po o ai moni lava i tatou—o se afafine faapelepele o le Atua.

O le manatuaina o a tatou feagaiga e faafilemu ai popolega o le lalolagi, liliu ai le masalosalo o le tagata lava ia i le lototele, ma tuuina mai le faamoemo e i taimi o tofotofoga.

Ma afai tatou te tautevateva ma pauu i lo tatou alualu i luma i luga o le ala o feagaiga, tau lava o le tatou manatuaina o Lona suafa ma Lona alofa-aga-lelei ia i tatou. “Ona ua ia te ia le mana uma, ma le poto uma, ma le malamalama uma; ua silafia e ia mea uma, ma o ia o se Tagata alofa mutimutivale . . . o i latou o e e salamo ma talitonu i lona suafa.”¹¹ E moni lava e leai se leo e sili atu ona logomalie nai lo le suafa o Iesu

ia i latou uma o e, faatasi ma se loto momomo ma se agaga salamo, e saili ina ia “faia ia lelei atu ma ia lelei atu.”¹²

Na aoao mai Peresitene Nelson: “Ua mavae aso sa mafai ai ona ave oe o se Kerisiano filemu ma le lagolelei. O lau tapuaiga e le na ona e auai atu lava i le lotu i le Aso Sa. O lona uiga o le auai atu o se soo moni mai le taeao o le aso Sa e oo atu i le po o le Aso Toonai. . . . E leai se mea e faapea o se soo ‘faavai-taimi’ a le Alii o Iesu Keriso.”¹³

O lo tatou loto e ave i o tatou luga le suafa o Keriso e sili atu nai lo o se talanoaga aloaia. E lē o se folafolaga e lē taunuu po o se aganuu faafoliga. E lē o se sauniga o se mea na tupu i le olaga po o se pine o le igoa tatou te faapiiina. E lē o se faaupuga e tau lava ina tatou tuu i luga o se fata pe tautau i luga o se puipui. O Lona suafa o le suafa e “oofu [ai],”¹⁴ e tusia i o tatou loto, ma “togitogitia i luga o [tatou] mata.”¹⁵

O le taulaga togiola a le Faaola e tatau ona manatuaina, i taimi uma, e ala i o tatou mafaufauga, amioga, ma fegalegaleaiga ma isi. E le gata Na te manatua o tatou igoa, ae e manatua e Ia i tatou i taimi uma. Sa tautino mai le Faaola:

“Aua pe mafai ea ona galo i se fafine lana tama o susu, ina ia lē alofa o ia i le tama a lona manava? Ioe, atonu e galo ia te i latou, ae o le a le galo ia te a’u oe, le aiga e o Isaraelu.

“Faauta, ua Ou togitogia oe i luga o alofilima o o’u lima.”¹⁶

Na aoao mai Peresitene Siaosi Alapati Samita, “Faamamalu i igoa o loo e tauaveina, aua o le a i ai se aso e te maua ai le faamanuiaga ma le avanoa e lipoti atu ai . . . i lou Tama o i le Lagi . . . mea na e faia i [na igoa].”¹⁷

E pei o igoa o Nifae ma Liae na filifilia ma le faateete, pe mafai ea ona talanoaina ma tusitusi e uiga ia i tatou o ni soo moni o le Alii o Iesu Keriso? Pe



o tatou faamamaluina ea le suafa o Iesu Keriso lea ua tatou loto e ave i o tatou luga? O i tatou uma ea o “se auauna ma se molimau”¹⁸ o Lona alofa-agalelei ma Lona mana togiola?

E lei leva atu, sa ou faalogologo ai i le Tusi a Mamona. I le mataupu mulimuli o le 2 Nifae, sa ou faalogologo o fai mai Nifae i se mea ou te le’i faitauina muamua i lea auala e tasi. I lana faamaumauga atoa, ua ia aoao mai ma molimau mai e uiga i le “Togiola,” le “Paia [e Toatasi] o Isaraelu,” le “Tamai Mamoe a le Atua,” ma le “Mesia.” Ae ina ua ia faaiiua lana tala, sa ou faalogologo o ia fai mai upu nei: “Ou te olioli i le manino; ou te olioli i le upumoni; ou te olioli i lo’u Iesu, ona ua togiola e ia lo’u agaga.”¹⁹ Ina ua ou faalogologo atu i upu nei, sa olioli lo’u loto ma sa tatau ona ou faalogologo pea lava pea i ai. Sa ou iloina ma tali atu i lena fuaiupu e pei lava ona ou iloa ma tali atu i lo’u lava igoa.

Na fetalai mai le Alii, “Ioe, amuia lava lenei nuu o e ua loto e tauave lo’u igoa; ona o lo’u igoa o le a valaau ai i latou; ma o ā a’u i latou.”²⁰

I le avea ai ma tagata o Le Ekalesia a Iesu Keriso o le Au Paia o Aso e Gata Ai, tau ina ia tatou “ave ma le fafia [i o tatou luga] le suafa o Keriso”²¹ e ala i le

faamamaluina o Lona suafa i le alofa, tuuto, ma galuega lelei. Ou te molimau atu o Ia o le “Tamai Mamoe a le Atua, le Alo o le Tama Faavavau.”²² I le suafa o Lona alo paia, o Iesu Keriso, amene. ■

FAAMATALAGA

1. Helamana 5:6–7.
2. Kalatia 3:27–28.
3. D. Todd Christofferson, “O Le Mana o le Feagaiga,” *Liahona*, Me 2009, 20.
4. Roma 6:4.
5. Mosaea 5:7.
6. Mosaea 3:17.
7. Mosaea 3:8.
8. Alema 26:13.
9. 2 Nifae 25:26.
10. Russell M. Nelson, “Auai o Tuafafine i le Faapotopotoina o Isaraelu,” *Liahona*, Nov. 2018, 70.
11. Alema 26:35.
12. Russell M. Nelson, “E Mafai Ona Tatou Faia ia Lelei Atu ma Ia Tatou Lelei Atu,” *Liahona*, Me 2019, 69.
13. Russell M. Nelson, “Disciples of Jesus Christ—Defenders of Marriage” (Brigham Young University commencement, Aug. 14, 2014), 3, speeches.byu.edu.
14. Kalatia 3:27.
15. Alema 5:19.
16. 1 Nifae 21:15–16.
17. George Albert Smith, “Your Good Name,” *Improvement Era*, Mar. 1947, 139.
18. Galuega 26:16.
19. 2 Nifae 33:6; faaopoopo le faamamafa.
20. Mosaea 26:18.
21. Alema 46:15.
22. 1 Nifae 11:21.



O LE AU PERESITENE SILI



Dallin H. Oaks
Fesoasoani Muamua



Russell M. Nelson
Peresitene



Henry B. Eyring
Fesoasoani Lua

O LE KORAMA A APOSETOLO E TOASEFULULUA



M. Russell Ballard



Jeffrey R. Holland



Dieter F. Uchtdorf



David A. Bednar




Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

O LE AU PERESITENE O FITUGAFULU



L. Whitney Clayton



Patrick Kearon



Carl B. Cook



Robert C. Gay



Terence M. Vinson




José A. Teixeira



Carlos A. Godoy

AU PULEGA AOA O FITUGAFULU (i le faasologa faalafapeta)



Marcos A. Adunkatis



Ruben V. Allaud



Jose L. Alonso



Jorge M. Alvarado



Ian S. Arden



Steven R. Bangertner



W. Mark Bassett



David S. Baxter



Randall K. Bennett



Hans T. Boom



Shayne M. Bowen



Mark A. Bragg



L. Todd Budge



Matthew L. Carpenter



Yoon Hwan Choi



Craig C. Christensen



Weatherford T. Clayton



Valeri V. Gordin



J. Devin Cornish



Joaquin E. Costa



LeGrand R. Curtis Jr.



Massimo De Feo



Benjamin De Hoyos



Edward Dube



Kevin R. Duncan



Timothy J. Dyches



David F. Evans



Enrique R. Falabella



Randy D. Furk



Eduardo Gavaret



Jack N. Gerard



Ricardo P. Gimenez



Taylor G. Godoy



Christoffel Golden



Walter E. González



Brook P. Hales



Kevin S. Hamilton



Allen D. Haynie



Mathias Held



David P. Homer



Paul V. Johnson



Peter M. Johnson



Larry S. Kacher



Jörg Klebingat



Joni L. Koch



Erich W. Kopischke



Hugo E. Martinez



James B. Martino



Richard J. Maynes



John A. McCune



Kyle S. McKay



Peter F. Meurs



Hugo Montoya



Marcus B. Nash



K. Brett Nattress



S. Gifford Nielsen



Brent H. Nielson



Adrián Ofrao



S. Mark Palmer



Adilson de Paula Parrella



Kevin W. Pearson



Anthony D. Perkins



Paul B. Pieper



John C. Pingree Jr.



Rafael E. Pino



James R. Rasband



Michael T. Ringwood



Lynn G. Robbins



Gary B. Sablin



Evan A. Schmutz



Joseph W. Strati



Vern P. Stantill



Benjamin M. Z. Tai



Brian K. Taylor



Michael John U. Teh



Juan A. Uceda



Aníbal Valenzuela



Juan Pablo Villar



Takashi Wada



Taniela B. Wakolo



Alan R. Walker



Scott D. Whiting



Chi Hong (Sam) Wong




Kazuhiko Yamashita



Jorge F. Zaballón

O LE AU EPIKOPO PULEFAAMALUMALU



Dean M. Davies
Fesoasoani Muamua



Gerald Causse
Epikopo Pulefaamalumu



W. Christopher Waddell
Fesoasoani Lua

TAITAI AOA




Milton Camargo
Fesoasoani Muamua



Mark L. Pace
Peresitene




Jan E. Newman
Fesoasoani Lua



Michelle Craig
Fesoasoani Muamua



Bonnie H. Cordon
Peresitene



Becky Craven
Fesoasoani Lua



Sharon Eubank
Fesoasoani Muamua




Jean B. Bingham
Peresitene




Reyna I. Aburto
Fesoasoani Lua



Lisa L. Harkness
Fesoasoani Muamua




Joy D. Jones
Peresitene



Cristina B. Franco
Fesoasoani Lua



Douglas D. Holmes
Fesoasoani Muamua



Stephen W. Owen
Peresitene



M. Joseph Brough
Fesoasoani Lua

ALII TALAVOU





SAUNIA E BONNIE H. CORDON
Peresitene Aoa o Tamaitai Talavou

Afafine Faapelepele

I le fatu o mea uma matou te faia i Tamaitai Talavou o lo matou naunau lea e fesoasoani atu ina ia outou maua le faatuatua mausali i le Alii o Iesu Keriso.

O’u uso pele e, o se fiafiaga le i ai faatasi ma outou! Ua tatou molimauina le anoanoai o faaaliga e le gata e tofotofoina ai le faaleagaga ae faagaetiaina foi.

A o tatou amata, ou te fia faailoa atu outou i ni uo; o ni tamaitai talavou e tulaga ese i taleni, tu masani, ma tulaga faaletagata lava ia ma faaleaiga. E pei foi o outou uma, o i latou taitoatasi na ootia ai lo’u loto.

Muamua, feiloai ia Bella. E tu malosi o ia ona na o ia lava le tamaitai talavou i lana paranesi i Iselani.

Feiloai ia Josephine tuuto mai Aferika, o lē na toe tuuto atu e suesue le Tusi a Mamona i aso uma. Ua ia iloaia le mana ma faamanuiaga e oo mai i lenei faatinoga faigofie ma faamaoni.

Ma mulimuli, feiloai i la’u uo pele o Ashtyn, o se tamaitai talavou tulaga ese o lē na malui i le mavae ai o se tauiviga ono-tausaga ma le kanesa. O lana molimau malosi i le Togiola a Iesu Keriso o loo lagonaina pea i lo’u loto.

O outou uma o ni tamaitai talavou ofoofogia. E tulaga ese outou, e tofu ma a outou lava meaalofo ma aafiaga ae e tutusa i se auala e sili ona taua ma faavavau.

O outou moni o afafine agaga a ni Matua Faalelagi, ma e leai se mea e

mafi ona tuueseeseina outou mai lo La alofa ma le alofa o lo outou Faaola.¹ A o outou faalatalata atili atu ia te Ia, e oo lava i le faia o ni tama’i laa i luma, o le a outou iloaina lava le filemu tumau e i ai i totonu o o outou agaga i le avea ai o se soo faamaoni a lo tatou Faaola, o Iesu Keriso.

Ua talosagaina a’u e Peresitene Russell M. Nelson, lo tatou perofeta pele, e faasoa atu nisi o suiga musuia o le a fesoasoani ia te oe e “atiae [lou] gafatia paia faaletagata lava ia”² ma faateleina lau faatosinaga amiotonu. O le a ou talanoaina vaega e fa o le fetuunaiga i le po nei.

Autu a Tamaitai Talavou

Muamua, i le fatu o mea uma matou te faia i Tamaitai Talavou o lo matou naunau lea e fesoasoani atu ina ia outou

maua le faatuatua mausali i le Alii o Iesu Keriso³ ma se malamalama mautinoa o lou faasinomaga paia o se afafine o le Atua.

I le po nei, ou te fia faasilasila atu se toe faafouga i le autu a Tamaitai Talavou. Ou te tatalo ina ia e lagona le molimau atu o le Agaga Paia i le moni o nei upu a o o’u fai atua le autu fou:

O a’u o se afafine faapelepele a ni matua faalelagi,⁴ e i ai se natura paia ma se taunuuga e faavavau.⁵

I le avea ai ma se so’o o Iesu Keriso,⁶ ou te tauivi ina ia avea e faapei o Ia.⁷ Ou te saili atu ma faatino e tusa ma faaaliga faaletagata lava ia⁸ ma auauna atu i isi i Lona suafa paia.⁹

O le a ou tu e avea ma se molimau a le Atua i taimi uma ma i mea uma ma i nofoaga uma.¹⁰

A o ou tauivi e agavaa mo le faaeaga,¹¹ ou te faatauaina le meaalofo o le salamo¹² ma saili ia lelei atili i aso taitasi.¹³ I le faatuatua,¹⁴ o le a ou faamalosi ai lo’u aiga ma le auaiga,¹⁵ osia ma tausia feagaiga paia,¹⁶ ma maua ia sauniga¹⁷ ma faamanuiaga o le malumalu paia.¹⁸


Ia matau le suiga mai le “matou” i le “a’u.” E faatatau upumoni nei ia te oe e toatasi. O oe o se afafine faapelepele a ni Matua Faalelagi. O oe o se so’o osifeagaiga a lo tatou Faaola, o Iesu Keriso. Ou te valaaulia oe ia suesue ma



Bella, mai Iselani



Josephine, mai Aferika



Ashtyn, o lē na tauivi ma le kanesa



mafaufau loloto i nei upu. Ou te iloa a o e faia, o le a e maua se molimau i lo latou moni a'ia'i. O le malamalama i nei upumoni o le a suia ai le ala e te feagai ai ma luitau. O le iloina o lou faasinomaga ma le faamoemoega o le a fesoasoani e te faaogatusa ai lou loto ma le finagalo o le Faaola.

O le a e mauaina le filemu ma le taitaiga pe a e mulimuli ia Iesu Keriso.

Vasega a Tamaitai Talavou

O le vaega lona lua o le suiga e aafia ai vasega a Tamaitai Talavou. Na saunoa mai Elder Neal A. Maxwell, "I le tele o taimi, o mea e sili ona manao-mia e tagata o le toomaga mai i afa o le olaga i le malutaga o le auai ai."¹⁹ O a tatou vasega e tataua ona avea ma malutaga mai i afa, o nofoaga malupuipui ia o le alofa ma le auai ai. I se taumafaiga e fausia le lotogatasi sili atu, faamallosia o faigauo, ma le faateleina o lena lagona o le auai i totonu o Tamaitai Talavou, ua matou faia ai nisi o fetuunaiga i le faatulagaga o vasega.

Mo le silia ma le selau tausaga, sa vaevaeina ai tamaitai talavou i ni vasega se tolu. Matou te valaaulia taitai o Tamaitai Talavou ma epikopo ia amata nei loa ona mafaufau ma le agaga tatalo i manaoga o tamaitai talavou taitoatasi ma faatulaga loa i latou e tusa ai ma tulaga faapitoa o le uarota. O nisi nei o faaitaiga e ono foliga mai ai lenei mea:

- Afai e toalaiti au tamaitai talavou, e mafai ona tasi lau vasega o Tamaitai Talavou e fono faatasi ai tagata uma.
- Masalo o loo i ai sau vaega toatele o tamaitai talavou e 12 tausaga ma se vaega toalaiti o tamaitai talavou matutua atu. E mafai ona e filifili e fai ni vasega se lua: Tamaitai Talavou 12 ma Tamaitai Talavou 13–18.
- Pe afai foi e toatele le tou uarota e 60 tamaitai talavou e auai ai, e mafai ona i ai ni tou vasega se ono, e tasi mo vaitausaga taitasi, e faatulaga i tausaga.

Po o le a lava le faatulagaga o tou vasega, e taua outou tamaitai talavou i le fausiaina o le lotogatasi. Ia avea ma se malamalama ia i latou o siomia oe. Ia avea ma puna o le alofa ma le tausiga o loo e faamoemoe e maua mai i isi. Faatasi ai ma se tatalo i lou loto, ia faaaauu pea ona aapa atu ma avea ma lena faatosinaga mo le lelei. A o e faia lea mea, o le a faatumulia lou olaga i le agalelei. O le a e maua se lagona lelei atu i isi ma o le a amata ona vaai i lo latou lelei e faaali mai.

Igoa o Vasega a Tamaitai Talavou

Tolu, faatasi ai ma lenei faatulagaga fou o vasega, o le a ta'ua vasega uma i le igoa laugatasia o "Tamaitai Talavou."²⁰ O le a tatou faamutaina le faaogaina o igoa "Ofagapi," "Maca Meite," ma le "Lora."

Faamallosia o Au Peresitene o Vasega

O le vaega mulimuli ou te fia tautalagia o le taua o au peresitene o vasega. E tusa lava pe o le a le faatulagaga o vasega a Tamaitai Talavou, *e tataua i vasega taitasi ona i ai se au peresitene o le vasega!*²¹ E ala i le mamanu paia ua valaauina ai tamaitai talavou e taitai i lo latou talavou.

O le matafaioi ma le faamoemoega o se au peresitene o se vasega ua faamallosia ma manino atili lona faauigaga. O le galuega o le faaolataga o se tasi lea o nei tiutetauave taua, aemaise lava i vaega o le auaunaga, galuega faafaifeautalai, toefaatoagaina mai, ma galuega o le malumalu ma talafaasolopito o aiga.²² Ioe, o le ala leni tatou te faapotopoto ai Isaraelu²³—o se galuega mamalu mo tamaitai talavou uma o ni tagata o le autau talavou a le Alii.

E pei ona tou silafia, i tulaga uma lava o le Ekalesia, e valaauina e le Alii au peresitene e taitai Lona nuu. Tamaitai Talavou, o le avea ma se sui o le au peresitene o se vasega atonu o lou avanoa muamua lea e auai ai i leni mamanu musuia o le taitaiga. Taitai matutua, ia avea le valaauina o au peresitene o vasega ma se faamuamua ona taitai soosoo tauau lea faatasi ma i latou, faufautua ma taiala i latou ina ia latou manuia.²⁴ Po o a lava tulaga o le atamai faaletaitaiga o i ai se au peresitene o se vasega, ia amata i le mea o loo latou i ai ma fesoasoani ia i latou e atiae ni tomai ma le talitonuga o le a faamanuiaina ai i latou o ni taitai. Faalatalata atu ia i latou, ae 'aia nei e puleaina. O le a taiala oe e le Agaga a o e taialaina i latou.

Ina ia faailoa atu le matafaioi



Chloe

taua a matua ma taitai i le avea ai ma ni faufautua, sei ou faamatala atu ia te outou se tala. Sa valaauina Chloe e auauna atu o se peresitene o le vasega. Sa uunaia o ia e lona taitai perisitua atamai e saili i le fesoasoaniga a le Alii i le fautuaina mai o ni igoa mo lona au peresitene. Sa tatalo Chloe ma vave ona maua musumusuga po o ai e fautua atu e avea ma ona fesoasoani. A o faaauau ona ia mafaufau loloto ma tatalo e uiga i se failautusi, sa faataulai atu pea e le Agaga lana taulaiga i se tamaitai talavou o le na faateia ai o ia—o se tasi na seāseā sau i le lotu po o gaoioiga.

I le lagona ai o le lē mautonu i le uunaiga, sa talanoa ai Chloe i lona tina, o lē na faamatala atu o se tasi o auala e mafai ona tatou maua ai faaaliga e ala lea i mafaufauga e oo mai pea. Faatasi ai ma se talitonuga ua toe faafouina, sa lagona ai e Chloe le mafai ona ia fautuaina atu lenei tamaitai talavou. Na tuuina atu e le epikopo le valaauga, ma sa taliaina e le tamaitai talavou. I le mavae ai o le vaetofaina, na faapea mai lenei failautusi lelei, “Tou te iloa, ou te le’i lagona lava e pei na i ai so’u nofoaga pe sa manaomia a’u i soo se mea. Ou te le’i lagona lo’u fetui i ai. Ae o lenei valaauga, ua ou lagona ai e pei o loo i ai i le Tama Faalelagi se faamoemoega ma se nofoaga mo a’u.” A o tuua e Chloe ma lona tina le sauniga, sa liliu atu Chloe i lona tina ma fai atu ma ona loimata, “E moni lava Faaaliga! E aoga moni lava faaaliga!”

Au peresitene o vasega, ua valaauina ma faatuatuaaina outou e le Atua e taitai se vaega o Ona afafine. “E silafia outou e le Alii. . . Na Ia filifilia outou.”²⁵ Ua vaetofaina outou e se tasi o loo i ai le pule o le perisitua; o lona uiga a o e faatinoina tiute o lou valaauga, o loo e faaogaina le pule o le perisitua. Ua i ai se tou galuega taua e fai. Ia nofouta ma galue e tusa ma musumusuga a le



Agaga Paia. A o outou faia, e mafai ona outou auauna atu ma le talitonuga, auā tou te le galulue na o outou!

Peresitene o vasega, matou te manaomia lo outou atamai, leo, ma le malos i le aufono fou a le autalavou a le uarota lea na fofogaina e Elder Quentin L. Cook i le asō. O outou o se vaega taua o le vaifofo i le taulimaina o manaoga a ō outou tuagane ma uso.²⁶

O nei suiga i faatulagaga o vasega ma le taitaiga e mafai ona amata i le taimi lava e saunia ai uarota ma paranesi ae e tatau ona oo atu i le aso 1 o Ianuari, 2020 ua faatulagaina.

O’u uso pele, ou te molimau atu o nei fetuunaiga na ou ta’ua i le asō o faatonuga musuia ia mai le Alii. A o tatou faatinoina ma le filiga nei fetuunaiga, ‘aue ne’i see ese lo tatou taulaiga mai lo tatou faamoemoega: ina ia faamalositia ai

lo tatou naunautaiga e mulimuli ia Iesu Keriso ma fesoasoani i isi ia o mai ia te Ia. Ou te molimau atu o Lana Ekalesia leni. E maeu lo’u faafetai ona ua Ia faatagaina i tatou e avea o se vaega sili ona taua o Lana galuega paia.

Ou te tatalo i le Agaga lava e tasi na taialaina nei fetuunaiga o le a taialaina outou a o outou fetaomi atu i luma i luga o le ala o feagaiga. Ou te molimau atu ai i le suafa o Iesu Keriso, amene. ■

FAAMATALAGA

1. Tagai i le Roma 8:35–39.
2. Russell M. Nelson, “O Molimau, Korama a le Perisitua Arona, ma Vasega a Tamaitai Talavou,” *Liahona*, Nov. 2019, 39.
3. Tagai i le Faataoto 3:5–7; Iakopo 7:5.
4. Tagai i le Roma 8:16–17; Mataupu Faavae ma Feagaiga 76:24; “O Le Aiga: O Se Folafolaga i le Lalolagi,” *Liahona*, Me 2017, 145.
5. Tagai i le 2 Peteru 1:3–4; Alema 37:44; Mataupu Faavae ma Feagaiga 78:18; “O Le Aiga: O Se Folafolaga i le Lalolagi.”
6. Tagai i le Ioane 13:14–15, 35.
7. Tagai i le Mataio 22:37–39; 25:40; 3 Nifae 12:48.
8. Tagai i le Ioane 16:13; 3 Nifae 14:7–8; Moronae 7:13; 10:5; Mataupu Faavae ma Feagaiga 8:2; 9:8; 11:13.
9. Tagai i le Mataio 20:26–28; 22:37–39; 25:34–40; 3 Nifae 26:19.
10. Tagai i le Isaia 43:10; Mosaea 18:9; Mataupu Faavae ma Feagaiga 14:8.
11. Tagai i le Roma 8:17; 2 Nifae 9:18; 31:20; Mataupu Faavae ma Feagaiga 84:38; 132:49; Mose 1:39.
12. Tagai i le Helamana 12:23; Moronae 10:33; Mataupu Faavae ma Feagaiga 58:42.
13. Tagai i le Alema 34:33; Mataupu Faavae ma Feagaiga 82:18.
14. Tagai i le Eperu 11; 2 Nifae 31:19–20; Alema 32:21.
15. Tagai i le Iosua 24:15; Mataupu Faavae ma Feagaiga 109:8; 132:19.





SAUNIA E PERESITENE HENRY B. EYRING
Fesoasoani Lua i le Au Peresitene Sili

16. Tagai i le Esoto 19:5; 1 Nifae 14:14; 2 Nifae 11:5; Mataupu Faavae ma Feagaiga 54:6; 66:2; 90:24.
17. Tagai i le Mosaca 13:30; Alema 30:3; Mataupu Faavae ma Feagaiga 84:20–22; Mataupu Faavae o le Faatuatua 1:3.
18. Tagai i le Salamo 24:3; Isaia 2:3; Esekielu 37:26.
19. Neal A. Maxwell, *All These Things Shall Give Thee Experience* (1979), 55.
20. E tatau ona faasino atu i vasega i le faalagiga laugatasia o “Tamaitai Talavou.” Ina ia faailoa se vasega faapitoa, e aofia ai le tausaga—mo se faaitaiga, “Tamaitai Talavou 12–14”; “Tamaitai Talavou 15–18” (tagai i le *Tusitaulima* 2: *Taitaiina o le Ekalesia*, 10.1.5, ChurchOfJesusChrist.org).
21. E tatau ona valaauina se au peresitene o se vasega mo vasega taitasi a Tamaitai Talavou. I nofoaga e mafai ai, e tatau ona valaauina se au peresitene atoa, o se peresitene, fesoasoani e toalua, ma se failautusi. Afai e manaomia, e mafai ona valaauina se vaega o le au peresitene (tagai i le *Tusitaulima* 2, 10.3.5).
22. Tagai i le *Tusitaulima* 2, 10.3.5.
23. Tagai ia Russell M. Nelson “Faamoemoe o Israelu” (faigalotu a le autalavou i le lalolagi atoa, Iuni 3, 2018), HopeofIsrael. ChurchOfJesusChrist.org.
24. O faatonuga faapoopo o loo maua mo taitai matutua o Tamaitai Talavou i le *Tusitaulima* 2, mataupu e 10.
25. Henry B. Eyring, “Tulai i Lou Valaauga,” *Liahona*, Nov. 2002, 76.
26. Afai e na o le tasi la outou vasega ma e tasi le au peresitene o le vasega, e mafai e le au peresitene atoa ona auai i le aufono a le autalavou a le uarota faatasi ma peresitene o korama o le Perisitua Arona ina ia i ai le paleni o tamaitai talavou ma alii talavou (tagai i le *Tusitaulima* 2, 18.2.9).

O Tamaitai o le Feagaiga i Faigapaaga ma le Atua

O le avea ai ma se tamaitai o le feagaiga i le faipaaga ai ma le Atua o le maoae ma le lelei lea e faafailele, taitai, ma auauna atu ai pea e le aunoa afafine o le Atua.

Ou te faafetai mo le faamanuiaga e talanoa atu ai ia te outou, o afafine o le feagaiga a le Atua. O lo’u faamoemoea i le po nei ina ia uunaia outou i le galu-ega sili lea ua valaauina i ai outou. Ioe, o afafine uma o le Atua o loo faafofoga mai i lo’u leo ua mauaina se valaau mai le Alii o Iesu Keriso.

O lou valaauga na amata ina ua tuuina oe i le olaga faaletino, i se nofoaga ma se taimi na filifilia mo oe e se Atua e silafia atoatoa oe ma alofa ia te oe o Sona afafine. I le lalolagi o agaga, na Ia

silafia oe ma aoaoina oe ma tuu oe i le mea o le a e maua ai le avanoa, e seasea i le talafaasolopito o le lalolagi, ina ia valaaulia i totonu o se faatanoa vai o le papatisoga. O iina, o le a e faalogo ai i upu nei e saunoa ai se auauna valaauina a Iesu Keriso: “Ona ua tofia au e Iesu Keriso, ou te papatiso ia te oe i le suafa o le Tama, ma le Alo, ma le Agaga Paia. Amene.”¹

Ina ua e aluese mai le vai, ua e talia-ina se isi valaau e auauna atu. I le avea ai ma se afafine fou o le feagaiga a le



Atua, ua e faia se folafolaga ma mauaina se tofiga i Le Ekalesia a Iesu Keriso o le Au Paia o Aso e Gata Ai, lea ua faamauina ai oe o se tagata o le ekalesia. Ua e osifeagaiga ma le Atua e ave i ou lava luga le sua o Iesu Keriso, ia tausi i Ana poloaiga, ma auauna atu ia te Ia.

Mo tagata taitoatasi o e osia nei feagaiga, o le auaunaga ua valaau i ai o ia e le Alii e fai o le a fetau lelei i lena tagata. Peitai, o afafine ma atalii o le feagaiga a le Atua, e tasi lava se valaauga taua ma olioli ua i ai ia i latou uma. O le auauna atu lea i isi mo Ia.

A o saunoa atu i tuafafine, na tuuina atu ai e Peresitene Russell M. Nelson se aotelega matagofie e uiga i le valaau a le Alii ia te oe ina ia auai ma Ia i Lana galuega. Ua faamatalaina e Peresitene Nelson lou valaauga i le auala lenai: “Na fetalai le Alii, ‘O la’u galuega ma lo’u mamalu leni ia aumaia le tino ola pea ma le ola faavavau o le tagata.’ (Mose 1:39.) O lona uiga e mafai ona faapea atu Lona soo-afafine tuuto, ‘O la’u galuega ma lo’u mamalu o le fesoasoani lea i e pele ia te a’u ia latou ausia lena sini faalelagi.’

“O le fesoasoani atu i se isi tagata soifua ia ausia lona gafatia faaselesitila, o se vaega lena o le misiona paia a le tamaitai. I le avea ai ma se tina, faiaoga, po o se Tagata Paia faafaiile, na te mamanuina olaga o isi ia tino mai i ona faamoemoega. I le faipaaga ai ma le Atua, o lana misiona paia o le fesoasoani lea i agaga ia ola ma loto ia faacaina. O le pogai lea o lona foafoaga. E faamamaluina, faagaetia, ma faacaina.”²

E le mafai ona e iloa po o afea, pe o le a le umi o le taimi, ae o lau misiona patino o le a taulai atu i auaunaga i valaauga e pei o se tina, taitai, po o tuafafine o auaunaga. Ona o le alofa o le Alii, e le tuuina mai ai ia i tatou le filifiliga o le taimi, umi, po o faagasologa o o tatou



tofiga. Ae ua e silafia mai tusitusiga paia ma perofeta soifua o nei tofiga uma o le a oo mai, a le o leni olaga po o le isi olaga, i afafine uma o le Atua. Ma o na mea uma o ni sauniuniga mo le ola e faavavau i ni aiga alofa—”o le meaalofa sili o meaalofa uma a le Atua.”³

O le a e atamai e faatino taumafaiga uma e saunia ai i le taimi nei faatasi ma le taunuuga i le mafaufau. Ua faafaigofie atili lena galuega ona e manaomia tele e nei tofiga taitasi sauniuniga lava e tasi.

Sei o tatou amata i le tofiga o le avea ma se tuafafine o auaunaga. Pe ua e maua lena tofiga o se afafine e 10 tausaga i se aiga ua maliu le tamā, po o se peresitene o le Aualofa na aafia talu ai nei lona nuu i se afi, pe o loo e i ai i se

falemai o loo sailiili malosi mai se taotoga—ua ia te oe se avanoa e faataunu ai lou valaauga mai le Alii ina ia avea ma Ona afafine o auaunaga.

E foliga mai e matua ecese lava na tofiga faaleaunaga. Ae latou te manaomia uma le sauniuniga o se loto malosi ma alofa, o se faatuatua le fefe auā e lē tuuina mai e le Alii se poloaiga vagana ua Ia saunia se ala, ma se manao e alu ma fai mo Ia.⁴

Talu ai na saunia o ia, na faauouo e le afafine e 10 tausaga le matua lona tina ua maliu lana tane ma na tatalo ia iloa le ala e fesoasoani ai i lona aiga. Ma e faaauau pea ona ia faia.

Na saunia le peresitene o le Aualofa e auauna atu a o le’i tupu faafuasei le afi i lona nuu. Ua ia silafia lelei ma alofa i



e mafai foi ona tele ni mea tatou te aoaoina e ala i le matauga, pe a tatou faaaogaina le avanoa e saili ai le Agaga ia fesoasoani mai ia i tatou ia malamalama i mea tatou te matauina.

Na ou matauina Kathleen Johnson Eyring mo le 57 tausaga na ma faaipoipo ai. O ia o se tina o ni atalii se toafa ma ni afafine se toalua. E oo mai i le asō, na ia taliaina le valaau e avea ma se faatosinaga faatina i le silia ma le selau tagata moni lava faaleaiga ma le isi fia selau ia sa ia vaetamaina i totonu o lona loto faatina.

Tou te manatua le faamatalaga atoatoa a Peresitene Nelson e uiga i se misiona paia a tamaitai—e aofia ai lana misiona o se tulaga faatina: “I le avea ai o se tina, faiaoga, po o se Tagata Paia e faafailele, na te mamauina olaga o isi ina ia tino mai i ona faamoemoega. I le faipaaga ai o ia ma le Atua, o lana misiona paia o le fesoasoani lea i agaga ia ola ma faacaina tagata. O le pogai lea o lona foafoaga.”⁵

I le latalata e mafai ona ou iloaitino ai, na mulimuli lo’u toalua, o Kathleen, i lena valaauga na tuuina mai i afafine a

tagata. O lona faatuatua ia Iesu Keriso ua faatupulaia i le aluga o tausaga mai le mauaina o tali i ana tatalo mo le Alii ia fesoasoani ia te ia i ni auaunaga laiti mo Ia. Ona o le umi o ana tapenaga, ua saunia ai o ia ma naunau e faatulaga ona uso e auauna atu i tagata ma aiga o mafatia.

O se tuafafine i se falemai ua amata ona malosi mai se taotoga na saunia e auauna atu i ana uo mama’i. Sa ia faaaluina se taimi atoa e auauna atu ai i le Alii i tagata ese e pei o ia o se tuaoi ma se uo. Ina ua ia lagona i lona loto le valaau e auauna atu i le falema’i, sa ia auauna atu i isi ma le lototoa ma le alofa lea na amata faamoemoe ai isi ma’i ia ‘aue ne’i vave malosi o ia.

I le auala lava e tasi e te saunia ai e auauna atu, e mafai ma e tatau ona e saunia mo lou valaauga e avea ma se taitai mo le Alii pe a oo mai. O le a manaomia ai le faatuatua ia Iesu Keriso, ia mauaa i le loloto o lou fiasia i tusitusiga paia, e taitai tagata ma aoao atu Lana afioga e aunoa ma le fefe. Ona e saunia lea ia maua le Agaga Paia e avea ma au soa tumau. O le a e naunau e fai atu, “O le a ou [alu],” pe a fai mai lou fesoasoani i le au peresitene o Tamaitai Talavou, ma le atuatuvaile i lona leo, “O loo gasegase Sister Alvarez i le asō. O ai o le a faiaoga i lana vasega?”

E talitutusa lava le tele o sauniuniga mo se aso matagofie pe a valaauina oe

e le Alii i se tofiga o se tina. Ae o le a manaomia ai foi se loto e sili atu ona alofa nai lo le mea na e manaomiaina muamua. O le a manaomia ai le faatuatua ia Iesu Keriso e sili atu nai lo se mea na i ai muamua i lou loto. Ma o le a manaomia ai se tomai e tatalo ai mo le faatosinaga, taitaiga, ma le faamafanafanaga a le Agaga Paia e sili atu i mea atonu na e lagonaina na mafai foi.

Atonu e te ono fesili ma le talafeagai pe faapefea e se alii o soo se vaitausaga ona iloa mea e manaomia e tina. O se fesili aoga. E le mafai ona iloa e alii mea uma, ae e mafai ona tatou aoaoina ni lesone i se faaaliga mai le Atua. Ma





SAUNIA E PERESITENE DALLIN H. OAKS
Fesoasoani Muamua i le Au Peresitene Sili

lo tatou Tama. E foliga mai ia te a'u o le ki, o upu ia "na te fesoasoani i olaga o isi tagata ia tino mai i ona faamoe-moega . . . i le faipaaga ai ma le Atua." Na te le fosia. Na te mamanuina. Ma sa i ai sana mamanu mo ona faamoe-moega, ma o lea, sa ia taumafai ai ia mamanuina i latou sa ia alofa ai ma faafailele. O lana mamanu o le talalelei a Iesu Keriso—e pei ona ou vaaia e ala i matauga ma le agaga tatalo i le aluga o tausaga.

O le aveai ai ma se tamaitai o le feagaiga i le faipaaga ai ma le Atua o le maoae ma le lelei lea e faafailele, taitai, ma auauna atu ai pea e le aunoa afafine o le Atua, e auauna ai i soo se auala ma nofoaga ua Ia saunia mo i latou. Ou te folafola atu o le a e maua le olioli i lau faigamalaga i lou aiga faalelagi a o e toe foi atu ia te Ia o se afafine tauti feagaiga a le Atua.

Ou te molimau atu o loo soifua le Atua le Tama ma e alofa o Ia ia te oe. O le a Ia tali mai i au tatalo. O loo taitaia e Lona Alo Pele, i auiliiliga uma, Le Ekalesia a Iesu Keriso o le Au Paia o Aso e Gata Ai. O Peresitene Russell M. Nelson o Lana perofeta soifua. Ma sa vaai ma talanoa Iosefa Samita i le Atua le Tama ma Iesu Keriso i se togavao i Palamaira, Niu Ioka. Ou te iloa e moni lena mea. Ou te molimau atu foi o Iesu Keriso o lo outou Faalola; e alofa o Ia ia te outou. Ma e ala atu i Lana Togiola, e mafai ona faamama ma siitia outou i valaauga maua luga ma paia lea o le a oo mai ia te outou. Ou te molimau atu ai i le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 20:73.
2. Russell M. Nelson, "Woman—Of Infinite Worth," *Ensign*, Nov. 1989, 22.
3. Mataupu Faavae ma Feagaiga 14:7.
4. Tagai i le 1 Nifae 3:7.
5. Russell M. Nelson, "Woman—Of Infinite Worth," 22.

O Poloaiga Sili e *Lua*

E tatau ona tatou taumafai ia tausia poloaiga sili uma e lua. O le faia o lea mea, tatou te taumafai ai e savavali faapaleni i le va o le tulafono ma le alofa.

O'u tuafafine pele i le talalelei a Iesu Keriso, ou te faafeiloai atu ia te outou o ni tagata ua atofaina faalelagi e vaaia le aiga faavavau. Na aoaoina i tatou e Peresitene Russell M. Nelson faapea, "Sa toefuataiina lena Ekalesia ina ia mafai ai ona faatulaga aiga, faamauiina, ma faaeaina e faavavau."¹ O lena aoaoga e i ai ni aafiaga taua mo tagata o e faailoa mai o ni faatauaafafine, faataua-tane, tosina atu i itupa uma e lua, po o se faafafine/faafatama, e masani lava ona ta'ua o le LGBT.² Na toe faamanatu mai foi e Peresitene Nelson ia i tatou "e le faapea e tatou te ioe i [taimi uma] i isi e alolofa atu ai i isi."³ E taua nei aoaoga faaperofeta mo talanoaga faaleaiga e tali ai fesili a tamaiti ma le autalavou. Na ou sailia ma le agaga tatalo se musumusuga e talanoa atu ai i lena aofia ona ua aafia uiga ese outou i nei fesili, lea e aafia tonu ai lava pe leai foi aiga uma i le Ekalesia.

I.

Ou te amata i le mea na aoao mai e Iesu o ni poloaiga sili e lua.

"E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

"O le poloaiga muamua lena ma le sili.

"E faapena foi le lona lua, E te alofa atu i le lua te tuaoi, ia pei o oe lava ia te oe."⁴

O le uiga o lena mea ua poloaiina i tatou ia alolofa i tagata uma, talu ai ona o le faataoto a Iesu i le Samaria agalelei o loo aoao mai ai o tagata uma o o tatou tuaoi.⁵ Ae o lo tatou naunau e tausia lena poloaiga lona lua e le tatau ona



mafua ai ona tatou faagalo le muamua, ia alofa i le Atua ma o tatou loto, agaga, ma mafaufau atoa. Tatou te faaalua lona alofa i le “tausia[ina] o [Ana] poloaiga.”⁶ E finagalo le Atua ia i tatou ia usiusitai i Ana poloaiga aua e ala atu i lona usiusitai, e aofia ai le salamo, e mafai ai ona tatou toe foi atu e nonofo i Lona afioaga ma ia atoatoa e pei o Ia.

I lana lauga talu ai i talavou matutua o le Ekalesia, na saunoa ai Peresitene Russell M. Nelson e uiga i le mea ua ia ta’ua o le “sootaga malosi i le va o le alofa o le Atua ma Ana tulafono.”⁷ O tulafono e matuai faatatau lava i faafitauli ia e fesootai ia i latou ua faailoaina o LGBT o tulafono a le Atua o le faaipoipoga ma lana soa tulafono o le ola mama. E taua mea uma e lua i le ata o le faaolataga a lo tatou Tama i le Lagi mo Ana fanau. E pei ona aoao mai e Peresitene Nelson, “O tulafono a le Atua e uunaia atoatoa lava e Lona alofa le mafuatia mo i tatou ma Lona finagalo ia tatou avea uma ma tagata e mafai ona tatou avea ai.”⁸

Na aoao mai Peresitene Nelson: “O le tele o atunuu . . . ua pasia ai le tulafono o le faaipoipoga a le itupa e

tasi. I le avea ai ma tagata o le Ekalesia, tatou te faaaloalo i tulafono o le laueleele . . . , e aofia ai faaipoipoga faalemalu. Peitai, o le mea moni, i le amataga . . . o le faaipoipoga na faauuina e le Atua! Ma e oo mai i lenei aso o Lana faauigaga ua na o le va o se alii ma se tamaitai. E lei suia e le Atua Lana faauigaga o le faaipoipoga.”

Sa faaauau mai pea Peresitene Nelson: “E lei suia foi e le Atua Lana tulafono o le ola mama. O tulaga manaomia e ulufale ai i le malumalu e lei suia.”⁹

Ua faamanatu mai e Peresitene Nelson ia i tatou uma faapea “o la tatou tiute o ni Aposetolo o le aoao atu na o mea moni. O lona tiute e le o tuuina maia [i Aposetolo] le pule e suia ai tulafono faalelagi.”¹⁰ O lea, o’u tuafafine e, e tataui i tatau o le Ekalesia ona aoao atu i taimi uma le taua uigaese o le faaipoipoga i le va o se alii ma se tamaitai ma tulafono o le ola mama e faatatau i ai.

II.

O le galuega a Le Ekalesia a Iesu Keriso o le Au Paia o Aso e Gata Ai e matuai faatatau lava i le sauniaina o

fanau a le Atua mo le malo selesitila, ma e sili ona faapitoa mo lona mamalu aupito maua, o le faaega po o le ola e faavavau. O lona taunuuga aupito maua e na o le faaipoipoga mo le ola e faavavau e ausia ai.¹¹ O le ola e faavavau e aofia ai mana foafoa ia e avea ma se vaega taua i le tuufaatasiga o se alii ma se tamaitai¹²—lea e faamatalaina e faaaliga i ona po nei o le “faaauaina lea o fanau e faavavau ma faavavau lava.”¹³

I lana saunoaga i le autalavou matutua, na aoao mai ai Peresitene Nelson, “O le usitaia o tulafono a le Atua o le a faatumaui ai lou saogalemu a o e agai atu i luma i le faaega mulimuli”¹⁴—o lona mea, o le avea e pei o le Atua, faatasi ai ma se olaga faaaina ma faamoe-moega paia o o tatou Matua Faalelagi. O le taunuuga lona tatou te mananao i ai mo tagata uma tatou te alolofa i ai. Ona o lona alofa, e le mafai ai ona tatou tuu lo tatou alolofa ia sili atu i poloaiga ma le fuafuaga ma le galuega a le Atua, lea tatou te iloa o le a aumaia ia i latou tatou te alolofa i ai lo latou fiafiaga silisili.

Ae e toatele tatou te alolofa i ai, e aofia ai nisi ua maua le talalelei toefuataiina, o e le talitonu i ai pe ua filifili e le mulimuli i poloaiga a le Atua e uiga i le faaipoipoga ma le tulafono o le ola mama. Ae faapefea i latou?

Ua faaali mai e aoaoga faavae a le Atua o i tatou uma o Ana fanau ma ua Ia foafoaina i tatou ina ia maua le olioli.¹⁵ Ua aoao mai e faaaliga i nei ona po faapea ua saunia e le Atua se fuafuaga mo se aafiaga faaletino lea e mafai ai e tagata uma ona filifili ia usiusitai e saili Ana faamanuiaga aupito silisili pe fai ni filifiliga ia e taitai atu ai i se tasi o malo e itiiti ifo le mamalu.¹⁶ Ona o le alofa tele o le Atua mo Ana fanau uma, o loo sili pea ona matagofie na malo itiiti ifo [le mamalu] nai lo le mea e mafai ona malamalama i ai tagata soifua.¹⁷ O le Togiola a Iesu Keriso ua mafai ai nei uma, e pei



ona Ia “faamamaluina le Tama, ma laveai galuega uma o ona aao.”¹⁸

III.

Ua ou talanoa atu i le poloaiga muamua, ae a le lona lua? E faapefea ona tatou tausia le poloaiga o le alofa atu i o tatou tuaoi? Ua matou saili e faatauana o tatou tagata o le ekalesia e faapea o i latou o e mulimuli i aoaoga ma amioga faatauafafine, faatauatane, tosina i itupa uma e lua, po o itupa ua suia, e tatau ona taulimaina i le alofa lea na poloaiina ai i tatou e lo tatou Faaola ia faaali atu i o tatou tuaoi uma. O le mea lea, ina ua folafola mai le aloaia faaetulafono o faaiipooga i le itupa e tasi i le Iunaite Setete, na folafola mai ai e le Au Peresitene Sili ma le Korama a le Toasefululua faapea: “Ua aoaoina i tatou e le talalelei a Iesu Keriso ia alolofa atu ma taulima tagata uma i le agalelei ma le migao—e tusa lava pe eseece o tatou manatu. Matou te faamautinoa atu e le tatau ona taulimaina ma le le faaaloalo i latou o e ua latou faaaogaina ia tulafono po o faaiuga o faamasinoga e faatagaina ai le faaiipooga i le itupa e tasi.”¹⁹

Ma le isi, e le tatau lava ia i tatou ona sauaina i latou o e e le tutusa o tatou talitonuga ma tautinoga.²⁰ O le mea e faanoanoa ai, o nisi tagata o fetaiai ma nei faafitauli o loo faaaauu pea ona lagona le ta’ufaatauvaaina ma teena e nisi o tagata ma taitai o le ekalesia i totonu o tatou aiga, uarota, ma siteki. E ao ona tatou taumafai uma ina ia agalelei atili ma faaaloalo atili.

IV.

Mo mafuaaga tatou te le malamalama i ai, ua ia i tatou ni luitau eseece i o tatou aafiaga faaletino. Ae ua tatou iloa o le a fesoasoani mai le Atua ia i tatou taitoatasi ia manumalo i nei luitai pe afai tatou te saili atu ma le faamaoni i Lana fesoasoani. A mavae ona



puapuagatia ma salamo mo le solia o tulafono ia na aoaoina ai i tatou, tatou te faamoemoe uma lava mo se malo o le mamalu. O le faamasinoga mulimuli ma faaii o le a faia e le Alii, ona ua na o Ia e i ai le malamalama, atamai, ma le alofa tunoa e manaomia e faamasino ai i tatou taitoatasi.

I le taimi nei, e tatau ona tatou taumafai ia tausia poloaiga sili uma e lua. O le faia o lona mea, tatou te savavali faapaleni ai i le va o le tulafono ma le alofa—tausia o poloaiga ma savavali i le ala o feagaiga, a o alolofa atu i o tatou tuaoi i luga o le ala. O lena savaliga, e manaomia ai lo tatou sailia o musumusuga faalelagi i mea e lagolago ai ma mea e tetece atu ai ma le auala e alofa atu ai ma faalogo ma le faaaloalo ma aoao atu ai i le faagasologa. O la tatou savaliga, e manaomia ai lo tatou le fetuunaia o poloaiga ae ia faaali atu se fuataga atoa o le malamalama ma le alofa. O la tatou savaliga, e tatau ona mafaufau i tamaiti o e e le o mautinoa o latou tulaga faaleitupa, ae e le fautuaina le vave faailogaina o i latou aua o le toatele lava o tamaiti e tutupu ae ma o ese mai ia lagona.²¹ O la tatou savaliga, e tetece atu i faiga e aveesea ai tagata mai le ala o feagaiga, ma teenaina le lagolagoina o soo se tasi na te taitaieseina tagata mai le Alii. O nei mea uma ia tatou manatua ai ua folafola mai e le Atua le faamoemoe ma le olioli ma

faamanuiaga tupito mo tagata uma o e tausia Ana poloaiga.

V.

O tina ma tama ma i tatou uma e nafa ma le aoao atu o poloaiga sili uma e lua. Mo tamaitai o le Ekalesia, ua faamalamalama mai ai e Peresitene Spencer W. Kimball lena tiute i lena valoaga sili: “O le tele o le faatupulaia ua oo mai i le Ekalesia i nei aso e gata ai, o le a oo mai ona o le toatele o tamaitai lelei o le lalolagi . . . o le a tosina mai i le Ekalesia i ni vaega toatele. O le a tupu lena mea i se maua luga e faapea ona atagia mai ai i tamaitai o le Ekalesia le amiotonu ma le tulaga lelei i o latou olaga, atoa foi ma le maua luga o loo vaaia ai tamaitai o le Ekalesia o ni tamaitai iloga ma le tulaga ese . . . mai tamaitai o le lalolagi. . . . O lea la o le a avea ai faaitaiga tamaitai o le Ekalesia ma se uunaiga taua i le tuputupu ae o le faitau aofai ma le faaleagaga o le Ekalesia i aso amuli.”²²

O le talanoa ai i lena valoaga, na tautino mai ai e Peresitene Russell M. Nelson e faapea “o le aso na valoia e Peresitene Kimball o le taimi nei. O outou o tamaitai na ia muai vaai i ai!”²³ E aunoa ma lo tatou iloaia e i tatou o e na faalogo i lena valoaga i le 40 tausaga ua mavae, o nisi o na tamaitai e ono laveaiina e tamaitai o lena Ekalesia, o a latou lava uo pele ma aiga o e o loo



SAUNIA E PERESITENE RUSSELL M. NELSON

aafia i le taimi nei i mea faalelalolagi ua faamuamua ma mea taufaasese faatiapolo. O la'u tatalo ma le faamanuiaga lea ina ia e aoao atu ma galue e faataunuu lena valoaga, i le suafa o Iesu Keriso, amene. ■

FAAMATALAGA

1. Russell M. Nelson, "Faaipoipoga Faaselesitila," *Liahona*, Nov. 2008, 93.
2. Ua tele naua isi faapuupuuga e ta'ua, ae o vaega autu nei ua lava mo lenei lauga.
3. Russell M. Nelson, remarks at the annual convention of the National Association for the Advancement of Colored People (NAACP), Detroit, Michigan, July 21, 2019.
4. Mataio 22:37–39.
5. Tagai i le Luka 10:29–37.
6. Ioane 14:15.
7. Russell M. Nelson, "The Love and Laws of God" (Brigham Young University devotional, Sept. 17, 2019), speeches.byu.edu.
8. Russell M. Nelson, "The Love and Laws of God."
9. Russell M. Nelson, "The Love and Laws of God."
10. Russell M. Nelson, "The Love and Laws of God."
11. Tagai i le Mataupu Faavae ma Feagaiga 132:7–13.
12. Tagai i le 1 Korinito 11:11; Mataupu Faavae ma Feagaiga 131:1–4.
13. Mataupu Faavae ma Feagaiga 132:19.
14. Russell M. Nelson, "The Love and Laws of God."
15. Tagai i le 2 Nifae 2:25.
16. Tagai i le Mataupu Faavae ma Feagaiga 76:71–113.
17. Tagai i le Mataupu Faavae ma Feagaiga 76:89.
18. Mataupu Faavae ma Feagaiga 76:43; faaopoopo le faamamafa.
19. "Response to the Supreme Court Decision Legalizing Same-Sex Marriage in the United States," enclosure to First Presidency letter, June 29, 2015.
20. Tagai i le Dallin H. Oaks, "Ola Faatasi ma Alofa atu i Isi e Eese o Tatou Talitonuga," *Liahona*, Nov. 2014, 25–28; "Alofa ma le Tulafono," *Liahona*, Nov. 2009, 26–29.
21. Tagai, mo se faaitaiga, Michelle Forcier, "Adolescent Sexuality," UpToDate, June 3, 2019, [uptodate.com/contents/adolescent-sexuality](https://www.uptodate.com/contents/adolescent-sexuality).
22. *Aoaoga a Peresitene o le Ekalesia: Spencer W. Kimball* (2006), 249.
23. Russell M. Nelson, "O Se Talosaga i O'u Tuafafine," *Liahona*, Nov. 2015, 96.

O Oa Faaleagaga

A e faatinoia le faatuatua i le Alii ma Lona mana o le perisitua, o lou tomai e utuvai ai mai lenei 'oa faaleagaga ua faaavanoa mai e le Alii o le a faateleina.

Faafetai mo lena musika matagofie. Ao tatou laulaututu uma e lagiina lena viiga ogatotonu, "Ia Viia Oe Le Atua" e lua ni mafaufauga malolosi na oo mai ia te a'u. O se tasi na faatatau i le Perofeta o Iosefa Samita, o le perofeta o lenei tisipenisione. O lou alofa ma le faame-melo ia te ia e tuputupu ae i le mavae ai o aso taitasi. O le mafaufauga lona lua na tupu ao ou tilotilo atu i lo'u toalua, o'u afafine, afafine a le fanau, ma afafine a fanau a fanau. Sa ou lagona e pei ou te manao e avea outou taitoatasi ma se vaega o lo'u aiga.

I nai masina talu ai, i le faaiuga o se sauniga o le faaeega paia o le malumalu, sa ou fai atu ai i lo'u toalua o Wendy, "Ou te faamoemoe o loo malamalama tuafafine i 'oa faaleagaga e ā latou o i totonu o le malumalu." Tuafafine, e tele lava ina ou mafaufau ia te outou, e aofia ai le lua masina talu ai ina ua ma asiasi atu ma Wendy i Heremoni, Penisilevania.

O le ma malaga lona lua lea iina. O taimi uma ia e lua na matua ootia ai lava i ma'ua a o ma savavali ai i luga o lena eleele paia. E lata i Heremoni



lea sa faaali mai ai Ioane le Papatiso ia Iosefa Samita ma toefuatai mai ai le Perisitua Arona.

O iina na faaali mai ai foi Aposetolo o Peteru, Iakopo, ma Ioane e toefuatai mai le Perisitua Mekisateko.

O iina foi i Heremoni sa avea ai Ema Hale Samita ma uluai tusiupu a lana tane a o faaliliuina e le Perofeta le Tusi a Mamona.

O Heremoni foi na maua ai e Iosefa Samita se faaaliga sa faaali mai ai le finagalo o le Alii ia Ema. Sa faatonu e le Alii ia Ema e faamalamalama ia tusitusiga paia, ia faamalosi i le Ekalesia, ia maua le Agaga Paia, ma ia faaalu lona taimi e “aoao tele” ai. Na fautuaina foi Ema ia “tuu ese mea o lenei lalolagi, ma saili mo mea o se lalolagi sili atu ona lelei” ma ia pipiimau i ana feagaiga ma le Atua. Na faaiuina e le Alii Ana faatonuga i upu faatauina nei: “O lo’u leo lenei i tagata uma.”¹

O mea uma na tutupu i lenei eria o loo i ai ni taunuuga loloto i o tatou olaga. O le toefuataiga o le perisitua, faatasi ma le fautuaga a le Alii ia Ema, e mafai ona taialaina ma faamanuaina ai i tatou taitoatasi. Ou te matua naunau mo outou ia malamalama o le toefuataiga o le perisitua e tutusa lava le fitoitonu ia te oe o se tamaitai e pei ona i ai i soo se alii. Ona ua toefuatai mai le Perisitua Mekisateko, ua tofua maua uma ai e tamaitai ma alii tausifeagaiga le avanoa i “faamanuiaga *uma* faaleagaga o le ekalesia”² pe, e mafai ona tatou faapea, i ‘oa faaleagaga uma ua i ai i le Alii mo Ana fanau.

O tamaitai uma ma alii uma e osia ni feagaiga ma le Atua ma tausia na feagaiga, ma o e auai ma le agavaa i sauniga o le perisitua, e mauaina le avanoa tuusao i le mana o le Atua. O i latou ua maua faaeeega paia i le maota o le Alii ua mauaina se meaalofo o le mana o le perisitua a le Atua e tusa ma le paia o a latou feagaiga,



faatasi ma se meaalofo o le poto e iloa ai le auala e utuvai ai mai lena mana.

E tutusa lava le matala o le lagi i *tamaitai* ua maua faaeeega paia i le mana o le Atua e tafe mai ia latou feagaiga faaleperisitua e pei ona matala ai foi i alii o loo umiaina le perisitua. Ou te tatalo ina ia faamalamalamaina lena upumoni i o outou loto taitoatasi ona ou te talitonu o le a suia ai lou olaga. Tuafafine, ua ia te oe le aia e maua ai e le aunoa le mana o le Faaola e fesoa-soani ai i lou aiga ma isi e te alofa i ai.

Ia, atonu o e fai ifo ia te oe lava ia, “e maeu tele lenei mea, ae faapefea ona ou faia? E faapefea ona ou mauaina le mana o le Faaola i lo’u olaga?”

E te le mauaina se faamatalaga auiliili o lenei faagasologa i soo se tusi lesona. O le a avea le Agaga Paia ma ou faiaoga patino a o e saili atu ia malamalama i mea e finagalo le Alii e te iloa ma faia. O lenei faagasologa e le vave pe faigofie, ae e faatupu malosi faaleagaga. O le a se isi mea e sili atu ona faafiafiaina nai lo le galulue faatasi ma le Agaga ia malamalama i le mana o le Atua—le mana o le perisitua?

O le mea e *mafai* ona ou ta’u atu ia te oe, o le mauaina o le mana o le Atua i lou olaga e manaomia ai mea lava e tasi ia na faatonuina ai e le Alii ia Ema ma outou taitoatasi e fai.

O lea la, ou te valaaulia ai outou ia sutesue ma le agaga tatolo i le vaega 25 o le Mataupu Faavae ma Feagaiga ma iloa po o a mea o le a aoaoina ai e le Agaga Paia *oe*. O au taumafaiga faaleagaga faaletagata lava ia, o le a aumaia ia te oe le olioli a o e mauaina, malamalama, ma faaogaina le mana lea ua faaecina atu ia te oe [i le faaeeega paia].

O se vaega o lenei taumafaiga o le a manaomia ai ona e tuu ese le tele o mea o lenei lalolagi. O nisi taimi toetoe lava a tatou talanoa faasamasamanoa e uiga i le savavali ese mai le lalolagi ma ona talitonuga, faaososoga e tele, ma filosofia sese. Ae o le faia *moni* o lena mea e manaomia ai ona e sutesueina soo lou olaga ma le faateete. A e faia lena mea, o le a uunaia oe e le Agaga Paia e uiga i mea e le o toe manaomia, mea e le o toe aoga ona alu ai lou taimi ma le malosi.

A aveese lou taulaiga mai mea faalavefau o le lalolagi, o nisi o na mea e foliga mai e taua ia te oe i le taimi nei o le a faaititiia le taua. O le a manaomia ona e fai atu leai i nisi mea, e ui e foliga mai e le afaina. Pe a e malaga ai ma faaauau leni faagasologa o le olaga atoa o le faapaiaina o lou olaga i le Alii, o suiga i lau vaai, lagona, ma le malosiaga faaleagaga o le a e maofa ai!

O sina upu itiiti leni o le lapataiga. O loo i ai i latou o le a faavaivaia lou

tomai e valaau atu i le mana o le Atua. E i ai nisi o le a uunaia oe ia e masalosalo ia te oe lava ma faaitiitia lou gafatia faaleagaga tulagaese o se tamaitai amiotonu.

O le mea e sili ona mautinoa, e le manao le fili ia e malamalama i le feagaiga na e osia i le papatisoga, po o le faacega paia maoae o le potu ma le mana na e mauaina pe o le a e mauaina i totonu o le malumalu—le maota o le Alii. Ma e mautinoa lava e le manao Satani ia e malamalama o taimi uma e te auauna ai ma le agavaa ma tapuai atu i totonu o le malumalu, e te aluese mai ua faaauppegaina oe i le mana o le Atua ma maua le “tausiga” a agelu i ou luga.³

O le a faufau pea e Satani ma ana ‘au ni faafitauli e taofia ai oe mai le malamalama i meaalofo faaleagaga ia ua faamanuiaina ai oe ma e mafai ona faamanuiaina ai oe. O le mea e leaga ai, o nisi o ia faafitauli atonu o le taunuuga o se amioleaga a se isi tagata. Ou te faanoanoa pe mafaufau sa i ai se isi o outou na lagonaina le le manaomiaina, pe sa le talitonuina e se taitai perisitua pe sa sauaina pe faalataina e se tane, tama, po o se tasi na e manatu i ai o se uo. Ou te matua faanoanoa pe afai sa i ai se tasi o outou na lagonaina le le amanaiaina, le faaaloaloina, pe faamasinoseseina. O sauaga faapena e leai ma se avanoa i le malo o le Atua.

I se isi itu, e faagaetitia a’u pe a ou iloaina ni taitai perisitua o e saili ma le naunautai e faaaui tamaitai i talanoaga a aufono a uarota ma siteki. E uunaia a’u e tane taitasi e faaaliga mai o lona tiute sili ona taua faaleperisitua o le popole lea mo lona toalu.⁴ Ou te viia lena alii e matua faaaloalo i le tomai o lona toalu e maua ai faaaliga ma faapelepele ia te ia o se paaga tutusa i le la faaipoipoga.

Pe a malamalama se alii i le mamalu ma le mana o se tamaitai amiotonu,

sailiili, o le Au Paia o Aso e Gata Ai ua maua faacega paia, pe o se mea ea e ofo ai lona lagonaina e pei o tu o ia a o ulufale atu lona toalu i le potu?

Mai le amataga o taimi, ua faamanuiaina lava tamaitai i se taiala tulagaese o amioga mama—le tomai e iloaitino ai le sa’o mai le sese. O lena meaalofo e faaleleia ia i latou o e osia ma tausia feagaiga. Ma e faaitiitia ia i latou o e le amanaiaina ma le loto i ai ia poloaiga a le Atua.

Ou te faaopoopo atu faanatinati ou te le folafola atu ua saoloto alii i soo se auala mai mea ua manaomia e le Atua mo i *latou foi* e iloaitino ai le va o le sa’o ma le sese. Ae o’u tuafafine pele, o lou tomai e iloaitino ai le mea moni mai le mea sese, ina ia aveia ma ē e puipuia le amiomama i nuu [ma malo], e matua taua tele i nei aso e gata ai. Ma e matou te faalagolago atu ia te outou e aoa isi ia faia lena mea e tasi. Se’i o’u matua faamanino atua le mea lena: afai e le toe i ai i le lalolagi le amiomama ma le amiotonu o ona tamaitai, o le a *lē* toe foi lava le lalolagi i se lelei.

O i tatou o le Au Paia o Aso e Gata Ai e le o ni ō o le lalolagi; o i tatou o tagata o le feagaiga a Isaraelu. Ua valaauina i tatou e saunia se nuu mo le Afio Faalua Mai o le Alii.

Ia, se’i o’u faamanino atua nisi manatu faaopoopo e faatatau i tamaitai ma le perisitua. Ina ua vaetofia oe e auauna atu i soo se valaauga i lalo o le taitaiga a se tasi e umia ki o le perisitua—e pei o lou epikopo po o le perisitene o le siteki—ua tuu atu ia te oe le pule o le perisitua e galue ai i lena valaauga.

E faapena foi, i totonu o le malumalu paia ua faatagaina oe e faatino ma taitai i sauniga faaleperisitua i *taimi uma* e te auai ai. E saunia oe e lou faacega paia o le malumalu e faia lena mea.

Afai ua maua ou faacega paia ae e te lei faaipoipo atu i se alii i le taimi nei o lē umia le perisitua ma fai atu se tasi ia te oe, “Faamalie atu e le o i ai se perisitua i totonu o lou aiga,” faamolemole ia malamalama e le sa’o lena faamatalaga. Atonu e le o i ai *sē o umia* le perisitua i totonu o lou aiga, ae ua e mauaina ma



osia feagaiga paia ma le Atua i totonu o Lona malumalu. Mai na feagaiga e tafe mai ai se faaega o Lona mana o le perisitua i ou luga. Ma ia manatua, afai e maliu lau tane, o *oe* o le a pulefaamalumu i totonu o lou aiga.

I le avea ai ma se tamaitai amiotonu o le Au Paia o Aso e Gata Ai ua maua faaega paia, e te tautala atu ma aoao atu i le mana ma le pule mai le Atua. Pe o se faamalosianga po o se talanoaga, matou te manaomia tou leo e aoao atu le mataupu faavae a Keriso. Matou te manaomia o outou manatu i totonu o aufono a aiga, uarota ma siteki. O lou auai i talanoaga e taua ma e lē faatauva.

O’u tuafafine pele, o le a faatupulaia lou mana pe a e auaua atu i isi. O au tatalo, anapogi, taimi mo tusitusiga paia, auaua atu i le malumalu, ma galuega o talafaasolopito o aiga o le a matala ai le lagi ia te outou.

Ou te aioi atu ia te outou ia susesue ma le agaga tatalo upumoni *uma* e te maua e uiga i le mana o le perisitua. Atonu e te amata i le Mataupu Faavae ma Feagaiga vaega 84 ma le 107. O na vaega o le a taitai atu ai oe i isi fuaitau. O tusitusiga paia ma aoaoga a perofeta, tagatavaai, ma talifaaliga o aso nei ua faatumulia i nei upumoni. A o faateleina lou malamalama ma a o e faatinoina le faatuatua i le Alii ma Lona mana o le perisitua, o lou tomai e utuvai ai mai lenei ‘oa faaleagaga ua faaavanoa mai e le Alii o le a faateleina. A outou faia lena mea, o le a outou iloina lo outou gafatia sili atu e fesoasoani e fatua’i ni aiga e faavavau ia e tuufaatasia, faamaui i le malumalu o le Alii, ma faatumulia i le alofa mo lo tatou Tama Faalelagi ma mo Iesu Keriso.

O a tatou taumafaiga uma e auaua atu i le tasi ma le isi, folafola atu le talalelei, faaatoatoa le Au Paia, ma togilaina e ua maliliu e tau atu uma i le malumalu paia. Ua 166 nei a tatou



malumalu i le lalolagi atoa, ma e tele isi o le a fausia.

E pei ona outou silafia, o le Malumalu o Sate Leki, Lotoa o le Malumalu, ma le palasa e sosoo atu e lata ane i le Maota o Ofisa o le Ekalesia o le a faafouina i se galuega tele o le a amataina i le faaiuga o lenei tausaga. *O lenei* malumalu paia e tatau ona faasaina ma saunia e uunaia tupulaga o le lumanai, e pei ona ia faatosinaina i tatou i lenei tupulaga.

A o faatupulaia ai le Ekalesia, o le a fausia pea malumalu ina ia mafai ai e le tele o aiga ona maua le avanoa i lena faamanuiaga aupito silisili o faamanuiaga uma, o le ola e faavavau lea.⁵ Tatou te faaaloalo i se malumalu o le maota sili ona paia lea i le Ekalesia. Soo se taimi lava e faasilasila atu ai ni fuafuaga e fausia se malumalu fou, e avea lava ma se vaega taua o la tatou talafaasolopito. E pei ona tatou talanoaina iinei i lenei po, e taua tele outou tuafafine i le galuega o malumalu, ma o le malumalu o le nofoaga lea o le a outou maua ai a outou ‘oa faaleagaga aupito silisili.

Faamolemole ia faalogo ma le totoa ma le faaaloalo ao ou faasilasila atu nei ni fuafuaga e fausia ai ni malumalu fou se valu. Afai o se tasi [o malumalu] e faasilasila atu e i se nofoaga e taua ia te oe, ou te fautua atu ia na o le punou o lou ao ma le agaga tatalo ma le agaga

faafetai i lou loto. Ua matou fiala lava e faasilasila atu ni fuafuaga e fausia ni malumalu i nofoaga nei: Freetown, Sierra Leone; Orem, Iuta; Port Moresby, Papua Niu Kini; Bentonville, Arkansas; Bacolod, Filipaina; McAllen, Texas; Cobán, Kuatemala; ma Taylorsville, Iuta. Faafetai atu, tuafafine pele Matou te matua talisapaia lo outou mauaina o nei fuafuaga ma la outou tali faaaloalo.

Ia, i le faaiuga, ou te fia tuua se faamanuiaga i o outou luga, ina ia outou malamalama i le mana o le perisitua lea ua faaee atu ia te outou [i le faaega paia] ma o le a outou faaogaina lena mana e ala i le faatinoina o lou faatuatua i le Alii ma i Lona mana.

Tuafafine pele, faatasi ai ma le faaaloalo ma le lotofaafetai tele, ou te faailoa atu ai lo’u alofa mo outou. Ma le lotomauualalo, ou te folafola atu ai o loo soifua le Atua! O Iesu o le Keriso. O Lana Ekalesia leni. Ou te molimau atu ai i le suafa paia o Iesu Keriso, amene. ■

FAAMATALAGA

1. Tagai i le Mataupu Faavae ma Feagaiga 25:7–16.
2. Mataupu Faavae ma Feagaiga 107:18; faapoopo le faamamafa.
3. Mataupu Faavae ma Feagaiga 109:22.
4. Tagai i le Mataupu Faavae ma Feagaiga 131:2–4.
5. Tagai i le Mataupu Faavae ma Feagaiga 14:7.



SAUNIA E ELDER GERRIT W. GONG
O Le Korama a Aposetolo e Toasefululua

O Le I Ai i Feagaiga

O le auai faatasi ma le Atua ma savavali faatasi ma isi i luga o Lana ala o feagaiga o le faamanuiaina lea i le i ai i se feagaiga.

Uso e ma tuafafine pele, ua faamatalaina le tala e uiga i se tamaitiiti Peraimeri na aoao e tatalo. “Faafetai mo le mataitusi A, le mataitusi E, . . . le mataitusi G.” O loo faaauau pea le tatalo a le tamaitiiti, “Faafetai mo mataitusi H, K, R. Tama Faalelagi Pele, faafetai mo le numera 1, le numera 2.” Ua popole le faiaoga o le Peraimeri ae faatalitali pea ma le atamai. Fai mai le tamaitiiti, “Faafetai mo le numera 5, le numera 6—ma faafetai mo lo’u faiaoga Peraimeri. Na o ia lava le tagata na te tuu a’u ia uma la’u tatalo.”

E faafogaina lava e le Tama Faalelagi tatalo a tamaiti uma. Faatasi ai ma le alofa e le iu, Na te valaaulia i tatou ia o mai ma talitonu ma auai e ala i se feagaiga.

Ua tumu lenei lalolagi i ata faafoliga, mea pepelo, togafiti e fai i lima. E tele mea ua foliga mai e lē tumau ma lē taua. Pe a tatou tuuese ia foliga taufaasese, faafoliga, mea e fialia pe le fialia i ai i luga o upegatafailagi, ua tatou naunau i mea e sili atu nai lo le aulelei mai fafo, fesootaiga pupuu, po o sailiga lē faamalieina o mea faalelalolagi e fialia i ai le tagata lava ia. Faafetai, o loo i ai se auala e tau atu i tali e taua.

Pe a tatou oo i poloaiga sili a le Atua ia alofa ia te Ia ma i latou o siomia i tatou e ala i le feagaiga, tatou te faia e le o ni tagata ese po o ni malo, ae o Sona atalii po o se afafine i le aiga.¹ O faamatalaga anamua o loo moni pea. O le lafoaiese o lo tatou tagata faalelalolagi ina ia i ai i le feagaiga, tatou te mauaina ai i tatou lava ma avea ai ma tagata sili e faavavau²—saoloto, ola, moni—ma faauigaina ai o tatou sootaga sili ona taua. O le i ai i se feagaiga o le osia ma tausia

lea o folafolaga faamaoni i le Atua ma le tasi ma le isi, e ala i feagaiga paia, lea e valaaulia le mana o le faaleatua e faaali mai i o tatou olaga.³ Pe a tatou osifegaigaina mea uma o ia i tatou, e mafai ona avea i tatou ma tagata sili atu nai lo tagata o tatou i ai. O le i ai i feagaiga e aumaia ia i tatou se nofoaga, faamatalaga, gafatia ia avea ai. E tupu mai ai le faatuatua i le olaga ma le faaolataga.⁴

O feagaiga paia e avea o se puna o le alofa mo, ma mai le Atua, ma o lea e mo le tasi ma le isi. E sili atu le alofa ma le silafiaina o i tatou e le Tama Faalelagi nai lo lo tatou alofa po o le iloaina o i tatou lava. O le faatuatua ia Iesu Keriso ma le suiga patino (salamo) e aumaia ai le alofa mutimutivale, alofatunoa, ma le faamagaloga. E faamafanafana e nei mea le tiga, tuuatoatasi, faiga le tonu tatou te oo i ai i le faaletino. I le avea ai ma Atua, e finagalo ai lo tatou Tama Faalelagi ia tatou maua le meaalofo sili a le Atua—Lona olioli, Lana ola e faavavau.⁵

O lo tatou Atua o se Atua o feagaiga. O Lona natura, Na te “tausia feagaiga ma faaalia le alofa mutimutivale.”⁶ O Ana feagaiga e tumau “a o tumau pea le taimi, pe a o tu pea le lalolagi, pe ao [ona] i ai se tagata e toatasi i luga o le lalolagi e faaolaina.”⁷ E lei faia i tatou ina ia tatou ola faasamasamanoa i le olaga faitino i le le mautinoa ma le masalosalo, ae ia olioli i sootaga taua o feagaiga “e sili atu le malosi . . . i lo fusi o le oti.”⁸

O tulaga manaomia o sauniga ma feagaiga a le Atua e mo tagata uma, ae o lona faataunuuga e patino i le tagata lava ia. I le lē faaitu’au o le Atua, ua mafai ai e tagata taitoatasi i nofoaga uma ma vaitausaga uma ona mauaina sauniga faaola. E faaoga le faitalia—e filifili tagata taitoatasi pe talia sauniga ua ofoina mai. O sauniga a le Atua e maua ai poutaiala i Lana ala o feagaiga. Tatou te ta’ua le fuafuaga a le Atua e aumai ai Lana fanau i le aiga,



o le fuafuaga o le togioala, fuafuaga o le faaolataga, fuafuaga o le fiafia. O le togioala, faaolataga, fiafia faaselesitila ua mafai ona o Iesu Keriso lea “na faia lenei togioala ua atoatoa.”⁹

O le auai faatasi ma le Atua ma savavali faatasi ma isi i luga o Lana ala o feagaiga o le faamanuiaina lea i le i ai i se feagaiga.

Muamua, o le i ai i se feagaiga e totonugalemu ia Iesu Keriso o le “puluva o le feagaiga fou.”¹⁰ O le a galulue mea uma mo lo tatou lelei pe a “faapaia [i tatou] ia Keriso . . . i le feagaiga o le Tama.”¹¹ E oo mai uma faamanuiaga lelei ma folafolaina ia i latou o e tumau faamaoni e oo i le iuga. O le “tulaga fiafia o i latou o e tausi i poloaiga a le Atua” e “faamanuiaina i mea uma, i mea faaletino ma faaleagaga,” ma o le a “mau faatasi ma le Atua i le . . . fiafia e le gata.”¹²

A o tatou faia le mea sili i le ola ai ia tatou feagaiga, atonu tatou te lagona i nisi taimi ua tatou i ai faatasi ma au agelu. Ma o le a tatou i ai—o i latou tatou te alolofa i ai ma o ē e faamanuiaina i tatou i lenei itu o le veli, ma i latou o ē alolofa ma faamanuiaina i tatou mai i le isi itu o le veli.

Talu ai nei sa ma vaaia ai ma Sister Gong se tulaga sili ona agamalu i le i ai i se feagaiga i se potu i le falema’i. Sa matuai manaomia lava e se tamā talavou se fatuga’o. Na fetagisi lona aiga, anapopogi, ma tatalo mo ia ina ia maua se fatuga’o. Ina ua oo mai le tala ua maua le fatuga’o e faasao ai le ola, na fai mai filemu lona toalua, “Talosia o manuia le isi aiga.” O le i ai i se feagaiga, i upu a le Aposetolo o Paulo, “ina ia tatou fefaamafanafanaa’i i lo tatou faatuatua, o outou atoa ma a’u.”¹³

I le ala o le olaga, atonu e [i ai taimi] e leai ai so tatou faatuatua i le Atua, ae e le aveesea lava Lona faatuatua ia i tatou. E pei lava ona sa i ai, e ola pea Lona

moli i taimi uma [ma faatalitali mai]. Na te valaaulia i tatou ia o mai pe toe foi mai i feagaiga ia e faailogaina ai Lona ala. Na te faatali e fusi ia i tatou, e tusa lava pe o tatou “mamao atu ma ia.”¹⁴ Pe a tatou vaai ma se mata o le faatuatua mo mamau, faaofuofu, po o ni togi ua fesootea o lo tatou aafiaga, e mafai ona tatou vaai i Lona alofa mutimutivale agamalu ma le faamalosiaga, aemaise lava i o tatou tofotofoga, faanoanoaga, ma luitau, faapea foi i o tatou olioliga. Po o le a lava lo tatou tautevateva pe pauu soo, afai tatou te agai atu pea i luma ia te Ia, o le a Ia fesoasoani ia i tatou, i lea laasaga ma lea laasaga.

Lua, o le Tusi a Mamona o se faamaoniga faaletino e mafai ona tatou uuina i o tatou lima o le i ai i se feagaiga. O le Tusi a Mamona o se mea faigaluega folafolaina mo le faapotopotoina o fanau a le Atua lea na valoia e avea o se feagaiga fou.¹⁵ A o tatou faitauina le Tusi a Mamona, na o i tatou pe ma isi, leleoa pe leotele, e mafai ona tatou ôle atu i le Atua “ma le loto faamaoni, ma le manatu moni i ai, ma le faatuatua ia Keriso,” ma maua e ala i le mana o le Agaga Paia faamautinoaga a le Atua e moni le Tusi a Mamona.¹⁶ E aofia i lenei faamautinoaga o Iesu Keriso o lo tatou Faaola, o Iosefa Samita o le perofeta o le Toefuataiga, ma o le Ekalesia a le Alii ua faaigoaina i Lona suafa—O Le Ekalesia a Iesu Keriso o le Au Paia o Aso e Gata Ai.¹⁷

E talanoa atu le Tusi a Mamona e ala mai i feagaiga anamua ma ona po nei ia te outou o fanau a Liae, “o fanau a perofeta.”¹⁸ Na maua e o outou augatama le folafolaga o le feagaiga faapea o outou, o o latou tupuaga, o le a iloa ina se leo e pei e mai le efuefu i le Tusi a Mamona.¹⁹ O lena leo e te lagonaina pe a e faitau o loo molimau atu o outou o “fanau o le feagaiga”²⁰ ma o Iesu o lo outou Leoleo Mamoe Lelei.

Ua valaaulia i tatou taitoatasi e le Tusi a Mamona, i upu a Alema, ina ia ulu atu “i se feagaiga faatasi ma [le Alii], o le a [tatou] auauna atu ia te ia ma tausi ana poloaiga, ina ia mafai ona liligi atili tele mai e ia lona agaga i luga o [i tatou].”²¹ Pe a tatou mananao ia sui mo le lelei sili atu—e pei ona ta’ua ai e se tasi tagata, “ina ia taofi le faanoanoa ma ia fiafia i le fiafia”—tatou te taliaina le taitaiga, fesoasoani, ma le malosi. Pe a tatou o mai i le feagaiga ia i ai ma le Atua ma se nuu o tagata talitonu ma faatuatua, e mafai ona tatou maua faamanuiaga folafolaina i le mataupu faavae a Keriso²²—i le taimi nei.

O le toefuataiina o le pule o le perisitua e faamanuia ai Ana fanau uma o se vaega lona tolu lea o le i ai i se feagaiga. I lenei tisipenisione, na o mai ai Ioane le Papatiso ma Aposetolo o Peteru, Ioane ma Iakopo o ni avefeau faamamaluina mai le Atua e toefuatai mai Lana pule o le perisitua.²³ O le perisitua a le Atua ma Ana sauniga e faatauina ai sootaga i luga o le fogaelele ma faatagaina ai sootaga o feagaiga ia i ai se aafiaga i le lagi.²⁴

O le perisitua e mafai ona faamanuiaina moni mai le fanau mai e oo i le tuugamau—mai le faaigoaina ma le faamanuiaina o se pepe e oo i le faapaiga o se tuugamau. O faamanuiaga faaleperisitua e faamalolo, faamafanafana, ma faufautua. Sa ita se tama i lona atalii, seia oo ina oo mai le alofa faamagalo a o tuu atu e le tama i lona atalii se faamanuiaga faaperisitua mālū. O se tamaitai talavou pele e na o ia le tagata o le Ekalesia o lona aiga, sa le mautonu e uiga i le alofa o le Atua mo ia seia oo ina ia maua se faamanuiaga musuia faaleperisitua. I le salafa o le lalolagi, e saunia ai faaleagaga peteriaka faamamaluina e tuu atu ni faamanuiaga faapeteriaka. Pe a faaee atu e le peteriaka ona aao i luga o lou ao, na te lagonaina ma faaali atu le alofa o le Atua

mo oe. Na te tautino atu lou tupuaga i le aiga o Isaraelu. Na te faailoa atu faamanuiaga mai le Alii. I le manatunatu lelei ua masani ai, sa tau mai ai e se avā a se peteriaka ia te a’u le auala na te valaaulia ai ma lona aiga le Agaga, aemaise lava i aso ia e tuuina atu ai e lo latou tama ni faamanuiaga faapeteriaka.

Ma le mea mulimuli, o faamanuiaga o le i ai i feagaiga e oo mai pe a tatou mulimuli i le perofeta a le Alii ma olioli i le ola ai i feagaiga, e aofia ai le faaipoipoga. O le faaipoipoga i le feagaiga e avea ma mea paia ma faavavau a o tatou filifili i aso taitasi e faamuamua le fafia o o tatou taitoalua ma aiga nai lo i tatou lava. Pe a avea le “a’u” ma “tatou,” o le a tatou tupu-tupu ae faatasi. Tatou te ola matutua faatasi, tatou te ola laiti faatasi. A o tatou faamanuiaina le tasi ma le isi i se olaga atoa o le faagaloina o i tatou lava, o le a tatou iloina le faapaiaina o a tatou miti ma olioli, i le olaga nei ma le faavavau.

E ui ina eseese tulaga, ae a tatou faia mea uma tatou te mafaia, i le mea sili tatou te mafaia, ma ōle atu ma le loto faamaoni ma saili atu i Lana fesoasoani i luga o le ala, o le a taialaina i tatou e le Alii, i Lana lava taimi ma Ana faiga, e ala i le Agaga Paia.²⁵ O feagaiga o le faaipoipoga e fusia i filifiliga autasi a i latou o loo faia—o se faamanatu o le faamamaluina e le Atua ma lo tatou

faamamaluina o le faitalia ma le faamanuiaga o Lana fesoasoani pe a tatou saili faatasi i ai.

O fua o le i ai i feagaiga i augatupulaga o aiga o loo lagonaina i o tatou aiga ma loto. Faamolemole faataga a’u sei faailoa atu i ni faataitaiga patino.

Ina ua amata ona ma alolofa faama-ma’i ma Sister Gong i le tasi ma le isi e agai atu i le faaipoipoga, sa ou aoao ai e uiga i le faitalia ma faaiuga. Mo se vaitaimi, sa ma aooga ai i ni atunuu eseese se lua i ni konetineti eseese se lua. O le mafuaaga lea e mafai ai ona ou fai atu ma le faamaoni, sa maua so’u PhD i sootaga faavaomalo.

Ina ua ou fesili, “Tama Faalelagi, pe tatou ona ou faaipoipo ia Susan?” Sa ou lagonaina le filemu. Ae o le taimi na ou aoao ai e tatou ma le faamoemoega moni, “Tama Faalelagi, ua ou alofa ia Susan ma ua ou manao e faaipoipo ia te ia. Ou te folafola atu o le a avea au ma tane ma tamā aupito sili e mafai ona avea ai”—ina ua ou faatinoina ma faia a’u faaiuga aupito sili, o le taimi foi lea na oo mai ai ni faamautuuga aupito malolosi faaleagaga.

O leni la, ua fesoasoani la matou gafa faaleaiga o le FamilySearch a Gong ma Lindsay, ma ata pu’e matou te maua ai ma fesootai ai i aafiaga o le ola ai i augatupulaga o le i ai i feagaiga.²⁶ Mo i maua, ua aofia i o ma augatuaa faaalogia ia:

O le Tina o lo’u Tina-matua, o Alice Blauer Bangerter, o le sa toatolu e na faamalamalama atu e fia faaipoipo ia te ia i le aso e tasi, mulimuli ane sa fai atu i lana tane e faapiipi se vilivae i lana vili pata ina ia mafai ai ona vili le pata, su’isu’i, ma faitau i le taimi e tasi.

O le Tamā o lo’u Tamā-matua o Loy Kuei Char na fafaina lana fanau i lona tua ma aveina nai meatotino a lona aiga i luga o se asini a o latou sopoina lafua o le lava i le Motu Tele o Hawaii. O tautinoga ma osigataulaga a augatupulaga o le aiga o Char ua faamanuiaina ai lo matou aiga i le asō.

Sa tuua Tina-matua Mary Alice Powell Lindsay faatasi ma se fanau laiti e toailima ina ua maliliu faafuasei lona toalua ma le atalii ulumatua na o ni nai aso na va ai. I le avea ai ma se tina ua oti lana tane mo le 47 tausaga, sa tausia ai e Gram lona aiga ma le alofa tumau mai taitai ma tagata o le au paia i le lotoifale. I le tele o na tausaga, sa folafola atu ai e Gram i le Alii afai o le a Ia fesoasoani mai ia te ia, o le a le faitio lava. Sa fesoasoani le Alii ia te ia. Sa le’i faitio lava o ia.

Uso e ma tuafafine, ua molimauina e le Agaga Paia, o mea uma e lelei ma faavavau e faatotonugalemu i le soifua moni o le Atua, lo tatou Tama Faavavau ma Lona Alo, o Iesu Keriso, ma Lana Togiola. O lo tatou Alii, o Iesu Keriso, o le Puluvaaga o le feagaiga fou. O le molimau atu e uiga ia Iesu Keriso o se faamoemoega o le feagaiga o le Tusi a Mamona.²⁷ E ala i le tautoga ma le feagaiga, ua faamoemoe ai le pule o le perisitua toefuataiina a le Atua ina ia faamanuiaina fanau uma a le Atua, e aofia ai faaipoipoga i le feagaiga, augatupulaga o aiga, ma faamanuiaga a tagata taitoatasi.

Ua tautino mai e lo tatou Faaola, “O Au o le Alefa ma le Omeka, o Keriso le Alii; ioe, o A’u lava o ia, o le amataga ma le gataaga, o le Togiola o le lalolagi.”²⁸



Alice Blauer Bangerter



Loy Kuei Char



Mary Alice Powell Lindsay



SAUNIA E CRISTINA B. FRANCO
Fesoasoani Lua i le Au Peresitene Aoao o le Peraimeri

Faatasi ai ma i tatou i le amataga, o loo faatasi o Ia ma i tatou, i lo tatou i ai uma lava i se feagaiga, e oo i le iuga. Ou te molimau atu ai i le suafa paia ma mamalu o Iesu Keriso, amene. ■

FAAMATALAGA

1. Tagai i le Isaac Watts, “My Shepherd Will Supply My Need,” *Ensign*, Sept. 2015, 73.
2. Tagai i le Mataio 10:39.
3. Tagai i le Mataupu Faavae ma Feagaiga 84:20.
4. Tagai i le *Lectures on Faith* (1985), 69.
5. Tagai i le Mataupu Faavae ma Feagaiga 14:7.
6. Mataupu Faavae ma Feagaiga 109:1.
7. Moronae 7:36; tagai foi i le Moronae 7:32.
8. Mataupu Faavae ma Feagaiga 121:44.
9. Mataupu Faavae ma Feagaiga 76:69.
10. Eperu 12:24; Mataupu Faavae ma Feagaiga 76:69; 107:19; tagai foi i le Faaliliuga a Iosefa Samita, Kalatia 3:20 (i le faaopoopoga o le Tusi Paia).
11. Moronae 10:33; tagai foi i le Mataupu Faavae ma Feagaiga 90:24; 98:3.
12. Mosaea 2:41.
13. Roma 1:12; tagai foi i le Mosaea 18:8–9.
14. Luka 15:20.
15. Tagai i le itulau o le autu o le Tusi a Mamona; Mataupu Faavae ma Feagaiga 84:57.
16. Moronae 10:4.
17. Tagai i le 3 Nifae 27:7–8; Mataupu Faavae ma Feagaiga 115:3.
18. 3 Nifae 20:25.
19. Tagai i le 2 Nifae 26:16; 33:13.
20. 3 Nifae 20:26.
21. Mosaea 18:10.
22. Tagai i le 2 Nifae 31:2, 12–13.
23. Tagai i le Mataupu Faavae ma Feagaiga 13; 27:12; tagai foi i le faatomuaga i le Mataupu Faavae ma Feagaiga.
24. Tagai i le Mataupu Faavae ma Feagaiga 128:8; tagai foi i le Esoto 19:5–6; Mataupu Faavae ma Feagaiga 84:40. O i latou o e na tausia ma le agavaa ia feagaiga na avea ma se oa taua, se malo o faitaulaga, o se nuu paia. O feagaiga e faapaiaina. O i latou o e tausia feagaiga e faapaiaina i le Alii.
25. Tagai i le Mataupu Faavae ma Feagaiga 8:2.
26. E mafai e augatupulaga ona aoao mai le tasi ma le isi, e pei lava ona aoao augatupulaga taitasi mo i latou lava. Na fautua mai le tusitala Kerisiano o Søren Kierkegaard, “Whatever the one generation may learn from the other, the genuinely humane no generation learns from the foregoing” (*Fear and Trembling*, trans. Vigilius Haufniens [2018], 117).
27. Tagai i le itulau o le ulutala o le Tusi a Mamona.
28. Mataupu Faavae ma Feagaiga 19:1.

Mauaina o le Olioli i le Faasoaina Atu o le Talalelei

E i ai so tatou Tama oi le Lagi alofa, o loo faatalitali mai mo i tatou ia liliu atu ia te Ia ina ia faamanuia i o tatou olaga ma olaga o i latou o siomiaina i tatou.

O se tasi o pese Peraimeri ou te fiafia lava i ai e amata i upu nei:

*Ekalesia a Iesu Keriso ua ou auai.
Ua ou iloa ai,
O le Atua,
Ma Lana fuafuaga.
Ou te talitonu ia Iesu, o le Faaola.¹*

E mau lea faamatalaga faigofie ma matagofie o upumoni ua tatou talitonu i ai!

I le avea ai ma tagata o Le Ekalesia a Iesu Keriso o le Au Paia o Aso e Gata Ai, ua tatou iloa po o ai i tatou. Ua tatou iloa “O le Atua o le Tama o o tatou agaga. O i tatou o . . . Ana fanau, ma e alofa o Ia ia i tatou. Sa tatou nonofo [faatasi ma Ia i le Lagi] ae tatou te le’i [o mai] i le lalolagi.”

Ua tatou iloa le fuafuaga a le Atua. Sa tatou i ai iina faatasi ma Ia a o Ia fofogaina mai. O le “faamoemoega atoa lava [a lo tatou Tama o i le Lagi]—Lana

galuega ma Lona mamalu—ina ia mafai e i tatou taitoatasi ona olioli i Ana faamanuia uma. Sa Ia . . . saunia se fuafuaga atoatoa e faataunuu ai Lona



faamoemoega. Na tatou malamalama ma taliaina lenei fuafuaga . . . o le fiasia, . . . togiola, ma le . . . faaolataga” ae tatou te lei o mai i le lalolagi.

“O Iesu Keriso e totonugalemu i le fuafuaga a le Atua. O Lana Togiola, na faataunu ai e Iesu Keriso le faamoe-moega a Lona Tama ma mafai ai e i tatou taitoatasi ona olioli i se tino ola pea ma le faaega. O Satani, po o le tiapolo, o se fili lea i le fuafuaga a le Atua” ma na faapea lava mai le amataga.

“O le faitalia, po o le tomai e filifili ai, o se tasi lea o meaalofo silisili a le Atua i Lana fanau. . . . E tatau ona tatou filifili pe mulimuli ia Iesu Keriso pe mulimuli ia Satani.”

O upumoni faigofie nei e mafai ona tatou faasoa atu i isi.

Se’i o’u faamatala atu se taimi sa faasoa atu ai e lo’u tina upumoni faigofie faapena e ala i le saoloto e faaali lagona i le faia o se talanoaga ma iloina se avanoa.

I le tele o tausaga ua mavae, sa toe foi ai lo’u tina i Atenitina mo se asiasiga ma lo’u tuagane. Talu ai e le fiasia lo’u tina e lele, sa ia talosagaina ai se tasi o o’u atalii e faia sona faamanuiaga o le

toafimalie ma le puipuiga. Na ia lagona le uunaiga ia faamanuia lona tinamatua i se taiala ma se taitaiga faapitoa mai le Agaga Paia e faamalosia ma pa’i atu i loto o le toatele o e ua mananao ia aoao i le talalelei.

I le malaevaalele i Sate Leki, sa feiloai ai lo’u tina ma lo’u tuagane i se teineitiiti e 7 tausaga le matua o loo toe foi i le fale mai se malaga faase’e i le aisa ma lona aiga. Na matauina e ona matua le umi ona ia talanoa i lo’u tina ma lo’u tuagane, sa tonu ai ia faatasi atu ia i latou. Sa la faailoa mai i laua ma le la tama teine o Eduardo ma Maria Susana ma Giada Pol. Sa i ai se fesootaiga masani ma faauo i lenei aiga lelei.

Sa fiasia uma aiga e lua e malaga faatasi i le vaalele e tasi i Buenos Aires, Atenitina. A o faaauau pea le latou talanoaga, sa matauina e lo’u tina latou te lei faalogo lava e uiga i le Ekalesia toefuataiina a Iesu Keriso pe ana le oo i lenei taimi.

O se tasi o fesili muamua na fesili ai Susana o le, “E mafai ona e ta’u mai ia te a’u e uiga i lenei falemataaga matagofie ma lenei faatagata auro o loo i luga?”

Sa faamatala e lo’u tina o le fale matagofie e le o se falemataaga ae o le malumalu o le Alii lea tatou te osia ai feagaiga ma le Atua ina ia mafai ona tatou toe foi atu e mau faatasi ma Ia i se aso. Na ta’u atu e Susana i lo’u tina faapea a o lei alu le latou malaga i Sate Leki sa ia tatalo mo se mea e faamalosia lona agaga.

I le taimi o le faigamalaga, na tuuina atu ai e lo’u tina lana molimau faigofie ae malosi o le talalelei ma valaaulia Susana e saili faifeautalai i lona nuu. Na fesili Susana i lo’u tina, “E faapefea ona ou maua i latou?”

Na tali atu lo’u tina, “E le mafai lava ona e misia i latou; a le o i laua o ni alii talavou se toalua e ofutino papae ma fusiua, po o ni tamaitai talavou e toalua e ofu sakete, ma e fai lava pine i taimi uma o loo faaali mai ai o latou igoa faapea foi ma ‘Le Ekalesia a Iesu Keriso o le Au Paia o Aso e Gata Ai.’”

Na faafesui ai e aiga numera o telefoni ma faamavae i le malaevaalele i Buenos Aires. Na faatele ona tau mai e Susana, lea ua avea ma a’u uo lelei talu mai lenei taimi faapea na ia matuai lagona le faanoanoa e tuua lo’u tina i le malaevaalele. Fai mai o ia, “Na susulu lou tina. E le mafai ona ou faamatalaina, ae na i ai se malamalama e uiga ia te ia ou te lei fia tuuina.”

O le taimi lava na oo ai Susana i lona nuu, na la o ma lana tama teine o, Giada, e faasoa atu lenei aafiaga i le tina o Susana, e nofo i ni nai magaala e mamao ese mai lo latou fale. A o aveina atu le la taavale, na te’i Susana i le vaaia o ni alii talavou se toalua o savavali i le auala o laei e pei ona faamatalaina e lo’u tina. Sa ia faatuina lana taavale i le ogatotonu o le auala, ma fesili atu i nei alii talavou e toalua, “E te lua o mai mai le Ekalesia a Iesu Keriso?”

Sa la fai mai, “Ioe.”

“Faifeautalai?” na ia fesili atu ai.

Na la toe tali mai, “Ioe, o lea lava!”



Ona ia fai atu lea, “Feosofi mai i totonu o la’u taavale; tatou o i le fale e aoao a’u.”

E lua masina mulimuli ane, na papatiso ai Maria Susana. Na papatiso foi lana tama teine o, Giada, ina ua atoa lona iva. O loo matou galulue lava ia Eduardo, matou te alolofa pea i ai e tusa lava po o le a.

Talu mai lena taimi, ua avea Susana ma se tasi o faifeautalai sili ona maoae ua ou feiloai i ai. E pei ia o atalii o Mosaea, e aumaia le toatele o agaga ia Keriso.

I se tasi o ma talanoaga, sa ou fesili ai ia te ia, “O le a lau mealilo [o fai]? O faapefea ona e faasoa atua le talalelei i isi?”

Sa fai mai o ia, “E matuai faigo-fie lava. O aso uma ae ou te lei tuua lo’u fale, ou te tatalo, ma ole atu i le Tama Faalelagi e taitai atu a’u i se tasi o manaomia le talalelei i lona olaga. O nisi taimi ou te ave ai se Tusi a Mamona e faasoa atu ia i latou po o ni kata fepasiai mai faifeautalai—ma pe a amata ona ou talanoa i se tagata, e na o lou fesili ia i latou pe na latou faalogo e uiga i le Ekalesia.”

Na fai mai foi Susana, “O nisi taimi e na o lo’u ataata lava ao ou faatali mo le nofoaafi. I se tasi aso na tilotilo mai ai se alii ia te a’u ma faapea mai, “O le a le mea e te ataata ai? Na fai si ona faate’ia o a’u.

“Sa ou tali atu, ‘ou te ataata ona o loo ou fiafia!’

“Ona ia fai mai lea, ‘O le a le mea ua e matuai fiafia ai?’

“Sa ou tali atu, ‘o a’u o se tagata o Le Ekalesia a Iesu Keriso o le Au Paia o Aso e Gata Ai, ma o le mea lena e faafiafiaina ai a’u. Na e faalogo i ai?’”

Ina ua ia fai mai lea, sa ia tuuina atu ia te ia se kata fepasiai ma valaaulia o ia e auai i sauniga o le Aso Sa e sosoo ai. O le Aso Sa na sosoo ai, sa ia faafeiloaia o ia i le faitotoa.



Na aoao mai Peresitene Dallin H. Oaks:

“E tolu ni mea e mafai ona fai e tagata uma o le ekalesia e fesoasoani ai e faasoa atu le talalelei. . . .

Muamua, e mafai ona tatou tatalo uma mo le manao e fesoasoani atu i lenei vaega taua o le galuega o le faaolataga. . . .

Lua, e mafai ona tatou tausia ia poloaiga. . . . O tagata faamaoni o le ekalesia o le a maua pea le Agaga o le Faaola . . . faatasi ma i latou, e taiala i latou a o latou saili atu e auai i le galuega tele o le faasoaina atu o le talalelei toefuataina a Iesu Keriso.

“*Tolu*, e mafai ona tatou tatalo mo musumusuga i mea e mafai ona tatou faia . . . e faasoa atu ai le talalelei i isi . . . [ma] tatalo faatasi ma se tautinoga e faatino le musumusuga e te mauaina.”³

Uso e, tuagane, tamaiti, ma le autalavou, e mafai ona tatou faapei o la’u uo o Susana ma faasoa atu le talalelei i isi? E mafai ona tatou valaauliaina se uo e le auai i la tatou tapuaiga e o mai faatasi ma i tatou i le lotu i le Aso Sa? Pe atonu e mafai ona tatou faasoa atu

se kopi o le Tusi a Mamona i se tagata o le aiga po o se uo? E mafai ona tatou fesoasoani i isi ia maua o latou tuua i le FamilySearch pe faasoa atu i isi mea na tatou aoaoina i le aluga o le vaiaso a o tatou suesueina le *Sau, Mulimuli Mai ia te A’u*? E mafai ona tatou faapei atili o lo tatou Faaola, o Iesu Keriso, ma faasoa atu i isi mea o loo aumaia le olioli i o tatou olaga? O le tali i nei fesili uma o le ioe! E mafai ona tatou faia!

I tusitusiga paia tatou te faitau ai e auina atu tagata o le Ekalesia a Iesu Keriso “e galulue i lona tovine mo le faaolataga o agaga o tagata” (Mataupu Faavae ma Feagaiga 138:56). O lenei galuega o le faaolataga e aofia ai le galuega faafaifeautalai a tagata o le au paia, faatumauiina o tagata liliu mai, faatoaagaina o tagata le toaaga, galuega o le malumalu ma talafaasolopito o aiga, ma le aoaoina atu o le talalelei.”⁴

A’u uo pele, e manaomia i tatou e le Alii ina ia faapotopoto Isaraelu. I le Mataupu Faavae ma Feagaiga, sa Ia fetalai ai, “Pe tou te mafaufau muamua foi po o a tou te fai atu; ae ia teu i o outou mafaufau e lē aunoa afioga o le



SAUNIA E ELDER DIETER F. UCHTDORF
O Le Korama a Aposetolo e Toasefululua

ola, ma o le a tuu atu ia te outou i lea lava itula le vaega lena o le a fua atu i tagata taitoatasi.”⁵

Ma le isi, ua Ia folafola mai ia i tatou:

“Ma afai e faapea lua te galulue i o oulua aso uma i le alagaina o le salamo i lenei nuu, ma aumai, nao se agaga e toatasi ia te a’u, e matua tele lava lo oulua olioli faatasi ma ia i le malo o lo’u Tama!

“Ma o lenei, afai o le a tele lo oulua olioli faatasi ma se agaga e toatasi na oulua aumai ia te a’u i le malo o lo’u Tama, e matua tele atu lo oulua olioli pe afai lua te aumai ni agaga e toatele ia te a’u!”⁶

O le pese Peraimeri na ou amata ai e faaii i le fuaiupu taua lenei:

*Ou te talitonu ia Iesu Keriso, o le Faaola.
O le a ou faamamalu i lona suafa.
O le a ou faia le mea sa’o;
O le a ou mulimuli i lona malamalama.
O Lana upumoni o le a ou folafola atu.”⁷*

Ou te molimau atu o nei upu e moni ma e i ai so tatou Tama oi le Lagi alofa, o loo faatalitali mai mo i tatou ia liliu atu ia te Ia ina ia faamamalu i o tatou olaga ma olaga o i latou o siomiaina i tatou. Tau ina ia tatou maua le manao e aumai ai o tatou uso ma tuagane ia Keriso o la’u tatalo lea i lea i le suafa o Iesu Keriso, amene. ■

FAAMATALAGA

1. “O Le Ekalesia a Iesu Keriso,” *Tusipese a Tamaiti*, 77.
2. *Tala’i La’u Talalelei: O Se Taiala mo le Galuega Faafaifeautalai*, rev. ed. (2018), 48.
3. Dallin H. Oaks, “Faasoaina Atu o le Talalelei Toefuataiina,” *Liahona*, Nov. 2016, 58.
4. *Tusitaulima 2: Taitaiina o le Ekalesia*, 5.0, ChurchofJesusChrist.org; tagai foi i le L. Whitney Clayton, “O Le Galuega o le Faaolataga: Taimi Lena ma le Taimi Nei,” *Liahona*, Sete. 2014, 23.
5. Mataupu Faavae ma Feagaiga 84:85.
6. Mataupu Faavae ma Feagaiga 18:15–16.
7. “O Le Ekalesia a Iesu Keriso,” 77.

O Lau Malaga Sili

*O loo valaaulia i tatou e le Faaola, i aso taitasi,
e tuuese o tatou toafimalie ma saogalemu ae
auai ma la i le malaga o le avea ma soo.*

E Faatatau i Hobbits

O se tala fatu faapelepele a tamaiti sa tusia i le tele o tausaga ua te’a e amata i le fuaiupu: “I totonu o se lua i le elele o loo nofo ai se hobbit.”¹

O le tala ia Bilbo Baggins e faatatau i se hobbit sili ona masani ma faatauavaa o le na tuu atu i ai se avanoa sili ona ofoofogia—o le avanoa matagofie i se malaga ma le folafolaga o se tau maoae.

O le faafitauli la, o le tele o hobbit e mitamita ia i latou lava, e le fia manao e o i ni malaga. O o latou olaga e

faatatau atoa i le toafimalie. Latou te fafia lava e tausasami i meaai e ono i le aso pe a latou mafai ona latou maua, ma faaalu o latou aso i a latou togalaau, faamatala atu tala i tagata asiasi, pepese, tātā mea fai musika, ma olioli i nai fiafiaga laiti o le olaga.

Peitai, ina ua tuu atu ia Bilbo le vaaiga o se malaga sili, o se mea na faafuasei ona matua fafia i ai lona loto. Na ia malamalama mai le amataga o le a luitauina le malaga. E lamatia foi. E i ai foi se avanoa e ono le toefoi mai ai.

Ae, o le valaau i le malaga ua oo atu i le taele o lona loto. Ma o lea la, o lenei hobbit faatauavaa ua tuua nei le toafimalie ma alu atu i luga o le ala i se malaga sili o le a avatua o ia i ala uma “iina ma toe foi mai.”²

O Lau Malaga

Masalo o se tasi o mafuaaga e faa-osophia ai e lenei tala ia lagona i le toatele o i tatou ona o le tatou tala foi.

I se taimi ua leva lava, ae tatou te le’i fananau mai, i se vaitau ua galo ona o le leva ma ua natia mai le manatuaina, sa valaaulia ai foi i tatou e o i se malaga. Na tuuina mai e le Atua, lo tatou Tama Faalelagi. O le taliaina o lenei malaga o lona uiga o le a tuua ai le toafimalie ma le saogalemu o Lona afioaga tonu. O





lona uiga o le ō mai i le lalolagi mo se malaga e tumu i lamatiaga ma tofoto-foga e lē mailoa.

Sa tatou iloa o le a le faigofie.

Ae sa tatou iloa foi o le a tatou maua ni 'oa taua, e aofia ai se tino faitino ma tofo i fiafiaga ma faanoanoaga matuitui o le olaga faaletino. O le a tatou aoao e taumafai, ia saili, ma ia tauivi. O le a tatou iloa ina upumoni e uiga i le Atua ma i tatou lava ia.

Ioe, na tatou iloa lava o le a tatou faia le tele o measese i luga o le ala. Ae sa tatou maua foi se folafolaga: ona o le taulaga maoae a Iesu Keriso, e mafai ai ona faamamaina i tatou mai a tatou solitulafono, faaleleia ma faapaiaina o tatou agaga, ma, i se aso, o le a toetutu ma toefaatasi ma i latou tatou te alolofa i ai.

Na tatou aoao i le tele o le alofa o le Atua ia i tatou. Na Ia aumaia ia i tatou le ola ma e finagalo o Ia ia tatou manuia. O le mea lea, na Ia saunia ai se Faaola mo i tatou. “E ui i lea,” sa fetalai mai lo tatou Tama Faalelagi, “e mafai ona e filifili mo oe lava, ona ua tuuina atu ia te oe.”³

Masalo e i ai ni vaega o le malaga faaletino na popole i ai ma faamata'uina ai fanau a le Atua, ona e talu ai o se vaega toatele o o tatou uso ma tuafafine faaleagaga na filifili e tetee i ai.⁴

E ala i le meaalofo ma le mana o le faitalia, na tatou filifili ai o le gafatia o mea e mafai ona tatou aoaoina ma

avea ai e faavavau sa sili atu lea i lo lamatiaga.⁵

Ma o le faalagolago la i folafolaga ma le mana o le Atua ma Lona Alo Pele, na tatou talia ai le lu'i.

Na ou talia.

Ma e faapena foi outou.

Sa tatou malilie e tuua le saogalemu o lo tatou esetete muamua ma auai i le tatou lava malaga sili o le o “iina ma toefoi mai.”

O Le Valaau i le Malaga

Ae, o loo i ai i le olaga faaletino se ala o le faalavelave ia i tatou, a ea? Ua foliga mai ua galo ia i tatou la tatou malaga sili, ua sili le toafimalie ma le mafanafana i lo le tuputupu ae ma le alualu i luma.

Ae, o loo i ai pea se mea lemafaafitia, i le taele o o tatou loto, o loo matelaina mo se faamoemoega maua luga atu ma mamalu atu. O lena matelaina o le tasi lea mafuaaga ua tosina atu ai tagata i le talalelei ma le Ekalesia a Iesu Keriso. O le talalelei toefuataiina, i se lagona, o se faafouga o le valaau i le malaga lea sa tatou taliaina i se taimi ua leva lava. O loo valaaula i tatou e le Faaola, i aso taitasi, e tuuese ou toafimalie ma saogalemu ae auai ma Ia i le malaga o le avea ma soo.

E tele pi'oga oi lena auala. O loo i ai mauga, o vanu, ma auala 'alo. Atonu o loo i ai foi ni apogaleveleve faafaatusa,

o tamai manu, po o se tarako se tasi pe lua foi. Ae a e tumau i luga o le ala ma faalagolago i le Atua, o le a i'u ina e maua le ala i lou taunuuga mamalu ma toefoi atu ai i lou aiga faalelagi.

E faapefea la ona e amata?

E faigofie lava.

Ua'i Atu Lou Loto i le Atua

Muamua, e manaomia ona e filifili e ua'i atu lou loto i le Atua. Tauivi i aso taitasi ia maua o Ia. Aoao e alofa ia te Ia. Ona tuu lea o lena alofa e musuia oe ia aoao, malamalama, ma mulimuli i Ana aoaga ma aoao ina ia tausi polo-aiga a le Atua. O le talalelei toefuataiina a Iesu Keriso ua foai mai ia i tatou i se ala manino ma faigofie e mafai ona malamalama i ai se tamaitiiti. Ae, ua i ai foi i le talalelei a Iesu Keriso tali i fesili aupito sili ona lavelave i le olaga ma o loo i ai se loloto naua ma le lavelave lea e oo lava i se suesuega o le olaga atoa ma mafaufauga loloto, e seāseā mafai ona tatou malamalama i ai e oo lava i sina vega sili ona laitiiti.

Afai e te faatuai i lena malaga ona e te masalosalo i ou tomai, manatua o le avea ma soo e le o le fai o mea ia atoa-toa; ae o le faia o mea ma le loto i ai. O au filifiliga e faaalia ai le tagata moni e i ai oe, e sili atu lava i lo ou tomai.⁶

E tusa pe e te toilalo, e mafai lava ona e filifili e aua ne'i loto atu i uuniga malolosi pe faavaivai, ae ia iloa lou lototele, fetaomi i luma, ma tulai ae. O le suega sili lena o le malaga.

E silafia e le Atua e te le atoatoa, o le a i ai taimi e te toilalo ai. E le itiiti lava le alofa o le Atua ia te oe pe a e tauivi nai lo lou manumalo.

E pei o se matua alofa, pau le mea e finagalo i ai o Ia o lou taumafai pea ma le loto i ai. O le avea ma soo e pei lava o le aoao e ta le piano. Masalo na o le pau le mea e mafai ona e faia muamua o le ta o se musika e faalētaatele o le



“Chopsticks” i tamailima e lua. Ae a faaaauau pea ona e aoao, o fati faigofie o le a i ai se aso e faatafaese ai ae ta pese faigata pei o sonata, rhapsody, ma concerto e ta faatasi ma aufaili.

Ia, o lena aso atonu e le oo mai i lenei olaga, ae o le a oo mai lava. Na o le pau le mea o loo finagalo ai le Atua ia e tauivi pea ma le loto i ai.

Aapa Atu i le Alofa i Isi

O loo i ai se mea mata’ina, toetoe lava feteenai, e uiga i lenei ala ua e fili-filia: na o le pau le ala mo oe e te alualu ai i luma i lau malaga i le talalelei o le fesoasoani lea i isi ia agai foi i luma.

O le fesoasoani i isi o le ala lea o le avea ma soo. O le faatuatua, faamoemoe, alofa, agaalofa, ma auaunaga e faaleleia ai i tatou o ni soo.

E ala i au taumafaiga e fesoasoani i ē matitiva ma lē tagolima, e aapa atu ai ia i latou ua mafatia, e faamamāina lou oe lava tagata ma faamalositia, e faalauteleina lou agaga, ma lagonaina se faatuatua atili.

Ae o lenei alofa e le mafai ona oo mai faatasi ma ni faamoemoega o le toe totagiina. E le mafai ona avea ma ituaiga o auaunaga e faamoemoe ia faailoa, faamemelo i ai, pe faaituau.

O soo moni o Iesu Keriso e alolofa i le Atua ma Ana fanau e aunoa ma le faamoemoe i se mea e tau mai ai. Tatou

te alolofa ia i latou e faaitaina i tatou, o e e le fialia ia i tatou. E oo lava ia i latou e faifai mai, sauva mai, ma saili e faatiga ia i tatou.

Pe a outou faatumuina o outou loto i le alofa le pona o Keriso, e te le tuua lava se avanoa mo le ita, faamasino atu, ma le faamaasiasi o isi. E te tausia poloaiga a le Atua ona e te alofa ia te Ia. I le faagasologa, e faasolosolo lemu lava ona e avea e pei o Keriso i ou mafaufauga ma amioga.⁷ O le a la se malaga e ono sili atu i lo lenei?

Faasoa Atu Lau Tala

O le mea lona tolu tatou te taumafai ia atamamai ai i lenei malaga o le ave lea i o tatou luga o le suafa o Iesu Keriso ma aua ne’i mā i le avea ai ma tagata o le Ekalesia a Iesu Keriso.

Tatou te le nanaina lo tatou faatuatua. Tatou te le tanuina.

I se eseese, tatou te talanoa i isi e uiga i la tatou malaga i ni auala masani ma taliaina. O mea na a uo e fai—latou te talanoa i mea e taua ia i latou. O mea e pele i o latou loto ma faia ai se eseese ia i latou.

O mea na e te faia. E te faamatala atu au tala ma aafiaga o se tagata o Le Ekalesia a Iesu Keriso o le Au Paia o Aso e Gata Ai.

O nisi taimi o au tala e fe’ātai ai tagata. O nisi taimi e fetagisi ai i latou.

O nisi taimi o le a fesoasoani i tagata ia faaaauau pea i le onosai, fetuutuunai, ma le lototele e feagai ai ma se isi itula, se isi aso, ma o mai ia latalata teisi atu i le Atua.

Faasoa atu ou aafiaga faafesagai ma se tagata, i luga o ala o faasala-lauga faaagafesootai, i ni vaega, i soo se mea.

O se tasi o mea mulimuli sa ta’u atu e Iesu i Ona soo e ao ona latou o atu i le lalolagi atoa ma faasoa atu le tala o le Keriso toetu.⁸ O le asō ua tatou taliaina ai ma le olioli lena poloaiga sili.

E ma’eua lea savali mamalu e ao ona tatou faasoa atua: ona o Iesu Keriso, ua mafai ai e alii uma, tamaitai, ma tamaiti ona toefoi atu i le aiga ma le saogalemu i lo latou aiga faalelagi ma, o iina, e nonofo ai i le mamalu ma le amiotonu!

O loo tele lava isi tala lelei e faasoa atu.

Ua faaali mai le Atua i le tagata i o tatou aso! O loo i ai so tatou perofeta soifua.

Se’i o’u faamanatu atu ia te outou e le manaomia e le Atua ona e “faatau” atua le talalelei toefuataiina po o le Ekalesia a Iesu Keriso.

Ua na ona faamoemoe mai o Ia e aua ne’i e natiaina i lalo o le mea e fua ai saito.

Ma afai e filifili tagata o le Ekalesia e le mo latou, o le latou faaiuga lena.

E le faapea ai ua e toilalo. E faaaauau pea ona e taulimaina i latou ma le agalelei. E le faapea e te le toe valaauliaina la i latou.

O le eseese ia le va o fesoataiga faasamasamanoa faaagafesootai ma le avea ma soo agaalofa ma lototele o le—valaaulia!

Tatou te alolofa ma faaaloalo i fanau uma a le Atua, e tusa lava po o a o latou tulaga i le olaga, e tusa lava po o a o latou ituaiga po o tapuaiga, e tusa foi po o a a latou faaiuga i le olaga.

Mo le tatou vaega, o le a tatou faapea atu, “O mai ina matamata! Saili mo oe lava ia pe faapefea e le savali i le ala o le avea ma soo ona tauia ma siitiaina.

Tatou te valaaulia tagata ia “o mai ma fesoasoani, a o tatou taumafai ia avea le lalolagi ma se nofoaga lelei atu.”

Ma e tatou te faapea atu, “O mai ma nofomau! O i matou o ou uso ma tuafafine. Matou te le atoatoa. Matou te faalagolago i le Atua ma saili e tausi Ana poloaiga.

Auai ma i matou, ma o le a e faia i matou ia lelei atili. Ma, i le faagasologa, o le a e lelei atili foi. Tatou faia faatasi ia lenei faigamalaga.”

O Afea e Tatau Ona Ou Amata Ai?

Ina ua lagona e le tatou uo o Bilbo Baggins le gaepu o le valaau i le malaga i lona loto, sa ia filifili e fai sana malolaga lelei i le po, olioli i se mālū taeao manaia, ma o le mea muamua i le taeao o le amata loa o le malaga.

Ina ua ala i luga Bilbo, sa ia matauina lona fale ua gasu, ma sa toetoe lava a faalavelave ia te ia i lana fuafuaga mamalu.

Ae sa sau lana uo o Gandalf ma fesili i ai, “O afea *ea* e te sau ai?”⁹ Ina ia oo atu i ana uo, sa ao ia Bilbo ona filifili mo ia lava po o le a le mea e fai.

Ma o lea la, sa faataalise atu ai le hobbit masani tele ma faatauva i fafo o lona faitotoa i luma i le ala o le malaga, ma sa matua vave lava lea na galo ai ia te ia lana pulou, tootoo savali, ma le solosolo. Sa ia tuua foi lana malu taeao lona lua e le'i mae'a ona taumafa.

Atonu o loo i ai foi se lesonea ii mo i tatou.

Afai tatou te lagonaina ni uunaiga e auai i le malaga sili o le ola ma faasoa atu mea ua saunia e lo tatou Tama Faalagolagi alofa mo i tatou i se taimi ua leva lava, ou te faamautinoa atu, o le asō o le aso lea e mulimuli ai i le Alo o le Atua ma lo tatou Faaola i luga o Lona ala o auaunaga ma le avea ma soo.

Tatou te ono faatali i le olaga atoa mo lenei taimi pe a taoto mea uma ma le atoatoa. Ae o le taimi lenei e tuuto atoa atu ai i le sailia o le Atua, auauna atu i isi, ma faasoa atu o tatou aafiaga i isi.

E tuu lou pulou, tootoo savali, solosolo, ma se fale gasu.¹⁰

Ia i tatou o loo savavali i lenei ala, ia lototetele, agaalofo, maua le talitonuga, ma faaauau pea!

Ia i latou ua tuua le ala, faamolemole toe foi mai, toe auai ma i matou, ma faia i matou ia malolosi atili.

Ma, ia i latou e le'i amataina lava, aisea e tuai ai? Afai e te fia tofo i mea ofoofogia o lenei malaga faalecagaga sili, laa atu loa i lau lava ia malaga sili! Talanoa ma faifeautalai. Talanoa ma au uo o le Au Paia o Aso e Gata Ai. Talanoa ma i latou e uiga i lenei galuega ofoofogia ma le mea e ofo ai.¹¹

Ua oo i le taimi e amata ai!

Sau, Auai faatasi ma i Matou!

Afai e te lagonaina ua ono i ai i lou olaga se uiga sili atu, se faamoemoega maua luga atu, ni sootaga malolosi atu faaleaiga, ma se fesootaiga latalata atu ma le Atua; faamolemole, sau ma auai faatasi ma i matou.

Afai o e saili i se nuu o tagata o loo galulue ia avea i latou lava ma ni tagata silisili, fesoasoani ia i latou o ē mafatia, ma faia lenei lalolagi o se nofoaga sili atu, sau ma auai faatasi ma i matou!

Sau ma vaai po o le a le uiga atoa o lenei malaga maoae, ofoofogia ma faafiafiaina.

I luga o le ala o le a e iloina ai oe lava ia.

O le a e iloina le uiga.

O le a iloina le Atua.

O le a e iloina le malaga aupito sili ona faafiafiaina ma mamalu o lou olaga.

O nei mea ou te molimau atu ai i le suafa o lo tatou Togiola ma le Faaola, o Iesu Keriso, amene. ■

FAAMATALAGA

1. J. R. R. Tolkien, *The Hobbit or There and Back Again* (Boston: Houghton Mifflin, 2001), 3.
2. Soaolutala o le *The Hobbit*.
3. Mose 3:17.





SAUNIA E ELDER WALTER F. GONZÁLEZ
O Le Fitugafulu

4. Tagai i le Iopu 38:4–7 (na alalaga atalii o le Atua i le olioli); Isaia 14:12–13 (“siitia i luga lo’u nofoalii ia sili i fetu a le Atua”); Faaaliga 12:7–11 (sa i ai se taua i le lagi).
5. “Sa faamatalaina e le Perofeta o Iosefa Samita le *faitalia* o le ‘saolotoga tutoatasi o le mafaufau lea na faaee mai e le lagi ma le mamalu tele i luga o le aiga o le tagata o se tasi o ana meaalofa aupito silisili” [*Aoaoga a le Perofeta o Iosefa Samita*, comp. Joseph Fielding Smith (1977), 49]. O lenei ‘saolotoga tutoatasi o le mafaufau,’ po o le faitalia, o le mana lea e faatagaina tagata ia avea ma “pule ia te i latou lava” (MF&F 58:28). Ua aofia ai le faatinoina o le loto e filifili i le va o le lelei ma le leaga po o tulaga feteenai o le lelei po o le leaga ma le avanoa foi e tofo ai i taunuuga o lena filifiliga. E alofa tele le Tama Faalelagi i Ana fanau ua Ia finagalo ai ia ausia lo tatou gafatia atoa—ia avea ai e faapei o Ia. Ina ia alualu i luma, e tatou i se tagata ona mauaina le gafatia tagagaese e faia ai ana lava filifiliga manaomia. E matua taua tele le faitalia i Lana fuafuaga mo Ana fanau lea ‘e oo lava i le Atua na te le faia tagata ia pei o ia lava e aunoa ma le faasaolotoina o i latou’ [David O. McKay, “Whither Shall We Go? Or Life’s Supreme Decision,” *Deseret News*, June 8, 1935, 1] (Byron R. Merrill, “Agency and Freedom in the Divine Plan,” in Roy A. Prete, ed., *Window of Faith: Latter-day Saint Perspectives on World History* [2005], 162).
6. I lana tusi *Harry Potter and the Chamber of Secrets*, author J. K. Rowling has Hogwarts headmaster Dumbledore say something quite similar to young Harry Potter. O se fautuaga matagofie foi mo i tatou. Sa ou faaagaina muamua i savali ma manatu e aoga le toe faia.
7. “Le au pele e, o le fanau i tatou a le Atua i nei ona po, a e le’i faaalai mai nei le uiga o i tatou a amuli; a ua tatou iloa, pe a faaali mai o ia, , *ona foliga ai lea o i tatou ia te ia*; auā tatou te iloa tino ai lava o Ia” (1 Ioane 3:2; ua faaopoopo le faamamafa).
E ui i lena liliuga atonu e sili atu ma lo tatou tomai e malamalama ai, ae “o loo molimau mai lea lava Agaga i o tatou agaga, o fanau i tatou a le Atua:
“Afai foi o fanau i tatou, o suli foi; o suli lava o le Atua, o suli faatasi ma Keriso; pe afai tatou te tiga faatasi ma ia, ina ia faamanuiaina foi i tatou faatasi ma ia.
“Aua o lo’u manatu e le tatau ona faatusaina le tiga nei ona po ma le ma le *manuia atali e faaalai mai ia te i tatou*” (Roma 8:16–18; ua faaopoopo le faamamafa).
8. Tagai i le Mataio 28:16–20.
9. Tolkien, *The Hobbit*, 33.
10. Tagai i le Luka 9:59–62.
11. Tagai i le LeGrand Richards, *A Marvelous Work and a Wonder*, rev. ed. (1966).

O Le Pa’i a le Faaola

A o tatou o mai ia te Ia, o le a afio mai le Atua e laveai i tatou, pe faamalolo i tatou pe tuu mai le malosi ia i tatou e fetaiai ai ma soo se tulaga.

Pe tusa ma le lua afe tausaga ua mavae, na afio ifo ai le Faaola mai le mauga ina ua uma ona aoao atu ia Faaamuia ma isi mataupu faavae o le talalelei. A o savali o Ia, sa sau ia te Ia se tagata e maua i le ma’i lelela. Na faaalai e le tagata le migao ma le faaaloalo a o ia tootuli i luma o Keriso, ma sailia se toomaga mai ona mafatiaga. Sa faigofie lana talosaga: “Le Alii e, afai ua e finagalo i ai, e te mafaia ona faamama ia te au.”

Ona aapa atu lea e le Faaola o Lona aao ma ua pa’i atu ia te ia, ma fetalai atu, “Ou te loto i ai, ina mamā ia oe.”¹

O le mea lea ua tatou iloa ai e finagalo pea lo tatou Faaola e faamanuia i tatou. O nisi faamanuiaga e vave ona oo mai, o isi atonu e umi atu, ma o nisi atonu e oo mai pe a mavae lenei olaga, ae o le a oo mai faamanuiaga i le taimi e tatau ai.

E pei o le lelela, e mafai ona tatou maua le malosi ma le toafimalie i lenei olaga e ala i le taliaina o Lona finagalo ma le iloina e finagalo o Ia e faamanuia i tatou. E mafai ona tatou maua le malosi e fetaiai ai ma soo se luitau, e aofia ai soo se ituaiga o faaososoga, ma ia malamalama ma onosai i o tatou tulaga faigata. E moni, i taimi sili ona olopalaina o Lona soifuaga, na faalotoina le malosi o le Faaola e onosai

ai e pei ona Ia fetalai atu i Lona Tama, “Ia faia lou finagalo.”²

E lei faia le talosaga a le lelela i se auala faafoliga pe fai faamalosi. Na faaalai i ana upu se uiga lotomaulalo, ma ni faamoemoega mauaululuga ae i se manaoga faamaoni foi ina ia faia le finagalo o le Faaola. O se faataitaiga lea o le amio lea e ao ona tatou o mai ai ia Keriso. E tatau ona tatou o mai ia Keriso ma le mautinoa o Lona finagalo o i ai nei o le a avea pea ma se mea sili mo o tatou olaga faaletino ma faavavau.



E i ai Sana vaaiga e faavavau tatou te le mauaina. E tatau ona tatou o mai ia Keriso ma se manao faamaoni o le a tofatumoanaina o tatou loto i le finagalo o le Tama, e pei o Lona finagalo.³ O le a saunia e lenei mea i tatou mo le ola e faavavau.

E matuai faigata lava ona vaai faalemafaufau atu i mafatiaga faaletino ma faalelagona lea na mamafatu i le lepela lea na sau i le Faaola. O le ma'i o le lepela e aafia ai uaua ma le pa'u, ma mafua ai ona faaleaga ma lē atoatoa ai le tino. E le gata i lea, e oo atu ai i le maasiasi faagafesootai. O se tagata e maua i le lepela e tatau ona tuua ē pele ia i latou ma ola e faaesca pe faaauunua mai tagata. O lepela e mafaufau i ai o se mea e le mama, i le itu uma faaletino ma faaleagaga. Mo lenei mafuaaga, na manaomia ai e le tulafono a Mose le ofuina e lepela o ni ofu masaesae ma valaau atu “Lē Mama” a o latou savavali.⁴ Ona o le ma'i ma le inosia, e mafua ai ona nonofo lepela i ni fale tuufua po o ni tuugamau.⁵ E le faigata ona mafaufau o le lepela lea sa alu atu i le Faaola sa nutimomoia.

O nisi taimi—pe o le a lava le auala—e mafai foi e i tatou ona lagona le nutimomoia, pe ona o a tatou lava amioga po o amioga a isi, ona o tulaga tatou te mafai pe le mafai ona pulea. I taimi faapena, e mafai ona tuu atu ai o tatou loto i Ona aao.

I nai tausaga ua mavae, na maua ai e lo'u toalua o Zulma—se tala faigata i le lua vaiaso a o lumanai ai le faaipoipoga a se tasi o le ma fanau. Sa i ai se afuafu [cyst] i luma tonu ae lava o ona taliga taitasi, ma ua vave le tupu. Na amata ona fulafula ona foliga, ma sa manao-mia vave se taotoga faaeteete. Sa tele ni manatu na oo ane i lona mafaufau ma na mamafa i lona loto. Pe lamatia ea le tuma? E faapefea ona toe malosilona tino? Mata o le a pe ona foliga? O le a



le malosilona o le a i ai le tiga? Mata o le a i ai ni mailaila tumau i ona foliga? Mata o le a toe foi mai le tuma pe a uma ona aveese? Mata o le a mafai ona auai o ia i le faaipoipoga a lo ma atalii? A o ia taoto i le potu o taotoga, sa ia lagona le nutimomoia.

I lona lava taimi taua, na musumusu atu ai le Agaga ia te ia e tatau ona ia talia le finagalo o le Alii. Ona ia filifili lea e tuu lona faatuatuaga i le Atua. Sa ia [maua se] lagona malosilona, po o le a lava le taunuuga, o le a sili atu Lona finagalo mo ia. E lei umi ae ua faagale-gale moe mai le tui faamoe.

Mulimuli ane, sa ia tusi faatusisolo i lana api talaaga: “I luga o le laulau a le fomai tipitipi sa ou ifo atu i Ou luma ma gauai atu i Lou finagalo, sa ou moe. Na ou iloa e mafai ona ou liliu atu i Lau Afio, ma le iloa ina e leai se mea leaga e mafai ona sau mai Lau Afio.”

Na ia maua le malosilona ma le toafimalie mai le gauai atu o lona loto i le [finagalo] o le Tama. I lona aso, na matuai faamanuaina o ia e le Atua.

Po o le a lava o tatou tulaga o i ai, e mafai ona tatou faatino lo tatou faatua-tua ia o mai ia Keriso ma maua se Atua e mafai ona tatou faalagolago i ai. E pei ona tusia e se tasi o la'u fanau, o Gabriel:

*E tusa ai ma le perofeta, e sili atu le
susulu o fofoga o le Atua nai lo le la
ma e sinasina atu foi Lona lauao uumi nai
lo le kiona*

*ma o Lona siufofoga e taalili e pei o le tatase
o se vaitase,
ma i Ona autafa, o le mea noa lava le
tagata. . . .*

*Ua olopalaina a'u i lo'u iloa ina e oo lava ia
te a'u o se mea noa.*

*Ma o le mafuaaga lea e tasi ou te taute-
vateva atu ai i lo'u ala agai i se atua e
mafi ona ou faalagolago i ai.*

*Ma o le mafuaaga lea e tasi ua ou iloa ai le
Atua e mafai ona ou faalagolago i ai.⁶*

O se Atua e mafai ona tatou faatua-tuaina e faamalositua lo tatou faamoemoe. E mafai ona tatou faalagolago ia te Ia ona e alofa o Ia ia i tatou ma e finagalo o Ia mo le mea sili mo i tatou i tulaga uma.

Na sau le lepela ona o le mana o le faamoemoe. Sa lei tuuina atu e le lalolagi ia te ia ni vaifofo, e oo lava i se toafimalie. O lea, atonu o le pa'i faatauva'a atu o le Faaola masalo na lagona ai le pei o se milimili malū i lona agaga atoa. E mafai ona tatou vaai faalemafaufau i lagona loloto o le lotofaafetai atonu na i ai i le lepela i le pa'i atu o le Faaola, aemaise ina ua ia faalogo i upu “Ou te loto i ai, ina mamā ia oe.”

Na ta'ua e le tala na “mama loa lea o lona lepela.”⁷

E mafai foi ona tatou lagona le pa'i mai o aao alofa ma faamalolo o le Faaola. E mau le oo mai o le olioli, faamoemoe, ma le lotofaafetai i o tatou agaga i le iloa ina e finagalo o Ia e fesoa-soani mai ia i tatou ia mama! A o tatou

o mai ia te Ia, o le a afio mai le Atua e laveai i tatou, pe faamalolo i tatou pe tuu mai le malosi ia i tatou e fetaiai ai ma soo se tulaga.

I soo se tulaga lava, o le taliaina o Lona finagalo—e le o o tatou lava loto—o le a fesoasoani ia i tatou ia malamalama i o tatou tulaga. E leai se mea leaga e mafai ona sau mai le Atua. Na te silafia le mea e lelei mo i tatou. Atonu e Na te le aveesea a tatou avega i le taimi lava lena. O nisi taimi e mafai ona ia faamāmāina na avega, e pei ona Ia faia ia Alema ma lona nuu.⁸ I le iuga lava, ona o feagaiga, o le a aveesea ai avega,⁹ a le o lenei olaga po o le Toetu paia.

O se manaoga faamaoni ina ia faia Lona finagalo, faatasi ai ma se malamalamaaga i le natura paia o lo tatou Togiola, o le a fesoasoani ia i tatou e atiae le ituaiga faatuatua lea na faaalia e le lepela ina ia mama ai. O Iesu Keriso o se Atua o le alofa, o se Atua o le faamoe-moe, o se Atua o le faamalologa, o se Atua e finagalo e faamanuia i tatou ma fesoasoani ia i tatou ia mama. O le mea lena sa Ia finagalo i ai a o le'i afio mai i lenei lalolagi ina ua Ia ofo mai e laveai i tatou pe a tatou pauu atu i le agasala. O le mea lena sa Ia finagalo i ai i Ketese-mane ina ua Ia feagai ma tiga faaletagata e le mafaamatalaina i taimi o le matuitui o le totoigiina o le tau o le agasala. O le mea lena o loo Ia finagalo i ai i le taimi nei pe a Ia aioi atu mo i tatou i luma o le Tama.¹⁰ O le mafuaaga lena o loo lagona ai pea Lona siufofoga: “Ia outou o mai ia te au outou uma o e tigaina ma mafatia i avega o au foi e malolo ai outou.”¹¹

E mafai ona Ia faamalolo i tatou ma siitia i tatou i luga aua ua ia te Ia le gafatia e faia ai. Sa Ia tauave i Ona lava luga tiga uma o le tino ma le agaga ina ia faatumuina ai Ona loto i le alofa mutimutivale ia mafai ai ona fesoasoani ia i tatou i mea uma ma faamalolo ma siitia atu i tatou i luga.¹² O upu a Isaia,



e pei ona sii mai e Apinati, ua matagofie ma faagaetia:

“E moni lava ua tauave e ia o tatou tiga, ma tauave o tatou faanoanoa. . .

“ . . . Sa manu’a o Ia mo a tatou solitulafono, sa totolia o ia mo a tatou amioletonu; sa i ona luga le aoaiga mo lo tatou filemu; ma o ona faalavalava ua faamaloloina ai i tatou.”¹³

O le mataupu lava lea e tasi o loo aoaoina i lenei solo:

*“Le Kamuta e o Nasareta,
O lenei loto ua le mafai ona toe faaleleia,
O lenei olaga ua toe ina a oo i le oti,
Pe mafai ona e fonoina, Kamuta?”*

*O Lona agalelei ma le naunau e
fesoasoani,
O Lona soifua tauleleia ua lalagaina
I o tatou olaga nutimomoia, seia oo ina
tulai mai
O Se Fofoaga Fou—“o mea fou uma.”*

*“O mea e pala ma lē aoga o [le] loto,
O manaoga, faanaunauga, faamoemoega,
ma le faatuatua,
Ia E mamauina i le vaega atoatoa,
Le Kamuta e o Nasareta!”¹⁴*

Afai e te lagona e te le o mama i soo se ala, afai e te lagona le nutimomoia, faamolemole ia iloa e mafai ona faamamaina oe, e mafai ona fonofonoina oe, aua e alofa o Ia ia te oe. Ia faatuatua e leai se mea leaga e mafai ona sau ia te Ia.

Talu ai na “afio ifo o Ia i lalo o mea uma,”¹⁵ ua Ia mafai ai ona faaleleia mea ua nutimomoia i o tatou olaga,

ma ua mafai ai ona tatou faalelei ma le Atua. E ala atu ia te Ia ua mafai ai ona faaleleia mea uma, e le gata i mea o i le lalolagi ma mea o i le lagi, ia “lelei ia te ia lava i le toto o lona satauro.”¹⁶

Sei o tatou o mai ia Keriso ma faia laasaga manaomia uma. A tatou faia, ou te faamoemoe o a tatou amio o se amio e faapea atu: “Le Alii e, afai ua e finagalo i ai, e te mafaia ona faamama ia te au.” Afai tatou te faia, e mafai ona tatou maua le pa’i faamalolo mai a le Matai, faatasi ai ma se i’uleo alofa o Lona siufofoga: “Ou te loto i ai, ina mamā ia oe.”

O le Faaola o se Atua e mafai ona tatou faalagolago i ai. O Ia o le Keriso, o Lē Faauuina, o le Mesia lea ua ou molimau atu ai i Lona suafa paia, o Iesu Keriso, amene. ■

FAAMATALAGA

1. Mataio 8:2–3.
2. Mataio 26:42.
3. Tagai i le Mosaea 15:7.
4. Tagai i le Levitiko 13:45.
5. Tagai i le Bruce R. McConkie, *Doctrinal New Testament Commentary* (1973), 1:174.
6. Tagai i le Faataoto 3:5–6; Mataupu Faavae ma Feagaiga 110:2–3; Mose 1:2–10.
7. Mataio 8:3.
8. Tagai i le Mosaea 24:8–15.
9. Tagai i le Mosaea 24:13–16.
10. Tagai i le Mataupu Faavae ma Feagaiga 45:3–5.
11. Mataio 11:28.
12. Tagai i le Alema 7:12.
13. Mosaea 14:4–5.
14. George Blair, “O Le Kamuta a Nasareta,” in Obert C. Tanner, *Christ’s Ideals for Living* (Sunday School manual, 1955), 22; quoted in Jeffrey R. Holland, “O Mea Malepelepe e Fonofonoina,” *Liahona*, Me 2006, 71.
15. Mataupu Faavae ma Feagaiga 88:6.
16. Kolose 1:20; tagai foi i le 2 Korinito 5:18–20.



SAUNIA E ELDER GARY E. STEVENSON
O Le Korama a Aposetolo e Toasefululua

Aua E Te Taufasese Mai Ia Te A'u

*Pe a tatou usitai i poloaiga a le Atua, o le a taitaia
 pea i tatou i le ala sa'o ma o le a lē faaseseina.*

O le asō, ou te ofoina atu ni upu apo-
 apoai mo tagata uma, ae faapitoa lava mo
 outou le tupulaga faia'e—tamaiti Perai-
 meri, alii talavou, ma tamaitai talavou.



Ua matua alofagia lava outou e le pero-
 feta a le Alii mo o tatou aso, Peresitene
 Russell M. Nelson—matua alofa lava lea
 na ia saunoa atu ai i le toatele o outou i
 le tausaga ua mavae i le faasalalaua faa-
 pitoa o le faigalotu mo le autalavou i le
 lalolagi atoa ua faaautuina “Faamoemoe
 o Isaraelu.”¹ E masani ona tatou faalogo
 ia Peresitene Nelson o valaauina moni
 outou—o le “faamoemoe o Isaraelu,” le
 tupulaga faia'e ma le lumanai o le Ekale-
 sia toefuataiina a Iesu Keriso.

A'u uo talavou e, ou te fia amata i le
 faasoaina atu o ni tala se lua o ni aiga.

O Le Taifau Pulepule [Dalmatian] Lona 102

I tausaga ua mavae, sa ou taunuu
 ai i le fale mai le galuega ma sa ou tei
 i le vaai i le pisipisi solo o le vali lanu
 paepae—i luga o le fola, faitotoa o le
 faletaavale, ma lo matou fale piliki
 lanumumu. Sa ou suesueina ma le totoia
 le vaaiga ma iloa ai o loo susū pea le
 vali. O se auala valivalia na taitai atu i
 tuāfale ma o lea na ou mulimuli ai. O
 iina, na ou maua ai lo'u atalii e lima tau-
 saga ma se pulumu valifale i lona lima, o
 loo tuliina lo matou taifau. O le matou
 taifau Lapatora [Labrador] lanuuliuli
 aulelei ua afa le valiga paepae!

“O le a lau mea na e fai?” Sa ou fesili
 atu ai i se leo malosi.

Sa tu lo'u atalii, tilotilo mai ia te a'u,
 tilotilo i le taifau, tilotilo i le pulumu
 vaifale o loo sisina mai ai le vali paepae,
 ma fai mai, “Ou te fia manao lava ia te ia
 ia foliga e pei o maile pulepule uliuli i le
 ata—te iloa, le ata o le 101 Dalmatians.”

Ou te fiasia i lo matou taifau. Sa ou
 manatu sa lelei lava o ia, ae i lena aso na
 ese se manatu o lo'u atalii.

O Le Pusi Tositosi

O la'u tala lona lua e taulai atu ia
 Uncle Matua o Grover [o le uncle o le
 tama o lona toalua] lea e nofo i se fale i
 se nuu maotua, e mamao mai le aai. Ua
 amata ona toeaina lava Uncle Grover. Sa
 ma mafaufau e tataua ona feiloai ma atalii
 ia te ia a o le'i maluu. I se tasi la o auauli,
 sa faia ai se matou tietiega umi i lona fale
 faatauvaa. Sa matou nonofo faatasi e eva
 ma faailoa atu o ia i o ma atalii. E lei umi
 le talanoaga, ae fia manao le ma fanau
 tama laiti e toalua, masalo e lima ma le
 ono tausaga, e o i fafo e taaalo.

I le faalogo mai o Uncle Grover i le la
 talosaga, na punou mai ai o ia ma faafe-
 sagai lelei ona foliga ia i laua. Sa matuai
 toeaina lava ona foliga ma lē masani
 lea na fai sina fefefe ai o tamaiti ia te ia.
 Sa ia fai atu ia i laua, i lona leo pāū, “Ia
 faaeteete—o le tele ia o skunk i fafo i o.”
 O le faalogo ai i le tala, sa ma tetei ma
 Lesa; sa ma popole nei fanaina i laua e
 se skunk! E lei umi ae o i fafo tamaiti e
 taaalo a o faaauau pea le matou evaga.

Mulimuli ane, ina ua matou i totonu
 o le taavale e o i le fale, sa ou fesili i
 tamaiti, “Na lua vaai i se skunk?” Sa tali
 mai le toatasi o i laua, “leai, ma te le'i
 vaai i ni skunks, ae na ma vaai i se tamai
 pusi e i ai tosi paepae i lona tua!”

O Le Taufasese Sili

O nei tala e uiga i tamaiti ta'uma-
 maina o loo mauaina se mea e uiga i le



olaga ma le mea moni e mafai e i tatou taitoatasi ona ataata ai, ae e faapupula mai ai foi se manatu sili atu ona loloto.

I le tala muamua, sa i ai i le ma atalii laitiiti se taifau aulelei o se fagafao; ae ui i lea, sa ia uu maia se kalone vali ma, se pulumu vali fale i le lima, naunau e fatu lana lava vaaiga faalemafaufau moni.

I le tala lona lua, sa le iloa lelei e tamaiti le lamatia i le namu leaga e feagai ma i laua mai se skunk. O le le mafai ona iloa lelei o le mea na fetaiai moni ma i laua, sa ono lamatia ai i laua i pua-puaga o ni taunuuga le manuia. O tala nei o ni faasinomaga taufaasese—o le mafaufauina o le mea moni o se isi mea. I tulaga taitasi, e itiiti lava ni taunuuga.

Ae peitai, o le toatele lava i nei aso o loo tauivi ma nei lava faafitauli e tasi i se tulaga sili atu. A le o lo latou lē mafai ona iloa mea e pei ona latou i ai moni, pe ua lē faamalieleina i le mea moni. E le gata i lea, o loo i ai ni faatosinaga malolosi i le taimi nei ua mamauina e taitaieseina i tatou mai le upumoni a'ia'i. O nei mea taufaasese ma pepelo e oo i tua atu o faasinomaga taufaasese ma mamā, ma e masani ona maua ai ni taunuuga ogaoga ae le itiiti.

O Satani, o le tama o pepelo ma o le taufaasese sili, na te faia ia tatou

fesiligia mea o loo i ai moni ma e oo ina tatou lē amanaiaina upumoni e faavavau pe faaliliuina i latou i se mea e foliga e sili ona faafiafiaina. “Ua sii taua ai o ia i le au paia a le Atua”² ma faaaluina le fia afe tausaga e fuafua ai ma faataitai le tomai e faatosina ai fanau uma a le Atua ia talitonu o le *lelei e leaga* ma le *leaga e lelei*.

Ua ia faia se uiga tauleleia mo ia lava o le faatalitonuina o tagata o skunks ua na o ni tamai pusi po o le, faatasi ai ma le faaagaina o le vali, e mafai ona e suia se Lapatora i se Dalmatian!

Se'i o tatou liliu atu nei i se faataitaiga o lenei lava mataupu faavae o loo maua i tusitusiga paia ina ua faafesagai Mose le perofeta a le Alii ma lenei lava faafitauli. “Na aveina a'e ai Mose i se mauga maua luga tele lava, . . . sa vaai faafesagai lava o ia i le Atua, ma sa talanoa o ia ma ia.”³ Na aoao e le Atua Mose e uiga i lona faasinomaga faavavau. E ui o Mose o se tagata ma e atoatoa, sa aoao mai e le Atua o Mose sa “tusa [o ia] ma la'u Toatasi na Fanaua; ma la'u Toatasi na Fanaua . . . o le a avea ma Faaola.”⁴

I le aotelega, o Mose, i lenei faaaliga ofoofogia, na ia vaai i le Atua, ma sa ia aoaoina foi se mea taua e uiga ia te ia lava: e ui o se tagata, ae o ia o se *atalii o le Atua*.

Faalogo ma le totoia i le mea na tupu a o tapunia lenei faaaliga ofoofogia.

“Ma sa oo ina ua uma . . . sa alu ane Satani ma faaosooso ia te ia,” ua fai mai, “Mose e, le atalii o le *tagata*, ifo mai ia te a'u!”⁵ Na tali atu ma le lototoa Mose: “O ai *oe*? Aua faauta, o a'u o se atalii o le *Atua*, i le faatusa o lana Toatasi na Fanaua; ma o fea o i ai *lou* mamalu, e tatau ai ona ou ifo atu ia te *oe*?”⁶

I nisi upu, na fai atu Mose: “E le mafai ona e taufaasese mai ia te a'u, aua ua ou iloa lo'u tagata. Na foafoaina a'u i le faatusa o le *Atua*. E le o ia te oe Sona malamalama ma le mamalu. Aisea la e tatau ai ona ou ifo ia te oe pe pa'u atu i au taufaasese?”

Ia gauai atu la i le ala na toe tali atu ai Mose. Na ia tautino atu, “Alu ese ia oe, Satani; *aua e te taufaasese mai ia te a'u*.”⁷

E tele naua mea e mafai ona tatou aoaoina mai le tali malosi a Mose i faaosoosoga mai le fili. Ou te valaaulia outou ia tali atu i lea lava ala e tasi pe a outou lagona faatosinaga e ala i faaosoosoga. Faatonu le fili o lou agaga i le faapea atu: “Alu ese ia! E *leai* sou mamalu. Aua e te faaosooso pe pepelo mai ia te a'u! Ou te iloa o a'u o se atalii/afafine o le *Atua*. Ma o le a ou valaau atu pea i lo'u *Atua* mo Lana fesoasoani.”

Peitai, e le faigofie ona lafoai e le tiapolo ona faamoemoe faataumaai e faasese ma ta'ufaatauvaaina i tatou. Na mautinoa lava na te lei faia ia Mose, nai lo lena na manao ia faagalo e Mose po o ai o ia e faavavau.

Na peiseai na osotu lona ita faatamaitiiti, “sa alaga Satani ma le leo tele, ma sa leoleoā i luga o le eleele, ma faatonu mai, ua fai mai: O a'u o le Toatasi na Fanaua, ifo mai ia te a'u.”⁸

Se'i tatou iloiloia. Na e lagona le tala lea na ia faatoa fai mai? “O a'u o le Toatasi na Fanaua. Ifo mai ia te a'u!”

Na fai mai le taufaasese sili, “Aua le popole; ou te le faamanua ia te oe—E le

o a'u o se skunk; Ua na o a'u o se tamai pusi mamā tosi uliuli paepae.”

Ona valaau atu lea o Mose i le Atua ma maua mai Lona malosī faalelagi. E ui ina sa gatete le tiapolo ma lulu le eleele, ae sa *le'i gauai atu* ai Mose. Na mautinoa ma manino lona leo. “Satani, alu ese ia mai ia te a'u,” na ia folafola atu, “aua ua nao le Atua lenē e tasi o le a ou ifo atu i ai, o le Atua lea o le mamalu.”⁹

Mulimuli ane, “sa [ia] . . . alu ese . . . mai luma o Mose.”¹⁰

Ina ua mavae ona afio ifo le Alii ma faamanuia ia Mose mo lona usiusitai, na fetalai mai le Alii:

“Amuia lava oe Mose, aua . . . o le a faia oe ia e malosī e sili atu nai lo vai e tele. . . .

“Ma faauta, Ou te faatasi ma oe, e oo lava i le iuga o ou aso.”¹¹

O le tetee o Mose i le tiapolo o se faataitaiga manino ma le faagaetia mo i tatou taitoatasi, e tusa lava po o le a lo tatou tulaga i le olaga. O se savali mamana mo oe patino—ia iloa le mea e fai pe a taumafai o ia e faasese ia te oe. Mo outou, e pei foi o Mose, ua faamanuiaina i le meaalofo o le fesoa-soaniga faalelagi.

O Poloaga ma Faamanuiaga

E faapefea ona e maua lenē fesoa-soani faalelagi, e pei ona maua e Mose, ae le faaseseina pe gauai atu i faaososoga? O se auala manino mo le fesoa-soaniga faalelagi na toe faamautuina i lenē tisipenisione e le Alii Lava Ia ina ua Ia tautino mai: “O le mea lea, o A'u o le Alii, ona ua Ou iloa le malaia o le a oo mai i luga o e o nonofo i le lalolagi, na Ou valaau atu ai i luga o la'u auaina o Iosefa Samita, Laitiiti, ma tautala atu ia te ia mai le lagi, ma tuu atu ia te ia poloaga.”¹² O le faaogaina o upu faigofie, atonu tatou te faapea atu ai o le Alii, o le na te silafia “le iuga mai le amataga,”¹³ e silafia faigata uiga ese o o



tatou aso. O le mea lea, ua Ia saunia ai se ala mo i tatou e tetee atu ai i luitau ma faaososoga, o le tele o ia mea e oo mai o se taunuuga tuusao o faatosinaga taufaasese a le fili ma ana osofaiga.

E faigofie lava le ala. E ala mai i Ana auaina, e fetalai mai ai le Atua ia i tatou, o Lana fanau, ma tuu mai ia i tatou poloaga. E mafai ona tatou toe fai ia fuaiupu na faatoa ou sii maia e fai mai, “O a'u, le Alii, . . . na valaau atu i la'u auaina o [Peresitene Russell M. Nelson], ma fetalai atu ia te ia mai le lagi, ma tuu atu ia te ia poloaga.” Pe le o se upumoni mamalu ea lena?

Ou te tuuina atu la'u molimau faamaoni e faapea, sa fetalai moni mai lava le Alii ia Iosefa Samita mai le lagi, e amata i le Uluai Faaaliga maoae. O loo fetalai mai foi o Ia ia Peresitene Nelson i lo tatou vaitaimi. Ou te molimau atu na talanoa le Atua ma ana perofeta i vaitausaga ua tuanai ma tuu mai ia i latou ni poloaga na mamauina e taitai ai Lana fanau i le fiafia i lenē olaga ma le mamalu i le isi olaga.

O loo faaauau pea ona tuuina mai e le Atua poloaga i lo tatou perofeta soifua i nei aso. Ua tele faataitaiga—o le faapaleniina o aoaoga a le talalelei ia sili atu ona faatotonugalemu i le aiga ma lago-lagoina e le Ekalesia; o le suiga o faiaoga o aiga ma faiaoga asiasi i le auunaga; fetuunaiga i faiga faavae ma sauniga o le malumalu; ma le polokalama fou a Tamaiti ma le Autalavou. Ou te maofa i le agalelei ma le agaalofo o se Tama Faa-lelagi alofa ma Lona Alo, o Iesu Keriso,

o le na toefuatai maia le Ekalesia a le Faaola i le lalolagi ma ua valaauina se perofeta i o tatou aso. O le Toefuataiga o le talalelei a Iesu Keriso e faafetaiaia ai taimi *faigata* ma le *atoaga* o taimi.

E Le'i Avea Lava Le Amioleaga Ma Fiafia

O le usiusitai i poloaga na tuuina mai i lo tatou perofeta o se ki e le gata i le aloese ai mai faatosinaga o lē taufaasese ae ia lagona ai foi le olioli ma le fiafia tumau. E faigofie lava lenē mamanu faalelagi: amiotonu, po o le usiusitai i poloaga, e aumaia faamanuiaga, ma o faamanuiaga e aumaia le fiafia, po o le olioli, i o tatou olaga.

Peitai, i le ala lava e tasi na taumafai ai le tiapolo e taufaasese Mose, o loo ia saili ai e faasese oe. E faafoliga lava o ia i taimi uma i se mea e le mafai ona avea ai o ia. Na te taumafai lava i taimi uma e nana lona tagata moni. Ua ia faapea mai o le usiusitai o le a pagatia ai lou olaga ma o le a faoa ai mai ia te oe le fiafia.

E mafai ona e mafaufau i nisi o ana togafiti e taufaasese? Mo se faataitaiga, na te faafoliga sese taunuuga faataumaioi o fualaau faasaina ma le inupia ae fautua mai o le a aumaia e le inupia le fiafia. Na te faatofu i tatou i elemene eseese le lelei lea e mafai ona i ai i upega faagafesootai, e aofia ai faatusatusaga faavaivai tagata ma tulaga faafoliga moni. E le gata i lea, na te faailoa mai ia i tatou isi anotusi faataumaioi o loo maua i le initoneti, e pei o ponokalafi, osofaiga matautia i isi e ala i telefoni feaveai, ma le totoina o ni faamatalaga sese e mafua ai le masalosalo ma le fefe i o tatou loto ma mafaufau. Na te musumusu mai ma le poto, “Na o le mulimuli mai lava ia te a'u, ma o le a mautinoa lava lou fiafia.”

O upu na tusia i le tele o seneturi ua mavae e se perofeta o le Tusi a Mamona ua matuai faataata lava mo o tatou aso: “E lei avea lava le amioleaga ma



SAUNIA E PERESITENE RUSSELL M. NELSON

fiafia.”¹⁴ Tau ina ia tatou iloa taufaa-
sese a Satani i mea o latou i ai. Tau ina
ia tatou tetee atu ma vaai e ala atu i
pepelo ma faatosinaga a lē o loo saili
e faaumatia o tatou agaga ma fao mai
ia i tatou lo tatou olioli i le taimi nei
ma le mamalu o i le lumanai.

O’u uso e ma tuafafine, e tatau ona
faaauau pea ona tatou faamaoni ma
mataala, aua ua na o le pau lea o le ala
e iloatino ai le upumoni ma faalogo ai
i le siufofoga o le Alii e ala mai i Ana
auna. “Aua e tautala mai le Agaga i
le upumoni ma e le pepelo. . . . Ua faa-
ali manino mai nei mea ia te i tatou,
mo le olataga o o tatou agaga. . . . Sa
fetalai atu foi i latou e le Atua i pero-
feta anamua.”¹⁵ O i tatou o se Au Paia
a le Atua Silisiliese, ma le faamoemoe
o Isaraelu! Pe o le a tatou vaivai ea?
“Tou te solaese ea? Leai! . . . I poloa’i,
a le Alii, tumau pea ma faamaoni.”¹⁶

Ou te tuuina atu la’u molimau i le
Tóatasi Paia o Isaraelu—i le suafa o Iesu
Keriso. Ou te molimau atu i Lona alofa
tumau, upumoni, ma le olioli lea ua
mafai e ala i Lana taulaga lē iu ma faa-
vavau. Pe a tatou usitai i Ana poloaiga,
o le a taitaia pea i tatou i le ala sa’o ma
o le a le faaseseina. I le suafa paia o lo
tatou Faola, o Iesu Keriso, amene. ■

FAAMATALAGA

1. Russell M. Nelson, “Faamoemoe o
Isaraelu” (faigalotu a le autalavou
i le lalolagi atoa, 3 Iuni, 2018),
HopeofIsrael.ChurchofJesusChrist.org.
2. Mataupu Faavae ma Feagaiga 76:29.
3. Mose 1:1–2.
4. Mose 1:6.
5. Mose 1:12; faaopoopo le faamamafa.
6. Mose 1:13; faaopoopo le faamamafa.
7. Mose 1:16; faaopoopo le faamamafa.
8. Mose 1:19.
9. Mose 1:20.
10. Mose 1:22.
11. Mose 1:25–26.
12. Mataupu Faavae ma Feagaiga 1:17.
13. Aperaa 2:8.
14. Alema 41:10; faaopoopo le faamamafa.
15. Iakopo 4:13.
16. “Vaivai Ea Fanau a Siona, *Viiiga*, nu. 159.

O Le Poloaiga Lona Lua ma le Sili

*E oo mai lo tatou olioli silisili pe a tatou
fesoasoani atu i o tatou uso ma tuafafine.*

O’u uso e ma tuafafine pele, faafetai atu
mo mea uma o loo outou faia e feso-
soani ai e faapotopoto Isaraelu i itu uma
e lua o le veli, e faamalosi ai o outou
aiga, ma ia faamanuia ai olaga o i latou
e lē tagolima. Faafetai mo le ola ai o ni
soo moni o Iesu Keriso.¹ Ua outou iloa
ma fiafia e usiusitai i poloaiga sili e lua,
ia alofa i le Atua ma ia alofa i ou tuaoi.²

I le gasologa o le ono masina ua alu,
sa ma feiloai ai ma Sister Nelson i le
faitau afe o le Au Paia a o ma faimalaga
atu i Amerika Tutotonu ma Saute,
atumotu o le Pasefika, ma le tele o aai

i le Iunaite Setete. A o ma faimalaga
atu, o le ma faamoemoe ia atiae lo *outou*
faatuatua. Ae ma te foi mai lava i taimi
uma ua faamalosi lo *ma* faatuatua e
tagata ma uo ma te feiloai i ai. E mafai
ona ou faasoa atua ni taimi anoa se tolu
mai i o ma aafiaga talu ai nei?

Ia Me, sa ma malaga ai ma Sister
Nelson faatasi ma Elder Gerrit W. ma
Sister Susan Gong i le Pasefika i Saute.
A o i ai i Aukilani i Niu Sila, sa matou
maua le faamamaluga e feiloai ai ma
taitai sauniga mai malumalu Mosalemi
e lua i Kalaiesetete, Niu Sila, lea i le



A o i ai i Aukilani, Niu Sila, sa feiloai ai Peresitene ma Sister Nelson ma imams mai ni faletapu se
lua i Kalaiesetete, Niu Sila.

lua masina na muamua ai, sa tafaanaina ai i lalo tagata tapuai lē sala i se faiga faatupu faalavelave matautia.

Sa faailoa atu lo matou tigailofa i nei uso o se isi faatuatuaga ma toe faamautu i ai lo tatou tautinoga e tasi i le saolotoga o tapuaiga.

Sa ofo atu foi i ai a tatou galuega ofofua ma sina fesoasoaniga tautupe e toefausia ai o latou malumalu. O le matou feiloaiga ma nei taitai Mosalemi sa faatumulia i le faailoaga agamalu o uiga faaleusoga.

Ia Aokuso, faatasi ma Elder Quentin L. ma Sister Mary Cook, sa ma feiloai ai ma Sister Nelson i tagata i Buenos Aires, Atenitina—o le toatele o i latou e le o nisi o lo tatou faatuatuaga—o e ua suia o latou olaga e nofoa faataavalevale na foai atu i ai e ala atu i la tatou Latter-day Saint Charities. Sa musuia i matou a o latou faailoa maia le lotofaafetai na tumu i le olioli mo a latou nofoa fou e feoai ai.

O se taimi lona tolu taua sa tupu i ni nai vaiaso talu ai iinei i le Aai o Sate Leki. Sa oo mai i se tusi tulagaese sa ou mauaina i lo’u aso fanau mai se tamaitai talavou o le a ou ta’ua o Mary—e 14 tausaga.

Sa tusia e Mary ni mea sa tutusa ai ma’ua: “E toa 10 lau fanau. E toa 10 matou le fanau. E te tautala i le Meneterini. E toafitu tamaiti o lo’u aiga, e aofia ai ma a’u, sa vaetama mai Saina, o le Meneterini la le matou gagana muamua. O oe o se fomai tipitipi o le fatu. E lua taotoga o le fatu o lo’u uso sa fai. E te fiafia i le lotu lua-itula. Matou te fiafia i le lotu lua-itula. E lelei lou leo usu pese. E lelei foi le leo o lo’u tuagane. E tauaso o ia e pei o a’u.”

Sa matua ootia a’u i upu a Mary, sa faaalai ai e le gata o lona agaga matagofie ae faapena foi le tuuto o lona tina ma le tama.

O le Au Paia o Aso e Gata Ai, e pei foi o isi soo o Iesu Keriso, o loo tagai i taimi



uma mo auala e fesoasoani atu ai, e siitia, ma alolofa i isi. O i latou o loo naunau ina ia ta’ua o le nuu o le Alii ua “loto e tauave le avega a le tasi [ma le isi], . . . e faanoanoa faatasi ma e faanoanoa; . . . ma [ia] faamafanafana atu ia te i latou o e manaomia le faamafanafanaga.”³

Latou te saili moni lava e ola i poloaiga muamua ma le sili ma le lona lua. A tatou alolofa i le *Atua* ma o tatou loto atoa, Na te liliu atu o tatou loto i le tulaga manuia o *isi* i se taamilosaga matagofie ma mama.

O le a faigata ona fuafua le tele o auaunaga e tuu atu e le Au Paia o Aso e Gata Ai i le lalolagi atoa i aso uma o le tausaga, ae e faigofie ona fuafua le lelei e faia e le Ekalesia o se faalapopototoga e faamanuia ai alii ma tamaitai—tamaiti ma teineiti—o loo manaomia se lima fesoasoani.

O le galuega alofa aapa atu a le Ekalesia sa tatalaina i le 1984. Ona faia lea o se anapogi a le Ekalesia aoao e saili ai tupe e fesoasoani ai i e na mafatia i se lamala faataumaoi i Aferika i sasae.

Sa foai atu e tagata o le Ekalesia le \$6.4 miliona i lena aso anapogi e *tasi*.

Ona auina atu lea o Elder M. Russell Ballard ma Brother Glenn L. Pace i Efiopia e iloilo pe faapefea ona faaoga na tupe paia i se auala silisili. O lenei taumafaiga na faamaonia ai le amataga o le mea o le a mulimuli ane lauiloa o le Latter-day Saint Charities.

Talu mai lena taimi, ua foai atu ai e le Latter-day Saint Charities le silia ma le *lua pilliona* talā i fesoasoaniga mo i latou ua mafatia i le lalolagi atoa. O lenei fesoasoani ua ofo atu i e mauaina e le afaina pe i ai ni latou fesoootaiga ma le ekalesia, tagatanuu, ituaiga, ituaiga faaleitupa, itupa, po o manatu faaupufai.

E le na o le pau lena. Ina ia fesoasoani i tagata o le Ekalesia a le Alii o e o pagatia, tatou te alolofa ma ola i le tulafono anamua o le anapogi.⁴ Tatou te le aai e fesoasoani ai i isi o loo faaai. E tasi le aso i masina taitasi, tatou te le aai ai ae foai atu le tau o lena meaai (ma faasili atu) e fesoasoani ai ia i latou o mafatia.



O le a le galo lava ia te a'u la'u uluai asiasiga i Aferika i Sisifo i le 1986. Na o mai le Au Paia i a matou fonotaga i ni aofaiga tetele. E ui sa itiiti ni a latou mea e fua i meatotino faalelailolagi, ae o le toatele lava na o mai ua laei i ofu papae e leai ma sina pisipisia.

Sa ou fesili i le peresitene o le siteki po o faapefea ona ia tausila tagata sa laiti ni mea na maua. Sa ia tali mai sa iloa lelei e o latou epikopo o latou tagata. Afai na gafatia e tagata ni meaai se lua o le aso, e leai la se fesoasoani na manaomia. Ae afai e na o le tasi le meaai pe itiiti foi na gafatiaina—e tusa lava pe o fesoasoani i ai aiga—e saunia e epikopo meaai, e faatupe mai le taulaga anapogi. Ona ia faaopopo mai lea o lenei mea moni ofoofogia: o a latou foai o le taulaga anapogi e masani lava ona *sili atu* i a latou tupe faaalu. Ona auina atu lea o faasiliga o taulaga anapogi i tagata i *isi nofoaga* o o latou manaoga e sili atu i lo o latou manaoga. O na Au Paia malolosi i Aferika sa aoaoina a'u i se lesone maoae e uiga i le mana o le *tulafono* ma le *agaga* o le anapogi.

I le avea ai ma tagata o le Ekalesia, tatou te lagonaina se fesoootaiga ia i latou o loo mafatia i soo se auala.⁵ I le avea ai ma atalii ma afafine o le Atua, o i tatou uma o uso ma tuafafine. Tatou te faalogo i se apoapoaiga o le Feagaiga Tuai: “Ia e matua faamafola atu lou lima i lou uso, i le ua tigaila, ma le ua mativa e ia te oe.”⁶

Tatou te tauivi foi ia ola i aoaoga a le Alii o Iesu Keriso e pei ona tusia i le Mataio 25:

“Aua na ou fia ai, ona outou avane ai lea ni mea ou te ‘ai ai, na ou fia inu, ona outou avane ai lea ni vai ou te inu ai; sa fai a'u ma tagata ese, ona outou talia lea o a'u:

“Na ou le lavalavā ona outou faa-ofuina lea o a'u; na ou ma'i, ona outou asiasia mai lea o a'u. . .

“... Aua na faia e outou i le tasi o e aupito itiiti o o'u uso nei, o a'u lea na outou faia i ai.”⁷

Se'i o'u ta'ua ni nai faaitaiga o le auala o loo mulimuli ai le Ekalesia i nei aoaoga a le Faaola.

Ina ia fesoasoani e fafaga e fiaaai, o loo faagaoioi ai e le Ekalesia faleteuolua e 124 a epikopo i le lalolagi atoa. E ala atu ia i latou, pe tusa e 400,000 oka o meaai e tuuina atu i tausaga taitasi i tagata taitoatasi o mafatia. I nofoaga e le o i ai ni faleteuolua, e tala mai e epikopo ma peresitene o paranesi ni tupe mai le taulaga anapogi a le Ekalesia e tuu atu ai meaai ma sapalai mo o latou tagata le tagolima.

Peitai, o le luitau o le matelaina o loo aafia ai le toatele o tagata nai lo na o tagata o le Ekalesia. O loo faatuputeleina i le lalolagi atoa. Na faailoa i se lipoti talu ai nei a Malo Afaatasi e faapea o le aofai o tagata e leai ni meaai i le lalolagi ua sili atu nei ma le 820 miliona—pe o le toetoe tasi mai le toaiva tagata o loo i ai i le lalolagi.⁸

Oka se fuainumera inā matautia. E maeu lo matou faafetai mo a outou

saofaga. Faafetai atu i lo outou lotofoa faamaoni, o le a maua ai e le faitau miliona i le lalolagi meaai matua manaomia, lavalava, malutaga le tumau, nofoa faa-taavalevale, vailaau, vai mama, ma isi.

O le tele o faamai i le lalolagi atoa e mafua mai ona o le lē mama o le suavai. E oo mai i lenei taimi, o ta'imua a galuega alofa a le Ekalesia ua fesoasoani e avatu le suavai mama i le fia selau o nuu i atunuu e 76.

O se poloketi i Luputa, i le Malo Faatemokarasi o Congo, o se faaitaiga lelei lea. I se aofai o tagatanuu e silia ma le 100,000, sa *leai se suavai maua i le aai*. Sa ao ona savavali tagata i mea mamao mo punavai o suavai saogalemua. Sa maua se vaipuna i le mauga e 18 maila (29 km) le mamao, ae sa le mafai e tagata o le aai ona maua lena vai i se tulaga faifai pea.

Ina ua iloa e a tatou faifeautalai o galuega alofa lenei luitau, sa latou galulue faatasi ma taitai o Luputa e ala i le sapalai atu o anomea ma faia aoaoga e faapaipa atu ai le suavai i le aai. Sa faaalu e tagata o Luputa le *tolu tausaga* e eliina ai se alavai e tasi-le-mita-le-loloto e oso atu i papa ma le togavao. E ala i le galulue faatasi, na i'u ai ina taunuu mai le aso fiafia ina ua maua le suavai fou ma mama mo tagata uma o lena nuu.

E fesoasoani foi le Ekalesia i tagata sulufai, pe o mai mai taua faalemalo, o faalavelave faalenatura, po o sauaga faalelotu. E silia ma le 70 miliona tagata ua aveesea nei mai i o latou fale.⁹

I le tausaga 2018 lava ia, sa tuuina atu ai e le Ekalesia sapalai mo faalavelave faafuasei i tagata sulufai i atunuu e 56. Ma le isi, e toatele tagata o le Ekalesia e ofofua atu o latou taimi e fesoasoani ai i tagata sulufai ua nonofo faatasi i ni nuu fou. Matou te faafetai atu i tagata uma o outou o loo aapa atu e fesoasoani ia i latou o e o loo taumafai ia faamautu i ni fale fou.

E ala i foai agaalofo i faleoloa o le Deseret Industries i le Iunaite Setete, e faitau miliona pauna o lavalava ua aoina ma faavasegaina i tausaga taitasi. A o faaaogaina e epikopo i le lotoifale nei foai e tele e fesoasoani ai i tagata mafatia, o le vaega *aupito tele* e foai atu i isi faalapopotoga o galuega alofa o loo tufatufa atua ia mea i le lalolagi atoa.

Ma i le tausaga ua te'a, sa tuu atu ai e le Ekalesia se tausiga o le vaai mo le silia ma le 300,000 tagata i atunuu e 35, o le tausiga mo pepe fou mo le faitau afe o tina ma pepe i atunuu e 39, ma nofoa faataavalevale mo le silia ma le 50,000 tagata o loo nonofo i le tele o atunuu.

Ua lauiloa le Ekalesia mo le i ai faatasi ma ē e muamua tali atu pe a tupu se faalavelave. E oo foi lava i le taimi *a o lei* taia e se afa, e fuafua e taitai o le Ekalesia ma aufaigaluega i nofoaga o le a aafia ni fuafuaga o auala o le a latou avatu ai ni sapalai mo toomaga ma ofofua atu le fesoasoani ia i latou o le a aafia.

I le tausaga na te'a nei, sa faatino ai e le Ekalesia le silia ma le 100 poloketi mo toomaga mai faalavelave faafuasei i le lalolagi atoa, e fesoasoani ai i e na aafia i afa, afi, lologa, mafuie, ma isi mala. Soo se taimi lava e mafai ai, e feoai ai o tatou tagata o le Ekalesia i ta'ofu sasama o Lima Fesoasoani i ni aofaiga toatele e fesoasoani atu ia i latou ua mafatia i faalavelave. O le ituaiga o tautua, e tuuina atu e le toatele o outou, o le ute tonu lea o le auaunaga.

Ou uso e ma tuafafine pele, o gaioiga ua ou faamatalaina ua na o sina vaega itiiti o le polokalama aapa atu ua faatupulaia a le uelefea ma galuega alofa a Le Ekalesia a Iesu Keriso o le Au Paia o Aso e Gata Ai.¹⁰ Ma o *outou* tagata ia ua mafai ai ona faia nei mea uma. Ona o o outou olaga o faataitaiga, o o outou loto foai, ma o outou lima fesoasoani, e le o se mea e ofo ai le viia o a outou taumafaiga e le toatele o taitai o nuu ma malo.¹¹

Talu ona avea au ma Peresitene o le Ekalesia, ua ou maofa lava i le toatele o peresitene, o palemia, ma amapasa ua faafetai mai ia te au ma le faamaoni mo a tatou fesoasoaniga alofa i o latou tagata. Ma ua latou faailoa maia foi le lotofaafetai mo le malosiaga o loo avatu e o tatou tagata faamaoni i o latou atunuu i le avea ai ma ni tagatanuu lotonuu ma fisaofaga.

Ua ou maofa foi ina ua asiasi mai taitai o le lalolagi i le Au Peresitene Sili

ma faailoa mai lo *latou faamoemoe* mo le Ekalesia ina ia faatuina i totonu o o latou eleele. Aisea? Ona ua latou iloa o le a fesoasoani atu le Au Paia o Aso e Gata Ai e fausia ni aiga ma ni nuu malosoli, ma faia ia lelei atu le olaga mo isi *po o fea lava* o latou nonofo ai.

Po o fea lava o loo tatou nonofo ai, e lagona e tagata o le Ekalesia ma le faananau e uiga i le tulaga faatama o le Atua ma tulaga faaleusoga o tagata uma. O lea, o lo *tatou* olioli silisili e oo





SAUNIA E PERESITENE HENRY B. EYRING
Fesoasoani Lua i le Au Peresitene Sili

mai pe a tatou fesoasoani atu i o tatou uso ma tuafafine, po o fea lava o tatou nonofo ai i lenei lalolagi matagofie.

O le tuuina atu o le fesoasoani i isi—i le faia o se taumafaiga mana-fanafa e popole mo isi e pei, pe *sili atu* nai lo le tatou popole ia i tatou lava ia—o lo tatou olioli lea. Aemaise lava, ou te fia faaopoopo atu, pe a le tala-feagai ma pe a avecesa ai i tatou mai i o tatou tulaga mafanafana. O le *ola* i lenei poloaiga sili lona lua o le *ki* lea i le avea ai ma se soo moni o Iesu Keriso.

O’u uso e ma tuafafine pele, o outou o ni faataitaiga ola o fua e maua mai i le mulimuli i aoaoga a Iesu Keriso. Ou te faafetai atu ia te outou! Ou te alofa ia te outou!

Ou te iloa o loo soifua le Atua. O Iesu o le Keriso. Ua toefuatai mai Lana Ekalesia i nei aso e gata ai e faataunuu ona faamoemoega paia. Ou te molimau atu ai i le suafa o Iesu Keriso, amene. ■

FAAMATALAGA

1. Tagai i le Moronae 7:48.
2. Tagai i le Mataio 22:37–39; Luka 10:27.
3. Mosaea 18:8–9.
4. Tagai i le Isaia 58:3–12.
5. I le amataga o le talafaasolopito o le Ekalesia, sa fiaaai foi paionia, sa leai ni aiga, ma sa sauaina.
6. Teuteronome 15:11.
7. Mataio 25:35–36, 40.
8. Tagai i le Food and Agriculture Organization of the United Nations and others, *The State of Food Security and Nutrition in the World 2019*, 6, fao.org/3/ca5162en/ca5162en.pdf.
9. Tagai i le “Worldwide Displacement Tops 70 Million, UN Refugee Chief Urges Greater Solidarity in Response,” United Nations High Commissioner for Refugees website, June 19, 2019, unhcr.org/en-us.
10. Mo nisi faamatalaga e uiga i galuga alofa a le Ekalesia, faamolemole tagai i le Church of Jesus Christ.org/topics/welfare; LatterDaySaintCharities.org; facebook.com/LatterDaySaintCharities; JustServe.org.
11. “O le tamaitusi sili ona aoga o le a tatou tauaveina o le lelei o o tatou lava ia olaga ma faataitaiga” (Gordon B. Hinckley, “Find the Lambs, Feed the Sheep,” *Liahona*, July 1999, 121).

O Le Paia ma le Fuafuaga o le Fiafia

E oo mai le fiafia sili mai le paia faaletagata sili atu.

O’u uso e ma tuafafine pele, sa ou tatolo mo le mana e fesoasoani ia te outou i la outou sailiga patino mo le fiafia. Atonu e lagonaina e nisi le lava o le fiafia, ae e mautinoa lava e leai se tasi e teenaina le ofa o le tele atu o le fiafia. E naunau soo se tasi e taliaina se ofa mautinoa o le fiafia tumau.

O le mea lenei ua ofo mai e le Tama Faalelagi, Lona Alo Pele, o Iesu Keriso; ma le Agaga Paia i fanau agaga uma a le Tama Faalelagi o loo soifua nei, o le a soifua mai, ma sa soifua i lenei lalolagi. O lenei ofa e ta’ua i nisi taimi o le fuafuaga o le fiafia. Sa ta’ua ai e le perofeta o Alema a o ia aoao atu lona atalii o le sa oo i le tiga o le pagatia o le agasala. Sa silafia e Alema e le mafai ona avea le amioleaga ma fiafia mo lona atalii—pe mo soo se tasi o fanau a le Tama Faalelagi.¹

Sa ia aoao lona atalii o le faateleina o le paia e na o le pau lea o le auala i le fiafia. Sa ia faamanino mai o le paia silisili ua mafaia ona o le Togiola a Iesu Keriso lea ua faamamaina ma faaatoatoaina ai i tatou.² E na o le faatuatua ia Iesu Keriso, salamo faifai pea, ma le tausiga o feagaiga e mafai ai ona tatou maua le fiafia tumau lea tatou te naunau ia lagonaina ma faatumauina.

O la’u tatolo mo le aso ina ia mafai ona ou fesoasoani ia te outou ia

malamalama, e oo mai le fiafia sili mai le paia faaletagata sili atu lea e te faatino ai e tusa ma lenei talitonuga. Ona ou faasoa atu lea o mea ua ou iloa mo a’u lava e uiga i mea e mafai ona tatou faia e agavaa ai mo lenei meaalofo o le avea ia paia atili.

Ua aoao mai tusitusiga paia ia i tatou e faapea, faatasi ma isi mea, e mafai ona faapaiaina i tatou pe sili atu ona paia pe a tatou faatinoina le faatuatua ia Keriso,³ faaalua lo tatou usiusitai,⁴ salamo,⁵ ositaulaga mo Ia,⁶ mauaina o sauniga paia, ma le tausiga o a tatou feagaiga ma Ia.⁷ O le agavaa mo le



meaalofa o le paia e manaomia ai le lotomauualalo,⁸ agamalu,⁹ ma le onosai.¹⁰

O se tasi o aafiaga o le manao atili ina ia paia na oo mai mo a'u i le Malumalu o Sate Leki. Sa ou ulu atu i le malumalu mo le taimi muamua ae sa itiiti mea sa ta'u mai o mea sa faamoemoeina. Sa ou vaai i upu i luga o le maota: "E Paia i le Alii" ma le "O Le Maota o le Alii." Sa ou lagonaina se lagona maoae o le naunauta'i. Ae sa ou mafaufau pe ua ou saunia ea e ulufale atu i ai.

Sa savavali atu lo'u tina ma lo'u tama i o'u luma a o matou ulufale atu i le malumalu. Sa talosagaina i matou e faaali atu a matou pepa faataga, e faamaonia ai lo matou agavaa.

Sa iloa e o'u matua le tamā sa i ai i le laulau o pepa faataga. O lea na la tutu ai mo sina taimi e talanoa ma ia. Sa ou alu atu na o a'u i totonu o se nofoaga telē lea sa feilafi papa'e ai mea uma. Sa ou tilotilo a'e i se faaalo matua maua-luga lava i o'u luga a'e na foliga mai o se lagi o loo matala. I lena taimi, na oo mai se lagona manino ia te a'u sa ou i ai muamua iina.

Ona ou, faalogoina lea o se siufofoga malū lava—e lē o lo'u leo. O upu lemu ia na tautalagia: "E te le'i i ai muamua lava iinei. O loo e manatuaina se taimi ae e te le'i fanau. Sa e i ai i se nofoaga paia e pei o lenei nofoaga. Ua e lagonaina o le afio atu le Faaola i totonu o le nofoaga o loo e tu ai. Ma sa e lagonaina le fiafia ona sa e naunau e vaai ia te Ia."

O lena aafiaga i le Malumalu o Sate Leki sa na o sina taimi lava na tupu ai. Ae o le manatuaina e aumaia ai pea le filemu, olioli, ma le fiafia toafimalie.

Sa ou aoaoina le tele o lesona i lena aso. O se tasi [o na lesona], e fetalai mai le Agaga Paia i se leo itiiti, ma le filemu. E mafai ona ou lagonaina o Ia pe a i ai le filemu faaleagaga i lo'u loto. Na te aumaia se lagona o le fiafia ma le



faamautinoaga ua faasolo ina ou paia atili. Ma o lena mea e aumaia pea le fiafia na ou lagonaina i na taimi muamua i totonu o se malumalu o le Atua.

Ua e matauina i lou lava olaga ma i olaga o isi le vavega o le fiafia e sau mai le faatupulaia o le paia, i le avea atili e faapei o le Faaola. I vaiaso talu ai nei, sa ou asiasi ai i tagata mama'i o ē sa ono feagai ma le oti faatasi ai ma se faatua-tua atoatoa i le Faaola ma foliga fiafia.

O se tasi [o ia tagata], o se alii na siomia e lona aiga. Sa la talatalanoa lemu ma lona toalu a o ma ulufale atu ma lo'u atalii. Sa ou iloina i laua mo le tele o tausaga. Sa ou vaaia le Togiola a Iesu Keriso o loo galue i o la olaga ma i olaga o tagata o o laua aiga.

Sa la filifili faatasi e faamuta tau-mafaiga faafomai e faaumiumi ai lona soifua. Sa i ai se lagona filemu a o ia saunoa mai ia i ma'ua. Sa ia ataata a o ia faailoa mai le lotofaafetai mo le talalelei ma ona aafiaga mamā ia te ia ma le aiga na ia alofa i ai. Sa ia talanoa e uiga i ona tausaga fiafia o auunaga i totonu o le malumalu. I le talosaga a lenei alii, sa faauu ai e lo'u atalii lona ao i le suaau paia. Sa ou faamauina le faauuga. A o ou faia, sa ou maua se uunaiga manino o le a le pine ae vaai o ia i lona Faaola, faafesagai.

Sa ou folafola atu ia te ia o le a ia lagonaina le fiafia, alofa, ma le faama-oniga a le Faaola. Sa ia ataata ma le alofa a o ma tuua [o ia]. O ana upu mulimuli ia ia te a'u "Ta'u atu ia Kathy ou te alofa ia te ia." O lo'u toalu, o Kathleen, i le tele o tausaga na uunaia ia augatupulaga o lona aiga e talia le valaaulia a le Faaola e o mai ia te Ia, osia ma tausia feagaiga paia, ma ia agavaa mo le fiafia lea e oo mai o se taunuuga o lena paia sili atu.

Sa maliu o ia i ni itula mulimuli ane. I totonu o ni nai vaiaso talu lona maliu, na aumai ai e lona faletua se meaalofa mo lo'u toalu ma a'u. Sa ataata o ia a o matou talatalanoa. Sa ia fai mai ma le fiafia, "Sa ou faamoemoe o le a ou lagona le faanoanoa ma le tuuatoatasi. Ua ou lagonaina le fiafia tele. E te lua manatu e lelei lena mea?"

O le iloina o le tele o lona alofa i lana tane ma le auala e iloa ai e i laua uma, alolofa, ma auuina atu i le Alii, sa ou fai atu ai ia te ia, o ona lagona o le fiafia o se meaalofa folafolaina aua sa paia atili o ia, e ala i lana auunaga faamaoni. O lona paia na agavaa ai o ia mo lena fiafia.

Atonu o nisi o loo faalogologo mai i le asō o loo mafaufau: "Aisea ou te le lagonaina ai le filemu ma le fiafia na



folafola mai ia i latou o ē faamaoni? Sa ou faamaoni i faigata matautia, ae ou te lē lagonaina le fiafia.”

E oo lava i le Perofeta o Iosefa Samita na feagai ma lenei tofotofoga. Sa ia tatalo mo le toomaga ina ua taofia o ia i se falepuipui i Liperate i Misuri. Sa ia faamaoni i le Alii. Sa ia tuputupu ae i le paia. Ae sa ia lagonaina le lē mauaina o le fiafia.

Sa aoaoina o ia e le Alii i le lesona o le onosai, lea tatou te manaomia uma i nisi taimi, ma atonu mo ni vaitaimi uumi, i la tatou tofotofoga faaletino. O le savali lenei a le Alii i Lana perofeta faamaoni ma mafatia:

“Ma afai e lafo oe i totonu o le lua, po o lima o e fasioti tagata, ma tuu mai le faaiuga o le oti i ou luga; afai e lafo oe i le loloto; afai e taupulepule galulolo o le sami e faasaga mai ia te oe; afai e avea matagi malolosi ma ou fili; afai e faapotopoto e le lagi le pogisa, ma aufaatasi elemene uma e pupuni le ala; ma i luga o mea uma, afai e tatala faamaga lautele mai e auvae lava o seoli le gutu ia te oe, ia e iloa, lo’u atalii e, o nei mea uma e te maua ai le poto masani, ma o le a avea mo ou lelei.

“Na afio ifo le Atalii o le Tagata i lalo o i latou uma. Ua sili atu ea oe ia te ia?”

“O lea, piimau i lou ala, ma o le a tumau le perisitua ia te oe; ona ua faatapulaaaina o latou tuaoi, e le mafai ona latou sopo mai. Ua iloa ou aso, ma o ou

tausaga o le a lē faitauina itiiti mai; o lea, aua le mata’u i mea e mafai ona fai e tagata, aua o le a faatasi le Atua ma oe e faavavau ma faavavau lava.”¹¹

O le lesona aoga lava lea e tasi na tuuina atu e le Alii ia Iopu, o lē sa tofogiina se tau mamafa ina ia mafai ai e le Togiola ona faia o ia ia paia atili. Ua tatou iloa o Iopu sa paia, mai le folasaga ua tatou maua e uiga ia te ia: “Sa i le nuu o Usa le tasi tagata, o lona igoa o Iopu; na sa’o le amio a lea tagata ma le amiotonu, sa mata’u foi o ia i le Atua, ma ‘alo’alo ese i mea leaga.”¹²

Ona aveesea lea mai ia Iopu o lona tamaoiga, lona aiga, e oo lava i lona soifua maloloina. Atonu e te manatua ina sa masalosalo Iopu i lona paia tele, na maua mai e ala i faigata sili atu, na agavaa ai o ia mo le fiafia sili atu. Sa foliga mai ia Iopu o le paia na aumaia ai le faanoanoa.

Ae sa tuuina atu e le Alii ia Iopu le lesona lava lea e tasi o le a’oa’iga lea na Ia tuuina atu ia Iosefa Samita. Na Ia tuu Iopu e vaai i lona tulaga lotonutimomoia i ona mata faaleagaga. Sa Ia fetalai mai:

“Ina fusi ia lou sulugatiti e pei o le tagata malos; ou te fesili atu foi ia te oe, ina e faailoa mai ia ia te au.

“O i fea sa e i ai ina o ou faavaeina le lalolagi? ina faaali mai ia pe afai ua e iloa mafaufau.

“O ai ea na ia fuafuaina ai, pe afai ua e iloa? o ai foi ua na faataoto i ai le fua?

“Ua tuuina ea ona faavae i luga o le a? o ai ea foi na na tuuina ifo lona maa tulimanu;

“Ina o pepese faatasi fetu o le taeao, ma alalaga fiafia atalii uma o le Atua?”¹³

Ma, ina ua uma ona salamo Iopu i le valaauina o le Atua e manatu faapito, sa faatagaina Iopu e vaai i ona tofotofoga i se auala maua luga atu ma paia atu. Sa salamo o ia.

“Ona tali atu ai lea o Iopu ia Ieova, ua faapea atu,

“Ua ou iloa e te mafaia mea uma, e le mafai foi ona vaoia se mea e te finagalo i ai.

“O ai ea lenei ua na faapouliuligia lau pule ma le le iloa? aua ua ou tautala atu ma lo’u le mafaufau, o mea ua sili ona faigata ia te au, na ou le iloa lava.

“Ia e faafofoga mai, o a’u ou te tautala atu ai; ou te fesili atu ia te oe, a ia e faailoa mai ia te au.

“Sa ou faalogo ia te oe i le faalogo o o’u taliga; a o lenei, ua vaai atu o’u mata ia te oe.

“O le mea lea ua ou ‘ino’ino ai ia te au, ua ou salamo foi i le efuefu ma le lefulefu.”¹⁴

Ina ua uma ona salamo Iopu ma oo ina toe paia atili, sa faamanuiaina o ia e le Alii i mea e sili atu i lo mea na aveesea mai ia te ia. Ae masalo o le faamanuiaga pito sili mo Iopu o le faateleina lea i le paia e ala i faigata ma le salamo. Na agavaa o ia e maua le fiafia sili atu i aso na totoe e ola ai.

O le paia sili atu o le a le oo mai i le tau na ona ole atu. O le a oo mai i le faia o mea e manaomia mo le Atua e suia ai i tatou.

Sa tuuina mai e Peresitene Russell M. Nelson le mea e foliga mai ia te au o le fautuaga aupito sili lea o le auala e agai atu ai i le ala o feagaiga i le paia sili atu. Sa tuuina mai e ia le taiala ina ua ia fautua mai:

“O le lagonaina o le mana faamalo-
siau o le salamo i aso taitasi—o le faia
ma le avea ma se tagata lelei teisi atu i
aso taitasi.

“A tatou filifili e salamo, ua tatou
filifili e sui! Ua tatou faatagaina le Faa-
ola e suia i tatou i o tatou lava ituaiga
tagata silisili. Tatou te filifili e tuputupu
a’e faaleagaga ma maua le olioli—le oli-
oli o le togiolaina ia te Ia. A tatou filifili
e salamo, ua tatou filifili ia avea atili e
faapei o Iesu Keriso!”

Sa faaauau pea Peresitene Nelson i
le tuuina mai ia i tatou o lenei faamalo-
siauga i a tatou taumafaiga ina ia paia
atu: “E le o faamoemoeina e le Alii se
atoatoa mai ai i tatou i lenei taimi. . . .
Ae ua Ia faamoemoeina i tatou ia faate-
leina lo tatou mamā. O le salamo i aso
taitasi o le ala lea i le mamā.”¹⁵

Na fesoasoani foi ia te a’u se lauga a
Peresitene Dallin H. Oaks i se konafesi
na muamua atu, e iloa manino atili ai le
ala tatou te tuputupu ae ai i le paia ma
le auala e mafai ai ona tatou iloa o loo
tatou agai atu i ai. Na ia saunoa mai: “E
faapefea ona tatou ausia le faaleagaga?
E faapefea ona tatou maua lena vaega
o le paia, lea e mafai ona tatou maua



ai le mafutaga tumau o le Agaga Paia?
E faapefea ona tatou vaai ma iloiloaina
mea o lenei lalolagi mai se vaaiga o le
faavavau?”¹⁶

O le tali a Peresitene Oaks e amata
i le faatuatua sili atu ia Iesu Keriso o lo
tatou Faaola alofa. Lea e taitai atu ai i
tatou ia saili le faamagaloga i aso uma
ma ia manatua o Ia e ala i le tausia o
Ana poloaiga. O lena faatuatua sili atu
ia Iesu Keriso e oo mai a o tatou tauma-
mafa fiafia i Lana afioga i aso taitasi.

O le viiga “Faapa’ia Mai Au” ua
fautuaina mai ai se auala e tatalo ai mo
se fesoasoani ina ia avea atili ma tagata
paia. Ua fautua mai ma le atamai e le
fatupese, o le paia tatou te sailia o se
meaalofa mai se Atua alofa, ua tuuina
mai i le aluga o taimi, pe a mavae mea
uma e mafai ona tatou faia. Tou te
manatua le fuaiupu mulimuli:

*Ia ou mamā tele,
Malosi, mālō ai,
Ia ‘ou lē ponā i,
Mea o le ola.
Ia ou agava’a,
Ma ‘ia ‘ou aoga,
Ia ‘ou pa’ia tele—
Pei o le Fa’aola.”¹⁷*

Po o a lava o tatou tulaga faaletagata
lava ia, po o fea lava o tatou i ai i luga
o le ala o feagaiga i le aiga, tau ina ia
tali mai a tatou tatalo mo le paia sili

atu. Ou te iloa a o tuuina mai mea tatou
te ole atu ai, o le a faateleina lo tatou
fiafia. Atonu e telegese mai, ae o le a oo
mai lava. Ua ou maua lena faamauti-
noaga mai se Tama Faalelagi alofa ma
Lona Alo Pele, o Iesu Keriso.

Ou te molimau atu o Iosefa Samita o
se perofeta a le Atua, o Peresitene Russell
M. Nelson o lo tatou perofeta soifua i
aso nei. O loo soifua le Atua le Tama
ma e alofa ia i tatou. E finagalo o Ia ia
tatou o atu i le aiga ia te Ia o ni aiga. Ua
valaaulia i tatou e lo tatou Faaola alofa
e mulimuli atu ia te Ia i la tatou malaga
iina. Ua uma ona La saunia le ala. I le
suafa paia o Iesu Keriso, amene. ■

FAAMATALAGA

1. Tagai i le Alema 41:10.
2. Tagai i le Alema 42:4–16.
3. Tagai i le Galuega 26:18; Eteru 4:7.
4. Tagai i le Mataupu Faavae ma Feagaiga 88:34.
5. Tagai i le 3 Nifae 27:19–20.
6. Tagai i le Mataupu Faavae ma Feagaiga 132:50.
7. Tagai i le Mataupu Faavae ma Feagaiga 97:8.
8. Tagai i le Helamana 3:35.
9. Tagai i le Mataupu Faavae ma Feagaiga 101:1–5.
10. Tagai i le 1 Ioane 3:2–3; Mataupu Faavae ma Feagaiga 112:13.
11. Mataupu Faavae ma Feagaiga 122:7–9.
12. Iopu 1:1.
13. Iopu 38:3–7.
14. Iopu 42:1–6.
15. Russell M. Nelson, “E Mafai Ona Tatou Faia ia Lelei Atu ma Ia Tatou Lelei Atu,” *Liahona*, Me 2019, 67, 68.
16. Dallin H. Oaks, “Faaleagaga,” *Liahona*, Ian.1986, 63.
17. “Faapaia Mai A’u,” *Vūga*, nu. 70.





SAUNIA E ELDER HANS T. BOOM
O Le Fitugafulu

Iloaina, Alofaina, ma le Tuputupu A'e

*Tau ina ia tatou malamalama uma i la tatou
vaega i lenei galuega sili o le auaunaga ina ia
mafai ona tatou avea atili e pei o Ia.*

I le 2016 na o mai ai le Aufaipese a le Tapeneko i le Lotoa o le Malumalu e asiasi mai i Netalani ma Peleseuma. Talu ai sa ou aafia i lena faafiafiaga mata'ina, sa ou maua ai le avanoa e olioli faalua ai ia latou faafiafiaga.

I le taimi o a latou faafiafiaga sa ou mafaufau ai e uiga i le maeu o se taumafaiga ofoofogia o le feaveai solo o se aufaipese toatele faapena. Na taulai atu lo'u mafaufau i le gong lapoa, lea sa faigata ma e masalo e taugata tele le lafoina pe a faatusatusa i le vaiolini, pu, po o isi meafaili ia e faigofie ona afisi i lalo o lou lima. Ae o le tilotilo atu i le aafiaga moni o lenei gong, sa na o ni nai taimi e ta ai, a o isi meafaili laiti atu sa tele atu le faaaogaina i le konaseti. Na ou tomanatu faapea a aunoa ma le leo o le gong o le a le tutusa le faafiafiaga ma o lea e tata ai ona faia le taumafaiga e fesiitai lenei gong lapoa i le salafa o le vasa loaloa.

O nisi taimi atonu tatou te lagona ai le faapei o lena gong, e nao sina vaega itiiti e lelei ai i le faafiafiaga. Ae ou te fia tau atu ia te oe o lou leo o loo faia se eeseega tele.

Tatou te manaomia uma mea faifaaili O nisi o i tatou e faigofie ona aoao ma lelei tele i le a'oga, a o isi e i ai ni taleni faatufugaga. O nisi e mamanu ma fausia ni mea po o le tausia, puipuia, po o le aoao atu o isi. O loo manaomia i tatou uma e aumaia ai le eeseega ma le uiga i lenei lalolagi.

Ia i latou o lagona e le'o ia i latou se mea e saofagā ai pe talitonu e leai



so latou taua po o se taunuuga i soo se tagata, i isi atonu o loo latou lagonaina ua latou i ai i le tumutumu o le lalolagi, ma soo se tagata o i le ogatotonu, ou te fia tuuina atu lenei savali.

Po o fea lava o e i ai i le ala o le olaga, o nisi o outou ua lagona le matua mamafatu i avega ua e le mafaufau ai ia te oe lava ia i luga o lena ala. Ou te fia valaaulia oe ia laa ese i fafo mai le pouliuli ma alu atu i le malamalama. O le malamalama o le talalelei o le a maua ai le mafanafana ma le faamalologa ma o le a fesoasoani ia te oe ia malamalama po o ai moni lava oe ma po o le a lou faamoemoega i le olaga.

O nisi o i tatou na fesesetai solo i ala faasaina, e taumafai e saili le fiafia iina.

Ua valaaulia i tatou e se Tama Faalelagi alofa e savalia le ala o le avea ma soo ma toe foi atu ia te Ia. E alofa o Ia ia i tatou i se alofa atoatoa.¹

O le a le ala? O le ala ia fesoasoani ia i tatou ia malamalama po o ai i tatou e ala i le auauna atu i le tasi ma le isi.

Ia te a'u, o le auauna atu o le faatinoina lea o le alofa faalelagi.² I lena ala, tatou te fatuina ai se siosiomaga lea e maua uma ai e le tagata foi ma le tagata e taliaina se manao ia salamo. I nisi upu, tatou te suia le itu e agai i ai ma o mai ia latalata atili i lo tatou Faola, o Iesu Keriso, ma avea atili e faapei o Ia.

Mo se faataitaiga, e le manaomia le ta'u soo atu i o tatou taitoalua po o fanau le auala e mafai ona faaleleia ai i latou; ua uma ona latou iloaina na mea. O le fatuina o lenei siosiomaga o le alofa o le a faamalositia ai i latou e fai ni suiga manaomia i o latou olaga ma avea ma tagata sili ona lelei.

I lenei auala, e avea ai le salamo ma se faagasologa i aso taitasi o le toe faaleleia, lea e ono aafia ai le faatoese atu mo se amioga le lelei. Ou te manatua ma o loo aafia pea i tulaga ia e vave ona ou faamasino atu ai pe tuai foi ona ou faalogo.

Ma i le faaiuga o le aso i le taimi o la'u tatalo patino, ou te lagona ai le fautuaga alofa mai le lagi ia salamo ma ia lelei atili. O le siosiomaga alofa na muamua fatuina e o'u matua, le uso, ma tuafafine ma mulimuli ane e lo'u toalua, fanau, faapea ma uo na fesoasoani ia te a'u ia avea ma se tagata lelei atili.

Ua tatou iloa uma le mea e mafai ona tatou lelei atili ai. E le manaomia le faamanatu atu pea i isi, ae o loo i ai se manaoga ia alofa ma auauna atu i le tasi ma le isi ma o le faia o lena mea, e maua ai se siosiomaga o le naunautaiga ia suia.

I lenei lava siosiomaga e tasi o loo tatou aoao ai po o ai moni lava i tatou ma po o le a la tatou matafaioi o le a i ai i nei aso mulimuli o le talafaasolopito o le lalolagi a o lumanai ai le Afio Mai Faalua o le Faaola.

Afai o e tuufesili e uiga i lau vaega, ou te valaaulia oe e saili se nofoaga e mafai ona e i ai na o oe ma ole atu i le Tama Faalelagi ia faailoa atu ia te oe po o le a le vaega e te faia. Atonu o le a faasolosolo malie mai lava le tali ma o le a manino atu pe a faamausali atili o tatou vae i luga o le ala o feagaiga ma le auaunaga.

O loo tatou aafia i nisi o faigata na fetai ai foi ma Iosefa Samita a o i ai o ia "i le lotolotoi o se taua o upu ma le vāvāo o manatu." E pei ona tatou faitau i lana lava tala, sa masani ona ia fai ifo ia te ia lava: "O le a le mea e ao ina faia? O ai o nei vaega uma ua sa'o; pe, ua sese faatasi ea i latou uma? Afai e i ai se tasi o i latou ua sa'o, o ai lea, ma e faapefea ona ou iloina?"⁷³

Faatasi ai ma le malamalama na ia maua i le Tusi a Iakopo, lea na fai mai "A e afai ua leai se poto i so outou, ina ole atu ia i le Atua, o le foai tele mai i tagata uma ma le le toe ta'uta'ua, ona foaiina mai ai lea ia te ia,"⁷⁴ na iu lava ina "i ai le naunautaiga ia Iosefa e 'ole atu i le Atua."⁷⁵



Na tatou faitau atili faapea o le taimi muamua lava lea i lona olaga na ia faia ai se taumafaiga faapea, ona i le lotolotoi o ona atuavalega uma, sa ia lei faia lava se taumafaiga e tatalo atu ma le leo."⁷⁶

Ma e mafai foi mo i tatou i le uluai taimi tatou te talanoa atu ai i lo tatou Foafoa i se ala tatou te lei faia muamua.

Ona o le taumafaiga a Iosefa, na faaali mai ai le Tama Faalelagi ma Lona Alo, o Iesu Keriso ia te ia, ta'u mai lona igoa, ma o se taunuuga ua tatou maua ai se malamalamaaga manino tele atu po o ai i tatou ma e taua moni lava i tatou.

Ua tatou faitau atili faapea i ona tausaga talavou maaleale "na sauaina ai [Iosefa] e i latou na tataua ona avea

ma [ana] uo ma e na tataua ona taulimaina ma le agalelei o [ia]."⁷⁷ Ma e tatou te ono faamoemoe foi i ni mea faafeagai a o tatou ola ai i se olaga o le avea ma soo.

Afai o e lagona i le taimi nei lou le mafai ona avea ma se vaega o le faili ma ua foliga faigata le ala o le salamo ia te oe, faamolemole ia silafia afai tatou te taumafai pea o le a aveesea le avega mai o tatou tauau ma o le a toe i ai le malamalama. O le a le tuua lava i tatou e le Tama Faalelagi pe a tatou aapa atu ia te Ia. E mafai ona tatou pa'u'u ma toe tutu i luga ma o le a Ia fesoasoani ia i tatou e tafiese le palapala mai o tatou tulivae.

O nisi o i tatou ua manunua, ae o loo i ai i le ato fesoasoani muamua a le Alii ni fusi manu'a ua lava le tetelē e fusi ai o tatou manuaga uma.

O lena la alofa, lena alofa lē faatua-oia lea tatou te ta'ua foi o le alofa mama po o le "alofa lē pona o Keriso,"⁷⁸ lea e manaomia i o tatou aiga e auauna atu ai matua ia latou fanau ma fanau i o latou matua. E ala i lena alofa, o le a suia ai loto ma fanau mai ai le manao ia faia Lona finagalo.

O lena alofa o loo manaomia i a tatou fegalegaleaiga ma le tasi ma le isi o ni fanau a lo tatou Tama Faalelagi ma tagata o Lana Ekalesia lea o le a mafai ai e i tatou uma ona faaaoafia meafaili faamusika uma i a tatou aufaili ina ia mafai ai ona tatou faatino ma





SAUNIA E PERESITENE M. RUSSELL BALLARD
Sui Peresitene o le Korama a Aposetolo e Toasefululua

le mamalu faatasi ai ma aufaipese a agelu o le lagi pe a toe afio mai le Faaola.

O lena alofa, lena malamalama lea e manaomia ona susulu ma faa-malamalamaina ai o tatou siosiomaga a o tatou fegasoloai i o tatou olaga i aso taitasi. O le a maitau e tagata le malamalama ma o le a tosina atu i ai. O le ituaiga lenei o galuega faafaifeautalai o le a aumaia isi ia “o mai ma vaai, o mai ma fesoasoani, ma o mai ma nofomau.”⁹ Faamolemole, a e mauaina lau molimau e uiga i lenei galuega maoae ma la tatou vaega, tau ina ia tatou olioli faatasi ma lo tatou perofeta pele o Iosefa Samita, o le na tautino mai, “Aua sa ou vaai i se faaaliga vaaia; sa ou mautinoa lena mea, ma sa ou mautinoa sa silafia e le Atua lena mea, ma e le mafai ona ou faafitia lena mea.”¹⁰

Ou te molimau atu ia te outou ou te iloa po o ai a’u, ma ou te iloa po o ai outou. O i tatou o fanau uma a se Tama Faalelagi, o le e alofa ia i tatou. Na te lei auina maia i tatou iinei ia toilalo ae ia toe foi atu ma le mamalu ia te Ia. Ina ia tatou malamalama uma i la tatou vaega i lenei galuega maoae faaleauaunaga ina ia tatou avea atili faapei o Ia pe a Ia toe afio mai o la’u tatolo lea i le suafa o Iesu Keriso, amene. ■

FAAMATALAGA

1. Tagai i le D. Todd Christofferson, “Tumau i Lo’u Alofa,” *Liahona*, Nov. 2016, 48.
2. Tagai i le Russell M. Nelson, “Alofa Paia,” *Liahona*, Feb. 2003, 12–17.
3. Iosefa Samita—Talafaasolopito 1:10.
4. Iakopo 1:5; tagai foi i le Iosefa Samita—Talafaasolopito 1:11.
5. Iosefa Samita—Talafaasolopito 1:13.
6. Iosefa Samita—Talafaasolopito 1:14.
7. Iosefa Samita—Talafaasolopito 1:28.
8. Moronae 7:47.
9. Dieter F. Uchtdorf, “Galuega Faafaifeautalai: Faasoina atu o Mea o Loo i Totonu o Lou Loto,” *Liahona*, Me 2019, 17.
10. Iosefa Samita—Talafaasolopito 1:25.

Tuu Atu i o Tatou Agaga e Pulea o Tatou Tino

O se tasi o mea sili ona taua e mafai ona tatou aoaoina i lenei olaga o le ala e faamamafa atu ai lo tatou natura faaleagaga e faavavau ma pulea ai o tatou manaoga leaga.

O’u uso e ma tuafafine pele, a o lata-lata mai le konafesi aoao ia Oketopa o le tausaga ua mavae, sa ou saunia la’u lauga o le konafesi e faamamafa ai le 100 tausaga o le faaaliga e uiga i le lalolagi o agaga na tuuina atu ia Peresitene Iosefa F. Samita i le aso 3 Oketopa, 1918.

O ni nai aso na mavae ai lo’u auina atu o la’u lauga mo le faaliliuga, na

faamaea ai e la’u soa pele e faavavau, o Barbara, lona olaga faaletino faataitai ma pasi atu i le lalolagi o agaga.

Ao faasolosolo atu aso i vaiaso, i masina, ma ua atoa nei le tausaga talu ona maliu Barbara, ua ou matua talisapaiaina ai lenei mau: “Ia outou nonofo faatasi i le alofa, ia outou fetagisi ai i le toesea o i latou o e e oti.”¹



Sa faamanuiaina i ma’ua ma Barbara e “nonofo faatasi i le alofa” mo le 67 tausaga. Ae ua ou aoaoina i se auala patino lava le uiga o le “fetagisi ai i le toesea” o i latou tatou te alolofa i ai. E maeu lo’u alofa ma le misia o ia!

Masalo o le toatele o i tatou e le mafai ona talisapaia atoatoa mea o faia e isi mo i tatou sei iloga ua latou maliliu. Sa ou iloa le pisi o Barbara i taimi uma, ae ou te lei malamalama atoatoa i manaoga faifai pea o le aiga, Ekalesia, ma le nuu i lona taimi. Sa i ai ni taumafaiga faapaiaina o aso taitasi na faia soo i le faafiaafe i le tausaga lea na faaauai ai pea le galulue o lo matou aiga. Ma i na mea uma, e leai se tasi i lo matou aiga na faalogo ia te ia o siisii i luga lona leo pe fai se upu le alofa.

Ua tele manatuaga ua oo mai i lou mafaufau i lea tausaga ua mavae. Na ou mafaufau e uiga i filifiliga faigata faaletino sa ia faia e avea ai ma se tina i se fanau e toafitu. O le avea ai ma se tausaga sa na o le pau lea o se matata sa ia manao ai, ma i tulaga uma o lea matata sa ia matuai atamai ai lava.

E tele ina ou mafaufau pe faapefea ona ia taulimaina le ma fanau ma a’u. O sauniuniga lava ia o meataumafa sa o se galuega lofituina, ae le ta’ua ai gaoioiga e pei o le faiga o mauga o tagamea lea na faaputuina e lo matou aiga i vaiaso taitasi, tausaiaina o sevae ma ofu ia ofi lelei i le fanau. Matou te agai uma atu ia te ia mo le tele o isi mataupu lea na taua ia i matou. Ma talu ai na taua ia i matou, na taua foi ia te ia. O ia, i se upu [e tasi] e ofoofogia—o se ava, o se tina, o se uo, o se tuaoi, ma o se afafine o le Atua.

I le taimi nei ua ia pasi atu i le isi itu, ou te fiafia na ou filifili e saofai i ona autafa pe a ou alu atu i le fale i masina mulimuli o lona soifua, e uu lona lima a o ma matamata i faaiuga o nisi o polokalama musika e fiafia i ai—e fai ma toe fai aua e le faatagaina o ia e le faama’i o



le Alzheimer ia manatua ua uma ona ia matamata i ai i le aoauli faatoa mavae atu. O manatuaga o na taimi faapitoa o le uugalima ua matua taua ia te a’u i le taimi nei.

Uso e ma tuafafine, faamolemole aua nei misia se avanoa e tagai atu ai ma le alofa i foliga o tagata o lou aiga. Fanau ma matua, aapa atu i le tasi ma le isi ma faaali atu lou alofa ma le talisapaia. E pei o a’u, o nisi o outou atonu e feala i luga i se tasi aso ma iloina ai ua pasi le taimi o se fesootaiga taua. Ola i aso taitasi ma loto e faatumulia i le faafetai, manatuaga lelei, auaunaga, ma le tele o le alofa.

I le aluga o lenei tausaga ua mavae, sa ou mafaufau loloto ai lava e uiga i le fuafuaga a lo tatou Tama Faalelagi. I le aoao atu ai o lona atalii o Korianetona, na ta’ua ai e Alema “le fuafuaga tele o le fiafia.”²

O le upu lea e oo soo mai i lo’u mafaufau pe a ou mafaufau i le fuafuaga

o le “toe faatasiga.” O se fuafuaga, ua mamanuina e lo tatou Tama o i le Lagi alofa, lea e i le ogatotonu le avanoa maoae ma mamalu o le faatasiga faaleaiga—o le toefaatasia e faavavau o tane ma ava, matua ma fanau, augatupulaga ma lea augatupulaga i le aiga o le Atua.

O lona manatu e aumaia ia te a’u le toafimalie ma le faamautinoaga o le a ma toe faatasi ma Barbara. E ui na mafatia o ia faaletino e oo i le iuga o lona soifua, ae o lona agaga sa malosii, mamalu, ma mama. Sa ia saunia ia lava i mea uma aua a oo mai le aso e mafai ai ona ia tu i luma “o le pa faamasino fimalie a le Atua,”³ ua tumu o ia i le talitonuga ma le faamautinoga filemu. Ae o a’u lenei, i le lua aso, o le a 91 ai tausaga, ma o loo o’u tuufesili pea, “Ua ou saunia ea? Ua ou faia mea uma e tatau ona ou faia ia mafai ai ona toe uuina lona lima?”

O le faamautinoaga sili ona faigofie o le olaga o le mea lenei: o le a tatou



feoti uma. Pe tatou te feoti matutua pe laiti, faigofie pe faigata, mauoa pe mativa, alofagia pe tuulafoaia, e leai lava se tasi e sao mai le oti.

I nai tausaga ua mavae atu, na saunoa mai ai Peresitene Gordon B. Hinckley i se mea e taua tele e uiga i le mea lenei: “E mau le matagofie o le faamautinoaga, e mau le mafanafana o le toafilemu lea e sau mai i le mala-malama, afai tatou te faaipoipo sa’o ma ola amiosa’o, o le a faaauau a tatou mafutaga, e ui lava i le mautinoa o le oti ma le aluga o le taimi.”⁴

Sa mautinoa lava le sa’o o la’u faaipoipoga. E leai se masalosalo i lena mea. Ae e le lava lena mea, e tusa ai ma le saunoaga a Peresitene Hinckley. E tataui foi ona ou ola amiosa’o.⁵

I nei vaitaimi, o le “ola amiosa’o” e mafai ona avea o se mataupu matua fenumiai lava, aemaise pe afai e te faaaluina se taimi tele i luga o ala o faasalalauga faaagafesootai, lea e mafai ai e soo se leo ona tautino mai upumoni mo’i po o mataupu sese e uiga i le Atua ma Lana fuafuaga mo Ana fanau. O le mea e faafetai ai, ua maua e tagata o le Ekalesia ni mataupu faavae moni e faavavau o le talalelei ia iloa ai le ala

e soifua ai ina ia mafai ona tatou lava tapena pe a tatou feoti.

I ni nai masina ae ou te lei fanau mai, na tuuina atu ai e lo’u tama matua o le Aposetolo, o Elder Melvin J. Ballard se saunoaga faapea, mo le toatele o tagata, na pu’eina le ute o le uiga o le ola amiosa’o. O lana lauga sa faaulutalaina “O le Tauiviga mo le Agaga,” sa taulai atu i taua faifaipa i le va o o tatou tino faaletino ma o tatou agaga faavavau.

Na ia saunoa, “O le feteenaiga sili o le a i ai i soo se alii po o se tamaitai . . . o le taua lea i totonu o ia lava,” ma faamalamalama mai ai o Satani “o le fili o o tatou agaga” e osofaia i tatou e ala mai “i tuinanau, manaolasi, ma faananauga o le tino.”⁶ O le taua muamua lava la e i le va o lo tatou natura paia ma faaleagaga ma le tagata natura faaletino. Uso e ma tuafafine, ia manatua, e mafai ona tatou maua le fesoasoani faaleagaga e ala i le faatosinaga a le Agaga Paia lea e mafai ona “aiao atu outou i mea uma.”⁷ E mafai foi ona oo mai le fesoasoani e ala i le mana ma faamanuiaga o le perisitua.

Ou te fesili atu nei, o faapefea le aluga o lena taua ma outou taitoatasi?

Na saunoa Peresitene Tavita O. MaKei: “O le olaga o le tagata i le lalolagi ua na o se suega e saili ai pe o le a taulai atu ana taumafaiga, lona mafaufau, lona agaga, i mea e saofagā atu i le to’afimalie ma le faamalieleina o lona natura faaletino, pe o le a ia faia e tusa ma [faamoemoega] o lona olaga le mauaina o uiga auau mama faaleagaga.”⁸

O lena taua i le va o lo tatou natura faaletino ma faaleagaga e le o se mea fou. I lana lauga faaiu i lona nuu, na aoao atu ai le Tupu o Peniamina e faapea, “o le tagata natura o se fili i le Atua, ma sa faapea lava mai le pau o Atamu, ma o le a faapea lava, e faavavau faavavau lava, vagana ai ua gauai atu o ia i uunaiga a le Agaga Paia, ma tuu ese le tagata natura ma avea ma tagata paia e ala i le togiola a Keriso le Alii.”⁹

Na aoao mai le Aposetolo o Paulo faapea “o e i la le tino e loto atu i latou i mea a le tino; a o e i la le Agaga e loto atu i mea a le Agaga.

“Aua o le loto i la le tino, o le oti lea; a o le loto i la le Agaga o le ola lea ma le manuia.”¹⁰

E foliga manino mai ia te a’u o se tasi o mea sili ona taua e mafai ona tatou aoaoina i lena olaga o le ala e

faamamafa atu ai lo tatou natura faaleagaga e faavavau ma pulea ai o tatou manaoga leaga. E le tatau ona faigata tele lenei mea. O o tatou agaga, lea ua umi atu nai lo o tatou tino faaletino, ua uma ona faamanuiaina i le filifilia o le amiotonu nai lo le leaga i le muai olaga. A o lei faia lenei lalolagi, sa tatou nonofo i le lalolagi o agaga o ni atalii ma afafine a ni Matua Faalelagi, o e alolofa ia i tatou ma e faaauau pea ona alolofa mai ia i tatou i le taimi nei.

Ma ioe, sa ao ona tatou faia ni faaiuga ma filifiliga e suia ai le olaga i lenei nofoaga i le muai olaga. Soo se tagata lava na soifua mai pe o le a soifua mai i lenei paneta na faia se faaiuga taua e filifili e talia le fuafuaga a le Tama Faalelagi mo lo tatou faaolataga. O lea la na tatou o mai uma ai i le lalolagi ma se faamaumauga faamaonia o le ala o se natura manuia faaleagaga ma se taunuuga e faavavau.

Maufaufau i lenei mea mo sina taimi. O lou tagata moni lava lenei, ma le tagata sa avea ai lava oe: o se atalii po o se afafine o le Atua, ua i ai aa faaleagaga i le faavavau ma se lumanai ua tau-masuasua i avanoa le mafuatia. O oe—o le uluai, muamua, ma e avea pea—o se tagata faaleagaga. Ma pe afai la e filifili se tasi e faamuamua lo tatou natura faaletino nai lo lo tatou natura faaleagaga, ua tatou filifili se mea e feteenai ma o tatou lava tagata faaleagaga moni, faamaoni, ma faatuatuaina.

Ae e le fesiligia lava le faafaigatania e manaoga o le tino ma faalelalolagi ona faia ia faaiuga. Faatasi ai ma se veli o le galo o mea ua tosoina i le va o le lalolagi o agaga i le muai olaga ma lenei lalolagi faitino, e mafai e se tasi ona le iloa la tatou faia ma le Atua ma lo tatou natura faaleagaga, ma mafai ai e lo tatou natura faaletino ona faamuamua mea tatou te mananao i ai i le taimi nei. O le aoao e filifili mea a le

Agaga nai lo mea o la le tino o se tasi ia o mafuaaga autu e avea ai lenei olaga faalelalolagi ma vaega o le fuafuaga a le Tama Faalelagi. O le mafuaaga foi lea ua fausia ai le fuafuaga i luga o se faavae mautu ma mausali o le Togiola a lo tatou Alii ma Faaola, o Iesu Keriso, ina ia mafai ona faatoilaloina a tatou agasala, e aofia ai ma mea sese tatou te faia pe a tatou gauai atu i manaoga o le tino, e ala i le salamo faifai pea ma e mafai ai ona tatou ola e taulai atu i le faaleagaga. O le taimi lenei e pulea ai o tatou manaoga faaletino ia ogatusa ma aoga faavae faaleagaga a Keriso. O le mafuaaga lea e le tatau ai ona tatou tolopoina le aso o lo tatou salamo.¹¹

O le mea lea, e avea ai le salamo ma se auupega taua i la tatou taua ma i tatou lava. I le konafesi aoao na sei mavae atu nei, na saunoa ai Peresitene Russell M. Nelson i lenei taua ma faamanatu mai ia i tatou faapea “a tatou filifili e salamo, ua tatou filifili e sui! Ua tatou faatagaina le Faaola e suia i tatou i o tatou lava ituaiga tagata silisili. Tatou te filifili e tuputupu a’e



faaleagaga ma maua le olioli—le olioli o le togiolaina ia te Ia. A tatou filifili e salamo, ua tatou filifili ia avea atili e faapei o Iesu Keriso!”¹²

O po uma, a o ou iloiloia lo’u aso i le tatalo ma lo’u Tama o i le Lagi, ou te aioi atu ina ia faamagaloina pe afai sa ou faia se mea sese ma folafola atu e taumafai ia lelei atu taeao. Ou te talitonu o lenei salamo faifai pea i aso taitasi e fesoasoani i lo’u agaga e faamanatu i lo’u tino po o ai e pule ia te a’u.

O le isi punaoa o le avanoa faalevai-aso lea tatou te maua uma e toe faafou ai i tatou lava faaleagaga e ala i le aai ma feinu i le faamanatuga e manatua ai le Togiola ma le alofa o lo tatou Alii ma Faaola, o Iesu Keriso, mo i tatou.

Uso e ma tuafafine, ou te uunaia outou ina ia faalemu teisi ma mafaufau po o fea o e i ai nei i le faatoilaloina o lou natura faaletino ma le faamalosi o lou natura paia, natura faaleagaga lea pe a oo mai le taimi, e mafai ona e ulufale atu i le lalolagi o agaga i se faatasiga fiafia ma ē pele ia te oe—lea ou te molimau atu ai ma le tatalo faamau-lalo i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 42:45.
2. Alema 42:8.
3. Iakopo 6:13.
4. *Aoga a Peresitene o le Ekalesia: Gordon B. Hinckley* (2016), 157.
5. Ua faaalia mai e le Alii e tatau ona tatou ola e tusa ai ma a tatou feagaiga ina ia mafai ai ona maua faamanuiaga folafolaina (tagai i le Mataupu Faavae ma Feagaiga 82:10; 132:5–7, 19).
6. Melvin J. Ballard, “Struggle for the Soul” (lauga na tuuina atu i le Tapeneko o Sate Leki, Me 5, 1928).
7. Ioane 14:26.
8. *Aoga a Peresitene o le Ekalesia: Tavita O. Ma’eki* (2003), 14.
9. Mosaea 3:19.
10. Roma 8:5–6.
11. Tagai i le Alema 34:33.
12. Russell M. Nelson, “E Mafai Ona Tatou Faia ia Lelei Atu ma Ia Tatou Lelei Atu,” *Liahona*, Me 2019, 67.



SAUNIA E ELDER PETER M. JOHNSON
O Le Fitugafulu

Mana e Faatoilalo ai le Fili

E faapefea ona tatou maua lenei filemu, manatua po o ai i tatou, ma faatoilalo ai F e tolu a le fili?

Uso e ma tuafafine, faafetai mo mea uma o loo tou faia ina ia avea ai, ma ia fesoasoani ai i isi ina ia avea ai, ma soo moni o Iesu Keriso ma olioli i faamanuiga o le malumalu paia. Faafetai atu mo lo outou tuuto. E maoae outou; ua lalelei outou.

O la’u tatalo ia tatou iloa le faatosi-naga *maumaututu* a le Agaga Paia a o tatou malamalama atoatoa o i tatou o fanau a le Atua. Ua ta’ua e “Le Aiga: O Se Folafofaga i le Lalolagi”: “O tagata soifua uma—tane ma le fafine—ua foafoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma, o lea ua tofua ai ma se natura paia ma se taunuuga.”¹ O i tatou o “agaga filifilia o e sa faapolopolo e o mai i le atoaga o taimi e auai i le faataotoina o faavae o le galuega tele o aso e gata ai.”² Na folafola mai e Peresitene Russell M. Nelson: “Na aoaoina oe i le lalolagi o agaga e saunia ai oe mo soo se mea ma mea uma o le a e feagai ai i le taimi o lenei vaega o nei aso e gata ai (tagai i le MF&F 138:56). O lena aoaoga e tumau i totonu ia te oe!”³

O outou o atalii ma afafine filifilia o le Atua. O loo ia te outou le mana e faatoilalo ai le fili. Peitai, ua iloa e le fili po o ai outou. Na te iloa lou tupuaga

faalelagi ma e saili ina ia faamuta lou gafatia faalelalolagi ma faalelagi e ala i le faaaogaina o F e tolu:

- Faasese
- Faalavefau
- Faalotovaivai

Faasese

Na faaaoga e le fili le meafaigaluega o le faasese i aso o Mose. Ua folafola atu e le Alii ia Mose:

“Faauta, o oe lava o lo’u atalii. . .

“Ua ia te a’u se galuega mo oe, . . . ma ua tusa oe ma la’u Toatasi na Fanaua.”⁴

E lei leva ona uma lenei faaaliga mamalu, ae taumafai Satani e faasese Mose. O upu na ia faaaogaina e mata’ina: “Mose e, le atalii o le tagata, ifo mai ia te a’u.”⁵ O le faasese sa le na o se valaaulia e ifo atu ia Satani, ae o le faasese foi i le ala na ia faamatalaina ai Mose o se atalii o le tagata. Manatua, faatoa uma lava ona ta’u atu e le Alii ia Mose o ia o se atalii o le Atua, na foafoaina i le faatusa o le Toatasi na Fanaua.

Sa naunau le fili i lana taumafaiga e faasese Mose, ae sa teena e Mose i le faapea atu: “Satani, alu ese ia mai ia te a’u, aua ua nao le Atua lenei e tasi

o le a ou ifo atu i ai, o le Atua lea o le mamalu.”⁶ Sa manatua e Mose po o ai o ia—o se atalii o le Atua.

O le afioga a le Alii ia Mose e faatatau foi ia te oe ma a’u. Ua foafoaina i tatou i le faatusa o le Atua, ma o loo i ai Sana galuega mo i tatou e fai. E taumafai le fili e faasese [i tatou] e ala i lo tatou faa-galoina po o ai moni i tatou. Afai tatou te le malamalama po o ai i tatou, o lona uiga e faigata ona tatou iloa le ituaiga tagata e mafai ona avea ai i tatou.

Faalavefau

E taumafai foi le fili e faalavefau i tatou ia o ese mai ia Keriso ma Lana ala o feagaiga. Na faasoa mai e Elder Ronald A. Rasband le mea lenei: “O le mamanu a le fili o le aveesea mai lea o i tatou mai molimau faaleagaga, ao le finagalo o le Alii o le faamalamalama ma faagauai atu i tatou i Lana galuega.”⁷

I o tatou aso, e tele faalavefau, e aofia ai le Twitter, Facebook, taaloga vitio e faafoliga e moni, ma le tele o



isi mea. O nei tulaga faatekinolosi e ofoofogia, ae afai tatou te le faaeteete, e mafai ona latou faalavelave ia i tatou mai le faataunuuina o lo tatou gafatia paia. O le faaagaina o ia mea ma le talafeagai e mafai ona aumaia ai le mana o le lagi ma faatagaina ai i tatou e molimauina vavega a o tatou saili atu e faapotopoto Isaraelu ua faataapepeina i itu uma e lua o le veli.

Ia tatou faaeteete ae aua le faasamasamanoa i lo tatou faaagaina o tekinolosi.⁸ Ia saili pea mo auala e mafai ai e tekinolosi ona tatou latalata atu i le Faaola ma faatagaina ai i tatou e faataunuu Lana galuega a o tatou saunia mo Lona Afio Mai Faalua.

Faalotovaivai

O le mea mulimuli, e manao le fili ina ia faalotovaivai i tatou. Atonu tatou te lotovaivai pe a tatou faatusatusa i tatou lava i isi pe lagona tatou te le o ola e tusa ai ma faamoemoega, e aofia ai o tatou lava olaga.

Ina ua amata la'u polokalama faafomai, sa ou lagonaina le lotovaivai. E na o le fa tamaiti na taliaina e le polokalama i lena tausaga, ae o isi tamaiti aoga sa atamamai. Sa maualuluga ni o latou togi i suega ma ni aafiaga faalegaluega i tofiga o pulega sinia, ma sa latou faaalua le talitonuga i o latou tomali. Ina ua uma a'u vaiaso muamua e lua i le polokalama, na amata ona ou lagonaina ni lagona o le faalotovaivaia ma le masalosalo, na toetoe lava a lofituina ai a'u.

Sa tonu ia te au afai e ao ona ou faamaeaina lenei polokalama fa-tausaga, e tatau ona ou faamaeaina le faitauina o le Tusi a Mamona i semesa taitasi. O aso taitasi a o ou faitau, sa ou iloina ai le tautinoga a le Faaola e faapea, o le a aoao mai e le Agaga Paia mea uma ia te a'u ma o le a ou manatua ai mea uma.⁹ Sa toe faamautu ai po o ai a'u i le avea ai ma se atalii o le Atua, na faamanatu



mai ia te a'u e 'aua nei o'u faatusatusaina a'u lava i isi, ma tuuina mai ia te a'u le talitonuga i la'u matafaioi paia ia faamanuiaina.¹⁰

A'u uo pele, faamolemole 'aua ne'i faatagaina se tasi na te faoa lou fiafia. 'Aua le faatusatusaina oe lava i isi tagata. Faamolemole ia manatua upu alofa a le Faaola: "Ou te tuuina atu ia te outou le [filemu], o lo'u [filemu] ou te avatu ai ia te outou: ou te le avatu ia te outou faapei ona avatu e le lalolagi. Aua le atuatuva'e, o outou loto, aua foi tou te matatau."¹¹

Ma e faapefea ona tatou faia? E faapefea ona tatou maua lenei filemu, manatua po o ai i tatou, ma faatoilalo ai F e tolu a le fili?

Muamua, ia manatua o le poloaiga muamua ma le sili o le alofa i le Atua ma o tatou loto, manatu, mafaufau, ma le malosi.¹² O mea uma tatou te faia, e tatau ona faaosofia e lo tatou alolofa ia te Ia ma Lona Alo. A o tatou atiina ae lo tatou alolofa mo i Laua e ala i le tausaga o a Laua poloaiga, o le a faateleina lo tatou gafatia e alolofa ai ia i tatou lava ma alolofa atu ai i isi. O le a amata ona tatou auauna atu i aiga, uo, ma tuaoi aua o le a tatou vaai atu ia i latou e pei ona silasila mai le Faaola ia i latou—o ni atalii ma ni afafine o le Atua.¹³

Lua, tatalo atu i le Tama i le suafa o Iesu Keriso i aso uma, aso uma, aso uma.¹⁴ E ala atu i le tatalo e mafai ai ona tatou lagonaina le alofa o le Atua ma faaali atu lo tatou alolofa mo Ia. E ala i le tatalo tatou te faailoa atu ai le lotofaafetai ma ole atu mo le malosi ma le lototele e gauai atu ai o tatou loto i le finagalo o le Atua ma ia taialaina ma taitaiina i mea uma.

Ou te uunaia outou e "tatalo atu i le Tamā ma le malosi atoa o le loto, ina ia faatumulia outou i lenei alofa, . . . ina ia mafai ona avea outou ma atalii [ma afafine] o le Atua; a oo ai ina afio mai o ia o le a tatou faapei o ia."¹⁵

Tolu, faitau ma suesue i le Tusi a Mamona i aso uma, aso uma, aso uma.¹⁶ O a'u suesuega o le Tusi a Mamona e foliga mai e sili atu pe a ou faitau faatasi ma se fesili i le mafaufau. A tatou faitau faatasi ma se fesili, e mafai ona tatou mauaina faaaliga ma iloina na saunoa mai le Perofeta o Iosefa Samita i le upumoni ina ua ia tautino mai, "O le Tusi a Mamona o le tusi aupito sili ona sa'o i soo se isi lava tusi i luga o le fogaeleele, . . . e sili ona latalata atili atu o le tagata [po o se tamaitai] i le Atua i lona ola ai i ona mataupu, nai lo se isi lava tusi."¹⁷ O le Tusi a Mamona o loo i ai afoga



Uso e ma tuafafine, ou te faasoa atu ia te outou lo'u alofa ma folafola atu lau molimau ou te iloa o loo soifua le Tama Faalelagi ma o Iesu o le Keriso. Ou te alofa ia i Laua. O Le Ekalesia a Iesu Keriso o le Au Paia o Aso e Gata Ai o le malo lea o le Atua i le lalolagi. O i tatou, i le avea ai ma tagata o Lana Ekalesia, ua i ai se *tofiga paia* e faapotopoto Isaraelu ma saunia le lalolagi mo le Afio Mai Faalua o le Mesia. I le suafa o Iesu Keriso, amene. ■

a Keriso ma e fesoasoani ia i tatou e manatua ai po o ai i tatou.

Ma le mea mulimuli, ia taumamafa ma le agaga tatalo i le faamanatuga i vaiaso uma, vaiaso uma, vaiaso uma. E ala mai i feagaiga ma sauniga o le perisitua, e aofia ai ma le faamanatuga, e faaalua ai le mana o le faaleatua i o tatou olaga.¹⁸ Na aoao mai Elder David A. Bednar: “O le sauniga o le faamanatuga o se valaaulia paia ma fai soo ia salamo faamaoni ma ia faafouina faaleagaga. O le faatinoga o le taumamafa i le faamanatuga, na o le faamanatuga lava, e le faamagaloina ai ni agasala. Ae a o tatou saunia ma le mafaufau loloto i ai ma auai i lenei sauniga paia faatasi ma se loto momomo ma le agaga salamo, ona maua lea o le folafolaga o le a mafai ona tatou maua *pea* le Agaga o le Alii e faatasi ma i tatou.”¹⁹

A o tatou aai ma feinu ma le loto-maualalo i le faamanatuga, tatou te manatua mafatiaga a Iesu i lena faatoaga paia ua ta'ua o Ketesemane ma Lana taulaga i luga o le satauro. Tatou te faaali atu le lotofaafetai i le Tama mo le auina mai o Lona Alo e Toatasi na Fanaua, lo tatou Togiola, ma faaali atu lo tatou naunau e tausi Ana poloaiga ma manatua pea o Ia.²⁰ O loo i ai le malamalamaaga faaleagaga e fesootei ma le faamanatuga—e patino [i le tagata lava ia], e mamana, ma e manaomia.

A'u uo, ou te folafola atu a o tatou taumafai e alolofa i le Atua ma o tatou loto atoa, tatalo i le suafa o Iesu Keriso, sutesue i le Tusi a Mamona, ma aai ma feinu ma le agaga tatalo i le faamanatuga, o le a tatou maua le tomai, ma le malosi o le Alii, e faaitiitia ai faiga *faasese* a le fili, e faaitiitia ai mea *faalavefau* ia e faatapulaina lo tatou gafatia paia, ma tetee atu i mea *faalotoivaivai* ia e faaitiitia lo tatou malosi e lagona ai le alofa o lo tatou Tama Faalelagi ma Lona Alo. O le a tatou malamalama *atoatoa* po o ai i tatou o ni atalii ma afafine o le Atua.



FAAMATALAGA

1. O Le Aiga: O Se Folafolaga i le Lalolagi,” *Liahona*, Me 2017, 145.
2. Mataupu Faavae ma Feagaiga 138:53; tagai foi Mataupu Faavae ma Feagaiga 138:54–56.
3. Russell M. Nelson, “Tutu Atu o ni Tagata Moni o le Meleniuma,” *Liahona*, Oke. 2016, 53.
4. Mose 1:4, 6.
5. Mose 1:12.
6. Mose 1:20; tagai foi i le Mose 1:16–19, 21.
7. Ronald A. Rasband, “Ne’i Galo ia te Oe,” *Liahona*, Nov. 2016, 115.
8. Tagai i le Becky Craven, “Faateete faasaga i le Faasamasamanoa,” *Liahona*, Me 2019, 9–11.
9. Tagai i le Ioane 14:26.
10. O la tatou matafaioi paia o le faamanuiaina, o le mauaina lea o le ola e faavavau e tusa lava pe maua e se tasi le tulaga e manatu le lalolagi o ni manuia i taumafaiga faalelalolagi. E faamanatu mai e le Agaga Paia ia i tatou lo tatou matafaioi paia ma le ituaiga o tagata e mafai ona avea ai i tatou pe a tatou tumau i le ala o le feagaiga ma faaitiitia, faatasi ai ma le malosi o le Alii, ia faasoosoga a le fili.
11. Ioane 14:27; ua faaopoopo le faamamafa.
12. Tagai i le Mataio 22:37–38.
13. Tagai i le Ioane 3:16; 1 Ioane 4:19; Mosaea 2:17.
14. Tagai i le 3 Nifae 18:18–21.
15. Moronae 7:48; ua faaopoopo le faamamafa.
16. Tagai i le Kevin W. Pearson, “Tumau i le Laau,” *Liahona*, Me 2015, 114–16.
17. Faatomuaga i le Tusi a Mamona.
18. Tagai i le Mataupu Faavae ma Feagaiga 84:20–21.
19. David A. Bednar, “Faatumauina Pea le Faamagaloina o a Outou Agasala,” *Liahona*, Me 2016, 61–62.
20. Tagai i le Moronae 4:2–3; 5:1–2; Mataupu Faavae ma Feagaiga 20:76–79. Faamolemole ia matau, o loo tatou ola i se taimi tatou te matua manaomia ai Lona Agaga e faatasi pea ma i tatou.



SAUNIA E ELDER ULISSES SOARES
O Le Korama a Aposetolo e Toasefululua

Ave Lo Tatou Satauro

O le aveina i o outou luga o a outou satauro ma mulimuli i le Faaola o lona uiga o le faaauau pea i le faatuatua i luga o le ala a le Alii ma ia lē gauai atu i mausa faalelalolagi.

Uso e ma tuafafine pele, ua tatou maua aoaoga matagofie mai o tatou taitai i nei aso e lua ua mavae. Ou te molimau atu ia te outou afai tatou te taumafai e faaaoga nei aoaoga musuia ma tala-feagai i o tatou olaga, o le a fesoasoani le Alii ia i tatou taitoatasi e ala i Lona alofa tunoa, e tauave o tatou satauro ma faamamā a tatou avega.¹

A o i ai i le aai o Kaisareia Filipi, na faaali atu e le Faaola i Ona soo le mea o le a Ia mafatia ai i lima o toecaina, faitaulaga sili, ma le au tusiupu i Ierusalema. Sa Ia aoaoina faapitoa i latou e uiga i Lona maliu ma le Toetu mamalu.² I lena lava taimi, sa le'i malamalama atoatoa Ona so'o i Lana misiona paia i le fogaeleele. Ina ua faalogo Peteru lava ia, i le fetalaiga a le Faaola, na Ia ave o Ia ma aoai o Ia, ua faapea atu, "Le Alii e, ia mamao ia te oe lea mea: e le oo lena mea ia te oe."³

Ina ia fesoasoani i Ona soo ia malamalama o le tuuto i Lana galuega e aofia ai le gauai atu ma mafatia, sa tautino malosai atu ai le Faaola:

"Ai se tasi e fia mulimuli mai ia te au, aua ne'i usiusitai o ia ia te ia, a ia ave e ia lona satauro, i le mulimuli mai ai ia te au."

"Aua ai se fia faasaogalemuina lona ola, e maumau ai ia te ia; a o le faamau-mau lona ola ona o a'u, e maua ai e ia.

"Aua se a le aoga i le tagata, pe afai na te maua le lalolagi uma, ae maumau lona ola? se a foi se mea e avatu e le tagata e togiola a'i lona ola?"⁴

E ala i lenei folafolaga, sa faamamafa mai ai e le Faaola, o i latou uma e loto e mulimuli ia te Ia e manaomia ona faafiti e i latou i latou lava ma pulea o latou manaoga, tuinanauga, ma faananauga, ositaulagaina mea uma, e oo lava i le ola pe a tatau ai, i le gauai ma le atoatoa atu i le finagalo o le Tama—e pei ona Ia faia.⁵ O le mea moni, o le tau lenei e totogi mo le faaolataga o se agaga. Sa faaaoga ma le iloina ma faafaatusa e Iesu le faatusa o le satauro e fesoasoani ai i Ona soo ina ia malamalama atili i le uiga moni o le ositaulaga ma le tuuto i le galuega a le Alii. O le faatusa o se satauro na lauiloa i totonu o Ona so'o ma tagata o le Malo Roma ona sa fai faamalosi e Roma tagata e faasatauroina e amo a latou lava satauro po o laau faalava o le satauro i le nofoaga o le a fasiotia ai i latou.⁶

Ae i le mavae ai o le Toetu o le Faaola faato'a tatala ai iina mafaufau o le au soo ma malamalama ai i mea uma

na tusia e uiga ia te Ia⁷ ma mea o le a manaomia mai ia i latou mai lena taimi agai i luma.⁸

I le tulaga lava e tasi, o i tatou uma lava, o uso ma tuafafine, e tatau ona tatala o tatou mafaufau ma o tatou loto ina ia malamalama atoatoa i le taua o le aveina i o tatou luga o o tatou satauro ma mulimuli atu ia te Ia. Tatou te aoao e ala i tusitusiga paia, o i latou o e mananao e ave i o latou luga o latou satauro e alolofa ia Iesu Keriso i se auala latou te faafitia ai i latou lava mai mea uma e lē faaleatua ma tu'inanau faalelalolagi uma ma tausi Ana poloaiga.⁹

O lo tatou naunautauga e lafoai ese mea uma e feteenai ma le finagalo o le Atua ma ositaulaga mea uma ua poloai-ina ai i tatou e tuuina atu ma tauivi e mulimuli i Ana aoaoga o le a fesoasoani ia i tatou e tumau ai i le ala o le talalelei a Iesu Keriso—e oo lava i fetalai'iga ma faigata, vaivaiga o o tatou agaga, po o faatosinaga faaagafesootai ma filosofia faalelalolagi ia e tetee i Ana aoaoga.

Mo se faataitaiga, mo i latou e lei mauaina lava se soa e faavavau ma e





ono lagona le tuuatoatasi ma leai se faamoemoe, pe mo i latou ua tatala faaipopoga ma lagona ua tuulafoaiina ma faagaloina, ou te faamautinoa atu ia te outou o le taliaina o le valaaulia a le Faaola o le ave i o outou luga o satauro ma mulimuli ia te Ia, o lona uiga o le faaauau pea ma le faatuatua i le ala a le Alii, tausisia o se mamanu o le mamalu, ma 'aua le gauai atu i mausa faalelailagi ia o le a iu lava ina aveesea ai lo tatou faamoemoe i le alofa ma le alofa mutimutivale o le Atua.

O mataupu faavae lava ia e tasi e faatatau ia te outou o loo aafia i le tosina atu i le itupa e tasi ma lagona ai le lotovaivai ma le leai o se faamoemoe. Ma e masalo ona o lenei mafuaaga, o loo lagona ai e nisi o outou ua lē toe aoga le talalelei a Iesu Keriso mo oe. Afai o le tulaga lena, ou te faamautinoa atu ia te oe o loo i ai pea le faamoemoe i le Atua le Tama ma i Lana fuafuaga o le fialia, ia Iesu Keriso ma Lana taulaga togilola, ma i le ola ai i a Laua poloaiga alofa. I Lona poto atoatoa, mana, faamasinotonu, ma le alofa mutimutivale, e mafai ai e le Alii ona faamauina i tatou e fai Mona, ina ia mafai ona avatu i tatou i Lona afioaga ma maua le faaolataga e faavavau, pe afai tatou te mausali ma lē masi'i'ese i

le tausiga o poloaiga¹⁰ ma o loo faatua mulia pea i galuega lelei.¹¹

Ia i latou o e ua soli ni agasala mutuiā, o le taliaina o lenei lava valaaulia o lona uiga, faatasi ai ma isi mea, ina ia faalotomaulaloina oe lava i luma o le Atua, ia fefautuagai ma taitai tala-feagai o le Ekalesia, ma ia salamo ma lafoai au agasala. O lenei faagasologa o le a faamanuiaina ai i latou uma o e faasagatau atu i vaisu matautia, e aafia ai heroini (opioids), fualaau faasaina, ava malos, ma ponokalafi. O le faia o nei laasaga e faalatalata atili atu ai oe i le Faaola, o Lē e mafai ona faasaolotoina oe mai le tausialaina, faanoanoa, ma le pologa faaleagaga ma faaletino. Ma le isi, atonu foi e te manao e saili atu i le lagolago a lou aiga, uo, ma fomai atamamai ma faufautua faapolofesa.

Faamolemole 'aua lava ne'i e fiu pe a mavae ni toilalo faifai pea, ma mafaufau ia te oe lava ia, e le mafai ona lafoaia agasala ma faatoilaloina le vaisu. E le tatou ona tuu lou taumafai ma faaauau pea i vaivaiga ma le agasala! Taumafai pea lava pea e fai le mea sili e te mafaia, ma faaali atu i au galuega le manao e faamamā totonu o le ipu, e pei ona aoao mai e le Faaola.¹² O nisi taimi o tali i ni luitau patino e oo mai pe a mavae le tele o masina o taumafaiga faifai pea.

O le folafolaga o loo maua i le Tusi a Mamona e faapea "e faaolaina i tatou i le alofa tunoa, pe a uma mea uma e mafai ona tatou faia,"¹³ e faatatau i nei tulaga. Faamolemole ia manatua o le meaalofo o le alofa tunoa o le Faaola e le faapea ua faatapulaaina i se taimi "pe a uma" mea uma e mafai ona tatou faia. E mafai ona tatou maua Lona alofa tunoa a o lei faia, a o faagasolo, ma le mavae ai o le taimi tatou te faia ai a tatou lava taumafaiga."¹⁴

Ou te molimau atu a o tatou taumafai pea e foia o tatou luitau, o le a faamanuiaina i tatou e le Atua i meaalofo o le faatuatua ina ia faamaloloina ma e ala i galuega o vavega.¹⁵ O le a Ia faia mo i tatou mea e le mafai ona tatou faia mo i tatou lava.

E le gata i lea, mo i latou e lagona le inoino, ita, lototiga, pe sa saisaitia i faanoanoaga ona o se mea e te lagona e le talafeagai, o le ave o le satauro ma mulimuli i le Faaola o lona uiga o le taumafai e tuuese nei lagona ae liliu atu i le Alii ina ia mafai ona Ia faasaolotoina i tatou mai lenei tulaga faalemaufau ma fesoasoani ia i tatou ia maua le filemu. Ae paga lea, afai tatou te taofimau i lagona ma manatu le lelei, atonu tatou te iloina o loo tatou ola e aunoa ma le faatosinaga a le Agaga o le Alii i o tatou olaga. E le mafai ona tatou salamo *mo* isi

tagata, ae e mafai ona tatou faamagaloina i latou—e ala i lo tatou mumusu ina ia saisaitia e i latou na faatiga ia i tatou.¹⁶

Ua aoao mai e tusitusiga paia e faapea e i ai se auala e o ese ai mai nei tulaga—e ala i le valaauliaina o lo tatou Faaola e fesoasoani ia i tatou e suia o tatou loto ma’a’a i loto fou.¹⁷ Ina ia tupu lenei mea, e tatau ona tatou o mai i le Alii ma o tatou vaivaiga¹⁸ ma talosagaina Lana fesoasoani ma le faamagaloga,¹⁹ aemaise lava i le taimi paia pe a tatou aai ma feinu i le faamanatuga i Aso Sa taitasi. Tau ina ia tatou filifili e saili atu i Lana fesoasoani, ma faia se laasaga taua ma le faigata e ala i le faamagaloga atu o i latou ua faatiga mai ia i tatou ina ia mafai ona amata faamaloloina o tatou manu’a. Ou te folafola atu ia te outou o le tou faia o lea mea, o le a faatumulia ai o outou po i le toomaga lea e sau mai se mafaufau e filemu i le Alii.

A o i ai i le falepuipui o Liperate i le 1839, na tusia ai e le Perofeta o Iosefa Samita se tusi i tagata o le Ekalesia o loo i ai valoaga e matua talafeagai lava i nei tulaga. Sa ia tusia, “O nofoalii ma malo, itumalo ma mana uma, o le a faaali ma tuu mai i luga o i latou uma o e na tumau ma le lototoa mo le talalelei a Iesu Keriso.”²⁰ O le mea lea, ou uso e ma tuafafine pele, o i latou e ave i o latou luga le suafa o le Faaola, faalagolago i Ana folafolaga ma tumau e oo i le iuga, o le a faaolaina²¹ ma o le a mau faatasi ma le Atua i se tulaga o le fiafia e lē gata.²²

Tatou te feagai uma lava ma tulaga faigata i o tatou olaga lea tatou te lagona ai le faanoanoa, leai se fesoasoani, leai se faamoemoe, ma o nisi taimi e faavaivaia ai. O nisi o nei lagona atonu e taitai atu ai i tatou e fesiligia le Alii: “Aisea ua ou oo ai i nei tulaga?” po o le “Aisea ua le faataunuu ai o’u faamoemoega? E le gata i lea, o loo ou faia mea uma i lo’u mana e ave la’u satauro ma mulimuli i le Faaola!”

A’u uo pele, e tatau ona tatou manatua o le aveina o o tatou satauro i o tatou luga e aofia ai le lotomaulalo ma faalagolago i le Atua ma Lona poto e lē iu. E tatau ona tatou faamamaluina o loo Ia silafia i tatou taitoatasi ma o tatou manaoga. E manaomia foi le taliaina o le mea moni e faapea, o le taimi a le Alii e ese mai ia tatou taimi. O nisi taimi tatou te saili ai mo se faamanuiaga ma faatulaga se taimi faatapulaa mo le Alii e faataunuu ai. E le mafai ona tatou faia ni tuutuuga i lo tatou faamaoni ia te Ia e ala i le tuu atu ia te Ia o se aso e faagata ai tali i o tatou manaoga. A tatou faia lenei mea, ua tatou pei ai o sa Nifae masalosalo, mai anamua, o e sa tauemuina o latou uso ma tuafafine e ala i le faapea mai, ua mavae le taimi mo le faataunuuina o upu na tautalagia e Samuelu le sa Lamana, ma faatupuina ai le fenumiai ia i latou o e na talitonu.²³ E ao ona lava lo tatou faalagolago i le Alii ina ia filemu ma iloa o Ia o le Atua, Na te silafia mea uma, ma e silafia e Ia i tatou taitoatasi.²⁴

Talu ai nei sa ou maua ai le avanoa e auauna atu ai i se tuafafine ua oti lana tane e igoa ia Franca Calamassi, o loo mafatia mai se faama’i o le pe o le tino. O Tuafafine Calamassi o le tagata



O Sister Franca Calamassi ma lana fanau e toafa i le malumalu.

muamua lea o lona aiga na auai i le Ekalesia toefuataiina a Iesu Keriso. E ui sa lei papatisoina lona toalua, ae na malie o ia e feiloai ma faifeautalai ma e masani ona auai i sauniga a le Ekalesia. E ui i nei tulaga, sa tumau pea le faamaoni o Tuafafine Calamassi ma tausia lana fanau e toafa i le talalelei a Iesu Keriso. O le tausaga ina ua mavae le malii o lona toalua, na ave ai e Tuafafine Calamassi lana fanau i le malumalu, ma latou auai ai i sauniga paia ma faamau faatasi ai o se aiga. O folafolaga e o faatasi ma nei sauniga na aumaia ia te ia le faamoemoe, olioli, ma le fiafia na fesoasoani ia te ia e faaauau ai i le olaga.

Ina ua amata ona vaaia ulua’i āūga o le faama’i, sa tuuina atu e lona epikopo ia te ia se faamanuiaga. I le taimi lena na ia ta’u atu ai i lona epikopo ua saunia o ia e talia le finagalo o le Alii, ma faailoa atu lona faatuatua ina ia faamaloloina ai faapea foi ma lona faatuatua e onosaia ai lona gasegase seia oo i le iuga.

I le taimi o la’u asiasiga, a o uuina le lima o Tuafafine Calamassi ma tilotilo atu i ona fofoga, sa ou vaaia se agelu susulu na sau mai ona fofoga—e atagia ai lona talitonuga i le fuafuaga a le Atua ma lona susulu atoatoa o le faamoemoe i le alofa ma le fuafuaga a le Tama mo ia.²⁵ Na ou lagonaina lona naunautai mausali e tumau i lona faatuatua seia oo i le iuga e ala i le aveina o lona satauro, e ui lava i luitau sa feagai ma ia. O le olaga o lenei tuafafine o se molimau ia Keriso, o se faamatalaga o lona faatuatua ma le tuuto ia te Ia.

Uso e ma tuafafine, ou te molimau atu ia te outou o le aveina i o tatou luga o lo tatou satauro ma mulimuli i le Faaola e manaomia ai i tatou ia mulimuli i Ana faataitaiga ma tauivi ia avea e faapei o Ia,²⁶ ia feagai ma le onosai i tulaga o le olaga, faafitia ma le inoino i tu’inanau o le tagata natura, ma faatalitali i le Alii. Sa tusia e le Fai Salamo:



SAUNIA E ELDER NEIL L. ANDERSEN
O Le Korama a Aposetolo e Toasefululua

“Ina faatalitali atu ia ia Ieova, ina loto tele ia, e faamalosiā foi e ia lou loto; ina faatalitali lava ia ia Ieova.”²⁷

“O Ia lava lo tatou fesoasoani ma lo tatou talita.”²⁸

Ou te molimau atu ia te outou o le mulimuli i tulagaa o lo tatou Matai ma faatalitali ia te Ia, o Ia o le faamalologa sili o ō tatou olaga o le a maua ai le malologa i o tatou agaga ma faafaigofie ma māmā ai a tatou avega.²⁹ Ou te molimau atu ai i nei mea i le suafa paia o Iesu Keriso, amene. ■

FAAMATALAGA

1. Tagai i le Mataio 11:29–30; Iakopo 2:24; 2 Nifae 25:23.
2. Tagai i le Mataio 16:21.
3. Mataio 16:22.
4. Mataio 16:24–26.
5. Tagai i le Ioane 6:38.
6. Tagai i le Ioane 19:16–17.
7. Tagai i le Mareko 16:17–20; Luka 24:36–53.
8. Tagai i le Mataio 28:19–20.
9. Tagai i le Faaliliuga a Iosefa Samita, Mataio 16:25–29 (i le faaopoopoga o le Tusi Paia); tagai foi i le Taiala i Tusitusiga Paia, “Lust”; “Natural Man”; “Sensual, Sensuality”; “Wicked, Wickedness”; scriptures. ChurchofJesusChrist.org.
10. Tagai i le Alema 1:25.
11. Tagai i le Mosaea 5:15.
12. Tagai i le Alema 60:23.
13. 2 Nifae 25:23.
14. Tagai i le Bruce C. Hafen, *The Broken Heart: Applying the Atonement to Life's Experiences* (1989), 155–56.
15. Tagai i le Mataupu Faavae ma Feagaiga 46:19, 21.
16. Tagai Neal A. Maxwell, “Salamo,” *Ensign*, Ian. 1992, 32.
17. Tagai i le Esekiele 18:31; 36:26.
18. Tagai Eteru 12:27.
19. Tagai i le 1 Nifae 7:21.
20. Mataupu Faavae ma Feagaiga 121:29.
21. Tagai i le 3 Nifae 27:6.
22. Tagai i le Mosaea 2:41.
23. Tagai i le 3 Nifae 1:4–7.
24. Tagai i le Mataupu Faavae ma Feagaiga 101:16.
25. Tagai 2 Nifae 31:20.
26. Tagai i le Mataio 5:48; 3 Nifae 12:48; 27:27.
27. Salamo 27:14.
28. Salamo 33:20.
29. Tagai i le Mataio 11:30; Mosaea 24:14.

Fua

la tāmāu o outou mata ma loto ia faatotonugalemu i le Faaola o Iesu Keriso, ma le olioli faavavau lea e na o la e oo mai ai.

Ua ou iloa le mea o loo e mafaufau i ai! Toe tasi lava le failauga ona tatou faafofoga atu lea ia Peresitene Nelson. O le faamoemoe ai ina ia outou mataala pea mo ni nai minute ao tatou talitali ai lo tatou perofeta pele, ua ou filifilia ai se autu mataina: o la’u mataupu o le fua.

Faatasi ai ma le lanu, foliga, ma le suamalie o peri, fa’i, meleni, ma mago, po o fualaau suamalie e ese atu e pei o le kiwano po o le pomegranate, ua leva ona avea fualaau suamalie ma matai’ai taua.

I le taimi o Lana galuega i le lalolagi, sa faatusatusa ai e le Faaola fua lelei i mea e faavavau le taua. Na

Ia fetalai, “Tou te iloa i latou i o latou fua.”¹ “E faapea foi laau lelei taitasi ma fua mai i fua lelei.”² Na Ia uunaia i tatou e ao mai “fua e oo i le ola e faavavau.”³

I se miti manino ua tatou iloa lelei i le Tusi a Mamona, na maua ai e le perofeta o Liae o ia lava i “se vao pouliuli ma le pagatia.” E i ai vai eleelea, o se puao o le pogisa, ala ese, ma ala faasaina, faapea foi ma le āi u’amea⁴ i se ala sa’o ma le vaapiapi e tau atu i se laau matagofie e tumu i “fua [e] faafiafia ai le tagata.” O le toe faamatalaina o le miti, na fai mai ai Liae: “Sa ou . . . ‘ai i [le] fua; . . . ua sili ona suamalie, nai lo o mea uma sa ou tofo muamua i ai. . .



I le taimi o Lana galuega i le lalolagi, sa faatusatusa ai e le Faaola fua lelei i mea e taua e faavavau.

[Ma] sa faatumulia lo'u agaga i le olioli tele." *O lenei* fua sa "[sili] ona manaomia [nai] lo se isi lava fua."⁵

O le Uiga o le Laau ma le Fua

O le a le mea o faatusa i ai lenei laau ma ona fua e silisili ona pele? E faatusa i "le alofa o le Atua"⁶ ma o loo folafola mai ai le fuafuaga ofoofogia o le togiola a lo tatou Tama Faalelagi. "Aua ua faapea lava ona alofa mai o le Atua i le lalolagi, ua ia aumai mai ai lona Atalii e toatasi, ina ia le fano se tasi e faatuatua ia te ia, ae ia maua le ola e faavavau."⁷

O lenei fua taua e faatusa i faamanu- iaga matagofie o le Togiola le mafaatusa- lia a le Faaola. E le gata o le a tatou toe ola pe a mavae lo tatou olaga faaletino, ae o lo tatou faatuatua ia Iesu Keriso, lo tatou salamo, ma lo tatou tausia o polo- aiga, e mafai ai ona faamagaloina a tatou agasala ma tutu i se aso i le mama i luma o lo tatou Tama ma Lona Alo.

O le 'aai i le fua o le laau e faatusa foi i lo tatou taliaina o sauniga ma feagaiga o le talalelei toefuataiina—o le papatisoina, mauaina o le meaalofo o le Agaga Paia, ma le ulu atu i le maota o le Alii ina ia faaecina i le mana mai luga. E ala atu i le alofa tunoa o Iesu Keriso ma e ala i le faamamaluina o a tatou feagaiga, tatou te maua ai folafolaga le mafuatia o le ola ai ma o tatou aiga amiotonu i le faavavau atoa.⁸

E leitioa faamatala e le agelu le fua o se mea e "silisili ona olioli i le agaga."⁹ E moni lava!

O le Luitau o le Tumau Faamaoni

E pei ona tatou aoaoina uma, e oo lava ina ua uma ona tofo i le fua faapelepele o le talalelei toefuataiina, o le tumau moni ma le faamaoni i le Alii o Iesu Keriso e le faigofie ona faia. E pei ona ta'ua i le tele o taimi i lenei konafesi, tatou te faaauau pea ona fetaii ma mea faalavefau ma taufaasese,

fenumiaiga ma le vāvāō, faatosinaga ma faaosoosoga ia e taumafai e toso ese o tatou loto mai le Faaola atoa ai ma olioliga ma mea matagofie ua tatou oo i ai i le mulimuli ai ia te Ia.

Ona o lenei faigata, ua aofia ai foi i le miti a Liae se lapataiga! Sa i ai i le isi itu o le vaitafe se fale tele ma le ateatea o i ai tagata o soo se matutua o loo tusitusi mai o latou tamatamailima, tauemu, ma faifai mai i soo amiotonu o Iesu Keriso.

O tagata o i le fale o loo tauemu ma taliē mai ia i latou o loo tausia polo- aiga, ma faamoemoe e ta'uleagaina ma faamaasiasi lo latou faatuatua ia Iesu Keriso ma i Lana talalelei. Ma talu ai o osofaiga i faamatalaga o le masalo- salo ma le inoino na tauvalaau atu i e talitonu, na amata ai ona lagona e nisi o i latou na tofo i le fua le maasiasi i le talalelei lea na latou taliaina muamua. O faatosinaga sese a le lalolagi na faato- sinaina i latou; ua latou liliuese ai mai le laau ma le fua ma, i upu a tusitusiga paia, ua "pau ese atu i ala faasaina ma ua leiloloa."¹⁰

I lo tatou lalolagi i lenei vaitaimi, o loo galulue faasoloatoa le aufaigaluega a

le fili, e faavave ona faatumulia le fale tele ma le ateatea. Ua faalatele atu i le isi itu o le vaitafe, ma le faamoemoe e siomia ai o tatou fale, a o tauvalaau mai pea le au tusitusilima ma le au tauemu i le ao ma le po mai mea o loo i luga o le initoneti.¹¹

Na faamalamalama mai e Peresitene Nelson, "Ua matuā faateleina e le tia- polo ana taumafaiga e faavaivaia moli- mau ma taofia le galuega a le Alii."¹² Sei o tatou toe manatua upu a Liae: "Sa matou lē amanaiaina i latou."¹³

E ui e le manaomia ona tatou fefefe, ae e ao ona tatou faaeteete. E i ai taimi e mafai ai e mea itiiti ona faatuatuvale- ina lo tatou paleni faaleagaga. Faamole- mole 'aia ne'i faatagaina a outou fesili, upu faifai a isi, uo lē faamaoni, po o ni measese ma ni lē fiafia e liliueseae oe mai faamanuiga suamalie, mama, ma faamalie loto ia e oo mai i le fua faape- lepele o le laau. Ia tāmāu o outou mata ma loto ia faatotonugalemu i le Faaola o Iesu Keriso, ma le olioli faavavau lea e na o Ia e oo mai ai.

O le Faatuatua o Jason Hall

Ia Iuni, na ma auai atu ai ma lo'u toalua, o Kathy i le faalelauasiga o



E pei ona tatou aoaoina uma, e oo lava ina ua uma ona tofo i le fua faapelepele o le talalelei toefuataiina, o le tumau moni ma le faamaoni i le Alii o Iesu Keriso e le faigofie ona faia.



Jason Hall. I le taimi o lona maliu, ua 48 ona tausaga ma na auauna atu o se peresitene o le korama a toaina.

O upu nei a Jason e uiga i se mea na tupu na suia ai lona olaga:

“[I le 15 tausaga sa] ou i ai i se faa-lavelave a o puna mau. . . . Na [gau] lo’u ua ma pe [lo’u tino] mai le fatafata agai i lalo. Na pe atoa lava o’u vae ma se vaega o o’u lima. Sa le mafai ona ou toe savali, tu, . . . pe fafaga a’u lava. Sa tau le mafai ona ou manava pe tautala.”¹⁴

“Tama pe [o i le Lagi],’ ou te aioi atu, ‘pe mafai lava ona [faaoga] na’o o’u lima, ou te iloa e mafai ona ou tauli-maina [lenei tofotofoga]. Faamolemole, Tama, faamolemole. . . .

“... ‘Tuu pea o’u vae, Tama; na’o le faaogaina lava o o’u lima o loo ou [tatalo atu ai].’”¹⁵

E lei mafai lava e Jason ona faaoga ona lima. E mafai ona e lagona leo mai le fale tele ma le ateatea? “Jason Hall, e le o mafai ona faafofoga mai le Atua i au tatalo! Afai o le Atua o se Atua alofa, aisea ua Ia tuua ai oe faapea? Aisea e faatuatua ai ia Keriso? Na lagona e Jason Hall o latou leo ae e lei faalogo ia i latou. Nai lo lona na ‘ai o ia i le fua o le laau. Na amata ona mausali lona faa-tuatua ia Iesu Keriso. Na ia faauu mai le iunivesite ma faaipoipo atu ia Kolette Coleman i le malumalu, ma faamatalaina o ia o le pele toatasi o lona olaga.¹⁶ Ina ua mavae le 16 tausaga talu ona faaipoipo, na fanau mai se isi vavega, o lo la atalii pele o, Coleman.

Na faapefea ona latou faatupuina lo latou faatuatua? Na faamatalaina e Kolette: “Sa ma faatuatua i le fuafuaga

a le Atua. Ma na aumaia ia i maua le faamoemoe. Sa ma iloa o le a [i ai se aso i le lumanai] o le a atoatoa ai Jason. . . . Sa ma iloa na saunia e le Atua mo i tatou se Faaola, o Lana taulaga togiaola ua mafai ai ona tatou taulai atu ai pea i luma pe a tatou fia faavaivai.”¹⁷

I le lauga ai i le maliu o Jason, na fai mai ai Coleman e 10 tausaga le matua na aoao o ia e lona tama “ua [i ai] i le Tama Faalelagi se fuafuaga mo i tatou, o le a matagofie le olaga faalelagi, ma e mafai ona tatou ola i ni aiga. . . . Ae . . . e tataua ona tatou feagai ma mea faigata ma o le a tatou faia ni mea sese.”

Sa faaauau pea Coleman: “Na auina mai e le Tama Faalelagi Lona Alo, o Iesu, i le lalolagi. O Lana galuega o le atoatoa. Ia faamalolo tagata. Ia alofa

atu ia i latou. Ona mafatia lea mo o tatou tiga, faanoanoaga, ma agasala uma. Ona Ia maliu lea mo i tatou.” Ona faaopoopo mai lea e Coleman, “Ona sa Ia faia lenei mea, e silafia e Iesu o’u lagona i le taimi nei.”

“Tolu aso talu ona maliu Iesu, na Ia . . . toe soifua mai, ma Lona tino ua atoa-toa. E taua lenei mea ia te a’u aua ou te iloa . . . o le a atoatoa le tino o lo’u [tama] ma o le a matou faatasia o se aiga.”

Na faaiuina e Coleman faapea: “O po uma talu mai ona ou pepe, e fai mai lo’u tama ia te a’u, ‘E alofa Tama ia te oe, e alofa le Tama Faalelagi ia te oe, ma o oe o se tama lelei.’”¹⁸

E Oo Mai le Olioli Ona o Iesu Keriso.

Na faamatala e Peresitene Russell M. Nelson le mafuaaga e lagona ai e le aiga o Hall le olioli ma le faamoemoe. Sa Ia saunoa mai:

“O le olioli o tatou lagonaina e itiiti lava se mea e faatatau i tulaga o o tatou olaga a o mea uma o loo faatatau i le taulaiga o o tatou olaga.



Jason, Coleman, ma Kolette Hall

“Afai o le taulaiga o o tatou olaga e i le fuafuaga o le faaolataga a le Atua . . . ma ia Iesu Keriso ma Lana talalelei, e mafai ona tatou lagona le olioli e tusa lava po o a mea o tutupu—pe le o tutupu foi—i o tatou olaga. O le olioli e sau mai [ia te Ia] ma ona o Ia. O Ia o le puna o le olioli uma. . . .

“Afai tatou te vaai atu i le lalolagi . . . , tatou te le iloina lava le olioli. . . . O le [olioli] o se meaalofo e sau mai le taumafai ma le leai o se mafaufau i ai ia ola i se olaga amiotonu, e pei ona aoao mai e Iesu Keriso.”¹⁹

O Se Folafolaga a o E Toefoi Atu

Afai na leai sau fua o le laau o le ola mo sina taimi, faamolemole ia silafia o loo faaloaloa mai pea aao o le Faaola ia te oe. O loo Ia talotalo mai ma le alofa, “Salamo ma o mai ia te a’u.”²⁰ O Ana fua e tele ma e fua i vaitau uma. E le mafai ona faatauina i tupe, ma e leai lava se tasi e manao moni i ai ua teenaina.²¹

Afai e te manao e toe foi i le laau ma toe tofo i le fua, amata e ala i le tatalo atu i lou Tama Faalelagi. Talitonu ia Iesu Keriso ma le mana o Lana tau-laga togiola. Ou te folafofa atu ia te outou afai tou te vaavaai atu i le Faaola “i mafaufauga uma,”²² o le a toe avea ma oe le fua o le laau, suamalie i lau tofo, olioli i lou agaga, “o le [meaalofo] aupito silisili o meaalofo uma a le Atua.”²³

O le tolu vaiaso ua mavae, sa ou vaايا ai le faaaliga atoatoa o le olioli o le fua a le Faaola a o ma auai atu ma Kathy i le faapaiaga o le Malumalu o Lisbon Potukale. Na tatala upumoni o le talalelei toefuataiina i Potukale i le 1975 ina ua i ai le saolotoga o tapuaiga. O le toatele o Au Paia tamalii o e na muai tofo i le fua i le taimi na leai ai ni faapotopotoga, leai ni falelotu, ma e leai se malumalu e latalata nai lo le



1,000 maila (1,600 km) ua fiala faatasi ma i matou ona ua i ai nei fua taua o le laau i le maota o le Alii i Lisbon, Potukale. E maeu lo’u faamamaluina ma faaloalo i nei Au Paia o Aso e Gata Ai o e na faatumauina le tāmāu o o latou loto i le Faaola.

Na fetalai mai le Faaola, “O lē tumau ia te au, ma a’u ia te ia, o ia lava e fua tele mai; aua e le mafaia e outou ona fai o se mea e tasi pe a a’u le i ai.”²⁴

O le lauga atu i lenei taeao i tagata o le Ekalesia i le salafa o le lalolagi, na saunoa atu ai Peresitene Nelson, “O’u uso e ma tuafafine pele, o outou o ni faataitaiga ola o fua e maua mai i le mulimuli i aoaoga a Iesu Keriso.” Ona ia faapoopo mai lea, “Ou te faafetai atu ia te outou! Ou te alofa ia te outou!”²⁵

Matou te alolofa ia te oe, Peresitene Nelson.

O a’u o se molimau patino i le mana o faaaliga lea e taoto i luga o lo tatou Peresitene pele. O Ia o le perofeta a le Atua. E pei o Liae anamua, o loo talotalo mai Peresitene Russell M. Nelson ia i tatou ma tagata uma o le aiga o le Atua ia o mai ma ‘aai i le fua o le laau. Tau ina ia tatou maua le lotomaua-lalo ma le malosi e mulimuli ai i lana fautuaga.

Ou te molimau atu ma le lotomaua-lalo o Iesu Keriso o le Alo o le Atua. O Lona alofa, o Lona mana, ma Lona alofa tunoa e aumaia mea uma e faava-vau lona taua. Ou te molimau atu ai i le suafoa o Iesu Keriso, amene. ■

FAAMATALAGA

1. Mataio 7:16.
2. Mataio 7:17.
3. Ioane 4:36.
4. I le amataga o Ianuari 2007, a o sauni atu mo se lauga i le faigalotu a le Iunivesite o Polika Iaga o se sui o le Au Peresitene o Fitugafulu e tuuina atu i le aso 4 o Mati, 2007, sa ou fesili ia Elder David A. Bednar i mea na ia sauniaina mo lana lauga i le aso 4 Fepuari, 2007, i le aofia lava e tasi. Sa ou le mautonu ina ua tali mai o lana lauga e uiga i le piimau i le ai u’amea. O le igoa tonu lenei na ou filifilia mo la’u lauga. Ina ua uma ona fefaasoa’i a ma tusitusiga ma le isi, na ma iloa ai e ese a ma auala. O lana lauga, ua faaautuina “O Se Vaitafe o le Vai Ola,” na faamamafaina ai le ai uamea, po o le afofa a le Atua, ao aofia ai tusitusiga paia. O lana lauga, na faaautuina “O Se Faatanoa o le Vai Ola,” na faamamafa mai ai le ai uamea, po o le afofa a le Atua, e pei ona aofia ai i tusitusiga paia. I lana lauga sa ia fesili ai, “Pe o ta faitauina, suesucina, ma sailiina tusitusiga paia i se auala e mafai ai e i taua ona pipii mau i le ai uamea?” (speeches.byu.edu).

Ona, i le faatoa maea ai o le vaiaso talu ona maea la matou talanoaga ma Elder Bednar, ae tuuina atu loa e Peresitene Boyd K. Packer se lauga i se faigalotu a le



SAUNIA E PERESITENE RUSSELL M. NELSON

BYU ua faaautuina “O Le Miti a Liae ma Oe.” Sa faamamafa ai e Peresitene Packer le ai uamea o se faaaliga faaletagata lava ia ma musumusuga lea e sau ia i tatou e ala i le Agaga Paia. Sa ia saunoa mai: “Afai tou te pipiimau i le ai uamea, o le a mafai ona outou *lagona* le ala i luma faatasi ai ma le meaalofo o le Agaga Paia. . . . Uumau le ai uamea, ma aua lava nei faamamuluina. E ala i le mana o le Agaga Paia, e mafai ona e *lagonaina* lou auala i le olaga” (Jan. 16, 2007, speeches.byu.edu).

O lau mataupu, “Pipii Mau i Afioga a Perofeta,” ia Mati 2007 o le ai uamea ua suitulaga i afioga a perofeta soifua (Mar. 4, 2007, speeches.byu.edu).

O fesootaiga o nei lauga e tolu e le o se mea na faafuaveta ona tupu. Sa galue le aao o le Alii a o saunia e lauga e tolu le aofia lava lea e tasi, i le faailoaina o vaega e tolu o le ai uamea, po o le afioga a Atua: (1) o tusitusiga paia, po o afioga a perofeta anamua; (2) afioga a perofeta soifua; ma le (3) o le mana o le Agaga Paia. O se aafiaga faaleaoaoga taua mo au.

5. Tagai i le 1 Nifae 8:4–12.

6. 1 Nifae 11:25.

7. Ioane 3:16.

8. Tagai i le David A. Bednar, “Miti a Liae: Piimau Pea i le Ai Uamea,” *Liahona*, Oke. 2011, 32–37.

9. 1 Nifae 11:23.

10. 1 Nifae 8:28.

11. Tagai i le Boyd K. Packer, “O Le Miti a Liae ma Oe” faigalotu a le Iunivesite o Polika Iaga, Ian. 16, 2007), speeches.byu.edu.

12. Russell M. Nelson, “E Mafai Ona Tatou Faia ia Lelei Atu ma Ia Tatou Lelei Atu,” *Liahona*, Me 2019, 69.

13. 1 Nifae 8:33.

14. Stephen Jason Hall, “The Gift of Home,” *New Era*, Dec. 1994, 12.

15. Stephen Jason Hall, “Helping Hands,” *New Era*, Oct. 1995, 46, 47.

16. Tusi patino ia Elder Andersen mai ia Kolette Hall.

17. Tusi patino ia Elder Andersen mai ia Kolette Hall.

18. Lauga o le falelauasiga na saunia e Coleman Hall, faasoaina e Elder Andersen mai ia Kolette Hall.

19. Russell M. Nelson, “O Le Olioli ma le Ola ai Faaleagaga,” *Liahona*, Nov. 2016, 82, 84.

20. 3 Nifae 21:6.

21. Tagai i le 2 Nifae 26:25, 33.

22. Mataupu Faavae ma Feagaiga 6:36.

23. 1 Nifae 15:36.

24. Ioane 15:5.

25. Russell M. Nelson, “O Poloaiga Sili e Lua,” *Liahona*, Nov. 2019, 100.

Malelega Faaiu

O le agavaa faaletagata lava ia e manaomia ai se liua atoa o le mafaufau ma le loto ina ia avea atili e faapei o le Alii.

Ou uso e ma tuafafine pele, a o tatou oo mai ai i le faaiuga o lenei konafesi faasolopito, tatou te faafetai i le Alii mo le musuiaina o savali ma musika ua faagaetiaina ai i tatou. Ua tatou olioli moni lava i se tausamaaga faaleagaga.

Ua tatou iloa o le talalelei toefua-taiina a Iesu Keriso o le a aumaia le faamoemoe ma le olioli i tagata o le a faalogo ma usitai i Lana aoaoga faavae. Ua tatou iloa foi e mafai ona avea aiga taitasi ma se malutaga moni o le faatua-tua, lea e mafai ona i ai le filemu, alofa, ma afio ai le Agaga o le Alii.

O le mea moni, o le maataua silisili o le Toefuataiga o le malumalu paia. O ona sauniga ma feagaiga paia ua matua taua i le tapenaina o se nuu o ē ua saunia e faafeiloai le Faaola i Lona Afio Mai Faalua. O le taimi nei e 166 a tatou malumalu ua faapaiaina, ma isi o le a oo mai.

O le a faia se fale tatala a o lumanai ai le faapaiaiga o malumalu fou ma toefaa-fouina taitasi. E toatele uo e le o nisi o lo tatou faatuatuaga o le a auai i maimoaga o na malumalu ma o le a aoaoina se mea e uiga i faamanuiaga o malumalu. Ma o nisi o na tagata asiasi o le a uunaia ia iloa atili. O nisi o le a faia ni fesili faa-maoni pe faapefea ona latou agavaa mo faamanuiaga o le malumalu.

I le avea ai ma tagata o le Ekalesia, e manaomia ona tatou saunia e tali atu i a latou fesili. E mafai ona tatou faamalamalama atu o faamanuiaga o le malumalu e avanoa i soo se tasi ma i tagata uma o ē o le a saunia i latou lava. Ae a o lei mafai ona latou ulufale atu i se malumalu ua faapaiaina, e



manaomia ona latou agavaa. E finagalo le Alii i Ana fanau uma ia tofo i faamanuiaga e faavavau o loo maua i totonu o Lona malumalu. Ua Ia faatonuina mea e tatau ona faia e tagata taitoatasi e agavaa ai e ulufale atu i Lona maota paia.

O se nofoaga lelei mo i tatou e amata ai se avanoa faaleaoaoga faapena o le valaau ia gauai atu i upu ua vancina i fao o le malumalu: “E Paia i le Alii: O Le Maota o le Alii.” O le savali a Peresitene Henry B. Eyring i le asō ma le toatele o isi ua musuia i tatou ia paia atili. O malumalu taitasi o se nofoaga paia; o tagata taitoatasi e ulu atu i le malumalu e tauivi ia paia atili.

O tulaga manaomia uma e ulufale ai i le malumalu e fesootai i le paia o le tagata lava ia. Ina ia iloilo lena saunia, o tagata taitasi e manao e olioli i faamanuiaga o le malumalu o le a faia ni faatalanoaga se lua: muamua ma se epikopo, se fesoasoani o se epikopo, po o le peresitene o le paranesi; o le lona lua ma se peresitene o se siteki po o se misiona po o se tasi o ona fesoasoani. I na faatalanoaga, o le a fesiligia ai ni fesili.

O nisi o na fesili ua toefaafouina talu ai nei mo le manino atili. Ou te fia iloilo ina na fesili ma outou i le taimi nei:

1. E i ai sou faatuatua ma sau molimau i le Atua, le Tama Faavavau; o Lona Alo, o Iesu Keriso; ma le Agaga Paia?
2. E i ai sau molimau i le Togiola a Iesu Keriso ma Lana matafaioi i le avea ai ma ou Faaola ma Togiola?
3. E i ai sau molimau i le Toefuataiga o le talalelei a Iesu Keriso?
4. E te lagolagoina le Peresitene o Le Ekalesia a Iesu Keriso o le Au Paia o Aso e Gata Ai o le perofeta, tagatavaai, ma tali faaaliga ma ua na o ia lava le tagata i le lalolagi ua faatagaina e faaagaina ki uma o le perisitua?



E te lagolagoina ia sui o le Au Peresitene Sili ma le Korama a Apisetolo e Toasefululua o ni perofeta, tagatavaai, ma tali faaaliga?

E te lagolagoina isi Au Pulega Aoa ma taitai o le Ekalesia i le lotoifale?

5. Ua fetalai mai le Alii o mea uma e ao ona “faia i le mamā” i Ona luma (Mataupu Faavae ma Feagaiga 42:41).

O e tauivi mo le mamā atoa i ou mafaufauga ma amioga?

O e usiusitai i le tulafono o le ola mamā?

6. O e mulimuli i aoaoga a le Ekalesia a Iesu Keriso i au amioga faalilolilo ma amioga i nofoaga faite i tagata o lou aiga ma isi?
7. O e lagolagoina pe faalauiloa atu soo se aoaoga, o faiga masani, po o aoaoga faavae e feteenai ma aoaoga a Le Ekalesia a Iesu Keriso o le Au Paia o Aso e Gata Ai?
8. O e tauivi ia tausia le paia o le aso Sapati, i le aiga ma i le lotu; auai i au sauniga; saunia ma agavaa e taumafa i le faamanatuga; ma soifua i lou olaga ia ogatusa ma tulafono ma poloaiga o le talalelei?
9. O e tauivi ina ia faamaoni i mea uma e te faia?
10. Pe o oe o se tagata e totogi atoa le sefuluai?
11. O e malamalama ma usiusitai i le Upu o le Poto?
12. O i ai ni au matafaioi tautupe po o

nisi matafaioi i se toalua muamua po o le fanau?

Afai o le ioe, o e tausia i le taimi nei na matafaioi?

13. O e tausia feagaiga sa e osia i totonu o le malumalu, e aofia ai le laeiina o ofusa o le malumalu, e pei ona faatonuina ai i le faaeeaga paia?
14. O i ai ni agasala ogaoga i lou olaga o manaomia ona foiaina ma taitai perisitua o se vaega o lou salamo?
15. Pe e te manatu ua e agavaa e te ulu atu i le maota o le Alii ma auai i sauniga o le malumalu?

O taeao, o le a tufatufa atu ai nei fesili ua toefaafouina o pepa faataga o le malumalu i taitai o le Ekalesia i le lalolagi atoa.

E faapoopo atu i lo latou taliina o na fesili ma le faamaoni, ua malamalama lelei e laeiina e tagata matutua taitoatasi ua ulu atu i le malumalu le ofusa paia o le perisitua i lalo ifo o lavalava masani. O le faatusa lena o se tautinoga i le loto e tauivi i aso taitasi ia avea atili e faapei o le Alii. Ua faamanatu mai ai foi ia i tatou ia tumau faamaoni i aso taitasi i feagaiga e osia ma ia savavali i luga o le ala o feagaiga i aso taitasi i se ala maua atu ma paia atu.

Ia, mo sina taimi lava, ou te fia talanoa atu ai i le tatou autalavou. Matou te uunaia outou ia agavaa mo pepa faataga o le malumalu e tapulaa le faaagaina. O le a fesiligia oe mo na

o fesili na e faatatau ia te outou i au sauniuniga mo sauniga o sui papatisoga ma faamauga. Matou te faafetai tele mo lo outou agavaa ma le naunautaiga e auai i lena galuega paia o le malumalu. Matou te faafetai atu!

O le agavaa faaletagata lava ia e ulu-fale atu ai i le maota o le Alii e manao-mia ai le tele o sauniuniga faaleagaga a le tagata lava ia. Ae faatasi ai ma le fesoasoaniga a le Alii, e leai se mea e faigata. I nisi tulaga, e faigofie atu le fausiaina o se malumalu nai lo le fausiaina o se nuu ia saunia mo se malumalu. O le agavaa faaletagata lava ia e manao-mia ai se liua atoa o le mafaufau ma le loto ina ia avea atili e faapei o le Alii, ia avea ma se tagatanuu faamaoni, ia avea ma se faataitaiga sili atu, ma ia avea ma se tagata paia atu.

Ou te molimau atu o se galuega sauniuni faapena e aumaia ni faamanuiaga lē mafaitaulia i lena olaga ma faamanuiaga e le o mafaufauina mo le olaga a sau, e aofia ai le faaauau pea o le iunite o lou aiga i le faavavau atoa “i se setete o le fiafia e le gata.”¹

Ia ou te fia liliu atu nei i se isi autu: fuafuaga mo le tausaga a sau. I le taimi o le tautotogo o le tausaga 2020, o le a atoa tonu i ai le 200 tausaga talu ona maua e Iosefa Samita le faaaliga ua tatou iloina o le Uluai Faaaliga. Na faaali mai ai le Atua le Tamā ma Lona Alo Pele, o Iesu Keriso, ia Iosefa, o se talavou e 14 tausaga le matua. O lena mea na tupu na faailogaina ai le amataga o le Toefuataiga o le talalelei a Iesu Keriso i lona atoaga, e pei ona muaita’u manino mai i le Tusi Paia.²

Ona oo mai ai lea o se soloaiga o asiasiga mai avefeau faalelagi, e aofia ai Moronae, Ioane le Papatiso, ma uluai Aposetolo o Peteru, Iakopo, ma Ioane. O isi na sosoo mai ai, e aofia ai Mose, Elia, ma Elaia. Sa toe aumai e i latou taitoatasi le pule paia e faamanuia ai le


fanau a le Atua i luga o le fogaeleele.

I se vavega, ua tatou maua foi le Tusi a Mamona: O Se Tasi Molimau ia Iesu Keriso, o se soa o tusitusiga paia i le Tusi Paia. O faaaliga ua lolomiina i le Mataupu Faavae ma Feagaiga ma le Penina Tau Tele ua matua faamau-oaina ai lo tatou malamalama e uiga i poloaiga a le Atua ma le upumoni e faavavau.

O ki ma tofi o le perisitua ua toefuataiina mai, e aofia ai tofi o le Aposetolo, Fitugafulu, peteriaka, faitaulaga sili, toecaina, epikopo, ositaulaga, aoao, ma le tiakono. Ma o tamaitai o e alolofa i le Alii e auauna atu ma le totoa i le Aualofa, Peraimeri, Tamaitai Talavou, Aoga Sa, ma isi valaauga o le Ekalesia —o vaega taua uma ia o le Toefuataiga o le talalelei a Iesu Keriso i lona atoaga.

O lea, o le tausaga 2020 o le a atofaina e faamanatu ai le 200 tausaga. O le Konafesi Aoao ia Aperila a sau o le a ese mai soo se konafesi ua maea. I le isi ono masina e sosoo ai, ou te faamoemoe o le a saunia tagata uma ma aiga uma mo se konafesi tulagaese o le a faamanatu ai faavae tonu o le talalelei toefuataiina.

Atonu e te manao e amata au tape-naga e ala i le toe faitauina o le tala a Iosefa Samita o le Uluai Faaaliga e pei ona tusia i le Penina Tautele. O le tatou kosi suesue mo le tausaga fou i le *Sau*, *Mulimuli mai ia te Au* o le Tusi a Mamona. Atonu e te manao e mafaufau loloto i fesili taua e pei o le, “O le a faapefea ona ese lo’u olaga pe afai e aveese faafuasei lo’u malamalama na maua mai le Tusi a Mamona?” po o le “Na faapefea e taualumaga ia na sosoo mai ma le Uluai Faaaliga ona faia se eeseesega mo a’u ma e pele ia te a’u?” Ma le isi, faatasi ai ma vitio o le Tusi a Mamona ia ua maua nei, atonu e te manao e faaafua ai i au suesuega faaletagata lava ia ma faaleaiga.



Filifili au oe lava fesili. Mamanuina lau oe lava fuafuaga. Faatofu oe lava ia i le malamalama mamalu o le Toefuataiga. A e faia, o le konafesi aoao ia Aperila a sau o le a le gata e manatua pea; ae o le a le galo lava.

I le faaiuga, ou te tuua outou i lo’u alofa ma a’u faamanuiaga ina ia fiafia atili outou taitoatasi ma paia atu i aso taitasi. A o le taimi lena, faamolemole ia mautinoa o loo faaauau pea faaaliga i totonu o le Ekalesia ma o le a faaauau pea i lalo o le taitaiga a le Alii seia oo ina “faataunuu faamoemoega o le Atua, ma fetalai ai le Ieova Silisili ua maea le galuega.”³

Ou te faamanuia ai ia te outou, ma toefaamautu atu lo’u alofa mo outou, faatasi ma la’u molimau o loo soifua le Atua! O Iesu o le Keriso! O Lana Ekalesia lena ma o i tatou o Lona nuu. I le sua fa paia o Iesu Keriso, amene. ■

FAAMATALAGA

1. Mosaea 2:41.
2. Tagai i le Isaia 2:2; 29; Esekiele 37:15–20, 26–28; Tanielu 2:44; Amosa 3:7; Galuega 3:21; Efeso 1:10; Faaaliga 14:6.
3. *Aoaoga a Peresitene o le Ekalesia: Iosefa Samita* (2007), 151.

Toe Faafouina Fesili o Pepa Faataga ma Isi Talafou o Malumalu

O le toe faafouga o fesili o le faatalanoaga o pepa faataga o le malumalu na fofogaina mai e Peresitene Russell M. Nelson i le taimi o le konafesi aoao o Oketopa 2019 (tagai i le itulau 121). E tumau pea tulaga faatonuina o malumalu, ae o nisi o fesili ua toe faaupuina ina ia manino atili. Ua tataua ona maua e taitai talafeagai o le Ekalesia se tusi a le Au Peresitene Sili na tusia i le aso 6 Oketopa, 2019, lea e aofia ai fesili ua toe faafouina.

Na fofogaina mai foi e Peresitene Nelson ni fuafuaga mo ni malumalu fou se valu (tagai i le itulau 79). O malumalu fou o le a i ai i Freetown, Sierra Leone; Port Moresby, Papua Niu Kini; Bentonville, Arkansas, ISA; Bacolod, Filipaina; McAllen, Texas, ISA; Cobán, Kuatemala; ma Orem ma Taylorsville, Iuta, ISA.

Talu mai le konafesi aoao ia Aperila 2019, ua uma ona faapaiaina malumalu i Kinshasha, Temokarasi Ripapelika

o Congo; Lisbon, Potukale; Port-au-Prince, Haiti; ma Fortaleza, Pasila; ma le toe faapaiaina i Oakland, Kalefonia, ISA; Memphis, Tennessee, ISA; Frankfurt, Siamani; Oklahoma City, Okalahoma, ISA; ma Raleigh, North Carolina, ISA.

Sa suatiaina le eleele mo malumalu i Yigo, Guam; Praia, Cabo Verde; San Juan, Puerto Rico; Lima, Peru (Los Olivos); ma o Belém, Pasila, ma nofoaga sa filifilia mo malumalu i Aukilani, Niu Sila, ma Layton ma Saratoga Springs, Iuta, ISA.

Sa faia ni fuafuaga faalauaitele mo le toe faafouina o le Malumalu o Sate Leki, lea o le a tapunia ia Tesema ma toe tatala i le 2024, ma le malumalu o St. George Iuta, lea e tapunia ia Novema 2019 ma o le a toe tatalaina i le 2022. ■

Mo nisi faamatalaga e uiga i malumalu, alu i le [temples.ChurchofJesusChrist.org](https://www.temple.ChurchofJesusChrist.org).

Fetuunai e le Ekalesia Aiaiga Faavae mo le Molimauina o Sauniga

I se fonotaga a taitai o le konafesi aoao, lea na maua ai e le Au Pulega Aoao ma Taitai Aoao o le Ekalesia ni faatonuga mai le Au Peresitene Sili, sa fofogaina ai e Peresitene Russell M. Nelson ni fetuunaiga faagasologa i aiaiga a le Ekalesia e tusa ai ma po o ai e mafai ona avea ma molimau i papatisoga ma faamauga.

O se tusi a le Au Peresitene Sili na tusia i le aso 2 o Oketopa, 2019, o loo auiliili ai ia fetuunaiga:

“Pe a valaaulia ai e pule faamalumalu:

1. “Soo se tagata o le ekalesia o loo umiaina se pepa faataga o le malumalu o loo aoga, e aofia ai se pepa faataga e tapulaa le aoga, e mafai ona auauna atu o se molimau i se papatisoga sui.
2. “Soo se tagata ua maua faaeega paia o loo i ai se pepa faataga o le malumalu o loo aoga e mafai ona auauna atu o se molimau i se faamauga mo ē o soifua po o se faamauga sui.
3. “Soo se tagata o le Ekalesia ua papatisoina, e aofia ai tamaiti ma le autalavou, e mafai ona avea ma se molimau i le papatisoga o se tagata o soifua.” ■



Mai le agavale: Malumalu o Fortaleza Pasila, Malumalu o Lisbon Potukale, Malumalu o Kinshasha Temokarasi Ripapelika o Congo, ma le Malumalu o Port-au-Prince Haiti

Ua Faalauiloa Atu e Taitai le Taumafaiga Fou mo Tamaiti ma le Autalavou

O le a faatinoina le [polokalama a] Tamaiti ma le Autalavou ia Ianuari 2020 e fesoasoani ai i tagata talavou e mulimuli i le Faaola a o latou tuputupu ae faaleagaga, faaleaga-fesootai, faaletino, ma faaleatamai. Mo saunoaga i leni mekasini lea o loo talanoaina ai [le polokalama a] Tamaiti ma le Autalavou, tagai i itulau e 40 ma le 53.

“Ua oo mai le taimi mo se auala fou, ua mamanuina e fesoasoani ai i tamaiti ma le autalavou o nei aso i le lalolagi atoa,” na saunoa ai Peresitene Russell M. Nelson i se faasalalauga faapitoa i le aso 29 Setema, 2019.

“Nai lo le tuuina atu ia te outou o le tele o tofiga faapitoa,” na ia saunoa atu ai i tamaiti ma le autalavou, “ua matou valaauliaina outou ia fefautuaai faatasi ma le Alii i auala e mafai ai ona outou tuputupu ae i se ala paleni. O le a tauia ma malie, ae o le a alu ai foi se taumafaiga i lau vaega. O le a manaomia ona e saili atu i faaaliga patino. O le a manaomia ona e filifili mo oe lava pe faapefea ona e faatinoina. O nisi taimi e ono uunaia oe e le Agaga e fai ni mea faigata. Ou te manatu ua e mafaia le lu’i. E mafai ona e faia ni mea faigata.”

Na saunoa mai foi Peresitene Nelson o loo i ai i matua se matafaioi taua e faatino. “Faamolemole ia fausia ni sootaga malolosi ma au tamaiti ma le autalavou,” na ia saunoa mai ai. “E mafai ona fesoasoani atu taitai i le lotu, peitai o au fanau nei. E leai se tasi e mafai ona faia se faatosinaga sili atu i lo latou manuina nai lo oe. Tuu atu ia i latou le alofa, faamalosiaga, ma fautuaga, ae ia tetee atu i le faaososoga o le faia o filifiliga mo i latou. O le a silisili mea latou te faia pe a latou faatinoina lo latou lava faitalia.

“O leni fautuaga e faatatau foi i o tatou taitai ma faiaoga lelei o tamaiti ma le autalavou,” na faaauau mai ai Peresitene Nelson. “E manaomia ona tatou tuu atu i le autalavou e taitai, aemaise lava i latou ua valaauina ma vaetofiaina e auauna atu i au peresitene o vasega ma korama. O le a faamatuu atu ia i latou le pule o le perisitua. O le a latou aoao i le auala e maua ai musumusuga i le taitaiga o a latou vasega po o korama.”

I lea lava aoaoga, na folasia mai ai e Peresitene M. Russell Ballard, o le Sui

Peresitene o le Korama a Aposetolo e Toasefululua, le faaaliga vaaia mo Tamaiti ma le Autalavou: ina ia “faamalosi le faatuatua o le tupulaga faiae ia Iesu Keriso, ma fesoasoani i tamaiti, autalavou, ma o latou aiga e agai i luma i le ala o feagaiga a o latou faafetaiaia luitau o le olaga.”¹ Na ia saunoa mai “o le fesoasoani atu i tamaiti ma le autalavou ia maua se molimau ia Iesu Keriso o le a faamanuiaina ai i latou ma i tatou uma i o tatou olaga atoa.

Ina ua uma ona auai le autalavou i le faasalalauga i se gaoioiga e faailoa



ai le faaaogaina o le *Taiala Tōmua mo Tamaiti ma le Autalavou*, na saunoa mai Peresitene Ballard: “Ua na o le amataga leni. I le asō, faatoa matou amata i leni gaoioiga. O se mea leni o le a faia pea i o outou aiga ma a o outou galulue faatasi ai. Matou te valaaulia outou ina ia faaaau le gaoioiga. . . . Matua, faamolemole faaaau leni gaoioiga i le fale.” Sa ia faamamafa mai e faapea “o le polokalama leni e faatotonugalemu i le aiga, ma lagolagoina e le Ekalesia” ma “e aofia faatasi ai aiga i leni polokalama. O le mea lena o le a maoae tele ai.”

I le tele o eria i le lalolagi, sa maua foi e matua ma taitai a latou lava taiala tomua. O isi eria o le a mafai ona faaliliuina le [polokalama a] Tamaiti ma

le Autalavou i a latou lava gagana i se taimi mulimuli ane i le 2020.

O le aoaoina o le talalelei, auaunaga ma gaoioiga, ma le atinaega patino (e aofia ai le setiina ma le ausiaina o sini) o vaega autu ia o le [polokalama a] Tamaiti ma le Autalavou, ma e tatau ona taitai le autalavou i le fuafuaina. E saili e tamaiti ma le autalavou ni faaaliga faaletagata lava ia a o latou agai atu i luma o le ala o feagaiga, ma le lagolago mai le aiga, taitai, ma isi. Sa taua e Peresitene Ballard e faapea o [le polokalama a] Tamaiti ma le Autalavou o se taumafaiga i le lalolagi atoa ma o le mea lea e mafetuutuunai ai i le “nofoaga e te nofo ai ma ou tulaga faaleaiga.”

O le a tuuina atu ni faamatalaga ma ni punaoa faaopoopo i le faasalalauga o le Talanoaga Faafesagai mo tamaiti ma le autalavou i le aso 17 o Novema, 2019, faatasi ai ma Elder Gerrit W. Gong o le Korama a Aposetolo e Toasefululua. O tamaiti ma le autalavou e atoa le tai 8 i le 18 tausaga i le aluga o le 2020, o o latou matua, ma taitai o Tamaitai Talavou, fautua o le Perisitua Arona, ma taitai o le Peraimeri e valaaulia ina ia auai. Auina mai au fesili e uiga i le polokalama a Tamaiti ma le Autalavou ia Elder Gong i le **facetoface.ChurchofJesusChrist.org**. A uma le gaoioiga tuusao, lea o le a faasalalauina i gagana e 18, o le a teuina le vitio ina ia mafai ona faasalalauina pe siiina mai i soo se taimi. ■

Tagai i le **ChildrenandYouth.ChurchofJesusChrist.org** faapea foi ma le **ChildrenandYouthLeaders.ChurchofJesusChrist.org** mo nisi faamatalaga, e aofia ai faamatalaga e uiga i taualumaga o le Talanoaga Faafesagai.

FAAMATALAGA

1. *Tamaiti ma le Autalavou o Le Ekalesia a Iesu Keriso o le Au Paia o Aso e Gata Ai: O Se Taiala Tōmua mo Matua ma Taitai* (2019), 1.



E Lagolagoina e Konafesi a le MMA Polokalama a Tamaiti ma le Autalavou

O se vaega o taumafaiga a le Ekalesia e tuu faatasia ona polokalama mo tamaiti ma le autalavou i le lalolagi atoa, e amata i le 2020, o le a lagolago ai e siteki i le lunaite Setete ma Kanata ni konafesi e tai lua tausaga ma fai Mo le Malosi o le Autalavou (MMA).

O konafesi a le MMA na faia i fafo atu o le lunaite Setete ma Kanata mo le silia ma le sefulu tausaga ma o le a faaaau pea e pei ona i ai i aso ua mavae.

O le a tuuina atu ni faamatalaga faaopoopo i le taimi o le Talanoaga Faafesagai i le aso 17 Novema, 2019. ■



Taulai Atu Suiga o le Faalapotopotoga i le Faamalolosia o le Autalavou

I le avea ai ma se vaega o le taumafaiga ina ia mafai atili ai e le autalavou o le Ekalesia ona ausia o latou gafatia paia, o lea na fofogaina mai ai ni fetuunaiga i faalapotopotoga a Alii Talavou ma Tamaitai Talavou i le konafesi aoao ia Oketopa 2019 e Peresitene Russell M. Nelson (tagai i le itulau 38) ma faamalalama mai e Elder Quentin L. Cook o le Korama a Aposetolo e Toasefululua (tagai i le itulau 40) faatasi ai ma Sister Bonnie H. Cordon, o le Peresitene Aoao o Tamaitai Talavou (tagai i le itulau 67).

O nei suiga ua faamamafa mai ai le “tiutetauave muamua ma le sili ona taua [a le epikopo] o le tausia lea o alii talavou ma tamaitai talavou o lana uarota,” na saunoa ai Peresitene Nelson. O suiga e aofia ai le faamutaina o au peresitene o Alii Talavou a uarota. O le au epikopo, i le avea ai ma au peresitene o le Perisitua Arona, o le a fesoasoani atu i ai ia faufautua o korama ma i nisi o tulaga o ni tagata faapitoa. O le a lipoti sao atu le peresitene o Tamaitai Talavou o le uarota i le epikopo.

O au peresitene o korama ma vasega o le a taulai atu i le galuega o le faaolagataga, e aofia ai galuega faamisiona a le au paia, faatumauina o tagata liliu mai, faatoagaina mai, galuega o le malumalu ma talafaasolopito o aiga, ma le aoaoina atu o le talalelei. O peresitene o le korama ma vasega a le autalavou e fuafuaina ma taitaiina ia sauniga i Aso Sa, galuega fesoasoani, ma isi gaioioiga.

O gaioioiga mo le autalavou e le toe ta’ua o le “Mutuale” ae e mafai ona ta’ua o “gaioioiga a Tamaitai Talavou,” “gaioioiga a le korama a le Perisitua

Arona,” po o “gaioioiga a le autalavou.” O le paketi alauni mo gaioioiga a le autalavou e tatau ona vaevaeina i ni vaega tutusa, e fua i le aofai o le autalavou i faalapotopotoga taitasi.

Ua uma ona toe faafouina le autalavou a tamaitai talavou, ma e tatau ona faatulaga le aofaiga o vasega a tamaitai talavou e tusa ai ma le aofai ma manaoga o tamaitai talavou. O vasega o le a faaigoaina o “Tamaitai Talavou,” sosoo ai ma tausaga o i latou o loo i le vasega, e pei o “Tamaitai Talavou 12 – 14,” pe na o “Tamaitai Talavou” pe afai e potopoto faatasi uma. O igoa o le “Ofagapi,” “Maea Meite,” ma le “Lora” o le a le toe faaigoaina.

O se tasi o fautua maua luga a le siteki o le a avea ma peresitene o Alii Talavou a le siteki, ma o le au peresitene o Alii Talavou ma Tamaitai Talavou a le siteki e galulue i le komiti a le Perisitua Arona–Tamaitai Talavou, o le fautua maua luga e tofia i Tamaitai Talavou, ma le fautua maua luga e tofia i le Peraimeri.

O isi suiga, o le a ta’ua le Aualofoa, Tamaitai Talavou, Alii Talavou, Peraimeri, ma le Aoga Sa o ni “faalapotopotoga” nai lo “ausilali” ma o taitai o le a ta’ua o ni “Taitai Aoao” i le tulaga o le Ekalesia i le lalolagi atoa a’o “taitai o siteki” ma “taitai o uarota” i le tulaga faalelotoifale. ■



O Auala e Fa e Sauniuni ai mo Aperila 2020

O le tausaga 2020 o le a faailoga ai le 200 tausaga o le Uluai Faaliga, lea na tupu i le tautotogo o le 1820. E tusa ai la, na fofogaina mai e Peresitene Russell M. Nelson, o le konafesi a sau i le masina o Aperila, “o le a faamanatuina ai faavae tonu o le talalelei toefuataiina” (tagai i le itulau e 122).

Sa ia uunaia tagata uma ma aiga ina ia saunia mo lenei “konafesi tulaga ese” ma fautuaina mai ni auala talafeagai e faia ai:

1. Toe faitau i le tala a Iosefa Samita o le uluai faaaliga.
2. A o e suesue i le *Sau, Mulimuli Mai ia te Au* i le 2020, mafaufau loloto i fesili e uiga i le malamalama ma faamanuiaga na mauaina ona o le Tusi a Mamona.
3. Mafaufau e faaoga ia vitio fou o le Tusi a Mamona i suesuega a tagata taitoatasi ma faaleaiga.
4. Filifili ni au lava fesili ma mananu lau lava fuafuaga e “faatofu ai oe lava i le malamalama mamalu o le Toefuataiga.”

“A’o e faia,” na saunoa mai ai Peresitene Nelson, “o le konafesi aoao ia Aperila a sau o le a le gata e manatua pea, ae o le a le galo lava.” ■

Mo nisi faamatalaga e uiga i sauniga a korama a toaina ma le Aualofa, tagai i le *Tusitaulima 2: Taitaiina o le Ekalesia*, 7.8.1, 9.4.1, ChurchofJesusChrist.org.

O fesili nei e mafai ona fesoasoani i faiaoga ao latou fuafua e faaaoga se savali o le konafesi aoao e aoao atu.

- [illegible]

Manatu mo Gaoioiga

E tele lava ni auala e fesoasoani atu ai i tagata e aoao mai savali o le konafesi aoao. O nisi nei o nai faataitaiga: atonu o i ai nisi au auala o le a sili ona aoga i lau korama po o le Aualofa.



- ***Talanoa i vaega.***

Vaevae tagata i ni vaega laiti, ma atofa atu i vaega taitasi ni vaega eseese o le savali o le konafesi e faitau ma talanoaina. Ona fai atu lea i vaega taitasi e faasoa mai se upumoni sa latou aoaoina. Pe e mafai foi ona e faatulagaina ni vaega mai tagata o e na suesue i isi vaega ma tuu atu ia i latou e faasoa atu i le tasi ma le isi mea sa latou aoaoina.

- ***Tali fesili.***

Valaaulia tagata e tali i fesili e pei o [fesili] nei e uiga i le savali o le konafesi: O a ni upumoni o le talalelei o tatou mauaina i lenei savali? E mafai faapefea ona tatou faaagaina nei upumoni? O a valaaulia ma faamanuiga na folafola mai na tuuina atu? O le a se mea o aoao mai e lenei savali ia i tatou e uiga i le galuega o loo finagalo le Atua tatou te faia?

- ***Faasoa atu upusii.***

Valaaulia tagata e faasoa atu ni upusii mai le savali o le konafesi lea na musuia i latou e faataunuu a latou tiutetauave i le galuega o le faaolataga. Uunaia i latou e mafaufau pe faapefea ona latou faasoa atu nei upusii e faamanuia ai se isi tagata, e aofia e pele ia i latou ma tagata latou te auauna atu i ai.

- ***Faasoa se lesona faitino.***

Ia muai valaaulia ni nai tagata e aumai ni mea faitino mai le fale e mafai ona latou faaagaina e aoao atu ai e uiga i le savali o le konafesi. I le fonotaga, fai atu i tagata e faamatala mai pe faapefea ona fesoatai na mea faitino i le savali.

- ***Saunia se lesona e aoao atu i le fale.***

Fai atu i tagata e galulue i ni paga e fuafua ai se lesona o le afiafi faaleaiga e faatatau i le savali o le konafesi. E mafai faapefea ona tatou faatatauina lenei savali i o tatou aiga? E mafai faapefea ona tatou faasoa atu lenei savali i tagata tatou te auauna atu i ai?

- ***Fetufaa'i atu mea na tutupu [ia te oe].***

Faitau faatasi nisi o faamatalaga mai le savali o le konafesi. Fai atu i tagata e faasoa mai ni faataitaiga mai tusitusiga paia ma mai i o latou olaga lea e faaalai ai pe faamalosi ai le aoaoga faavae lea na aoaoina i nei faamatalaga.

- ***Aoao e uiga i se mau.***

Valaaulia tagata e faitau se mau faasino i le savali o le konafesi. Fai atu ia i latou e talanoa i le auala e mafai ai ona fesoasoani ia aoaoga o loo i le savali latou te malamalama atili ai i le mau.

- ***Sue se tali.***

Ia muai fatuina ni nai fesili e mafai ona taliina e faaoga ai le savali o le konafesi. Ia taulai atu i fesili ia e uunaiaina le mafaufau loloto po o le faaagaina o mataupu faavae o le talalelei (tagai *Aoao Atu i le Ala a le Faaola*, 31-32). Ona tuu atu lea i tagata e filifili se fesili ona sue lea o tali i le savali. Valaaulia i latou e talanoa ia latou tali i ni vaega toalaite.

- ***Sue se fasifuaitau.***

Valaaulia tagata e saili i le savali o le konafesi, e vaa-vaa mo fuaitau lea e taua ia i latou. Fai atu ia i latou e faasoa mai ni fasifuaitau ma mea sa latou aoaoina mai i ai. E faapefea ona fesoasoani nei aoaoga ia i tatou e faataunuu ai le galuega a le Alii?

- ***Fatu se mea.***

Valaaulia tagata e fai se pepa lautele o i ai se savali po o se faailogatusi lea e aofia ai se faamatalaga musuia puupuu mai le savali o le konafesi. Tuu atu ia i latou se avanoa e faasoa atu ai se mea sa latou faia. ■



Keriso i le Ala i Ierusalem,
saunia e Michael Coleman

“O le maataua silisili o le Toefuataiga o le malumalu paia. O ona sauniga ma feagaiga paia ua matua taua i le tapenaina o se nuu o ē ua saunia e faafeiloai le Faalua i Lona Afo Faalua Mai. . . .
“ . . . O malumalu taitasi o se nofoaga paia; o tagata taitoatasi e ulu atu i le malumalu e tauivi ia paia atili.”

Peresitene Russell M. Nelson, “Malelega Faaiu,” 120, 121.



“O le tausaga 2020 o le a atofaina e faamanatu ai le 200 tausaga. O le konafesi aoao ia Aperila o le a sosoo ai o le a ese mai i soo se konafesi ua mavae, “sa saunoa ai Peresitene Russell M. Nelson i le taimi o le sauniga faaiu o le Konafesi Aoao Iona 189 faaleafatausaga a le Ekalesia. “I le isi ono masina e sosoo ai, ou te faamoemoe o le a saunia tagata uma ma aiga uma mo se konafesi tulagaese o le a faamanatu ai faavae tonu o le talalelei toefuataiina. . . .”

“ . . . A e faia, o le konafesi aoao ia Aperila a sau o le a le gata e manatua pea; ae o le a le galo lava.”

Mo ni manatu i le auala e saunia ai mo le konafesi aoao ia Aperila 2020, tagai i itulau e 122 ma le 126.